

# 张文端集

张英

文硕阁

wenshuoge.com

## 目录

|      |     |
|------|-----|
| 关于我们 | 4   |
| 提要   | 6   |
| 原序   | 7   |
| 卷一   | 8   |
| 卷二   | 23  |
| 卷三   | 44  |
| 卷四   | 69  |
| 卷五   | 80  |
| 卷六   | 88  |
| 卷七   | 96  |
| 卷八   | 107 |
| 卷九   | 113 |
| 卷十   | 121 |
| 卷十一  | 126 |
| 卷十二  | 132 |
| 卷十三  | 139 |
| 卷十四  | 150 |
| 卷十五  | 159 |
| 卷十六  | 168 |
| 卷十七  | 179 |
| 卷十八  | 186 |
| 卷十九  | 193 |
| 卷二十  | 202 |
| 卷二十一 | 207 |
| 卷二十二 | 213 |
| 卷二十三 | 220 |
| 卷二十四 | 227 |
| 卷二十五 | 236 |
| 卷二十六 | 240 |
| 卷二十七 | 244 |
| 卷二十八 | 250 |
| 卷二十九 | 259 |
| 卷三十  | 268 |
| 卷三十一 | 279 |
| 卷三十二 | 289 |
| 卷三十三 | 296 |

|      |       |     |
|------|-------|-----|
| 卷三十四 | ..... | 306 |
| 卷三十五 | ..... | 319 |
| 卷三十六 | ..... | 329 |
| 卷三十七 | ..... | 336 |
| 卷三十八 | ..... | 346 |
| 卷三十九 | ..... | 364 |
| 卷四十  | ..... | 386 |
| 卷四十一 | ..... | 393 |
| 卷四十二 | ..... | 401 |
| 卷四十三 | ..... | 409 |
| 卷四十四 | ..... | 420 |
| 卷四十五 | ..... | 427 |
| 卷四十六 | ..... | 434 |

# 版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

## 什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

## 传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

## 如何联系我们？

网站：[www.wenshuoge.com](http://www.wenshuoge.com)

邮箱：[7sbook@duck.com](mailto:7sbook@duck.com)



(扫码访问网站)



(扫码加客服微信)

# 提要

钦定四库全书 集部七

文端集 别集类六 【国朝】提要

臣等谨案文端集四十六卷

国朝张英撰英有易经衷论已着録此乃其诗文全集凡存诚堂应

制诗四卷存诚堂诗集二十五卷笃素堂诗集七

卷笃素堂文集十卷英遭际

昌辰仰蒙

圣祖仁皇帝擢侍

讲幄入直

禁廷簪笔雍容极儒臣之荣遇矢音赓唱篇什最多其间鼓吹昇平黼黻廊庙无不典雅和平至於言情赋景之作又多清微淡远抒写性灵台阁山林之二体英乃兼而有之其散体诸文称心而出不事粉饰虽未能直追古人而原本经术词旨温厚亦无忝於作者焉乾隆四十六年五月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

# 原序

## 文端集原序

余自束髮学为诗今自顺治己亥年以迨於康熙壬申约略凡三十四年存其诗若干首为二十五卷自幼至老多好言山林农圃耕凿之事即与人赠荅往来游历之所至亦不能离乎此迨年五十以後山林之思益迫引退之思愈急每不憚其言之重复而恒苦出於不自觉殆欧阳子所谓年益加老病益加衰而其心渐迫其言愈多者欤余自弱冠即抱此志每见才隲之士著作非不多当其言廊庙则志耽轩冕言山林则志耽邱壑一卷之中忽而慕夔龙忽而慕巢许乍浓而乍淡倏近而倏远情随境迁心与物移令人读之而茫然不知其志之所在夫诗以言志虽中更出处进退而无中变其志之事洵如此则其诗可知矣则其人可知矣余诗譌鄙固多重复而自少至老止言其志之所在而无暇计论工拙聊可以免於读其诗不知其志之所在云尔敢云望古人堂奥哉既又辑癸酉以後诗以年月为次序为笃素堂诗若干卷康熙甲申年三月望日双溪英自序

# 卷一

钦定四库全书

文端集卷一

大学士张英撰

存诚堂应

制诗集一

讲筵应

制诗五十二首

耕藉礼成恭纪四首

东郊淑景转和风  
種稯朝来献六宫  
禹甸三千开穡事  
姬年八百肇农功  
云依鸾辂金根外  
春满龙旗黛耜中  
自古惟陈无逸训  
君王亲与万方同

其二

乘时秉耒践尧封  
九扈齐飞拥

六龙陇畔授鞭京兆尹  
坛边进耜大司农  
青旗千亩公卿集  
縹轭三推父老从  
俭德由来兼孝德  
迎神此日撤歌钟

其三

协风遥迓

翠华新正是农祥  
应律辰粟荐神仓

亲享

帝



恩流御廩重勤民祀农坛畔三时庆观藉台边万宝陈华黍登歌书大有遍将劳酒  
赐诸臣

其四

十载

恩波遍海隅苍生比屋戴涵濡淮扬水旱频

颁粟丰沛巡行数

赐租

帝力久知歌父老

圣躬犹欲试泥涂叠逢盛事书惇史还进豳风七月图

【颁粟 赐租皆比年实政】

扈

跸南苑恭纪应

制二首

和风丽日象昭回游豫欢呼动九垓旌影过时千骑拥钟声迎处

六龙来青郊地接滹沱迴平野天连碣石开

圣主时巡因驻驂侍臣欣得到蓬莱

其二

川融山霭迓

鸾舆树里星罗尽直庐万马踏云开

御道干官近日护

宸居平原旷衍初游猎

行殿深严尚说书扈从属车蒙

授简抽毫作赋魏相如

南苑

讲筵恭纪应

制四首

行宫清閼晓垂裳棐几先陈

黼座傍

圣主勤民兼讲诵儒生报国藉文章乍含鸡舌瞻天表近傍龙鳞识

御香况是王阶崇俭德图书道已接羲皇

其二

细旃广厦集簪裾正是甘泉避暑初阁启还英朝进讲筵开崇政早陈书柳风细拂炉烟外莺  
啭稀闻昼漏余喜见孝经通卫士诵声常听满星庐

其三

圣主崇文轶古今缥囊随

辇入华林春秋不辍符天健寒暑无分见

帝心千树周庐青入座五云垂盖结成阴虞廷蓂莢初开遍好迓薰风鼓舜琴

其四

藜光三载

禁庭陰此日传呼入

上林作赋忽承

君命重读书久荷

圣恩深欣逢

盛代明良会敢负平生啓沃心最是臣愚如草木欢腾亦自解讴吟

南苑扈从讲武恭纪二首

时平讲武近岐阳甲冑蒐春出建章洛水旌旗周甫草西京词赋汉长杨

御围云气成龙虎天廡星精本驪驪画戟雕弓森羽卫射生羣与奉

君王

其二

畿南地旷接滹沱

宸辔来游淑景和马散平原春草緑幕连芳树晚烟多云边影疾讲鹰落柳外风鸣猎骑过日暮天清西岭出居庸层嶂远嵯峨

赐樱桃恭纪

讲筵人退五云端分得含桃出

禁闌荐

庙祗因先百果承

恩旧许赐千官锦林初傍宫云摘翠笼犹沾晓露漙饱食盈筐叨

圣泽火珠光映水晶盘

又次同官史鹤龄韵

朱櫻历落藹春融总在琼霄雨露中万颗衬来新叶碧满筐擎出

上林红最宜果熟明光殿未许莺衔长乐宫

赐食更余筠笼带诸雏咸沐

圣恩同

赐白樱桃恭纪

朱果频经

赐上方忽看素质满瑶筐堆从玉盃初难识浮向银盘但有香鸟未敢衔疑雪片冰堪相映总  
珠光水晶帘下初擎出风味宜含晓露尝

赐鱼兔恭纪

红耳霜毛碧草眠

御河春水锦鳞鲜嘉鱼尽入珊瑚网灵兽争迎白玉鞭山泽搜来游猎後

恩波分自

御筵前还同门下沾

膏泽偕咏中林在藻篇【时被 赐者惟内阁翰林】

南苑

大阅恭纪十二韵【御试】

翠辇乘时驻翠微六军讲武近南畿礼嫺蒐狩遵王制梦叶熊罴合

御围七校腾骧夸虎旅三驱指顾视龙旗弓弯明月垂金勒人度春风动铁衣铠甲光疑林雪  
满骅骝色鬬岭云飞普天雷动钲声出卷地风鸣猎骑归翡翠旌麾翻晓日珊瑚鞭影入斜晖  
玉盘晚进黄羊熟金弹新开白兔肥盛代丰岐皆宿将清时颇牧在彤闱选徒自昔闻蒐乘治  
外当今赋采薇常藉羽干昭

圣德还将戈楯耀

天威儒臣载笔慙讴颂纬武经文历代稀

瀛台

赐宴赏荷恭纪应

制二十韵

西苑良辰当盛夏烟波太液晓苍苍云开翠巘连长乐水涨明湖接建章飞阁千寻凌古木画楼一半出疎杨芳洲掩映黄金幄碧涧滢洄白玉堂几处轩窗波上下万重烟树水中央湖边曲磴通瑶岛天际长虹卧石梁观稼亭幽藏浦溆迎薰殿敞俯沧浪花浓水榭春光晚柳拂鱼矶午梦凉【西苑有观稼亭藏舟浦迎薰殿水云榭钓鱼矶】凤舸隔林声欵乃鸾旗拂树影悠扬芙蕖发处龙池丽菡萏花时凤沼香翠盖翻风擎夜雨红衣浥露艳朝阳常垂并蒂迎芳辇时有微芬逐彩航太华由来开玉井西园自昔种银塘争如此地涵波泽得奉余懽入景光不向越溪迎画楫岂同楚客泛罗裳灵池广集鱼龙戏酺宴分沾鴈鹭行羣卉独标君子号千官留赏

圣人傍太平盛事镂银瓮游讌诗篇媿锦囊此日随车过辇路频年珥笔侍岩廊小臣拜献甘泉赋愿逐鳬鹭捧御觞

试马歌应

制【癸丑七月上驻蹕南苑试马王公以下八旗三品官以上出良马万余骑上御晾鹰台阅之树旌旗为驰道自大红门齐发奔驰五十余里先至台下者四十余骑赐银帛有差臣英及臣在丰奉命扈从欣观其盛各赋长歌翼日讲筵进呈】

天闲万马嘶新秋碧草无际黄云流清晓

翠华驻南苑下

诏明日观骅骝晾鹰台畔平芜绿房星中夜光可烛金羁玉勒珊瑚鞭云锦千羣丽朝旭

国家马政前代稀刍秣蕃息过秦非玉关葱岭久通道渥洼异产今来归

圣人神武六龙御黄金幄敞频回顾王公将相各呈奇赤骝紫燕纷无数平沙夹道旌旗开千骑远自红门来经过长杨历甫草势如电激声如雷诚哉天马称汗血红尘不动影先絶骠骑蹀躞看流云照夜奔腾类飞雪中有龙种何踟蹰神闲先到高台边超羣致远有余力五花蹴地真连钱须臾数马复奔逸飞黄骊襄皆奇质前冈影动方微茫转盼人前鸟同疾

圣人顾此

天顏怡三千駉牝皆权奇就中四十更雄特吴绫蜀锦优賚之

国家典礼有深意恐有盐车困骐驎便是金台市骏心伯乐一顾空幽冀小臣何幸从驰驱欲  
写神骏增踌躇试马由来寄军政拜手秋原赞

庙谟

南苑纪事诗十首应

制

岂如汉武驻离宫讵与唐宗避暑同

圣主观书朝启阁炉烟不断雨声中

其二

月当银汉漏声迟东阁深严近

御墀

宸翰九重天上至云牋亲写早朝诗

其三

鸾旗羽箭逐轻风猎罢西山落日红云外玉骢归帐殿九天铙吹晚霞中

其四

秋郊白兔逐黄尘碧草丛中远避人

天子御围亲射得猎回宣

勅赐诸臣

其五

嘉鱼出水锦鳞红中使擎来正晚风自愧小臣叨侍从得沾两度

圣恩隆

其六

宸心亲切念词臣  
怜尔清曹薄宦人  
讲罢退归龙尾道  
重教宣进

赐温纶

其七

试马台高

御苑东六军动地  
满旗风书生愧乏  
长杨笔歛段行随  
万马中

其八

西山遥接

帝城端屏列芙蓉  
翠色寒最是新秋  
微雨後万峰如在  
苑中看

其九

今年秋色禁云边  
马散郊原日暮天  
翠幕高张平野濶  
冰轮正对

直庐悬

其十

单衣短袖趁新凉  
羽箭雕弓最擅长  
才见乌号明月满  
霜翎早已着垂杨

纪

恩恭赋二首【臣英同臣在丰扈从南苑入夜值大风雨上在行宫谓侍臣曰两翰林恐油幕未具得无有沾湿之苦时已漏尽三鼓命中使至学士传达礼帐中传谕移於五店皇庄安宿学士回奏臣已为二人料理何敢烦圣虑时英等已就枕次日学士传上谕因恭赋诗进呈】

秋郊云雾暗空蒙  
静夜摊书烛影红

圣主慈仁深念及  
小臣风雨

直庐中

其二

草湿烟深夜漏迟特传

温谕出

龙墀顿忘帐外秋声急身在

尧天雨露时

德寿寺【进讲毕

上谓翰林学士传达礼日南苑中有玉皇阁德壽寺二人曾游览否傳回奏此 禁地非奉  
命不敢入因 命同臣英及臣在丰往观各成五七言排律 进呈】

宝刹流金碧弘开

御苑东梵钟连

禁柳精舍傍

宸枫贝阙悬金镜丹楹架彩虹香云幽径满花雨上林红碧草生经室青莲隐佛宫瑶堦看竦  
峙宝鼎独玲珑翡翠含云气雕镂夺化工铎声如转漏殿影欲凌空诂是禅居丽皆因

帝力雄庄严金粟地常在五云中【有宝鼎顺治年制】

玉皇阁

高阁平临北极开仙居璀璨似蓬莱晴光远映琉璃瓦紫气遥连白玉台宝顶浮空芳树里红  
墙落影碧云隈殿名元极诸神护座比圜丘五帝陪金翠摇光迎日月帘栊拂地隐风雷山河  
图画

深宫赐纓络幡幢

内府裁云满雕梁疑乍落龙蟠绣柱欲飞来玉缸灯火辉长昼古鼎炉烟接上台秘殿万灵真  
肃穆丰碑双影更崔嵬映堦綠树斋宫满夹路秋花道院栽地近上林多气色居隣三岛絕尘  
埃闲人未敢窥青鸟幽径常看长碧苔望气由来知壮丽承



恩今始得徘徊蓬壶胜事欣游赏媿乏灵光作赋才

赋良马应

制二首【十月臣英同臣在丰扈蹕南苑上在行宫方张灯伸纸作大书中夜传翰林侍读学士喇沙里至前问曰两翰林此时作何事对曰方在直庐读书上曰可令两人各赋良马诗学士请良马状上曰此不必论古人以骥骥比君子所谓骥不称其力称其德也因恭赋二律次日讲书毕进呈】

天闲龙种本星精一片桃花万里行金勒乍衔疑电绕玉鞭初动觉云生远随日驭过青海遥逐霞光度赤城幸傍

銮舆称上驷调良独擅渥洼名

其二

顾影天街灿锦鞵骅骝得傍

圣人前华山归马修文日冀野登台市骏年芳草每衔仙仗里红泉常饮

禁云边从来骥骥如君子伯乐欣逢与共传

康熙十二年十月十二日

特赐讲官紫貂白金文绮时同

赐者学士熊赐履侍读学士杨正中杜臻陈廷敬侍讲孙在丰编修叶方蔼史鹤龄【臣】英八人

霜华晓日映龙楼

讲幄帘开

玉殿头

温语九天传凤诏轻寒十月

赐貂裘颁从

御府香云绕衣傍炉烟紫气浮冰雪顿忘皆

圣泽阳春偏荷

主恩优

其二

清班日侍

禁庭陰温饱无求本素心珥笔方慙縻重禄承

恩况复赐南金九龄曾上千秋监蘊古还陈大宝箴自媿涓埃全未答但镂银管效讴吟

其三

紫殿披香带晓开青缣

内府出新裁山龙幸际垂裳盛缝掖慙无濯锦才宫绣缤纷云外卷天章璀璨日边来愿将俯  
念诸臣意衣被苍生遍九垓

扈从南苑蒙

赐直庐饮饌恭纪二首【先是上于讲筵谕学士传达礼曰翰林官清苦巡行扈从所以备顾问  
资讲劝也无令艰于资装嗣後帐幙饮食焉匹器具皆令给于内府永着为令】

侍从晨趋

御苑东直庐

特赐傍

行宫顿忘野色风霜急真觉

皇仁覆载同卷幔正逢明月满摊书相对夜灯红儒生何幸分帷幄常在鸾旗豹尾中

其二

丹地年年愧素餐躬承

渥泽海天寬侍

朝每得分仙僊扈

跽还教领大官

賜粟恩光沾玉粒调兰香气出金盘每从退食公门後覆餗常忧欲报难

宸翰篇【康熙十六年丁巳三月敬觀 御笔临苏轼大字一轴因恭赋斯篇】

圣主宵旦劳万几未央晓漏观垂衣燕闲即入图书室瑶函锦轴生光辉

亲洒宸翰大如斗擘窠旧蹟皆?嶙遥将标格掩鍾王近看矩薺又卑顏柳宝墨淋漓书敬天高署

经帙黼座前小臣侍从来深殿仰窥素壁生云烟尝思圣学何渊邃落笔濡毫有深意直将钦若接勲华妙义能涵十六字清和三月正春融瑶堦永日移铜龙集贤学士承

恩渥手捧

天书出九重偶尔临摹写苏轼结构纵横具神力凤翥鸾翔迴异姿银钩铁画真雄特遥想

深宫昼漏分

御炉香霭正氤氲翡翠笔牀凝晓露琉璃砚匣起春云东坡寥落黄州句流传千载还遭遇楚泽孤臣吮笔时岂知今日

龙顏顾由来

御笔重琳琅飞白当年写玉堂唐宗賜札传三杰汉祖頒书美十行今日侍臣亲拜

賜弘璧天球良不啻小臣幸在

直庐前芸香盥手频窥视

天藻缤纷自卷舒珊瑚色映

御图书日星流曜垂丹地奎壁分光照石渠学士频年典文翰拜手紫庭賡复旦什袭藏之亿万  
万年天际遥遥配云汉

康熙十六年五月三十日蒙赐

御笔楷书清慎勤三大字草书格物二大字石刻及赵

孟頫所书不自弃文石刻恭纪四章

承

恩陪侍

禁垣边

御墨封题自

讲筵共仰奎章超百代欣看

宸翰洒中天波翻笔底虬龙出云涌毫端日月悬自媿小臣叨

赐渥光华紵纓颂尧年

其二

琳琅宝翰重南金拜

赐还知意独深常愿普天沾

圣泽特将如水励臣心守身当似持双璧爱日偏宜惜寸陰飞白漫夸题玉署恭承三语即官箴

其三

墨池遥接晋唐风苍劲雄奇夺化功古法传来章草在贞珉勒就石经同只因道与千秋合不独书兼八体工更向挥毫窥

圣学精微囊括片言中

其四

龙章拜手赐龙墀更捧新成

御府碑价比兰亭初勒石书传松雪旧临池缥緗尚有王孙蹟翰墨还邀

圣主知敢向

熙朝甘自弃昔贤遗训是良规

六月五日

特召【臣】英至

懋勤殿

上讲中庸及太极西铭之学并命【臣】英敷陈经书大义

复

亲洒宸翰书忠孝存诚大字二幅以

赐【臣】不胜荣幸恭赋八首

雨余晴日映花瓢今古图书

黼座前紫阁昼长帘影静一编澄对

御炉烟

其二

洙泗微言日讨论远从尧舜接心源

虚怀不厌咨询切好问何殊辟四门【亲讲中庸舜其大知一章】

其二

遐考图畴邈浑蒙近推濂洛振宗风仰窥

圣学无涯际愿颂高深海岳同【亲讲太极西铭之学】

其四

雅颂由来被管弦先王风教在遗编睢麟八百基王化敬诵周南第一篇  
【命臣英讲毛诗首章】

其五

迎凉殿里拂华牋满贮端溪宝墨鲜亲见

君王挥玉管承

恩拜赐

御牀前

其六

擘窠惊见笔如轮落纸云烟若有神篆籀书能兼八法纵横势可勒千钧

其七

存诚精义贯天人忠孝良规勗子臣敬佩

王言如学海敷天万类荷

陶甄

其八

宝篆朱浓墨未乾棒持暮出

禁云端数承汪濊

恩施重益愧愚蒙报荅难

文端集卷一

## 卷二

钦定四库全书

文端集卷二

大学士张英撰

存诚堂应

制诗集二

内庭应

制诗一百首

懋勤殿盆中古梅一株双?花分红白恭赋应

制

上苑羣葩未放时春风先已到

彤墀交柯碧树参差影双萼琪花冷艳姿野质乍惊仙阁暖岁寒深赖

主恩知

天阶雨露宽如许日送微香点砚池

天府宝翰篇

康熙十六年十二月二十一日蒙

赐观

内府所藏王羲之怀素顔真卿蔡襄苏轼黄庭坚米黻朱熹赵孟頫及董其昌真蹟共十六轴  
宋初搨淳化阁帖臣不胜欣幸恭赋斯篇

秘阁西头古锦囊时时宝鸭薰天香雕函什袭虬龙抱玉匣标题翡翠装

君王清燕常留翫不宝珠玕宝书翰往代名笺色尚莹千秋遗墨光犹灿学书无过王右军天门凤阙迴无羣萧疎内景神仙字娟秀曹江孝女文【昔人谓右军书黄庭经飘逸有神仙之槩曹娥碑婉顺有孝女之仪今内景经曹娥碑真蹟皆存内府】怀素上人笔如铁漏痕钗脚皆奇絶藤影盘时鹤欲栖剑鎗舞处蛟堪截平原雄劲若有神内制犹存宝篆新【顔真卿书朱巨川诰勅有唐宋玺】晋唐墨迹人间少由来一字堪千缙端明学士黄州客作字还如画奇石山谷偏余潇洒姿南宫独创欵?格骨气苍严数晦翁偶然藻翰皆能工始信真儒自淹贯临池原不比雕虫子昂难得兰亭意江左宗风犹未坠近代华亭说剑篇落笔轻圆饶逸致【周文矩画说劒图董其昌书说劒篇】阁帖初年搨本奇玉堂手记拜恩时【宋毕士安为学士淳化初年赐此帖士安自跋于後】澄心旧纸廷珪墨海内流传第一碑古人真蹟良难遇一片精英凝尺素鸿宝常腾奎壁光灵物从来鬼神护

圣主典学开承明旁搜文翰佐昇平譬彼珍奇贡川岳沐日浴月光华生累朝墨妙藏

天府

圣情如历琼瑶圃温室临摹敲硯冰风亭展对飞檐雨侍从词臣许纵看惊心骇目夸雄观泰山俯视皆云气沧海平临尽紫澜先教拂拭青玉案捧持须用蔷薇盥书家今得见山陰如遡河源入星汉再拜稽首

恩无疆晴窗寓目神飞扬天球河图世世宝上与景庆同辉光

雪中直

南书房恭纪六首

腊尽春前雪正宜天街飘洒晚烟时如霜渐满黄金瓦似絮浓沾白玉墀

其二

凝辉积素影蹁跹

宸藻新题五色牋今日

圣情偏豫悦普天来岁是丰年

其三

琼林万树鬪芳菲瑶岛诸峰隐翠微



上苑光辉开辇路

六龙行处六花飞

其四

水晶帘卷雪漫漫坐拥图书向晚看新露研朱还校閱亲拈玉管不知寒

其五

炉烟暖散墨池水满苑瑶华夜色澄秘阁小臣沾圣泽梅花香里读书灯

其六

平明走马石桥头银海光摇碧殿浮雪後晓寒都不觉尚方新

赐翠云裘

除夕

养心殿侍

宴应

制

深殿宵沈宝炬然岁除欣侍五云边步随仙仗陪鵷鹭坐近

天香听管弦柏叶分行传玉琰椒花送暖入琼筵渐知温律阳春早拜手

君恩又一年

元日

养心殿侍

宴应

制

暖日和风漾凤城履端清  
讌在承明楼前晴雪消金掌  
玊上春星转玉衡三殿班聯  
同愷乐万方歌舞祝昇平欣  
沾元日

恩辉早听奏钧天第一声

上元

赐宴恭纪

龙墀春早至凤历月初圆  
紫阁银花丽天街玉镜悬  
笙歌连绮陌宴赏入华年  
令节叨

恩重调兰出

御筵

养心殿看鳌山灯恭赋

琉璃宵映藥珠宫绛蜡分  
行皎月同山似蓬莱移海上  
人疑鸾鹤戏云中当筵自舞  
呈天巧弄影无心夺化功漫  
说鱼龙夸往代神奇不数偃  
师工

其二

彩山灯灿若流霞

黼席高张倚碧纱万壑烟  
云千树月一楼箫管四时花  
青骢解向平桥转画舫能随  
石?斜此夕看从深殿里奇  
观何异泛仙槎

恭覩

御制诗十章敬赋四首

睿词天藻日光辉手捧

鸾书在

禁闱献赋侍臣慙珥笔賡歌

圣帝正垂衣

其二

万几暇日偶怡情玉韵金声震八紘  
函盖古今谁得似海涛千顷日华生

其三

岂羨唐宗吟爽气漫夸汉武赋秋风  
九霄明月千峰雪尽入

君王藻翰中

其四

五字高吟岂漫然还同六义与流传  
崇高在德真天语不是寻常月露篇  
【圣制有崇高原在德壮丽岂为威之句】

南书房盆中白梅盛作花恭赋

一树梅从

上苑移频劳中使护重帷花迎暖日香侵席  
人对春风雪满枝疎影夜添烧烛後清芬朝扑卷  
帘时野桥絶磴寻常见几到

君王白玉墀

月下出自西掖

太液波涵

禁苑西

君恩分与一枝栖长堤路指红墙近古殿  
陰连碧树低晓度石桥看马迹晚随金钥听乌啼  
慙无经术酬知遇高阁空然照夜藜

恭赋

孝昭皇后挽诗四首

华阙鍾祥久椒涂叶瑞宜六宫型

后德万国仰

坤仪地坼珠沈日天惊月坠时敬扬彤管盛冀慰紫宸思

其二

徽音腾桂苑

宝册正瑶宫练服先羣御宵衣佐

圣躬荐馨

宗庙肃视膳

寝门同一白云輶杳凄凄玉殿风

其三

懿恭标壺则雍肃范人伦家国沾淳化

宫闱洽至仁禕衣新耀彩宝镜忽承尘

圣主频挥泪哀思感侍臣

其四

素纛移郊甸孤城寝殿开悲看丹旆过泣送宝衣来执紼千官拥随车万姓哀小臣垂涕日作  
谏愧非才闰三月二十一日五台山新贡天花至

特颁手勅分赐恭赋应

制

灵岳珍蔬贡尚方欣从

紫禁沐

恩光清芬远带山岚色鲜洁犹含石髓香

圣藻温纶深雨露仙厨异味重琳琅同时宠赉成佳事千祺流辉照玉堂

闰三月二十二日蒙赐

上所御凉帽鞵袜及罗紵表里恭赋

六年讲席慙无补自天

锡赉邀便蕃内织新裁称长短香罗绮紵随寒暄紫毳丰貂白狐腋严风积雪资奇温身着  
赐衣拜

天子一时光彩生庭轩补袞何能赞

文治书绅常恐孤

殊恩服之不衷古所诫寸心感惕恒自扞顾瞻已足耀蓬户况乃推解劳

至尊华冠曾经服

元首明珠的烁如瑶琨黼黻裁成锦蔽膝赤芾金舄奚足论

颁自尚衣最亲切龙香缭绕今常存书生微躬焉敢近空怀慙汗惊心魂锦箱珍重黄封密留  
与贫家示子孙世祖皇帝御书正大光明大字

今上御制题跋勒石告成蒙

恩赐观恭纪

圣祖宸章日月昭传心精义接唐尧典谟四字垂千古藻翰重华见

两朝如覩挥毫临墨沼欣看勒石炳丹青吾

君孝德兼文德作述同光万祺遥

四月十七日

赐观盆植人蓂赋此时同说岩阮亭澹人近公

椶树陰中荷锄寻孤茎五叶翠云深由来灵草生丰沛喜见移根到

上林

四月二十六日蒙

赐新贡龙井天池珍茗二瓶恭纪四首

春山雷英緑参差驿使南来贡

御时千片月团天上味清芬先许侍臣知

其二

瑞草荣

颁向直庐捧持惊喜拜

恩初锦函自启窥新緑不觉兰香满石渠

其三

披云和露出层峦雀舌名芽欲购难家住江南浑未识得分珍味在长安

其四

晚窗自煮石泉清静听松风第一声喜沐

君恩分玉液不将仙露美金茎

四月二十八日蒙

赐高丽人蓂一函恭赋

紫团名重旧

神京【紫团参名东坡有紫团参诗】琼液金枝色最莹山泽常看云气护海天朝映日华生  
俯怜弱质宜仙草

特赐灵芽荷

圣情时饫甘香同湛露胜含鸡舌在西清

恭和

圣制喜雨诗

灵雨东来满

帝城和烟沾洒

玉阶轻卷帘笑指云生处稼穡深蒙

圣主情

五月初八日

赐五台山新贡香菌恭赋二首

包贡西来入

九重石英遥自白云封

君恩分得名山味身到清凉第一峰

其二

香菌离奇细石纹紫芝瑶草鬪清芬祇因野性甘藜藿最爱山蔬带水云

恭和

御制郊外偶作

郊圻一道莺花晚禾黍千村雨露深不独诗情穷物态由来

睿藻叶天心

恭和

御制夜静读书

御牀缭绕一帘香午夜观书烛影长

圣度此时天际满遥同明月照要荒

恭和

御制郊外即事

风过凉生树云来雨濯枝三农耕稼苦常藉

豫游知

恭和

御制复道口占

晚凉游上苑扶辇见园官为报榴花艳红侵碧玉阑恩赐紫禁城骑马恭赋二首

诏许垂鞭入

禁林天街蹀躞紫云深书生自愧弩骀力难报孙阳感遇心

其二

珥笔承

恩禁掖西晓听宫漏夜乌啼从兹芳草长楸道青琐沈沈送马蹄

四月十八日蒙赐

御笔临苏轼诗一卷草书唐诗二幅恭赋二首

君王清燕侍臣知  
裴几常临白玉墀  
披卷爱当明月夜  
挥毫多在晚凉时  
湘帘香绕书千帙  
春殿云生墨一池  
地近九霄饶雨露  
名牋新

赐曲江诗【御笔书唐诗有曲江烟柳之句】



其二

坡仙楷法今犹在草圣新题墨未乾秀色松筠千岭上奇姿鸾鹤五云端臣叨

宝翰重颁渥人比瑶光一见难自幸此身依日月拂牋常奉万年欢

侍从登景山恭赋六首

追随登陟翠微峰马首云生石上松俯视万家图画里祇因身得近

飞龙

其二

上苑平芜校射宜雕弓羽箭晚凉时

圣人神武真天授命中争夸百步奇

其三

初从

清蹕虎城来猛兽珍禽总异材不独熊罴同渭水还看麋鹿似灵台

其四

漫夸绣岭长杨馆岂羨甘泉五柞宫身到华林最深处蓬莱指点绛云中

其五

古槐垂地晚陰疎雨过凉生满玉除遥隔珠帘窥紫阁君王亲玩总图书

其六

羽卫羣趋进玉鞭书生分跨紫连钱

君恩欲试驰驱力揽辔常教近

御前

恭觀

御制夏日登景山诗敬赋二首

载笔随车陟阊风小臣词句愧雕虫

皇情欢豫抒天藻气盖山河百二中 【御制诗中有翰林随辇进词章之句】

其二

碧落云生夕照西千山送雨晚烟低微材欣际赓扬盛名姓惊看入

御题

五月十五日黑龙潭扈

跸恭纪

俯瞰龙湫碧瓦亭中涵云气比沧溟一泓澄润浮文藻万叠苍山列画屏喜雨曾经

宸翰赐祈年常见

翠华停今从

清跸时巡处禾黍临风夹道青

碧云寺扈

跸恭纪

衆峰环翠与云平胜地幽奇惬

圣情石路陰陰笼树色僧房处处听泉声

行宫朝对灵巘敞

御榻宵移竹院清

睿赏坐来吟咏久隔林山月晚凉生

扈

躋至法海寺瞻仰

世祖皇帝御筆敬佛大字石碣奉

勅恭紀

岩壑蒼深佛寺宜

先皇曾駐翠雲旗鼎湖弓劍存遺蹟山殿松筠覆古碑千載

宸章看勒石

兩朝家學重臨池

聖心瞻眺停輿衛指點香台下馬時

石景山扈

躋恭紀

羽衛連朝作勝游還從石景駐鳴驄懸岩飛閣松陰合古洞藏經蘚壁幽遠樹平臨開冀野羣峰西繞送河流六龍更渡橫橋外萬壑遙看紫氣浮【駕度潭河英病不能從遂留石景】

和龍湫壁上韻應

制

碧澗穿雲落閑階曲曲流

聖情怡皎潔

仙躋助清幽片石涼宜夏空山響帶秋名泉經

睿藻敷澤滿

皇州

题卧佛寺殿前大树应

制

古树参云佛阁前

圣心留赏拂华棧夕阳恰在香林外一片清陰落御筵

盘磴应

制【洪光寺有盘磴九折柏陰蔽日】

古柏陰中石磴盘如虹迢遞跨层峦

翠华回历烟霄外山半红云驻马看

奉

勅题赠圣感寺僧海岫【僧以苦行受知因赐名圣感寺】

碧水莲花清淨身香台施食道心真荒山布衲安禅处戒律精严感

圣人

恭覩

御制游览诸诗敬赋

帐殿瑶函载锦棧登临处处有诗篇朝吟丽句龙骧拥夜落仙毫宝炬然瑞彩常教笼古寺翰  
香分赐与流泉小臣忝附清尘外时听南风入五弦

扈

跸西山至南苑纪事诗四十首

野色苍茫隔柳堤名山多在

帝城西青郊缓引黄金勒白马轻翻碧玉蹄【初出西直门茂林曲径最为幽胜】

其二

遥望飞尘一綫轻平郊历历引双旌

皇情最爱田畴好万骑传呼逐队行 【上谕卫士勿践民田令鱼贯单行】

其三

击壤歌衢乐自如不教鸡犬避

乘輿山僧出定闲披衲野老来看勸倚锄 【寺僧不扰观者不令回避】

其四

四民独苦是耘耔

君相同心軫念时不待豳风歌七月

圣人亲制悯农诗 【御制问大学士及侍卫等幸黑龙潭途中诗念农民暑中荷锄之苦】

其五

古潭石碣藓痕斑常迓

銮輿到碧山只为蛟龙留窟宅能将霖雨遍人间 【扈跸幸黑龙潭】

其六

盘纡峻岭白云封今日新看

幸六龙指顾河山襟带里鸾旗遥驻最高峰 【自黑龙潭度岭至五华阁】

其七

萧萧野寺入云根径转峰回始到门石色溪声如太古闲花幽草似仙源 【从广泉寺至卧佛寺溪山最幽】

其八

陰崖尽日掩芳丛退谷亭幽曲径通单骑不教传警蹕山泉声绕玉花骢【退谷曲径清流与御骢相绕】

其九

干云秀色比祗林斑驳莓苔岁月深嘉树幸邀

天子顾教依玉几咏清陰【上亲制卧佛寺大树诗命臣英臣士奇于御前同咏】

其十

霁顏不觉堂廉远軫念恒如父子亲马首备闻

天语切本朝家法重臣邻【上于马上顾大学士及臣英等论君臣一体之谊】

其十一

激湍

书就字如椽笔底萧萧响润泉莫讶小臣还气索涂鸦敢向墨池前

【上于龙湫亭书激湍二大字落笔天然命臣英书听泉臣士奇书枕流臣等仰瞻御笔在前不能措手】

其十二

满地松陰碧涧流昔年曾宿寺西楼书生仍是看山客得扈

君王万乘游【碧云寺忆旧游】

其十三

骅骝岂独美腾骧德冠金台选骏場试落雕鞍浑不觉始知天驥重调良

【上所乘骏马最良左右试之屹然不动命从臣驻观亦称驥以德之意也】

其十四

圣主寻幽载笔随常披苍蘚看残碑几年

翠輦曾游处犹记山亭壁上诗【龙湫亭及来青轩壁上诗有佳者上曾游处犹记忆之】

其十五

御书苍劲迥无俦悬向千峰最上头奎曜常同云汉丽日华高映海天秋【来青轩瞻御笔恭纪】

其十六

空蒙云气生虚壁远近岚光入小亭几度凭阑看不厌山容野色总青冥【来青轩高敞最宜远眺】

其十七

古洞嶙峋飞阁绕侍臣登蹑藉垂藤

鸣銮偶憩青莲社敝衲常怜白髮僧【上幸宝珠洞御制诗赐僧海岫并命臣英等作诗赠之】

其十八

揽胜歌风同过沛时巡观俗陋横汾千村郢屋瞻龙气万幕平郊散马羣【石景山驻蹕卫士皆罗布山下】

其十九

凭虚高阁俯松端千顷平畴入望寛山色自青云自白河流苍莽古桑乾【石景山晚眺】

其二十

灵境无如潭柘杳幽栖真见古瞿昙慙无济胜登临具咫尺名山不易探  
【上幸戒坛潭柘念臣英偶病艰于登陟  
命暂留石景山昔许询善登山人谓其有济胜之其臣愧不能也】

其二十一

岩壑纡回入渺茫鸟啼花落总天香浑河西畔山逾秀福地珠林纪晋唐【戒坛潭柘山更幽奇佛刹乃晋唐之遗】

其二十二

翠竹烟梢碧玉姿傍崖临水綠差池

皇心珍重凌霜节题作簣箒第一枝【潭柘有竹最茂御制诗咏之】

其二十三

深山民俗自羲皇妇子提携

輶路傍岂是房陵朱仲李也同芹曝献

君王【时道傍村民有献鲜李者上笑而容之】

其二十四

宝翰偏宜洞壑藏山光云影入

天章一经洗笔溪头水清涧常流

御墨香【西山诸胜地上皆有题咏】

其二十五

天闲晚向柳陰开铁骝花骢尽上材牵向

御前都记忆何年贡自渥洼来【上幸南苑閱马御厩良马甚多一一记其所贡之人】

其二十六

凉风习习卷龙旗碧草丛中兽正肥

亲挽琯弓频射得千声虎拜颂

天威【南苑合围上亲射每发必中】

其二十七

豹尾龙骧若布綦放麕传语六军知书生新扈长杨猎亲见

皇仁解网时【合围时凡不成禽者命开一面放之】



其二十八

聪慧天潢少有名九龄初入

御围行自乘果下随

龙驭万骑从中学射生【时有郡王九龄随围骑射】

其二十九

上林回绕是清渠北渡平桥映碧虚

圣泽常同灵沼乐柳风生处看游鱼【上临流看鱼】

其三十

落照西山猎骑催长风驾雨自东来玉鞭动处云随马十里离宫顷刻回【猎回遇风雨】

其三十一

宫使频看驿骑催遥从长乐问

安回宝弓

亲射林中鹿为进

慈宁御饌来【上亲射鹿进太皇太后】

其三十二

昔扈行宫入

讲筵陈诗献赋绿槐边今看

黼座牙籤处得奉

恩波已六年【上驻蹕南苑犹日御讲筵臣英思初承命进讲正在离宫今已六年】

其三十三

殿角钟鸣佛寺幽重来金地几经秋薰风两度过兰若总是

君恩许赐游【臣于康熙十二年五月曾过德壽寺今得再往皆奉 命许游】

其三十四

灵境招提御柳边紫金炉制本天然细看翡翠龙纹里犹记

先皇铸鼎年【德壽寺有宝鼎乃世祖时所铸工巧异常】

其三十五

横空十里阵如云

御盖飘摇指六军喜见驹虞

王泽盛马前麋鹿自成羣【南苑禽兽蕃息真见驹虞之盛】

其三十六

偶临曲水翫沦漪宛转溪流碧草湄隔岸游鳞随手得英风汉武射蛟时【看射游鱼皆应手而得】

其三十七

六轡学调

天厩马一鞭遥傍属车尘慙无羽猎长杨笔为写军容奉

紫宸【扈从二臣皆命乘内厩马】

其三十八

敢言托乘比枚臯弩钝无能逐彩旄驻马松间频赐问

恩深时荷

圣衷劳【臣等未习驰驱蒙 上命近侍同行复时时 赐问眷顾?异】

其三十九

别殿长廊映绿苔槐铺深院晚蝉来

君恩常恐疲驱策

诏许行宫待猎回 【上常命臣英于行宫 驾】

其四十

天浆饱饫牙盘美仙馔常分玉箸偏此日猎回还拜赐恩教稚子共烹鲜 【回宫日  
赐臣英等饗一兔二】

文端集卷二

## 卷三

钦定四库全书

文端集卷三

大学士张英撰

存诚堂应

制诗集三

赐宣德宫扇恭纪二首

亭午曦车送祝融水壶静对碧纱中九鸾宫扇新承赐满袖凉生

玉殿风

其二

半面轻纨笼翠竹数行幽鸟点黄金新开宝篋沾恩渥犹带龙香出

禁林

夏日

上幸景山时【臣】英【臣】士奇扈从

御制诗一章七月十八日蒙

恩书赐恭赋五言八韵

翠绕三峰近荣陪八骏游海云连雉堞山雨入龙楼树色津门暗烟光碣石浮高吟

天藻发清景

御题留桂满金波日兰开玉殿秋

圣慈挥宝翰丽句写银钩盛事诚希遇

深恩岂易酬同分圭璧彩千古照沧洲

## 西洋贡师子歌

圣朝威德弥九垓海天万里梯航来远致珍奇罗阙下狻猊诡异非常材昔闻乌弋产神兽制  
兕搏象称渠魁照耀林麓日若电哮吼山谷声如雷往来长风生大壑巨石乔木皆崩摧虎豹  
慑服类狐兔熊罴翫视同婴孩修尾阔臆双耳帖形体图画堪弭灾中国此兽不恒见惟从载  
籍标奇佷忽覩入贡自絶域象胥九译相追陪浮舟西溟历南粤海波浩荡山崔嵬金锁长縻  
铁闲闭拳毛偃卧黄云堆何年却别条支路一朝奄至华林隈久服

## 王化气已驯

御园麋鹿忘惊猜蛮官呼名抚其鬣雅知人意常低徊越雉旅獒追盛事白麟赤雁同昭回在  
昔汉武好善马貳师远度西轮台穷年求得渥洼种登歌天庙夸龙媒曷若奇兽慕义至刚猛  
驯服如驾骀愿颂驹虞

## 王业盛载歌麟趾

## 帝紘恢

圣主虽不宝异物以兹昭德诚皇哉

## 八月六日於神武门观西洋进贡师子恭纪

灵囿秋光映碧岑狻猊新贡入华林日南声教车书远海外梯航岁月深白泽兽能言

主德越裳人本识天心承

恩许近瑶墀看昭代仁风珥笔吟

## 八月十八日蒙

## 赐观

## 圣制诗集恭纪五言十六韵

圣藻盈绡帙高吟碧殿清端居因感物几暇偶怡情字掩三辰丽词探六义精含毫当

紫闼结念在苍生瑞雪歌银瓮华星咏玉衡艰难怜荷锺辛苦忆从征句每

临轩得篇多

驻辇成烟霞邀盼赏岩壑记巡行气溢河山壮思翻海岳平规模凌雅颂律吕协韶箴宝树千寻直珠光万斛倾幸容依

黼席窃许听金声日映丹霄近奎悬碧汉明

赐观恩数重捧读寸心惊仙露臣同渥卿云

帝载赓愿偕芸阁侣常纪柏梁名

九月十日

上侍

太皇太后幸温泉恭纪五言八韵

慈颜康豫日

凤盖驻郊原华发

三朝贵彤闱万国尊含饴娱

寿母扶輦见

文孙红树迎丹幰青山入翠轩香泉浮露暖碧涧泻春温问俗前模重

承懽至性存菊黄当九月露湛满千村野老羣瞻望讴歌

两圣恩

十月二十四日蒙

恩自温泉颁赐野鸡恭纪二首

侍膳温泉馆霜天羽猎催

御围云外合宫使雪中回心傍华旗远

恩分锦翼来古人曾载贽耿介异凡材

其二

白草鞬鹰健寒原野雉肥遥从金弹落近绕玉鞭飞偕鹿登厨传随车入

禁闱文禽

颁侍从拜

赐有光辉

长至日

上躬祀

南郊恭纪五言十二韵

至日躔南极初阳纪仲冬绣裳添彩线玉管应黄钟庆典同函夏明禋掌秩宗斋宫香雾绕泰  
畤碧云封视版临深殿

亲郊出九重霜华迎

翠輦燿火照寒松登降闻

天语堂皇展

帝容瑶台

三后配黼帟百神从蚩栗燔柴犒星辰护烛龙祠官调宝瑟舞羽间金镛

一德符穹昊羣僚秉肃雝遥瞻苍璧荐共覩紫烟浓

恢复岳州奏捷恭纪五言十二韵

露布驰星驿

天戈取岳阳亲贤开壁垒

庙算出岩廊讨逆劳专阍稽诛尚陆梁困犹鱼在釜饥藉鼠为粮智勇

王师备綏戡武烈扬巢将焚燕雀险已失潇湘梦泽飞旌影兰江淬劒铓受降归铠甲列肆进  
壶浆凯奏春台日懽腾

黼座傍从兹清巨寇势若履康庄鲸浪平巫峡狼烟息鬼方六军铙吹入端拱靖炎荒

十二月二十五日蒙赐

御用貂裘一领恭纪二首

紫绮丰貂世所稀新裁岁岁拜

彤闱称身难荷

恩施重顾影深慙报荅微

圣泽频年忘雨雪天香满路美光辉归来检点裘裳看叠笥盈箱总

赐衣

其二

珥貂自昔重承明况复珍裘积累成如雪漫夸狐腋贵当风不数雉头轻日华朝映香云绕霜  
颖晴看紫雾生拜

赐何能酬渥泽

垂衣常愿祝昇平

十二月二十八日蒙

赐食品酒醴恭纪二首

紫陌晴云暖年华入岁除

恩衔宫使诏春满侍臣庐兰饌烹鲜日椒觞献腊初颁从霄汉上欢跃更谁如

其二



岁月

恩波里风光

禁籞中佳辰叨法膳备物愧愚衷荣逮宗祊远甘分稚子同尧厨天酒绿寒谷总春融

懋勤殿盆中古梅又值花时恭赋四首

秘阁寒香旧赋诗春风又见

上林枝年华愈觉

君恩重常藉梅花纪岁时

其二

深红浅白恰相宜岭上溪边见亦稀絶似孤山清素士承恩新得赐绯衣【一株双干花开红白二色】

其三

交让连枝尽不如孤根双萼自扶疎影留东壁三更月香覆西清一卷书

其四

奇葩移自蕊珠宫浓淡同开一树中晚节自忘冰雪苦独将消息报春风

懋勤殿芍药于春初盛开恭赋二首

宫柳南园未放芽数枝含露艳朝霞祇因日沐

天波暖温室先开四月花

其二

翠幙重帘护晓寒名花常傍

讲帟看岂如凝碧池头宴惟赋沈香芍药栏

康熙十八年二月蒙

恩转侍读学士恭纪二章

门开宣政日曛曛温室花繁淑景融  
载笔趋来宫漏里除书闻自

禁闱中身依香案

恩常渥名愧冰衔岁不同广厦细旃时

赐对慙无一得报

宸衷

其二

艺苑词曹比凤池鸡栖敢傍最高枝  
丹梯日偃云霄近碧草心衔雨露滋  
东观崇阶容屡陟西清秘简许频窥承

恩便诏当筵谢不待鵷班晓漏时

恭遇

太皇太后万寿节敬赋五言十韵

懿德超前古

纯禧裕後昆

文孙天下养

尧母域中尊雍肃千秋范涵濡

两代恩

圣慈开泰运厚载比坤元仁俭贻谋远  
康宁受祉繁春深翔凤阙瑞绕濯龙门  
庆节祲祥集佳辰景物暄嵩呼连海岳  
华祝指崑仑

宸藻镂云笔仙芝献寿罍万龄同日月  
常照紫庭萱省耕应

制二十韵

皇心崇穡事

睿虑重田功问俗神尧似勤民大禹同频年颁汉诏午夜诵 风

北阙韶光丽南郊淑景融土膏方泽泽牟麦正芄芃耕稼乘时令艰难启

圣衷

诏传青嶂外

輶驻绿畴中河汉星将晓沧溟日在东树边听好鸟泽畔见飞鸿

清跸双旌远期门七校雄桑阴闲稚子芹曝献村翁草映鸾旗碧花围黼帐红篝车纷绮陌畚  
鍤遍芳丛还许驱黄犊何须避

玉骢讴謠忘

帝力歌颂达

宸聪郅屋

温纶溥茆檐

御路通苍生陈疾苦赤子赖帡幪补助

恩常渥涵濡

德至崇敷天安衽席荒服靖兵戎华黍呈嘉瑞千秋祝屡丰

二月二十九日蒙

恩赐宴西苑恭纪四章

上林风日好游讌

赐芳辰花映长堤晓波涵太液春马嘶衔碧草舟泛入青苹共庆昇平乐

殊恩及侍臣

其二

离宫烟浦外幽赏

禁垣西瑶岛孤峰秀华林万树齐水生杨柳?春满杏花蹊不觉移情久仙源到易迷

其三

水亭浮画栋高敞若凌虚云影摇珠箔天光动绮疏药栏栖皓鹤石濑戏文鱼

圣主挥弦处薰风化日舒

其四

兰饌陈山海

琼筵接水云共乘青雀舫惊起白鸥羣地胜情偏惬恩深酒易醺小臣歌既醉天保奉吾

君

三月十四日

上省耕回宫蒙

赐水禽诸物恭纪二章

观俗旋鑣自水湄小臣沾

赐愧恩私如瞻翠盖楼船上春满平湖射雁时

其二

爰爰紫兔出中林羽翮纷纭杂水禽谁得平分天上味归鞍携自

禁庭陰

恭遇

皇上万寿节于

内殿称贺敬赋二首

紫殿懽呼动八紘当年华渚庆云生【唐太宗生时有庆云见】中天日暎丹霞丽南极星悬  
黼座明春满

九重闻笑语风清四海贺昇平寰瀛岁岁瞻

龙德玉简金泥纪颂声

其二

斗柄瑶光正向辰清和三月岁华新甫从禹甸回銮驭亲见尧衢祝  
圣人地接

宸居容虎拜身依香案傍

龙鳞小臣敢献千秋颂遥指南山万树春

已未孟夏

上以天时久旱于宫中致斋三日望日

亲诣

南郊?祷读祝版甫毕雨泽应时而至恭纪二首骄阳入夏轸

皇情肆类

郊坛燿火明碧汉夜随鸾旆卷微云朝傍

翠华生由来

主德崇无逸益信

天心感至诚九奏未终沾洒到千官扈

蹕尽欢声

其二

端居减膳启斋宫肃穆

宸心与

帝通滋植民天惟岁稔栽培国本在时丰随车恰自郊禋後露冕亲沾

輶道中宵旰连朝今色喜

君王忧乐万方同

五月初一日

赐内府彩丝药物恭纪

节近中天景物和琼琚沾

赐出鸾坡缤纷色映临风佩飘渺香侵叠雪罗

圣泽岂需灵药护

君恩还较彩丝多玲珑宫样人争识似曳云霄紫玉珂

五月初二日蒙

恩传谕尔子【廷瓚】选授翰林院庶吉士恭纪二首太液湖光映直庐燕雏随傍凤城居敢期姓字联珠榜得奉

恩辉到玉除当殿抡才悬藻镜退朝传

命驻金舆海天

圣泽真无际许读西清旧赐书

其二

清切官阶数艺林何堪相继玷华簪  
一经教子慙无术两代分荣愧转深  
愚似豚鱼犹载德微如葵藿尚倾心  
况曾夙奉诗书泽感遇酬

恩自古今

五日西苑泛舟侍

宴纪恩四首

蒲香风暖浴兰辰

御苑欢游奉

紫宸时有微云消暑气还因宿雨净芳尘  
幽潭碧树迎仙仗画舸朱栏列近臣  
欲识

君王同乐意普天今是太平人

其二

簪裾鹄侍彩云端酺酒临流

圣泽宽碧玉桥头双旆引绿杨阴里万人看  
西园击楫过瑶岛北岸扬舲到激湍  
惠霭和风偏此日还知天意与同欢

其三

郭外灵泉入渚宫藏舟别渚汎流通  
新从太液移黄鹄遥隔平桥望彩虹  
夹岸林峦浮积翠一楼箫管御微风  
咸池乐奏游鱼出静爱湖天似镜中

其四

韦杜金张

黼座前小臣窃喜荷

恩偏追陪凤盖鸾旗里荡漾云亭水榭边  
仙醕自天倾玉液官庖隔岸送琼筵  
清时令节沾殊渥愿捧蒲樽祝亿年

侍从西苑进讲恭纪四章

清时避暑驻

离宫竹坞花溪

辇路通水殿凉分芦荻雨山亭香满芰荷风坐临空翠鸣弦里静听飞泉

讲幄中

圣主一编犹在手乾行不息与天同

其二

云影天光自窈冥蓬莱宫阙俯沧溟綠槐枝覆鴛鴦瓦碧洞光摇翡翠亭乳燕掠波穿绣户水禽接翅过芳汀微臣窃侍迎凉殿拜手甘泉敢勒铭

其三

龙旗飘拂照盘涡芳景来游御画舸云度石桥微雨歇波生莲渚晚凉多嘉鱼喜傍兰舟跃溪鸟欢迎

翠辇过水木清华幽赏地仙源端可接银河

其四

陪

辇行宫讲诵余隔溪欣得傍

宸居垂杨影里摊书卷流水声中掩直庐晓露新荷闻沆瀣夕阳高树对扶疎传呼小艇花间泊观稼亭西近玉除

赐新贡芥茶二瓶恭纪

紫笋芳芬比蕙兰吴山越水到长安含香瑞草封雕篋拜

赐名芽出

禁闌自灋清泉松籟起细倾仙液露华溥只因身侍红云里岁岁



恩波捧月团

蒙

恩命供奉【臣】周道写【臣】小像装潢成轴

特赐恭纪二首

十载清曹近玉墀

经帙秘阁许追随忽闻

恩泽传宫使为写仪容遣画师香近

御炉薰绢素墨和仙露点须眉三毫颊上频添取多在天颜指顾时

其二

潘岳中年鬓有星自将疎野叹仪形披裘只合栖山泽鸣玉何堪着

殿庭麟阁勲名慚竹帛瀛洲文学愧丹青惟惊蒲柳沾恩渥敢傲丰裁问九龄

康熙十九年六月蒙

擢授翰林学士兼礼部侍郎纪

恩四首

粉榆陋质比鷕鷀阿阁何期托

圣朝三径蓬蒿连

紫禁八年书帙傍丹霄手攀天上星辰近身被人间雨露饶日日青花龙尾道常同历草侍

神尧

其二

青琐沈沈入紫微四时常见着宫衣蓬瀛自古人争美史册如臣遇亦稀香案

宸顏容咫尺

经帙

天语赐光辉唐虞典诰羲文易拜捧瑶函翼万几

其三

文明天授御飞龙俯视羣流若岱宗涓滴何能思报荅冰渊常恐负遭逢

褒纶惊捧

王言重野质深慙

圣度容自是清时荣侍从章缝偏觉渥

恩浓

其四

紫泥光映曙霞生重叠水衔忝姓名仙籍屡看标艺苑崇阶还许列清卿一时

宠命沾鸾掖同日除书出凤城羣自

讲筵蒙异数拜官千载有殊荣

平蜀奏捷恭纪二首

一军飞劒阁三捷报蚕丛宿雾巴江卷春流蜀道通壶浆迎猛士组练系狂童天半峨眉石新看纪战功

其二

六年屯汉沔

王化阻岩疆扼塞狐凭险膏腴鼠藉粮自天开益部计日定炎荒喜见櫜枪息同声贺

庙廊

七月三日奉

恩泛舟西苑观取鱼并蒙

颁赐恭纪八首

兴庆池莲照水红

恩分青雀御微风几人曾到甘泉馆来往波光潋灩中

其二

太液湖西雨脚垂水云亭畔荡舟时芙蕖深处菱花密出水红鳞压钓丝

其三

参差楼殿俯沧浪北渚南湖接渺茫隔岸水花秋更好覆堤官柳午偏凉

其四

好雨连朝长暮潮轻舫宛转木兰桡西山指点青如黛不觉经过玉蝀桥

其五

秋早凉从水殿生鱼罾收处柳风轻纵横荇藻流船滑时听鲜鳞泼刺声

其六

新蝉乍喜报秋清灵沼风和见物情绿树阴中啼翡翠白莲花底宿鸂鶒

其七

空明双桨击澄潭烟水菰蒲性所耽怪底夜来凉雨後鱼庄蟹舍梦江南

其八

锦鬣银腮满泛船盈筐拜

赐荷

恩偏漫言玉鱠东南美亲割华林第一鲜

闰八月二十七日蒙

恩赐内廐鞍马恭纪二首

频年踪迹傍金门驽马常随入掖垣

御苑遴材夸上驷儒臣拜赐荷

深恩调良自昔如君子驱策曾经奉

至尊宫锦障泥丝络首连钱光泽照庭轩

其二

中夜房星降紫霄长鸣顾影独萧萧花骢远自西川贡金埒新从

内廐调嘶入宫云看揽辔光生衢路美联镳朝朝柳下青骊稳蹀躞春风玉螭桥

除夕

乾清宫侍

宴恭纪

饯岁

恩晖奉

紫宸翬飞阿阁物华新崇阶喜接金张贵秘殿欢陪卫霍亲谏果特分宣口敕【橄榄古称谏果】衢樽频赐被

温纶来朝共庆三微节拜手尧年二十春

康熙二十年元日

乾清宫侍

## 宴恭纪

元辰佳气晚氤氲清讌连朝夜漏分人傍层霄依斗极光悬东壁见奎文宝幢色丽螭头日古鼎香添豹尾云法曲总涵祈谷意九歌新自

## 九重闻

## 上元侍

## 宴恭纪二首

干羽虞阶海溼清传柑时节宴承明檐低星月千灯绕庭舞鱼龙百戏呈天保颂扬因乐恺

皇情欢豫在昇平请看此夕同民处九陌笙歌满凤城

## 其二

宵临别殿敞琼筵画鼓声催火树然碧落烟消双月映紫澜风定万珠圆千枝忽涌金波桂十文频开玉井莲叠

赐奇观真异数浮槎星汉忆当年

## 温泉歌应

## 制

苍山层叠东方来插天万朵芙蓉开中有幽壑自盘互温泉霏沸灵山隈遥见白云覆岩谷波光日暖寒松绿四时天气总春融双泉数武分凉燠静如明镜石池平泻入房栊取次行兰香潋灩膏千斛碧色深沈玉一泓定有丹砂结泉底仙竈绵绵倾石髓阳乌浴彩咸池波烛龙衔照空潭水天生灵异岂偶然近瞻

世庙桥山巅土脉精英恣磅礴郁蒸佳气通源泉常听空山传

警蹕畿东胜地时巡日来游弥切望

陵思岂为临流赏清泌

慈宁圣人鹤髮垂有时

凤辇出龙墀乐游原上温泉畔风土清嘉

圣体宜规模简朴留陈蹟半亩方塘甃文石缭垣翠巘长松行殿土阶沿素壁却笑华清侈费  
多连云宫阙漫嵯峨何须刻石成鳧雁岂待镂金作芰荷

圣朝举事皆有则敬爱为心俭为德宁

亲常愿葆天和结构恒思惜民力今年扈从碧山岑赐游佳地荷

恩深每怀祓濯尘缨志时望天波浥注心

扈从謁

孝陵恭纪

鼎湖龙久去冠劔托幽宫地接东溟日山藏大漠风入云浮宝幄跨涧落银虹寢殿周庐绕园  
林

輦路通关城花自发温谷水常融松栢思尧德龙门颂禹功千峰争侍

蹕万岭俨呼嵩典礼遵前制经营殫

圣衷望

陵回玉仗瞻宇却花骢宗伯陈牺象祠官献桂棹懿亲陪奠耸故老恻遗弓石马嘶何处寒山  
夕照中

七月二十一日瀛台

赐宴诸臣

命臣英同内大臣主席恭纪二首

輦驻甘泉水殿中清秋时节柳堤风欢承

慈圣重闱喜

恩逮羣工曲讌同珍果总含兰蕙露嘉鱼新出藕花丛聯翩簪佩蓬池上影落平桥潋灩红

其二

代捧尊罍绮席前频宣

口勅紫云边秋光特锡迎凉宴湛露羣歌既醉篇拜赐香罗纷彩袖携归丝笼压花鞦微臣喜  
接金张後宠渥尤沾异数偏【是日 赐诸臣文绮有差】

恭和

圣制赐内大臣辅国将军俄启韵

戡定常怀猛士风新收荒服燕彤弓

天章特赐雕龙句

帝室新褒射虎雄

平滇南诗【有序】

皇帝御极之二十年滇南既平俘馘来献寰宇内外截然宁谧盖自屡年以来经营四方上厪

宵旰至此底厥成事羣臣扬诵

神武比于无竞之烈

皇帝谦冲弗居临轩申

命以为

天心眷佑

祖德灵承以克臻斯耆定又念四方赤子疮痍初起衽席未安将士荷戈八载劳勩待泽吁恩  
并在今日于是展告

郊

庙崇号

两宫发

德音下明诏沛维新之大泽布休养之深仁所以巩固丕基嘉惠元元者至矣盖武功之後焕以文德戡乱之余继以致治

圣心未尝以天下既安而稍自暇逸也臣既祇献昇平颂以杨廓清之盛复敬撰律诗八章叙捷闻之懽忭美庆典之裔皇铺事纪实昭鸿骏焉

君王指顾定滇中絕徼炎荒

圣泽通益部火云天际扫昆池鲸浪日南空投戈喜愜休兵志因垒真成不战功

步辇早趋长乐苑

慈怀先与慰深宫

其二

露布天南万里余经旬飞羽到庭除铜壶深夜传中禁铃索清宵响直庐奏捷鱼符偏早读纪功凤纸不胜书况逢雾扫金戈日正是阳回玉管初

其三

次第謹传遍九達侍臣先许贺

彤墀丹屏方见

天顏喜赤子还蒙

圣虑慈万户刍茭输驿路八年戈甲顿

王师亲聆倍觉愚衷感拜手

仁言百代垂【奏捷之夕臣英面聆天语深念累年官民军伍之劳】

其四

帝德如天本好生惟教貔虎瞰孤城釜鱼自见鲸鲵灭簞食仍闻士女迎六诏何曾惊夜柝百川犹不废春耕乌蒙乌撒咸归化洱海波澄看洗兵

其五



昇平大典庆如林底定还劳

睿虑深肃藉明禋扬

祖德勤将锡类荅

天心恩周九服光图史孝达

重闱冠古今舞勺歌雝追盛事功成一代纪元音

其六

遥听

凤诏万方同温律吹从玉殿风狱纵赭衣求讼简赋蠲赤县恤民穷花邨鹄报茅檐喜棘寺鸾栖犴户空兵气尽消佳气满普天甘雨庆云中

其七

当殿曾推阊外轮时清凯入骑駉駉

天潢授钺皆龙种禁旅横戈尽虎臣铜柱远征忧国久雕弓遥赐拜

恩新明年杨柳依依日正是赓歌杖杜春

其八

彤廷喜起集臣工经纬訏谟仰

圣聪云合羣方归旧服星罗宿将定元功羽干载舞期同乐华黍登歌愿屡丰手建太平千万禩无疆大历庆庞鸿

雪中侍直恭纪应

制四首

自昔占年瑞连朝不厌多休兵知岁稔偃武庆时和积素辉珠箔飞花点玉珂好将书史册黄竹漫赓歌

其二

满苑琼瑶屑轻烟与共浮

天心慈下土

宸念切西畴花散嘉平月禾登大有秋銮坡时久立沾洒翠云裘

其三

雪中看

上苑别自有山容太液银为磧华林玉作峰烟常笼翠竹色最爱青松园吏开温室梅花香更浓

其四

同云栖殿角霰後渐霏霏风细蹁跹舞寒轻宛转飞玉堦人语静宫瓦鹊声稀媿乏阳春调吟诗傍粉闱

康熙二十一年正月

赐假南归经营丘壑恭赋纪

恩诗八首

臣心寸草由来久未敢封章达

至尊每见青郊陈麦饭思乘春水到柴门上书幸恕愚情迫

当宁偏承

诏语温回忆此身依日月芸编香案十年恩

其二

典学筵开久侍观龙绡几碧云端风亭展卷都忘暑温室披图岂避寒日旰坐当楼影直宵分听彻漏声残法天行健诚稀覲蠡见惟愁测海难

其三

睿学渊涵迈古今羣山揖岱比高深  
彖爻远遯羲文旨典诰遥同舜禹心  
历考简编罗汉史旁兼风雅绍唐音  
当轩屡见飞宸藻鸿宝天球照艺林

其四

自离疏蹕入觚棱碧落丹霄十二层  
别苑每随临水殿御筵常近读书灯  
静从秘阁听铃索晚向天街望玉绳  
检点平生恩遇地涓埃酬荅愧无能

其五

李泌犹慙迹太奇况臣愚鲁奉

皇慈赐游设醴花亭日进讲停舟柳岸时  
殿上屡容陪曲讌輦前常许献新诗  
六军豹尾云深处数见书生欸段随

其六

波横桥影柳参差

御苑西偏借一枝海燕许巢鸕鶿观山鸡  
教宿凤凰池寒芽独荷阳春暖薄植深逢  
雨露滋为感乌啼思罔极仰慙

天语慰恩私

其七

四海波澄正偃兵传柑时节侍承明  
诗联柏殿昇平宴乐听云门大濩声

沛泽如天常覆物报

恩无地愧言情迢遥江国三千里一片葵心向日倾

其八

鸡舌乍辞文石陞羊肠重踏碧山岑陈情敢有怀乡意拜

命弥增恋阙心缱绻难违芸阁侣低徊还惜

禁庭陰年来供奉衔恩句暂向东臯泽畔吟

二月十四日蒙

赐手勅白金文绮恭赋

江城二月返轺车特降

褒纶凤纸书乡国白云应到眼墓田春草正堪耰久慙赤芾垂三组敢道黄金比二疏拜舞一  
辞龙尾道野人欲制芰荷裾

文端集卷三

<集部,别集类,清代,文端集>

# 卷四

钦定四库全书

文端集卷四

大学士张英撰

存诚堂应

制集四

归田纪

恩诗二十首

其一

【壬戌年三月十八日舟中恭遇圣寿望阙行礼毕赋此时驾在盛京】

帐殿祥开献寿罇此时拜舞忆金門河山旧是兴王地父老新沾

驻蹕恩三月莺花连远徼九天铙吹集诸藩望云独自呼嵩处身在吴舫水上邨

其二

【癸亥年三月十八日山中恭遇圣寿望阙行礼毕赋此】

韶华曙景满人寰忆听仙钟缀末班虎将总归丹凤阙狼烽尽扫碧鸡山目惊云汉罗

天藻身寄江湖想

圣顔空谷拜扬还北望一声啼鵙绿陰间

其三

【甲子年三月十八日恭遇圣寿望阙行礼毕赋此】

甲子新逢太史书衢歌巷舞遍

皇輿金铺节遇行觴日玉琯年当听律初五纬华星悬殿陛一枝萸叶秀庭除周南留滞今三载常梦垂绅待直庐

其四

【乙丑年三月十八日恭遇圣寿望阙行礼毕赋此】

燕云缥缈隔

宸居自返丘园报答疎烟霁秦淮开宝幄江清弘济照龙輿拜承温语慙樗栎归话

慈颜动里闾弹指又逢天庆节烟霞犹自恋衣裾

其五

【舟中展对御书敬赋】

拜捧

纶言出

九重

御书都藉紫泥封缤纷宫锦香犹在掩映江云墨更浓开匣顿教荣草木迎舟时复起鱼龙良宵展对烧官烛烟际疑闻禁漏钟

其六

【舟中感念圣恩恭赋二首】

鸥语蝉声助客吟篷窗独坐数烟岑停云暂遂南归志捧日犹悬北望心驿路柳稀伤客久江潭花落忆恩深归来未觉清贫甚检点青箱有赐金

其七

十载趋承白玉墀

经帙清切荷恩私春风上苑宫莺早夜雨长楸禁漏迟授简常陪鵷鹄观移家近住凤凰池汀洲野泊闻鸡後彷彿金华进讲时

其八

【至家闻五日赐纱恩命恭赋】

里社新秋客子归始闻当暑

赐宫衣紫霄乍覩冰纨出赤日惊看雪练飞香自禁庭传画匣凉分殿角到荆扉

圣情不遣幽遐隔感遇酬知自古稀

其九

【初闻特恩谕祭之命恭赋】

迢遥南北隔江烟

紫闼睽违近一年已遂乌私归下泽忽惊

凤綵耀重泉宁亲盛典宗祊纪稽古殊荣里巷传自是君恩优侍从居人争数义方贤

其十

【谕祭礼成谢恩毕恭赋】

一卷遗经训子孙先臣耆耄晚承恩簪纓已许膺三命俎豆何期荐九原飘渺

御香临萃户喧闾钧乐动衡门身兼悲喜趋迎处手把宫衣满泪痕

其十一

【田间感念圣恩恭赋】

草土陈情

黼席前诏从休沐憩林泉春陰学种池边柳时雨看锄墓下田常展

赐书孤馆读闲将

圣德老农传青蓑黄犊臣家事恰喜归耕庆有年

其十二

【丘垄告成感颂圣恩敬赋】

罔极情深久郁陶  
许归三径剪蓬蒿  
苔痕旧树龙鳞古  
草色新封马鬣高  
得向空山占景物  
容分暇日报劬劳  
夕阳原上丰碑矗  
敬勒

宸章五色豪

其十三

【恩赐昇平嘉宴诗石刻恭赋】

早岁传柑令  
节前集贤春  
殿敞华筵  
紫微花气  
千门晓碧  
落珠光万斛  
悬

睿藻遍容寮  
案和

天言屡顾侍臣传  
只今拜赐同金石  
转忆昇平庆赏年

其十四

【癸亥岁除蒙 赐羊酒食物恭纪】

九重深念侍臣归  
再见江天雨雪霏  
法醞昔常歌醉饱  
岁寒更复拜

恩辉冰坚辽海鱼  
初美霜落关山兔  
正肥野性愿甘藜  
藿老仙庖遥领事  
尤稀

其十五

【闻驾登泰山恭纪】

日观高峰驻六龙  
时平

天子庆登封  
鸾旗翠盖临沧海  
玉简金函礼岱宗  
谷转风雷千骑拥  
气蒸河岳百灵从

盛朝举事卑秦汉  
石上遥寻古帝踪

其十六



【闻驾幸阙里恭纪】

法驾晨严税鲁东两楹车服昔时同只因百代心源合不独千秋

圣藻雄古壁冠裳邀

帝泽空堂丝竹动天风路人指点停

銮处洙水桥西桧影中

其十七

【驾幸金陵恭纪】

驻辇金陵王气浓时当猕狩不妨农山川旧识龙蟠险城郭新看凤迹重  
六代烟云供染翰千秋江汉待朝宗翠华不遣传清蹕南国苍生覩

圣容

其十八

【覲上於秦淮蒙 恩慰问并 赐御书恭纪】

戢影田间拜舞疎秦淮江上覲

乘輿时同旧侣趋前席还沐

新恩载後车击目丘墟陈俎豆关心水旱问州闾微臣新奉

天顏喜小艇南归有

赐书

其十九

【蒙 恩召臣子编修臣廷瓚至内廷询臣起程并 赐食南书房恭纪】

北风吹鴈过茅茨有子离居荷

圣慈宵旰不忘簪履贱江湖犹系庙廊思细旃

天语承恩日秘阁仙庖赐食时十载未言温室处蓬莱清切到方知

其二十

【颁赐易经讲义恭纪】

秦燔未烈赖斯传拜献金华几岁年凤纸喜沾今日赐龙缣重抚旧时编图书道契陈畴日象数微?出洛前幸遇羲文今御极余生何敢废丹铅

康熙二十七年正月恭赋

大行太皇太后挽辞六章

启佑成鸿业含宏比厚坤

文孙千古孝

慈圣两朝恩夕漏趋宫仗宵衣侍寝门只今看玉 涕泗总留痕

其二

轩车陈绣幄文駟列珠鞞同轨三千国

重闱五十年慈云长?日涕雨正敷天缟素龙荒远星轺驿使传

其三

深殿愁云结千官拜寝闱衔悲当岁晚洒泪向春晖接席陈雕俎倾宫送宝衣关心闻

圣主擗踊恸无依

其四

皇情哀恋笃屣步出东华寒聚城闉雪风回輶路沙扶輿行露草垂涕杂冰花凄切常中夜林臯起暮鸦

其五

夙昔宣仁训庭闱一德中十行

慈诏切三代孝思同爱敬成家学徽柔嗣国风他年记惇史焜燿总无穷

其六

丰沛多耆旧三朝翊戴清羣扶鸠杖至哭傍翟车行奠酌诸藩长攀号率土氓万方同遏密原野共吞声南巡扈从诗十八首

车驾至畿辅道上民献嘉禾数岐以示从臣

春风转韶律时巡历郊原王道广周谘冀以康黎元衢路撤警蹕羽卫祛殷繁万姓趋马首填塞窥井垣皆言年谷好比岁丰鸡豚麦穗三两岐敢以陈

至尊

圣心益嘉悦慈颜弥霁温民天在粒食农事古所敦稼穡久为宝珠玉安足论再拜纪惇史大哉真

王言

诏免山东来年田赋

王政先足民实惠惟捐租浩瀚若河海百谷同时濡跂行与喙息万类皆昭苏此年屡拜

赐大泽已频敷蠲除常钜万食德非一区

銮辂莅东土民瘼勤咨諏特与免正供闾里无追呼讴吟起岱畎拚舞弥海嶠

温诏有徽言民富国乃腴父老扶杖听荡荡歌尧衢展礼泰山神祠给守祀者金岁以为常

岱宗峙东域穹隆凌紫烟风雨走百灵膏泽弥八埏功德润生民柴望纪虞年

翠华昔临幸日观登遥巔杯耸视沧海襟带俯长川大书云峰字刻石苍崖边今兹复莅止展礼意益优诏下尺一岁给水衡钱观瞻肃庙貌母俾祀事愆怀柔及河岳允協时迈篇

扈从观趵突珍珠二泉

济水性沉劲隐见多伏流趵突历城嶠喷薄声飏飏澄波涵曲沼玉峰对层楼雪涛涌银瓮朱

檻翔白鷗或類鮫人窟百琲珠光浮參差文藻漾灩澦纖鱗游清寒沁心骨四時常若秋昔已邀

天步今復駐彩旂

宸章炳星日光芒射潛蚪先後兩輝映特為名泉留車駕由宿遷親覽河堤後復臨幸高堰閱視

羽衛臨河干徘徊瞻禹迹黃河自西來浩蕩無朝夕聖主宵旰憂披圖日謀畫上以利轉輸下不妨耕辟今茲獲安瀾順令驅河伯激箭歸東溟波靜淮流碧溯洄發櫂謳片帆如衽席拯此昏墊民澤水還其宅自昔漢帝來采薪兼負石宣房瓠子歌盛事繼疇昔

詔蠲江南累年逋賦

東南財賦區逋租昔所苦官長若傳舍民亦罹罪罟休哉浩蕩仁明詔傳風雨盡蠲歷年賦絲粟無所取率土供維正累代有恒矩

聖心崇簡質權衡內外府澣衣過孝文菲食師神禹十載侍

禁庭微臣目所覩約已以裕人惠澤斯能溥

鳳紙下層霄慈藹軼千古

詔增取土額錄功宥過寬釋罪辜并恤商賈徒役萬里垂天霖雨沛大澤

王言流春膏煌煌俪典冊菁莪培士氣弦誦廣縫掖車服旌功庸章程寬過謫湯網恢八紘堯歌溢九陌惠政恤商旅余波及徒役渙汗若風行星軺馳數驛譬彼陽春景彌綸無轍迹萬物皆沾濡一夫靡不獲上配星漢文千禩永無斁

詔民間無得結彩建碑

上古君民情淳風今再遇欣逢

至尊出馬首謹童孺千里賁糧米所至輒成聚燈火若繁星香風霽烟霧慰問龐眉人

翠輦時為駐碑鏤萬歲字炳燿照衢路敷天歡忭聲淵云不能賦愛戴出微忱

聖衷彌簡素所期家室盈禮讓起丰裕至哉如天仁击壤听

温谕

扈从登虎丘

虎丘一片石乃在闾阖间王珣旧时宅清泚相回环游人无古今石色常自闲剑池如削玉绣  
澁苔痕斑中涵清浅流花底犹潺湲层丘莽回互数步劳跻扳长廊临大壑紫翠何其殷村落  
爱平远极目入烟鬟上有万岁亭卓立当兹山吴人歌乐胥喜惠频年颁

扈从登金山

沧江浩无际乃自岷山来浮玉一拳石砥柱何崔嵬北迎瓜步口南接润城隈回波忽涌立激  
薄声如雷皎若鸥鹭羣灿疑冰雪堆海气驾奔涛阁影势欲摧有时风日丽潮落江烟开波光  
类澄镜灯火明香台

仙跸驻上头胜地欣追陪峰顶大字石云汉同昭回

扈从登邓尉山

泛舟入吴会越岭趋香林村居接花屿长桥跨碧浚溪怜木渎好山爱铜坑深一径入桂岩千  
树对梅岑吹香满高阁积雪照湖阴长松翳古寺惟闻钟磬音数点渔洋山便娟当波心帆影  
时出没湖光弥绿沈邓尉隐此山流传空至今欣从

仙仗来感激生长吟

扈从登灵岩山

振策石城路维舟木渎傍红亭倚山畔兰蕙松风香春草没宫井野花迷屨廊裂眦入烟际湖  
山郁苍苍镜奁俯震泽浮槎看渔洋琴台冈势直箭筈河流长复有消暑湾密树涵溪光遗踪  
半髣髴?诘增荒唐石洞本确荦履迹尤微茫千古好事人附会多忖量

扈从登吴山

吴山俯城闾石径登嵯峨翘首云物丽极目河山多层峦滴幽翠晴光卷白波一片明湖影掩  
映隔乔柯春潮如雪岸朝夕满江沱万井若鳞次葱郁知时和丹梯耸飞阁苍磴接崇阿

至尊移步輦雨霁此经过云霄画图句古调永不磨微臣草?吟敢继大风歌

车驾至会稽恭祀禹陵

会稽古名郡禹穴千山中梅梁空寂寞窈石疑幽宫栋牖杂云气灵旗来空蒙

圣心久遐契精一渊源通况兹勤玉趾胼胝师神功园陵伊匪遥驾言沧海东质明展祀事松籁吹天风荒庭列俎豆牲醴咸告充袞衣肃再拜簪裾陪上公忝佐秩宗礼感叹盈私衷

扈从渡钱塘经过云栖虎跑泉飞来峰

东风动涟漪鼓枻渡钱塘沿缘历沙渚山径多微茫林峦转幽邃十里青篴簫映水绿娟娟戛玉声琅琅紫兰被山谷日暖吹微香西度虎泉侧因过鹫岭傍奇峰削云根凌空如飞翔澄溪回数折灌木罗千章钟声度白云阁影摩青苍

万乘一回顾岩壑生清光

车驾幸锺山酌酒於明太祖陵

春雨洒轻尘江干草微绿鸾旗卷惠风驾言锺山麓前代已丘墟寝园在空谷

圣人一举事千古超恒局在昔修禋祀展礼必

躬肃今兹再临幸青茅酒重漉侍臣咸虎拜仰止天颜穆赐金遍守圉松楸禁樵牧厚德塞穹壤仁风被草木书以范百王永永光简牘

扈从登北极阁

走马登崇冈东南临冶城万瓦连九陌淡沲春云生至尊凭杰阁眺览纾

皇情苍苍夕阳落耿耿银河清象纬天阙近奎壁相纵横

圣心罗七曜指点示诸卿盈缩穷造化高论云霞惊弧偃天狼息斗转泰堦平南极悬日表久为仁寿祯今夕覲

天子芒角增光明

閱武并赏宴驻防将士

秣陵带京口控驭称要地海邦屈吴越星罗联指臂各列水犀营清时饬武备特简丰沛英卫霍领骠?六龙御东南神武麾七萃霜雪耀戈甲荼火望旌帜射侯必饮羽鹰隼逊猛鸷

圣泽靡不周师徒悯劳勩爰歌采薇篇饮食亦古义遍锡上方金共沐投醪赐

文端集卷四

# 卷五

钦定四库全书

文端集卷五

大学士张英撰

存试堂诗集一

古体诗三十二首

拟古田家诗六首

柴门拥谿水谿响无朝昏农夫荷耒倦独倚秋树根顾我田畴好念我桑麻繁脉脉不能语感兹风雨恩风雨岁时熟古俗今犹存遥指烟生处亲戚满前邨稚子驱鸡犬夜来忘闭门何以酬清时努力从田园

谿流何涓涓山色复苍苍谿山秋後好农夫秋後忙鸡寒不能啼主人立严霜驱牛向烟雾稚子牵衣裳阿妇亦蚤起饥儿啼在床携筐馐南陌回听煎中肠岂不惜劳苦遗业未敢荒古人亦有训力田以为良

短衣农家儿少小习耘耔鸠鸣杏花白偕举西畴趾三春风雨中九秋霜露里妇馐复男耕举室无停晷夏耨良苦辛亭午日华紫背方炙骄阳足且濡浊水我来陇亩间慨叹不能止熟知土物艰焉敢厌糠粃聊用作短章庶以诚淫侈

我有湖畔田沙垆非沃壤霏霏微雨中犹闻桔槔响径僻饶松杉地淤足菰蔣柴门接沙尾春水嘉鱼上处处鸣渔榔家家泛兰浆蚤禾常薄收晚禾亦丰穰更有隔湖山湖光漾秋爽我欲谢浮名腰镰此长往

昔爱诵 风亦常歌小雅桑柘栖鸡豚结庐在中野春菑方扶犁秋禾倏盈把野老乐时和高枕瓜棚下田家老瓦盆新醪月中泻击鼓赛先农调瑟娱方社何必桃花源此境足潇洒风尘久误人我岂悠悠者愧无风人笔爱此不能写

力微不能耕鄙性复好农欲自营十亩课仆春山中秧鍼出新水?稭吹香风彼驱黄犊往我荷青笠从虽不执劳勩风雨愿与同秉穗遗自拾黄粱熟自舂饱食复行歌举手酬天公庶几对盘餐坦然无愧容

拟古诗五首



## 陶渊明田园

谋生固有道委情在耕凿但勤四体力勿嫌岁收薄策杖看良苗吹香如杜若好风动平畴垄间自舒约岂惟儿女餐浊醪还可酌同生大化中遗粒畀田雀俛仰弄琴书信无逾兹乐

## 谢康乐游山

将游浮渡山言登细石岭白云冒崇冈湖天落峰影沿缘巘壑间陰晴变俄顷乔柯散幽籁曲洞邈?靚苔滑屐难置巘深烛须炳天窗过云疾石窦飞泉冷倘许结茅茨尘滓可长屏

## 左太冲招隐

千巘一径入修竹隐精庐柴门尽日掩中有幽人居好鸟落翠岑文鳞戏清渠啸傲弄朱弦坐起携琴书天风鼓长松庭际鸣笙竽愿言招邛友此境常自如往师沮溺贤春田良可锄

## 郭景纯游仙

屏迹尘表置心羲农前振衣跻崇冈濯足临长川饥食青精饭渴饮丹砂泉胎息鹤登树抱珠龙在渊启户焚清香绛霄延倬佺还丹得至诀餐玉有秘詮翹首芙蓉城驾鹤凌紫烟

## 阮嗣宗咏怀

士生各有志不乐居烦囂敢言隐者贵但觉举世劳醯鸡视羣动螺贏卑二豪楚楚笑蜉蝣切切憎寒号桔苑等一辙欣戚随所遭蓬首本非浣衣虱频自搔鸾凰意高翥斥鷃空啾嘈

## 听友人弹琴

有客遗我绿绮琴携来竹路桐花陰素爱清商学操縵广陵人去湘水深故人为予鼓一曲指上清风响寒玉小弦切切大弦惊云鸿沙鴈相离续使我满室生秋声寒林落叶寒虫鸣坐客不知日将夕花枝竹影相纵横古称无弦琴亦好静对枯桐自飘渺况复移宫换羽时松籁泉声满幽抱余音缕缕入青冥残照依依欲下庭主人闭门客复去门前无数远峰青

## 寄题黍邱陈简庵谿南草堂

繁华鲜能久珍异罕常存洛阳一片地谁复金谷园琪花与瑶草化为秋雨痕悠悠惟世德可以历寒暄陈子多古谊澹泊尤所敦大父居谏议先人典名藩庙堂仰谟烈园林隐弟昆结屋临清谿聊以远尘喧藏书满高阁种树罗前轩三代历膺仕惟此遗子孙廿年燧燧後几荡为寒原陈子啓榛莽结构立柴门残垣断壁间手泽犹可扪谿声遶茅屋枕上闻潺湲古木不改色入夏清陰繁谁谓消息理天意不可论昔年歌舞地台榭委荒邨昔年弦诵地依然琴与樽

愿言崇世德赠子以勿谖【陈子名希稷夏邑人能诗工书法】

### 叠翠楼歌

龙眠日照万峰紫耸峙一峰号投子古堞参差岭岫间乔柯掩映烟岚里延陵世宅居城中为爱此山不能已家有一亩青琅玕筠粉初落青且寒中辟高楼曰叠翠北窗面面堆层峦主人对此数晨夕手持一卷闲岸帻朝来最好山岚青夜来最好山月白有时雪後成奇观玉峰琼树高千尺有时花发满山椒隐隐疎红间寒碧招我正是春明时春烟春雨尤离奇山翠倏忽分浓澹峰腰云影时时移应是公麟捉笔在空际伸纸泼墨写山势楼头百幅龙眠图雨岫晴峰落埤垠【楼在姊夫吴式昭宅右】

### 松声阁

吴姊居佛阁自颜曰松声昔读松声集今见兹阁成予以外家弟拜姊登轩楹高楼起宅畔俛视秋满城霜柿红披离当户一枝迎未见庭堦上谡谡松风生再拜问吾姊胡以松声名姊笑而未言尔何无远情佛理本无滞勿以我见横予日坐此阁虑澹神复清譬彼苍龙干霜雪忘枯荣诵经入深夜栖鸟时时惊绣佛俨垂盼红灯对秋橙况有案上诗古调存韶讌摩娑吾老眼挑灯一再赓烟缕方入户微香来茶铛静聆石经斋书声依短檠皆作松声想自觉吾耳盈何必南山南始听万松鸣再拜谢吾姊朗识谁与京姊今逾甲子兹阁始经营愿言阁上人岁岁如松贞【木厓母夫人吾姑之女有松声阁集】

### 风雪行

黑云压前途夜半北风起客子双足拳寒卧僵襍被角角鸡初鸣凄凄入吾耳主人来叩门呼客整行李披裘闚茅檐雪片白如纸牵马且无力霜风吹断指客子贪征途仆夫行且止徘徊四野中乞火望墟里我方叹苦寒骑驴者谁子须眉结冰花栗栗战牙齿人苦不自怜吾貌应复似生长江南春不解寒如此小阁常晏眠重氈布文几纸窗映虚白炉火埋深紫行行亦胡为邈愧幽独士衣湿方苦饥俯仰叹未已仆夫前致词甫渡黄河水行行向燕山风雪从兹始

### 望岱

行行兗州道矫首青冥中朝霞拥日出照灼沧海东苍翠插天半泰山何嵒嶺上有白云气暎日如长虹紫岚忽变幻万里回天风梁甫与社首连绵亘遥空远望百里外霄汉若可翬况复登天门盘曲安能穷我欲披日观俛阊蓬莱宫周秦数点碧黄河襟带雄长啸探玉策邈与穹苍通

### 黄茅冈

暮登黄茅冈冈势俛平畴怪石何离奇羣羊满山头坡公守此地醉醒时来游石上有遗字笔

势如银钩後人景高风还为起朱楼  
名山不在深此地直荒邱乃知贤达士能令山川幽幻化  
同草木林壑擅风流使君复何处片石自千秋

### 寄任昭兹

岁暮濠梁与君遇霜天携手黄河渡  
二千余里风雪中行行细数燕山路  
朝来并马夕连床清宵有梦起  
傍徨顾影相怜两游子如君况复稀  
鴈行有时君吟我亦和酒醒灯残客未卧  
仆夫呼客出茅檐雪片如刀马蹄破  
献策金门未见收岂君亦复滞骅骝  
春城柳色无情绿京洛空成汗漫游  
我方停车君税驾落日忽遇荒城下  
兄弟关河聚会难剪烛呼樽共良夜  
此时不遇君勿悲堂上有人俱顰眉  
区区承欢各努力京华旅食空尔为  
与君别去常惻惻百里相思无羽翼  
临风寄尔尺素书愿言加餐崇令德  
落月盈盈照屋梁怀人犹如见颜色  
【昭兹名光世舒城人能诗与予乡试同出即墨黄公门】

### 梁家园对酒歌

帝城昨夜柳初碧杏花片片飞绮陌  
弟兄俱是天涯人携手相逢出左掖  
玉勒金鞵照路傍紫骝嘶嘶何长吁  
嗟良会不易得画楼高处还相将  
画楼掩映垂杨里一曲银塘泻春水  
小阁珠帘临水开依稀此景江南似  
歌儿红雪本吴侬灯前双颊秋芙蓉  
黄莺自啭梁尘落宛转歌成谢女慵  
坐客燕赵复吴楚京华挟策成羈旅  
藁宫姓字曲江春等闲同作金闺侣  
对酒当歌歌勿迟再来此地知何期  
青蛾皓齿白紵词劝君满酌倾玻璃  
春风为我惜良夜珍重梁园对酒时

### 慈仁松下对酒歌【中秋为念斋招因赋】

长安八月天气清千门九陌秋盈盈  
弟兄相将十五人齐驱马首过春明  
春明门外红尘起共向慈仁寺里行  
璀璨离奇百宝集游人游女倾都城  
钿车来往如流水花骝嘶嘶且惊吾  
侪只坐长松下秋风飒飒闻松声  
须臾燕市蜃楼散冰轮蚤向松枝生  
松枝影落空坛上龙蟠蛟怒何纵横  
有客壶觞醉诸子石栏松畔飞兕觥  
倚徙徧饮诸松下一松一斗如长鲸  
天涯骨肉两珍重可怜俱是游子情  
京国风尘改颜色终朝逐逐如楸枰  
诸子孝威年最少【谓茗水】犹恐  
异时相逢呼老伧今夕良会不易得  
浩歌莫惜樽频倾吁嗟乎浩歌莫惜  
樽频倾

### 再饮慈仁松下歌【九日为礼存招因赋】

秋深古寺风萧萧长松铁干摩青霄  
复有低枝苍且劲寒声树底如秋潮  
前日携樽曾醉此宿醒未解旬日耳  
黄花细雨又重阳咫尺秋光不相似  
检点遂成十四人唐子抱病思鲈蓴  
人生最易是离别为欢切莫轻良辰  
相将携手登高阁俯瞰西山闕碧落  
金翠辉煌树影浓明光宫殿连长乐  
日晚移樽松下来寒风淅淅吹高台  
罗衣自薄不胜露酒醒歌罢重徘徊  
徘徊还向幽林去招客禅房最深处  
蒲团纸帐蜡灯红茗椀炉香客无语  
坐客无语听清歌歌入微时唤奈何  
莫道承明同珥笔漫言玉树共鸣珂  
人生富贵等闲事须念为欢去日多  
劝君且尽樽中

酒听我再饮慈仁松下歌

家书

家书久不达终夜不成寐道遇故乡人云自秋後至珍重试一询或恐有只字客言离家时与子老亲值疾行不扶杖顏色类童穉再拜故乡人顿释经秋思游子复何悲游子复何冀如获径寸珠不复叩其次归来坐床上吁嗟发长喟不乏鳞与鸿胡使我心悸愿托凌风翼寄言昆与季高堂有老亲尺书且时寄

霄汉楼诗【为任鹤峰同年作】

江涛澎湃西南来萦回百折海门开北有大龙与天柱苍巘翠壁真奇哉任子嗜奇爱山水凭陵杰阁山之隈下视长江如尺素平芜草綠江南路湖烟邨树几人家沙尾沙头数鸥鹭有时江风吹白浪千帆片影窗间渡四面窗开皆好峰摩空峭立青芙蓉不觉斯楼几案间飞来天柱与二龙百幅云林佳山水烟云乍澹还乍浓傍城无数参差屋掩映亏蔽出林麓花外珠帘何处亭篱边小圃谁家竹佛宫金碧涌浮图尽来窗底供游目最宜风雪满江城千山万树皆瑶琼更爱长天秋月白寒江空翠波浪平洞开四壁双目瞳散髮浩歌鱼龙惊山灵河伯相纵横酒阑客醉不复去欹枕还听江流声

渡阿城闸

忆我泛舟时积雪西山白行行重行行柳花飘绮陌东阿山下流微波不盈尺苦吟坐篷窗欲渡无羽翮嗟此一勺水涓涓非大泽湖水南北流启闭类潮汐藉以通漕艘诘宜思归客最是争渡时风起日将夕石梁一苇间檣櫓森如戟操舟上青天指顾惊人魄电击复雷轰挝鼓迎河伯对岸人语声咫尺飞涛隔百夫挽一舟始渡沙间磧出门多辛苦况复此行役故国三千里南望江云碧安得片帆轻春风从所适

赠吴逵田舅氏山居

畴昔鸣琴客近为餐霞人山癯类野鹤修翮无纖尘秋水澹神虑俛仰皆天真手艺河阳花烂漫犹如春隐之多清操饮泉风絶伦避俗谢轩冕家山耽鲈蓴浮渡三十六探索常经旬时还托诗酒调古思弥新门前五柳树潇洒陶公巾【舅氏名道观顺治己丑进士为商水令】

寄怀同館诸子一百韵

畴昔京华春旅食再经岁幸有同心人天涯比昆弟河堤草放青城陰柳含翠垂鞭陌上逢与尔交初缔千官彩仗齐五色宫云丽

天子方爱才邹枚重陪侍简此十五人笔札许同赐传呼出玉堦走马来丹地名誉起公卿诸

王及勲卫长安争欲识官街拥千骑从此金門路出入并街轡高槐散清陰同摩古碑字联裾

御道行对席秋堂试马街庭草嘶鸟语稀人更有时各垂帘一编探微义有时登堂上琅琅听羣议

御河流向东往复恣游戏酬和同心言袭人如兰蕙一日不相见三秋良不啻【此言初授館职】佳辰多好怀携手慈仁寺松影如深林松风吹客醉一月数来游苍蘚扞残碣【此言慈仁寺讌集】城东有清池锦鳞跃芳砌南望園丘宫苍柯正陰翳相将此地游五月雨初霁人在水边楼马向垂杨系【此言金鱼池讌集】最忆禁城西此景时无二逶迤白玉桥长虹落天际鸳瓦碧琉璃百尺如飞坠宝幄间珠宫烟林共深邃戚里夜歌钟天风落轻吹千亩太液池曲曲皆荷芰数峰不在高巖壑苍逾媚古松近十围罗列森衆卉楼观水中央蓬萊堪髣髴环之以朱门指点王侯第吾侪读书暇数日时一至烟水菰蒲间相期涤尘累我至为君留君来为我迟下马饮荷香凉风入罗袂【此言西苑之游】追随分余欢亦复同劳勩驱马未平明击柝门犹闭星光月影中相对发长喟风雪回平沙掩面伤目眦逢君各相问昨夜寒甚厉十月犹单裳无裘可言敝方朔恒苦饥朝来饭也未同是旅食人惊心说珠桂【此言旅食之苦】嗟予尤苦辛萧然托高寄玉堂庑下炊岑寂不言瘁吾兄耽清赏【礼存】中宵持襖被与予共灯火短檠各幽致高吟步庭除月落犹未寐岂不惜勤劬落落腴道味瀛洲五云堂时时发诗思诸子皆至性胶漆相投契繆子磊落人【念斋】雄才冠时辈披沥皆素心好我独真摯安仁称益友【起岱】食牛气弥銳霜蹄蹋秋晨橐橐惊人睡史子真天人【子修】瘠骨有奇慧落笔妙天下兰亭得其势夏子雅怀抱【隣湘】道气日醇粹读书常比邻纏綿入微细丁子气如兰【次兰】简澹寡营虑独羸绣阁欢宫花插宝髻幼輿与仲舒【瞻在子重】湛湛见深器人澹竟如菊二子差可拟照隣富才思【景韩】挹之多静气能读等身书沈摯时无比杨子澹荡人【简人】清风余秀惠草书学右军轩翔入三昧储子旷世才【玉依】思敏力复毅晨昏相追随欢不减棠棣大令神骨清【子厚】天庙琳琅贵刘子何亭亭【茗水】孝威名不愧二君年最少才思独雄肆唐子方抱恙【偕藻】蚤归食鲜荔徘徊十五人倏忽成十四闵予遭多故老亲遂不讳游子肠寸断中心自煎沸诸子为我啼再拜皆出涕各赋薤露歌悲惻复周致哀哀游子情恳恳故意路白冰棱高麻衣两行泪诸子送客行关山共迢迢吁嗟遂成别人生无根蒂长路多艰虞风涛日惊悸游子归故乡入室如闻恠悲迷草土间无复忆人事故国两经秋梦与诸子值綿綿梦中言耿耿犹能记历历思旧游惘惘不能置嗟予昔有言珍重此把臂今时不为欢聚首良不易不谓此语?转与予相类浩然发长歌愿言告同志努力报

清时勲业予翹企

方四松先生题远峰亭长歌和之

小园种竹已十年覆墙才见生寒烟十竿五竿近窗户筠粉初落青可怜更喜奇峰向茅屋朝似烟鬢夕如沐问人知是江南山九点芙蓉杳霭间客子经年远行役三径无人苔蘚斑归来重启竹间户咫尺家山同陟岵尚开临砌旧时花花下心酸淚如雨鑑湖先生诗絶伦【谓四

松】青莲居士今骚人【谓嗣雅】嚣尘不厌城隅道剥啄来问松与筠指点青峰出林际梧桐叶密山光细凉风飒飒从南来坐客添衣纸窗闭等闲落笔成浩歌长句短句奇思多书向吴绡与蜀纸顿看素壁烟岚起亭中一幅蚤秋诗亭外千重暮山紫同将黛色摩青苍不独江云看九子【四松先生名畿字还青同里人工诗文曾官河间司马有四松集】

姑射仙人篇寄上房师临汾蒋公

姑射神山汾水湄中有仙人冰雪姿千年苞秀毓灵异诞甫生申端在兹伟人游上都橐笔游天衢丁年里选方弃繻翩飞珥笔承明庐

世庙当年受知蚤木天丹地竞词藻歛华不屑鬪时名芸阁悠然见怀抱怀抱复何似水何澹澹山岛峙雅望年来中外深玉衡羣仰台星指高揽芙蓉镜还登选骏台自顾驽骀亦何幸春风翦拂呼龙媒等闲移作上林树芳杜秋兰共零露仰止公琰社稷器千顷汪陂钦叔度青藜甫得分余光小子归卧南山阳桃蹊苦忆花三径苹户长扃水一方关梁无羽翮长安秋正碧诸子正是良讌时受经羣列康成席极目燕云杳霭中论思东观日春容陶熔庶类须钜公天南翘首思无穷

伊蒿篇为许子志先德次四松先生韵

故园君子推许公当年隐德今穹窿自予闻之年方童迄今廿载思何穷秦陇之寇弥八鸿围城数匝将倾桐凭山带河城西东营火如磷千点红公方负母湖草中孝思平地成蚕丛贼聚蠡聚而蚁同官兵倏至乌羣空公归安母耒蒿蓬及时播种麦有麴寇方去兮禾方芄隣里复活伊谁功孳孳惟义是所攻潜德惜未闻宸聪惟公虽没义则隆天佑善人啓其衷许子读书时念翁孝德累世苍旻通挥毫落笔文最工蓀蓁岁岁未丰道气渊湛常冲融文坛艺苑偏能雄草堂秋日方曛曛草堂秋树何菁葱多君先德如衡蒿羣公诗史皆清风【许子伊蒿名来惠予同学友工诗文为邳州学博】

重九後十日木厓招同四松芥须伊蒿叔兄如三集九松分得地字

秋山不在远出郭自幽致秋林不在深九松足苍翠主人曾有约山灵久相迟若使重阳来登临只故事回首已成昔十日秋光异青青原上枫初与晓霜试逶迤草间路黄叶犹未坠盘桓古松下高枝落秋吹髣髴数君子澹劲复无二侵旦远移尊霜螯正肥臠田家古瓦盆斟酌成微醉倚徙松棚间独悯老农瘁白髮自驱犊天寒拾遗穗可怜儿女餐饱此催租吏讌酣忘苦辛吾侪将无愧古人惜良辰且勿发长喟清流遶田垄曲曲盃堪置瓜果秋树根衔盃托高寄隔水山畔路正与归樵值日落衆峰紫林峦转深邃严城未掩关林鸦杂归骑落落有吾徒萧然在天地

寄都谏姚龙怀先生

黄门典封驳纠弹重老成伟欵都谏公岳岳谁与京邱壑十年居蔬水南陔情掖垣徵再入方  
直旧知名阜囊一编书抒发皆至诚衆论如委波赖此宏议撑转移在微密耻为殿上争

至尊降温顔听此鸾凤鸣同时仙掖客袞袞皆上卿於公为後辈仰之如华衡心苦力亦瘁五  
十白髮盈愿言加餐飫葆此松柏贞

帝前作霖雨长此被苍生

文端集卷五

# 卷六

钦定四库全书

文端集卷六

大学士张英撰

存诚堂诗集二

古体诗三十八首

春江积雪行寄怀四松先生

客子晨将行南枝蚤梅发如何寒香时远与故山别不惜枝上花宛转赴南陌南陌良苦辛昨夜江天白不见江上渔惟见江干雪北风号枯杨横林远萧槭寒气入江声波涛力应竭天地无纖尘羣峰如挺壁琼树将万株瑶台且千尺一幅水晶帘遥遥挂青碧小艇明镜中四顾清光彻如驾凌云鹤远渡银河碛俛视无复有横空但明月客子得奇悟邈然忘所适故乡有诗人秉心素高洁澹荡非世情怀抱自清悦安得同苦吟写此江天夕

送木厓偕长君务滋入成均

鸢鷺振羽仪薄海知宴清宁久戢其翼不向榛莽鸣黄钟太古器耻与凡响争清庙朱弦间为世陈韶讖骐驎当困时久为弩骀轻一朝入燕市千古金台名吾党有潘子才思蚤纵横十岁能属文落笔前辈惊悠悠四十年华髮双鬓生潘子勿复叹遇晚名亦成文字摹大家韩欧同规程古风久沦弃力为流俗撑浩浩写胷次意匠无经营赋诗耽杜白历落倾珠琼丹黄海内书月旦操其评脉望食余字皆得分时荣嗟予樗栎材相远奚莛楹如君不得志转使予心忤清时方爱才勿惮驱车行辟雍今宏开钟鼓何鏗鏘漆经多奇字古乐无新声君且携长公春明事遐征河堤垂弱柳宫树啼新莺我知入都时名誉驰公卿珊瑚出海隅明珠来秦城慈仁古松下璀璨都市呈鸿宝发奇光见者双目瞠鹏翮凌高风云路今方平枚臯侍从才位置宜承明煌煌帝京篇请为

天子賡【潘子木厓名江余同学友工诗文有木厓集】

陵阳行

陵阳古佳地诗人昔来游谢朓与李白吟咏空千秋昔人不可见青山入高楼上有黄鹤飞下有清谿流俛仰仙灵宅高风凌丹邱安知千载後姚子今其俦理国师烹鲜化民如狎鸥夙昔天下士文誉满沧洲投分无俗宾吟啸谿山幽为我语元之救时资良谋岂容山水间谢李遥



## 唱酬【时海南姚六康为石埭令】

### 东臯草堂诗

我闻李先生自辟东臯堂衰年托亲戚葺屋农家傍君昔在岭南橐笔走战塲归来卧一邱不复耽旧狂怜君不偶俗君本无俗肠诗味比孟浩文字摹蒙庄性复嗜孤洁安可居农乡左厢栖鸡豚右厢鸣糟牀念此虽纷纷无机迹易忘较之城市中此景翻为良春窗好风雨拭几焚清香自起汲新泉茗椀翻旗枪东郊正膏沃北山还苍茫驱犊过浅水捕鱼来石梁二三老诗人时时索报章有客来叩扉自谓老圃忙荷耒那肯顾种树须春阳悠悠世俗情谁与之等量【李子嗣雅名雅一字芥须同里人能诗晚年居东臯】

### 重晤方明农先生赋赠

桃渡诗人宅春水生柴门未到已七年相忆劳晨昏壁间画梅竹斑剥今尚存百卷螽山诗古调无纖尘高吟石城烟妻子同小园僻巷连野寺萧然如山邨入室古人在闭门吾道尊吟诗饮醇酒世俗安可论【先生名文同里人工诗隐於秦淮间】

### 燕子矶

我来宏济江髣髴悟画理河阳与云林工秀各一纸何处似河阳江流飞燕子奇石削琅玕清波织纹绮斑剥翡翠痕绣涩珊瑚紫一片如暮霞铺向空江水双松覆孤亭曲径石齿齿点染两渔舟潇洒真无比何处似云林东畔幽岫是老树晚烟中曲?层冈里霏微见城阙亏蔽出桃李古屋自参差重叠山岛峙波光接云影无从覓起止爱此不忍去蓬窗劳倚徙作画不在奇直欲画其似但得丘壑情居然成絶技天地老画师捉笔徒尔尔

### 双泉歌为念斋新筑草堂赋

紫云双阙绣芙蓉箫韶仙吹落天风殿上传呼出凤纸鸾旗细卷朝暾红繆子承恩御阶上赐衣五色宫云中金华才子虎邱客鹤髮堂前峙双壁暂乞承明着作身归来定省欢晨夕吴门市宅石桥头家有赐书藏小楼粉壁不屑鬪朱翠一邱一壑偏能幽古称养亲惟小园此风近日谁其俦叠石临流构书屋曲沼穿花漾新绿最是草堂初构时春风乳燕飞花蹴主人倚树看荷耒醴泉一道花间出花间初出犹涓涓甫经搜淙还潺湲水边石畔不盈尺一泉又出如珠聯品题谁复居第二味如北固江头泉我闻饮此令人壽琼浆石髓媲灵秀持此高堂介大年何必丹砂问勾漏繆子皎洁如泉清传家世世捧金茎当思此泉义非偶流膏布泽弥苍生异时绿野堂中人方许高卧泉频倾记我作歌今何时已酉寒食兹落成

### 霜哺歌【为袁重其赋】

袁子之母八十五星星白髮银丝缕哺雏饮血几何年依稀甲子将重数袁子於今亦髮白六

十犹作老莱舞从来上壽不易得节孝之人天所祐节孝何者最为难袁子蚤孤复贫寡母贫能节织作耕儿贫能孝笔作贾篋中赠言四十卷作歌之人半往古只今壽母壽且康白华新句年年补堂上堂下俱期颐霜哺岁月长如许吁嗟乎节孝之人天所祐【重其吴门人佣书养母见文士则再拜乞霜哺诗今盈数十轴】

### 吴门晤盛珍示却赠

斯文苟不废砥柱伊何人盛子具毅力手为开荆榛骐驎非凡才蚤岁已逸尘苍苍者何意遇晚气益淳树帜秦淮秋起草燕台春六籍探微义两京推茂醇文体方再变着作皆殊伦天风回紫澜海波无际垠陆离珊瑚光肃肃天庙陈海内拾余芳士类资鸿钧伊人一覲止投契捷若神愿言慰畴昔古道情自亲明日忽分手怅望吴江滨

### 赠敬亭鍾予夔

伊人有微尚深情在邱壑山水犹陈迹草木亦荣落不若笔墨间等闲写寥廓奇峰自奔会嘉树忽聯絡天地脱腕下五岳等糟粕展幅即深山卷之复高阁斑管作筇杖无离亦无着寄语书泉人此中有真乐

### 平陵宜山堂诗

我闻宜山堂结构平陵阳羣公争赋诗佳咏皆琅琅何处最宜山奇峰出短墙石屋一片云黛色暎簷簷隔帘见幽壑入户飞层冈枯藤与古木掩映多奇光峰影落清泉水面还苍苍何时最宜山山静觉昼长朝霞与夕烟树色分微茫春明山翠浓夏雨山风凉明月出远岫秋峰羣相望何人最宜山先生称古狂芒屨筇竹杖荷衣薜荔裳看山无朝暮一卷或一觴手招西爽来披襟从徜徉斯景与斯人是名宜山堂

### 为袁重其题画兰

画兰如作字笔墨在幽致微香出纸上兰露花间坠我爱霜哺人幽澹复无二安得入空谷采此以相遗

### 渡钱塘遇潮

晚云日将夕客子渡钱塘舟人警暮潮倚棹催行装篷窗一叶舟荡漾河中央匹练海外来如雪复如霜殷雷震层云巨石崩崇冈天地方肃杀羣舟皆旁徨远在千里外指顾犹微茫转睫类飞电玉山何琅琅东望连山陰北眺接余杭惊涛转地轴白虹贯天长客子邁奇观睇视恣徜徉对面高百尺几欲吞吾航舟子迎潮立捩舵随飞翔奔流四五里怒马收危繯小舟如覆轮逆浪尽溅裳我非弄潮儿胡不戒垂堂

## 同四松先生木厓叔兄如三游画谿得音字

好山名画谿披榛犹可寻曾经画船游流水空至今寒潭影千尺往往闻龙吟石色削苍玉谿声鸣素琴悬瀑如溅珠飞雨出空林天风吹不断积雪亦何深半亩龕公谷路入梅花陰台榭已非故松竹犹森森昔年荷池隈此日无蹄涔古砌延碧色惟有苔痕侵抚今思旧欢慨叹谁能禁岳梦【四松别号】山水癖明时蚤抽簪看山挈好友白云知此心捷比攀枝猿幽如坐叶禽甫在南礪石忽陟西山岑清响振林樾落落闻古音诸子互酬答各如探异琛一觴复一咏临流时自斟深林忽已暮仰见斜阳沉安得常相从涤此尘嚣襟

## 送内侄尧元还雄山

公子骋骅骝朝暮长安路金勒珊瑚鞭风流生指顾客从江南来离情复谁诉不谓骨肉欢转向天涯聚公子有新诗芙蓉浥秋露尺幅作山水落笔得佳趣惟此翰墨情可以涤纨袴纸阁罗青樽竟夕懽无度一朝忽言别明日雄山去手挽青丝纆系马白杨树入门拜两亲斗酒且深注咫尺春明门騫飞接鸕鹭杏花烟柳时兄妹盼良晤公子扶轮来懽游复如故

## 儿璚就婚于延陵示之

汝生十六年绕膝何时离讵知燕喜日父母天一涯千里望江云佳霭栖门楣金屋宝胜结绮阁流苏垂鸳鸯织纹漪翡翠依琼枝好借珊瑚彩饰此蒹葭姿琴瑟偕新声柳絮听新词堂上有大姑授经垂绦帷男儿可取法不独阃内师延陵好兄弟璀璨复冲夷叠翠百尺楼花竹何参差此中有奇书探索不厌疲倦倦千里心孺子宜鉴之愿尔当宾筵蕉叶衔且迟愿尔悬鹦鵒不报客来时愿尔画眉笔常点关雎诗愿尔鸡鸣警愿尔凤雏随一字当一缣寄尔深闺知

## 忆江南曲六首

忆江南忆在故园春梅萼未舒红豆小柳芽才展翠钿匀盘中蚤韭初尝客叶底新莺巧唤人临流入户皆芳树深红茜紫花无数何人挂起珍珠帘双双蛱蝶穿花去

忆江南忆在石城边桃叶渡头沽酒肆莫愁湖畔卖花田海棠树树堪铺席杨柳家家好系船蹋青都向城南寺可怜六代烟花地游人几个说兴亡年年木末亭边醉

忆江南忆在虎邱山鬟梳蛱蝶云千缕船系桃花水一湾石上亭台随处有人家箫管不曾闲南塘曲曲皆花市杜鹃枝压樱桃睡就中还有老翁家粉壁华亭两行字

忆江南最忆是钱塘冷泉亭畔松杉暗石锦塘边荷菱香峰顶平时添?影山腰缺处补湖光酒人醉卧吴山路潮头飞过吴山树城南万壑更青苍画中遥见西陵渡

忆江南忆在浮渡山奇石缕成金谷寺片云飞作紫霞关跻攀曲径松杉杪指点危峰杳霭间

最怜九带堂前路古藤霜柚交盘互安能散髮此长吟云中细数江南树【金谷寺紫霞关九带堂皆浮山佳处】

忆江南忆在二龙隈千家竹圃参差绿十里杏花深浅开春风曲径幽兰露细雨新香山谷臺游人春半应无数提壶竞蹋深庄路友人相约十年前空使山灵怨迟暮【大龙山产山谷臺清芬甘脆深庄为余友刘超宗所居】

墨庄诗【为王近微先生赋】

世味复何似缚束类牛马朝暮无息肩骇汗走辕下坐使朱顔人白髮空盈把我闻抽簪客蚤岁白莲社墨庄一片地萧然似林野散髮卧东轩披襟鼓南雅菜甲春畦绿墨渾清池泻书声出芦帘花香入栢笋三万六千日七十年潇洒所得良孰多可以决趋舍仰止此清风愿言最来者

怀贤诗【为业师齐古愚先生赋】

吾所北面人澹荡古君子传是中山裔易姓汝南氏【先世为中山族人後易姓齐】家世多伟人先生特奇傀蚤年罹苦辛潦倒饥寒里惟携一卷书移家渡江水为文尚气魄汗漫常自喜不合有司度三十犹尔尔敛彼惊异才屈首就恒轨百篇熟昌黎千回读左史落笔如春蚕转盼倏盈纸射石堪没羽气可搏犀兕文場比幽燕抉目无坚垒甲午秣陵秋已中浮图矢虽不获祖龙留侯诎云耻棘闱多嶮巇既收旋复委归来益磅礴骚经穷四始宏丽发庙谟幽细写物理有时鸣钟镛有时撷兰芷潘岳同许询挥毫各相视暨予弟与兄龙眠五子是迄今海内传颇会诗人旨激昂负奇气丰容色深紫饮酒或一石号呼中坐起雄论堪絶倒飒飒风生耳耻见富贵人避之去如驶终岁一布袍岸帻不纳履所居在穷巷数椽屋将圯出门无亲戚入门无仆婢雏女髮垂肩长女前岁死但有门人来问字相接趾人生遭百忧磊块积成痞曾无一日欢五十有三矣形貌忽然颓奇疾良有以诗书为药饵仓卒遽披靡破屋堆残书布衾覆牀第修文恐浪传吁嗟入蒿里皇天生斯人士穷竟如此二三故人来挥泪不能止虽无世俗荣昔贤良可拟諡之以敏介敢效门人谀【先生讳邦直同里人积学工文甲午乡试副榜】

梁家园泛舟

京洛苦蹄轮一水已幽絶况复乱苇中轻舠似吴越朝雨夕方晴最爱新秋节相将理短櫂弄此波间月荒池才数亩亭桥延曲折遂使荡舟人逶迤入林樾月明清浅流苇间秋可撷露下水微波舟动人语歇此时客方醉杳淼清歌发欣陪长者游壶觞况未竭击柝任相催幽赏詎能别

枯松行【同沈康臣作】

慈仁古松树苍老不记年高下近十株为态各自妍中有双龙鳞蟠曲香台前松顶近可摩高枝才覆肩屈彼百尺势空阶恣蜿蜒横侧益奇絕影若蛟螭眠涛声走平地双树撑如拳似此苍劲质止宜空山巔藉以一片石濯以清浅泉谡谡响絕壑垂手招列仙何将故山态老卻车尘边横遭厮养辱强索冠盖怜冠盖那复顾日落生寒烟一夕风雨过萎黄何忽焉衆松失顏色台殿增寂然惜彼凌霜姿遽随羣卉迁吾子勿复叹物各全其天

### 送羹湖之官开化郡丞

有客将为万里行将行未行余心怵欲往送之雄山陰滹沱一水空盈盈

朝廷神武开南服益州新郡滇南属蚕丛路辟百蛮归长官尽化雕题俗吾子新为郡大夫时平政简稀萑苻蛮旗如火迎且趋行行勿复嗟崎岖人生足迹不万里江汉吴越在庭 史迁才思冠古今名山大泽纷眼底子渊曾撰碧鸡文相如持节冉?君由来谿洞称奇絕天半益州常火云况君落笔烟峦起长歌奔放尤自喜九嶷黛色点苍山画里诗中各奇傀况君雄辯复英多骇心洞目如悬河一部滇南风俗通为话缅甸与牂牁才堪盘错今无二拊循尤能起凋敝雄关厮养杂穷黎两载畿南称大治六诏风烟向化新文身金齿旧逋臣韦臯特简西川使軫此炎荒絕徼人老亲七十犹强飮伯季承欢仲游宦显亲养亲各有人何事牵衣增繾綣君归再拜还登车王程努力毋踌躇明年玺书下南诏朝廷待尔承明庐

### 香漏诗【为叶炳霞母夫人作】

凄凄城上乌明星照东隅忽闻香漏声旋闻慈母呼慈母无安眠教儿何劳劬刻香如刻烛贯之以青蛛裊裊余香尽榆莢鸣铜壶母起灯下绩儿亦灯前趋从此书一卷宛转度朝晡自昔称贤母未若香漏殊愿言作短章广以勗吾徒

### 蕉林书屋图【为真定梁公题】

种蕉盈数亩碧色亦何深书屋三两间结构当空林云影无朝暮澹荡成秋陰微雨易为响时向书牀侵尘氛不可到凉风披素襟空翠满四壁茶烟乍浮沈此境邈难即画里犹堪寻吾师退食时高斋横古今数幅蕉林图常伴朱弦琴布置随笔墨取意皆萧森短歌或长句磊落存古今披图顿寥廓俨若空山岑焉知拥书者独抱苍生心

### 鹤来诗【宝应乔圣任先生年五十画小像甫成有鹤飞来因画於侧此鹤相依二十余年令子石林道其事为作鹤来诗先生讳可聘明崇禎年间御史】

青田有灵羽古称为皓鹤仙人王子乔跨之入寥廓碧天无际海云寛孤飞肯向人间落有客翛然池上楼苍顏白髮凌丹邱荷耒自种青门圃絕口不道东陵侯闲写荷衣挂秋室缟裳丹顶穿云出刷羽长鸣唤主人虎头回顾惊停笔从此香山居士图傍添一鹤如相呼水边饮喙月中舞二十余年时与俱先生服气颇好道爱尔闲眠藉芳草先生垂老犹读书一声清唳秋

晨蚤澹味闇修知者稀仙禽瑶草思依依不然翠壁丹巘多旧侶圆峤仙人呼尔归胡为花下随人常不飞

柴窑酒椀歌【曹颂嘉斋中同严存庵沈康臣赵武昔周緘斋曹升六汪蛟门乔石林作】

长安晴日秋窗暖曹郎酒客秋窗满持出牀头旧酒卮篋中碧色柴窑椀大朴不屑争离奇翡翠斑剥空尔为制如半截青莲子土花色暗苍玉姿悬知此物已千载沧桑几换今犹在人间岁月老糟牀瓦?田家同不坏由来珍异豪家争玻璃七宝徒纵横苦伴珠玉委尘土那能常对秋山清吾侪持此发诗思举手摩娑复频视问尔千年閱几人几人对尔能沈醉

馆中读书言志【馆试作】

清晓入丹地老树春陰繁和风动帘幕爽气来庭轩御河东南流天街静尘喧长廊集簪裾散步迎朝暾清晏多休暇四壁罗琴樽琳琅探艺苑六籍欣尚存石碣何离奇古字侵苔痕纵目涉沧海振衣当崑仑浩浩发胷次藉以度朝昏渊默领微义得意时忘言常与古人处因知吾道尊诸家间旁搜百川同一源含英而咀华如袭兰与荪诵读愜素怀皆藉涵濡恩聯袂登玉堂方驾趋金门匪赖贞洁操纷华安足论遭逢当

圣代咫尺隣九閤愿言赞

王化元气日以敦澹泊复宁静撑拄流俗奔昔人崇令德矢志期勿援

十二砚歌【为蛟门舍人作】

汪子卧病不出尸棱棱瘦骨吟新诗牀头一卷探相示十二砚歌恣离奇自言梦中入广厦濡毫研墨方淋漓纵横俱是老坑石龙蟠虬卧苍玉姿此物那可使无主就中十二欣自持汪子性僻耽笔墨神物来贖夫何疑惟砚以静而得寿笔以日计墨以时镂心鉅肺亦太苦将母此意良可师吁噫嘻湘帘垂几一片石朝耕夕耨常苦饥呵冻手皴无气力弃掷屡遭妻孥嗤一石磨穿亦已足龙尾十二将胡为

为吴五崖题王烟客太常画卷

奉常老作西田客剩有闲情写泉石古来笔墨非浪传高人片纸如和璧况复烟云兼衆妙浓澹苍深非一格门外红尘没马蹄故山云树江南隔愿常对此涤胷臆闭门坐拥千山碧

益咏堂诗二首【宋荔裳尊人为顿邱令邑人德之为建益咏堂尸祝焉】

畿南顿邱路漳水秋山陰哲人昔为宰流风还至今父老食旧德欲语涕沾襟下车翦稂莠不使嘉禾侵理民但静治手挥单父琴堂上撒桁杨堂下生讴吟每读循吏传怀古意何深

巍然益咏堂乃在秋山原棠陰旧时路亏蔽见庭轩岁时父老来再拜罗牺樽筵簞走妇子击鼓闻千邨昔人亦已去风土怀旧恩朱邑安桐乡且以嘱子孙知公恋兹土窈冥来朱旛前有霁云祠相与招忠魂千载顿邱路灵爽常弗谖【邑有南霁云祠与堂相望】

### 送宋荔裳观察西川二首

东海宋使君骚坛数前辈百卷诗古文苍深侔泰岱昔为越州使覲闵几颠蹶三载客长安

君恩许重赐旌节向西川嘯咏江山丽曾听祭臯陶清词堪出涕洞彻犴狴情髣髴如图绘以此理桁杨臯陶良不愧劒南号阻絶案牘多沈滞文人往振肃自识无刑意哀矜慎勿喜斯言足永佩【祭臯陶为荔裳所撰杂剧】

杜陵老诗客自昔居夔州瀼西筑草堂吟咏空千秋相如杨子云此地多淹留君行渡锦江俛视三峡流长歎探遗迹浣花谿正幽好筑二乡亭高临谿水头昔人不可见宋玉今其俦自秉严武节不似临邛游文翁尚雅化觴咏登高楼从此锦江春古今遥唱酬【荔裳有二乡亭记谓睡乡醉乡】

### 文端集卷六

# 卷七

钦定四库全书

文端集卷七

大学士张英撰

存诚堂诗集三

古体诗四十三首

送唐偕藻侍御请假归闽中

与君识面时同作金门客我方遘百忧君亦振六翮江湖各三载重遇长安陌同人如晨星数点秋河隔惟吾与之子相对庭槐碧古槐自亭亭苦心比茹檠我住空尔为君行诎非策故山瘴海滨荔枝香可擘经年且休沐暂许还山泽君子重致身况复当言责苍生今何如廊庙资谋画行行非徒然民瘼贵探索归来献

天子宣室方前席勿忘短檠时永言念畴昔

题画

白沙碧草江邨路夕阳古寺人争渡天风不起水微波萧萧落尽江南树此景依稀秋浦湄自呼小艇渡江时十年犹记行人苦风打篷窗雨似丝【余癸丑春闰分校前一日】崇勲德寿图诗【崇勲德寿图髣香山故事图中九老为少司农谢君路然年七十八督饷裴君长山少谢君二岁山左开府张君英寰年七十五八闽开府刘君磐所粤东开府董君捷轩年七十四八闽开府徐君吉吾直隶开府潘若世衡年七十三鄢阳开府张君仙羽山左宪副刘君诏轩年七十皆丰沛旧臣为国家任节钺晚岁致政相与觴咏间适以乐太平因画斯图其事良可纪述同馆王子帽谷持索诗遂书此】

国家资神武驱除委长轡麟麟多钜公鹄起风云际精灵发川岳轮囷苞元气不独兼仁勇期颐且驯至晨披九老图悠然见高致当时佐景命宣力亦已瘁齐楚或闽粤节钺江山丽老来致政归高隐金门地雨阳岁有秋清晏时无事羣公相招随杖履成嘉会骨相皆天人须髮丝还翠茗棋适所好壶觴成薄醉倚徙近竹林流盼当荷芰犹能落金弹欸段秋原骑旷然见天真萧疎寡尘累洛水与香山斯图得其意岂惟麟阁标亦且西园记赖兹翰墨宝邦家永为瑞

送徐健庵编修南归



昔从吴门游坐上识徐子盛名三十年文坛如岳峙分手入金门宿将幽燕起对策承明庐  
唱宫云紫予再入长安蹑影蓬莱趾博雅重徐陵便殿常承旨诗思若春蚕挥毫金凤纸冀北  
收骅骝文章新壁垒只今鸾坡上烦君种桃李进贤受上赏况复皆国士琢成珊瑚枝照耀明  
光里翻令采珠人遥遥隔湘水日夕登君楼清琴伴图史黄花正秋风一朝去如驶纵道彩衣  
欢莫恋蓴鲈美心知非远别歌声皆变徵

### 送桂林太守之官

古重二千石五马黄金络位比大诸侯万井同忧乐朝廷欲置相先俾视民瘼渤海与颍川功  
名亦非薄异哉今之人勲业等糟粕惟知公辅安争说盘根恶挥手春明外意气先摇落所以  
昇平化邃古不相若程子官职方枢密资谋度声名照华省文章亦雄博一官守桂林正可抒  
所学瘴雨蛮烟中五岭带城郭炎荒远

圣泽民命君攸托瘠土望膏雨絶徼纾方略钴鉞潭幽深湘江水寥廓公余入吟咏新诗满巖  
壑

天子徵贤守玺书下黄阁一片郁林石归伴南来鹤

### 为石林题拓谿草堂图

石林斋中悬尺素披离满幅多奇树湖光千顷浸柴门数椽古屋临荒圃问君疑是江南邨指  
点为言柘谿路柘谿今日之青门老亲五十归邱樊齿髮只今八十余渚鸥汀鹭供朝昏我闻  
此语肃然敬先生抗节如松劲少簪直笔弹要津老读残书悟天性君今图画多深情心在江  
南身

帝京归梦迢迢柘谿去醒来壁上烟云生今年挥手承明庐射阳秋水上鲈鱼归看青山侍华  
髮柘谿深处草堂居我披此图看不已身入画中当何如【柘谿为圣任先生读书处】二月  
二十三日过念斋观画扇因成十五韵

长安花事迟二月风瑟瑟巷陌驱尘沙怒号且终日纸窗如鸣蝉无心就书帙借来弩马骑冒  
寒偶然出巷北过巷南遂造静者室小阁凝清香虎皮印双膝童子两三辈独居寡俦匹人如  
僧出定言笑皆简质为我开锦篋搜罗古人笔石田与包山洒墨果清逸方探林壑幽忽讶花  
房密流传皆百载墨光黝如漆兹事虽小技不朽在真实与君忽三叹奈此流光疾着作与勲  
名千秋竟何述

四松先生寄予古诗用昌黎赠张秘书韵从敝簏中检出益增悲感因次和之

开篋展君诗鹤唳清秋闻风流自骀宕光仪如见君古镜寒潭碧背隐蛟螭文娟娟花下露裊  
裊谿上云三年客子俱怀袖扬余芬宝此耀贫橐还以慰离羣平生学昌黎今古谁能分持节

曾絕塞司马古参军饮不盈蕉叶苦吟常自醺对客日数幅落笔皆氤氲千篇留上谷一官何足云【四松为上谷司马弃官归四松斋】归来四松下尘缘谢糺纷弥勒同龕食经时不妨葷荷芰制为裳薜荔裁为帟古调越流辈俗响如秋蛟高风溢里巷浅薄资陶薰斯人亦已逝寂寞归荒坟春花日堪把秋草又将耘不朽尚言德何必资功勲长吟泪盈把西阁倾斜曛

### 三兄五十初度成四十韵寄之

伊彼鵲鵲鸟夙昔同一枝壮者毛羽成穉者娇且痴引之翔高林还与戏清池低徊三十年饮啄常相随一朝分飞去各在天一涯况我与叔兄年少逢嶮巇九龄失慈母保抱多恩私吾兄走文場予方佩象觶相将石门路老衲同栖迟灯火照空山书声出茅茨嗟予已十五惟耽游与嬉修竹路冉冉櫻桃花离离带之以清泉至今有余思城南峙高楼古壁将倾欹荒池溷鷺鸭坏圃纷柴篱叔兄携书往予亦肩随之渐知父兄教立志颇不移天风响危檻明月临阶墀乌啼星复落鼠囓声何悲咿唔达中夜苦为比隣嗤秋风秣陵船江路多艰危季弟偶见收吾兄还数奇数奇不复叹归来理东菑横塘绕荷芰小阁对沦漪衆芳密如箐一岁皆花时弱女已婚嫁强仕方有儿惆怅上东门送予当路岐离别各老大京洛空尘缁古人重宦达千载以为期今人不知耻劳劳驹影驰自顾镜中顔惟添颊上髭觚棱双阙间晓入晨光曦不能竭涓埃趋走空尔为纸窗展书读复为尘事羈惘惘念乡国屑屑谋晨炊遥遥羨鸿鹄耿耿难置词久知宦与游不及耘与耔此理已深悟欣告不复疑叔兄今五十五载睽光仪生子已就塾蚤慧有异姿琅琅听书声可以长自怡园林艳榴火櫻笋堆花瓷修林叫白鹤深绿映黄鹂一觴复一咏文采发新诗叩门皆旧友高谈无愧辞况乃远兵革间巷犹恬熙幼弟颇能文仲兄髮如丝龟勉述祖德明发思所贻勿念京洛人浊醪常自持

### 孝仪客予斋中见投古诗奉答

我友亦已困毛羽丰且妍高文擷天藻奔滙如长川新诗复澹宕落笔秋露圆珊瑚错明珠满泛波斯船京华久不达失意空茫然郁彼乔松姿耻为萝薜牵吾道敦所积春华岂常鲜文豹蔚神采雾隐空山眠硕果经霜垂气味翻得全转因息六翮摇落相周旋小斋横素琴半榻堆陈编得淹君子驾欣赏多奇詮努力勿复叹辟此榛芜田万里渤海流千仞蓬山巔与子驾鸾鹤相将凌紫烟临风颂君子秉志期益坚

### 戏拟吴宾客俨四时词皆故园所有北地独少者及之

垂柳暎晴沙清泉试蚤茶野人带朝露遗我幽兰花兰花香度湘帘影黄鹂唤处人初醒

杜鹃红??满院蕉陰绿新笋夜来添荷锄入深竹深竹门前系钓船为送鲋鱼第一鲜

橘柚悬霜圃历落殊堪数风起满城香桂花作秋雨秋雨秋风试杖藜芙蓉开徧石塘西

楫枻耐宵长炉头煨芋香窗白非关雪梅花映草堂草堂天竹当檐树火齐珠光照缣素

## 送王藻如宫赞归省

青门数耆旧独有西田翁世泽冠宇内门阀如恒嵩簪绂卧烟霞吐纳皆宗风有时洒翰墨能侔元化功声名与大耄焜燿人寰中乔松?瑶草硕果垂芳丛子孙多贤达雅不乐西东挥手谢轩冕追随龐德公幼子官侍从才誉擅青宫西清铃索间游子各有衷憬彼城上乌岂学云中鸿车马上东门转使予心忡三公输一日何敢惜忽忽愿言承欢暇念旧邮诗筒

## 挽陕西提督陈忠愍公

观德殿西曾侍立蜀中虎将双趋入【公讳福时同陕督王公进宝皆以遴选总兵自蜀召入命射观德殿予直起居注得与观焉】眉宇英风动阙庭雕弓万石时无匹

## 内殿承恩锡宴频史臣当陛记温纶

## 御筵屡赐金盘食

天语琅琅感侍臣陈公作镇古灵州持旄建节当新秋是时海内方宴然风清铃阁闲兜鍪逆氛涨天西南起劔门阻絶连湘水秦陇岷洮藉重臣惟公忠勇堪凭委志殲羣盗靖西陲不教花马作潢池方看小丑投戈日恰待游魂入釜时志酬马革悲何蹙星沈虎帐惊栖鵬军中痛悼舞陰侯举朝感叹来君叔可怜百战垂成功血洒灵武多悲风

## 天子当宁动顔色易名赐爵恩数隆愿得忠魂抚长劔一掃西南櫓枪空

## 送曹峨眉同年还江陰省亲

京华作客谁最难京华归客谁最欢眼中之人见曹子片帆六月离长安曹子有母不得养惘惘对客常心酸今年尺书上承明乞身南去归江城过我小斋忽狂笑两腋轩举凉风生眉宇已是云中鹤樊笼将别毛羽轻自言十亩江陰宅古树苍藤覆墙碧邃阁萧疎竹满窗芳园烂漫花围席愿言将母余何求嘉果新蔬日堪摘曹子雅嗜韩柳文落笔排宕生春云朱弦疏越振遗响淫哇促节空时氛却抱残书涉江水江陰八月蓴羹美华髮千茎板輿上奇文一卷荒园里不分吾侪日相见养亲着书让吾子

## 六月十一日座师给諫荏平王公招同年诸子宴集郭外荷亭值雨坐上分得客字

夫子宦京华独抱烟霞癖雨霁偶招携相将振短策谢彼车尘喧来就荷亭僻荷亭临水开深柳沼谿碧翠盖翻微凉萧疎动絺綌好雨西山来云气峰腰白雨势逼荷香尽来侵几席须臾转晴霁林外炎曦炙故将烟景好天意娱闲客时艰良会稀佳辰莫轻掷回首畏红尘坐待山光夕

## 秋夜听络纬声

络纬本秋虫瓜棚饮清露粉惭蝴蝶翅艳谢蜉游羽寒怜蛩语阶高怯蝉吟树耻为促织争豪家作金注机杼终夕劳不能成尺素童子爱追寻苦被微声误朝辞豆花丛暮入樊笼固瓜叶何青青时向樊笼哺草虫本微姿跳踯转惊怖吟声久断絶意与儿童忤偶然时一鸣都无向来趣昨夜樊笼开双双一朝去小庭藤影密叶深不知处转向青葱中相对连朝语咽露餐新凉繁响达昏曙嚶嚶类苦吟切切如悲诉满耳皆秋声小斋若园圃午梦客初醒听此涤尘虑物性贪所适妙理得深悟徘徊夕阳下斯物良足赋

## 送孙杞瞻学士归省

德清学士住菱湖七载声华满

帝都金石千言丹陛上珊瑚百尺紫庭隅紫庭丹陛红云起魏公名唱红云里晓日葳蕤上苑花春风清浅蓬莱水

圣人讲学经帙开数许儒臣内殿来阁里陈诗轻沈宋筵前献赋薄邹枚讲僚晓伴封章入起居注史西头立凤纸光腾殿角云龙缣色映花砖日殿上仙庖出大官侍臣常得奉余欢分来

御醴黄金碗赐出宫樱赤玉盘千古君臣重知遇孙绰承恩夸异数珥笔新成射虎歌【杞瞻承 诏作射虎歌】属车屡上甘泉赋南苑秋风万骑屯龙旗嫋嫋不闻喧书生射得林中鹿回倚雕鞍谢

至尊追随予亦来行殿直庐讲幄时相见天香衣袖各分携高阁珠林赐游宴【诏同游玉皇阁德壽寺】六军试马晾鹰台特诏儒生欸段陪饶吹晚来归毳幕红灯相对咏龙媒【承 诏同作良马诗】最是新秋秋雨歇万点青山如挺笏吟断行宫柳外风看残帐殿云中月方輿此日正昇平銳意崇儒偃甲兵燧燹乍惊叩焚起妖氛忽自夜郎生三年南北军书剧细旃广厦犹前席同君午夜听鸡声觚棱晓入星霜白知君结念在夔龙动色琅琅彻

九重自是丹心词剡摯敢言春殿语从容羨君鹤髮双亲健

圣泽亲恩劳纒绌为听乌啼感至情岂因鲈脍思肥遯手持丹诏谢彤闱身惹炉香着赐衣泉石旧谙游子处江湖新有侍臣归余石谿边花作圃朱萼堂前玉为树九天阿阁凤凰羣暂卧沧洲狎鸥鹭秘阁文章待彩毫着书何必向林臯谩言昼锦乡园乐还念宵衣

## 圣主劳

## 送徐方虎编修归省

海内徐孺子博雅今儒宗盛名三十年韞?如洪钟赋诗掩鲍谢幽洁如兰丛经史贵穿贯渺旨靡弗穷若陟泰华巅岳渎罗掌中清时发异采天庙陈璜琮释屣跻玉堂高举凌阊风鸿笔为国宝讵止徐陵工

至尊坐清燕赐问常从容艺林号多才称徐衆所同酷暑试殿廷腕下奔虬龙动色惊宰相高置蓬山峰今年谢承明请急归江东甫为阁上鸾复为云中鸿津门泛吴舫江畔攀芙蓉爱日承余欢板舆方侍从

### 东臯篇寄李芥须

吾里自昔多诗豪澹荡磊落推东臯平生嗜洁老成癖等闲若浼嫌吾曹天才排宕兼衆妙长歌短句凌风骚净如好女对明镜壮如碧海奔洪涛秀如摩天阊州石快如翦水并州刀落笔奇气横九秋俛视侪辈声啾嘈壮年足迹东南徧十指天际舒彩毫琼海珠江归去来功名敝屣轻鸿毛一卧东臯今老矣酒肠诗兴空终袍拍手犹令四座惊萧疎短髮时频搔日坐柴门望老友瓦盆为客开新醪卧我小亭辄信宿七载不见思郁陶欲谢风尘息倦翮明年秋水乘轻舫愿君善饭使君健相对剧饮双持螯

### 赠东海董生

宇内奇观海为最董子收之襟带间推窗夜半看日出赤霞万顷涛如山海市人生不恒见君直视如檐下电旌旗城阙摇空蒙海风吹作云千片自言结屋荒山中苹婆手植千株红梨花如雪间梅李十里烂漫吹香风枯藤奇树无不有春菰秋蕨绿盈亩布袜青鞵老道人十载长斋未除酒吟诗经岁客长安气如沧海翻紫澜颊上髭须老犹壮意中鸥鸟天何寛东来秋色海云黄诗人归卧陆浑庄此时天地风尘客各忆南山旧草堂【董生名樵东海隐者】

### 题四知图为魏环谿先生

关西孔子杨伯起四世清德光前史岳岳千寻絶壑松泠泠百尺寒潭水纠弹内嬖排羣奸正色昌言肃纲纪一笑黄金谢故人但将清白遗孙子吾辈读书何所慕守身爱鼎应如是晚近脂膏最误人吁嗟此义成糠粃环谿先生迈流俗关西前後真同揆生平亮节远相师凛凛四知一端耳夙抱忠诚感

### 至尊抗疏常见

天顔喜门巷萧然时着书脱粟留宾如素士吾道有守方有为君子不贪先不侈敬藉此图为公寿愿以清风受繁祉更爱传家秉与彪三鱣世卜从公始

### 题嘉庄农隐图

久欲结一庐当在南山阳去郭数十里  
亏蔽登崇冈山翠四围合一径穿谿梁  
其中土膏沃散布诸农庄中央数十亩  
寮之以短墙一宅置妻子纸阁依茅堂  
余地恣种植古木罗千章梅桃各一区  
果蔬各一塲花开接四序烂漫庭阶芳  
冬煨温室火夏拂水亭凉温室藏晚花  
水亭?高杨高杨带清池荷芰吹微香  
倚树间有屋看花必有廊帘前竹万个  
坐隅书一牀开窗落峰影隔树来谿光  
邨居皆淳民但知说农桑鸡豚亦有政  
耕凿亦有常一川稻粱熟八口资为粮  
夜来机杼声终岁裁为裳新蔬翦樊圃  
鲜鳞出陂塘饗殮称时足鄙嗇庸何伤  
好友二三条促坐倾壶觞安知末俗漓  
矫首谈羲皇毕世无外慕通体无俗肠  
宠辱不能铄忧虞不能戕其俗静而治  
其人寿而康平泉何足齿蓝田何敢望  
日坐尘网中此愿空茫茫梁子嘉庄图  
倏忽陈吾傍委曲肖鄙意叫歎几欲狂  
回首眺乡园远在天一方人生贵所适  
安得久低昂休哉陶靖节千载谁等量

### 题赵武昔小像

高梧?丛菊澹荡铺秋陰片石倚幽草  
鸣泉激素琴中有冰雪人爱静复耽吟  
退食常拥书迢遥观古今夙有苍生志  
金门久陆沈怀抱日绵邈川岳同高深  
赋诗续古调历落皆雅音一杯聊在手  
浊醪还自斟日夕坐秋色梧菊知此心

### 寄木厓

当代有诗人萧然隐薊轴蚤年驰盛名  
晚岁耻干禄天才本高隲经史盈便腹  
千秋夙相许名山藏敝簏少陵与香山  
同工还异曲君吟四十年遥遥踵其躅  
长篇极浏漓短章无局促有笔写胸次  
何为苦缚束真能学杜白岂在娱尘俗  
闻君理旧诗篇篇总堪读吟向石经斋  
天风响寒竹高堂今大耄眉映贞松绿  
母子俱闻人海内所瞻瞩人生贵不朽  
岂在曳鸣玉谁能六十翁霜髭犹啜菽  
相赠白华篇期君介景福

### 送徐艺初归崑山

我闻琼玉峰正当君家楼连理三珠树  
兹事空千秋警欬被寰宇宏獎皆风流  
畴昔握手欢契濶滋繁忧同朝日瞻企  
春风听鸣驄长公蔚文采眉宇天人俦  
貽我威凤篇古调谁能酬鸿宝自希世  
息翮还沧洲怅惘春明门芳草送华輶

### 哭信臣

嗟予束髮初衆中识吾子鸾鹤本异姿  
珪璋有静理眉宇在霄汉清言寡尘滓  
寒潭何湛湛山岛自竦峙愿言比君心  
此语差复似登君宅畔楼赠缟从兹始  
十年走名塲相将执鞭箠堂上各老亲  
华颠豁衰齿区区人子心愤激深相砥  
含英复咀华终岁无停晷君才本秀瞻  
摛文如结绮一日不相见新篇盈数纸  
丹铅互校讐斯道无坚垒同负秣陵秋  
泪落秦淮水老亲良苦辛结屋龙眠里  
山寒送米蔬宵凉齎襦被雪片对茅檐  
梅花覆庭布袍如枯僧寂寞侵?髓岂  
谓终不达数奇竟如此薄宦来荒城博  
士斋空圯苜蓿无朝餐宿疾焉能起寄  
我尺素书悲歌

皆变徵徘徊能几时消息传蒿里稚子真可哀慈亲复何倚天问总无凭理数谁能揆追念平生懽故人今已矣悲来戕五中挥涕不能止远在天一涯无由哭灵几坟边春草生始作安仁诔故人知我心千载恒如是【周子信臣名孚先予同学友能诗文卒於五河学博】

### 题石林临流濯足图

振衣千仞冈濯足万里流壮哉左太冲斯语空千秋家山曰龙眠近郭偏能幽灵巘叠苍翠衆壑烟光浮悬瀑似飞雪落向千峰头谿中石齿齿太古苔痕留灌木垂清陰水鸟衔文儵我欲濯纓往拍手呼浮丘东华万斛尘恐为山灵羞石林作此画雅与予意谋矫首睇云鸿浩气凌沧洲雪肤暎寒泉本是仙人俦素琴横草间弹罢行复讴怀抱极寥廓天地皆浮沕何况我与君身世如蜉蝣栖栖竟何益扰扰将焉求披图各无语对此销繁忧

### 孝仪廷对第一喜而赋此

灼灼明月珠垂光照紫庭黼龙匿其宝潜耀居沧溟悠悠十七载龙睡无时醒今年驾洪涛天矫驱风霆忽令径寸珠天衢缀华星我友虞山客乡举同一经凤麟毓文彩河岳鍾英灵与我频年交相顾如影形长安风雪中蓬户曾偕局短檠入深夜露白鐙逾青书声和鸣鹤激楚呼高冥

圣主方好贤赐第冠丹屏雏燕乘阆风同时舒彩翎【儿瓚同举进士】之子素宁澹结念在千龄荣名以为宝赠子惟德馨

### 松声万岭篇为木厓母夫人赋

长松挺姿冰雪里苍枝团盖烟光紫松涛拂地横九秋谡谡声从高阁起中有仙人鹤髮垂传家仪法真吾师咏雪餐霞八十年朱顔烁灼如瑶芝夫人之母吾老姑延陵世德生贤姝落笔不肯让班史男儿枉自矜髭须晚年雅志耽禅静晴窗自写维摩影宵来常见佛灯红晓起时闻清磬冷令子名坛盛羽仪能将色养佐含饴间居共赏安仁赋家学争传阿母诗石经堂畔萧萧竹闻道新来森似束桂露方浓兔渐圆红烛锦毹照华屋游子辞家已十年冈陵遥指望江天霜鬓霞裳阁上人听我松声万岭篇

### 八哀诗

康熙六年同榜进士与予交谊敦密者已亡八人因作八哀诗

### 黄舍人仍绪

东吴有岩邑沧海抱孤城中有简寂士公车来上京对策冠南宫董贾驰声名文章挟元气浑颢陈韶黼貌古性复僻耻与时俗争蛰身书卷中布袍依短檠十日不出户门径蛛网生有客

或相召羸马将来迎向客顰两眉多是歔歔声斯人閱斯世磊块焉得平人生有百忧底事羣来撓旅魂倚僮仆朋友书铭旌复闻玉树折使我心弥惊

### 沈刑部应范

沈子工诗翰潇洒山陰客五字芳如兰鲍谢踵遥迹初读采山篇清思已奔绎中年气益醇杜韩堪避席落笔褚河南纖秀无拘迫拭几焚名香修洁嬾成癖篆隶兼衆妙书成自鑪石洞箫或在手雅令佐浮白道气令人静好友藉三益络秀本明慧京华共晨夕病起俄复颠才华世人惜篋底有遗笺宝爱如珍璧

### 潘黄门翹生

黄门伟丈夫食牛气恒鋭乡举曾冠军雄文发经济饮歔亦可观高谈裂双眦词曹入諫垣结念在匡世仰干黄屋尊頼切苍生计寥寥朱檻间伉直谁能继壮年顿销歇声华忽幽翳豫章久用兵妻子苦颠蹶闻说戎马时江干正留滞谁当念故人为理荒山碣

### 史编修鹤龄

古人善体物濯濯春柳姿我友濂江客风度恰如斯清才照艺圃习习香风吹落笔秀天下蚤被

人主知分来金凤纸真草恣所为学士如堵墙观君临墨池须臾百幅尽墨渾看淋漓春殿开讲席我与同追随共拜紫貂赐偕进朱櫻诗一朝返江浒风折琼树枝屡邀

当宁叹宠恤偏恩私还使素心人五载泪如丝

### 张编修玉裁

伯也京江????声华照吾党指顾多英姿风流任宏獎春泉比才思朝霞俪融朗蚤年颇落拓壮岁冠珠榜百尺紫珊瑚已跃沧波上犹忆玉堂夜广厦连书幌中宵起读书互答空庭响予既理归舟君亦泛兰桨同作江南人一水劳心想诂意明月珠埋光忽泉壤频把别来书临风增怅惘

### 夏编修沅

京华对衡宇好友如君稀君如宝在璞山岳含其辉骨重复神寒温密无鍼机摛辞尚典要书卷堆四围十载雅投分纏绵意入微下马登君堂釋子牵我衣一日不相见三秋如调饥东门风雪中送子衔恤归江临北固山松筠堪掩扉经时不寄书忽同朝露曦竟符乘槎?使我长歔歔【昔有术士谓君当应乘槎之会果以八月卒】



## 杨检讨仙枝

简人磊落士翛然谢羈鞅清风满四座尘虑为君涤本是嵇阮俦眉宇气陵轹草书颇腾骞琴声出东壁吟诗爱陶潜嗜饮师王绩倏尔微醺余更不进涓滴食贫甘如饴怀抱从所适丧亲与悼亡哭子兼衆戚言返泽州山诂意音容寂中边皆至性斯人难再覩

## 刘编修泽溥

我闻李长吉白皙长指爪君貌酷相类祝君惟寿考屈指眼前人惟君致身蚤温温良玉姿春容满怀抱夙慧本天成抒辞若春藻照耀巖廊间人共钦其宝抱病还中州丰仪乍幽窅人生石火微复如电光绕如君益可悲身世何草草坟前穉子稀堂上衰亲老招魂魂岂来雪涕问苍昊

## 读元道州贼退示官吏诗慨然有作

我爱元次山诗篇独简质短章如长谣仁心自洋溢至欲委符节甘心采菱实昔人志康济岂云耽暇逸置身君民间无能澹忧恤汗颜拖长绅不如腰带銓古人耻旷官斯义久萧瑟谁无湖畔山浩歌抚遗帙

## 寄王农山先生

海内今耆旧屈指农山翁高文昔馨炳葩义骚坛空弱龄知向往私淑曾南丰琅琅殿陛声綉斧乘花骢辞荣蚤挥手归卧巖壑中九峰三 间霞翥扬清风幸慰畴昔愿策名随长公季子复联翩牖唱宫云红瑶圃三珠树光气如长虹史笔须大手讲幄资元功先生年杖国鹿驾桓君同相对骖鸾鹤华髮映方瞳愿言祝期颐曦照扶桑东何时蒲轮来下管聆新宫

## 兴朝仰人瑞士类荷帡幪

## 送田纶霞督学江南

夙昔有微尚雅慕恬澹人风流推独步高洁由天真龙门百尺桐孤芳谁与隣虽寡握手欢胶漆如有神论文入微密谈诗辟荆榛登朝十七年著作今等身振笔摇海岱矩矱皆先民士气嗟濩落大雅久不陈葺户单寒子眉蹙何由伸

当宁简邦直朝议争推轮兵甲会偃息文治期维新经术藉模楷风教资陶甄大江南北流浩浩今还淳菁莪翼王化梗楠储国珍归来报

## 天子事业在人伦

文端集卷七

<集部,别集类,清代,文端集>

# 卷八

钦定四库全书

文端集卷八

大学士张英撰

存诚堂诗集四

古体诗三十首

题羹湖画田家图寄孙鉞卷子

生儿不愿振长缨曳华裾结驷游天衢但愿提壶挈榼常追扶生儿不愿腹盈笥思涌泉摇笔凌机云但愿惓惓讷讷耕且耘生儿不愿朝楚越暮燕齐结交少年行但愿出作入息依农庄人生百忧缘富贵悲喜宠辱煎我肠譬如白鹤铄其羽霜天仰视空苍苍羹湖一纸二丈余杂沓画出田中庐呼童隔水饮黄犊抱孙着膝巾柴车山畔无云不宵霭谿边有树皆扶疎蓑笠桔槔无不有岸有鱼罾梁有笥疎篱垂蔓故侯瓜小亭低拂先生柳青旗卖酒山桥市银钗汲水田家妇我闻仇池有百泉四围奇石撑青天只今荒为豺虎宅何人更种峰头田我闻桃源古避秦谿流岁岁桃花春只今戎马蹋作泥妻儿零落悲酸辛吁嗟此图不易得羲皇之人华胥国天外三山蜃气楼先生空费一挺墨老翁新自战场回支离奇骨犹崔嵬看舞宝刀刃如雪听飞铁礮声如雷譬彼夜半出恶梦剔灯自视还惊猜自写此图涤胸臆腕底布置真奇哉家园千里寄雏孙老亲一笑慈颜开况我对此不能舍长吟短句增低徊何年共君挈儿子谿山深处欢相陪鸡豚社酒无穷事肯让陶潜归去来

读陶诗慨然有作

穰穰今昔人天地为席幕富贵多忧虞贫贱常落魄投网恐不深谁能解其缚身非金石坚万端自消铄志愿何穷极如剥新笋箨人生道力浅随处得沉着夙昔有微尚苦欲谢羈络常恐衆人是惘惘吾独错我爱陶徵君胸次颇寥廓忘情寄麴蘖避世憩泉壑岭上白云飞松间夕阳落三讽陶家诗微知顔子乐

送运青出守姑苏

古重二千石五马扶朱轮简自承明庐卧治多儒臣况乃东吴郡延袤沧海滨贡赋雄九州岁入千万缗土狭苦人满绣错纷如鳞曲技恣淫巧优贱工谐颦朝或冶服游暮衣百结鹑赋急岁恒俭俗侈户益贫

当宁屡叹息除吏常逡巡卓哉西蜀士黄绶耀新纶昔年共鐙火随步丹地尘峻格凌巘松直节媲霜筠?异视流辈耿介难与伦高才理盘错运斤若有神声名彻廊庙顾问恩数频一麾领吴郡桑梓来祥麟望风驱墨吏解慍苏疲民既令疮痍起还令风俗醇人生非乘轩康济何由伸东南民力竭一语为君陈

### 题石林桃花钓艇图

春烟春雨朝霏微苍翠绰约山四围谿清鹭白桃花飞新涨昨夜侵渔矶中有仙人忘尘机扁舟散髮迎朝晖白苧新裁短後衣吟诗最爱陶与韦枕书抱膝思依依遶船流水花芳菲银鳊缩项甘且肥此乐不遥知者稀主人方直彤云闱白玉为堂花紫薇史笔在手不停挥匡时有愿且莫违湖边为我掩双扉渔竿嫋嫋他时归

### 修堂丛桂篇【修堂为子弟洵仲华芑辈读书处】

大参旧第城南隅亭有丛桂兼高梧苍顔斑剥花烂漫百年世泽涵且濡上有饮水嚙雪之寿母下有翔鸾翥凤之羣雏寿母琼枝本桂林谢公掌上双明珠佐我叔父蚤成名翩翩藻彩扬天衢二十年来多苦辛大厦只手劳撑扶家法峻肃迈朝典朝昏教子真勤劬大纲小纪各有政闺门矩矱天下无愿奉叔母为矜式季兰衆嫺皆师模诸弟才华复敦硕骐驎络绎登

皇涂有弟三年住京国联牀与我形影俱温温恭人良不愧孝友令誉腾燕都几回短檠话深夜细听方知母教殊今年齿髮初甲子华筵旨酒罗笙竽江南草绿杏花时修堂遥望增踌躇敢藉阶前丛桂影天香写入南山图

### 马兰峪古松行

古松铁干苍还赭虬蟠虎卧长城下遥看翠色起寒烟近讶苍皮侵古瓦碧云一片低不飞松顶平铺复堪把紉枝往复如有神奇姿劲挺谁能写黄冠白髮不记年塞月边风自潇洒特标孤节凌穷冬更送清陰涤烦夏影闭荒城鹤不栖梢入空堂露常泻落落耻与羣木俦所悲幽人在中野挈云干折为悬弓覆地枝残因系马等闲夜半起涛声关山谁是知音者

### 徐立斋前辈自学士擢总宪

六卿有分职宪长持鸿钧庶司与百度臧否得俱陈訏谟翊元化功与丞相伦

圣人望治切特简丹扉臣举朝仰正色四裔瞻垂绅倪寬贡禹後经术见斯人西南将偃戈海内无纖尘要在涤旧俗使我王化淳大镛列东序玉衡悬紫宸发挥虞夏理感应当有神清风生独坐天地荷弥纶

### 读白乐天诗六首

昔人有深悲百年如转毂耻以千金躯幻化同草木天地藉劳人甘心谢巖谷勲名寄寰宇精诚留简牘舍彼百年欢博此方寸竹鄙哉後世人所耽在微禄身名同时灭尘鞅苦征逐縕袍苟自适轻华胜绮縠藜藿得所如燕衍倍粱肉岂能拂天性巧媚时人目长歎看青山花谿置茅屋

鷓鴣本微姿罗毕或致之不解语言好复无羽毛奇主人枉见珍陋质深自知居以玳瑁笼宿以珊瑚枝野田黄雀来惊羨各有辞焉知此物贱野性终不移一饮复一啄顾影鸣且悲故林有徒侣桑柘浓陰时

小雅楚茨篇画出田家庐後世有作者风流陶与储清流饮黄犢晚日驱柴车带露翦菰韭不食城中蔬虽贱梦常安纵贫闲有余春陰种树时自荷移花耒左招山畔樵右挟泽中渔斯人洵鄙朴忘机谁能如

三峡日奔注惊涛千古愁若比世人情三峡为安流劒門古巖巖鬼哭猿啾啾若比世人情劒門如平邱肺腑方寸地何乃荆棘稠唇吻苦不大何乃攒戈矛如彼涉沧海日夕怀百忧逝将谢嚣躋伴我南汀鸥

一轮中天日万斛南陌尘有马无闲蹄有车无停轮日出照羣动刍狗良苦辛富贵与贫贱譬彼环相循华胥日已远举世无先民尧舜立赏罚万古雕其淳忽而空山谷忽而要路津势去骨肉疎时来秦越亲巧拙各相笑谁能识其真寄语世间人上有高高旻

人生有万端适意固为好睠彼枝上花与此砌边草倘违风露情青青坐枯槁苍鷹恒苦饥淘河不常饱鹄巢鳩来居谁拙复谁巧鸚鵡憎笼时緘口苦不蚤智者物之灾用愚以为宝置身才不才黠哉漆园老

施愚山赠敬亭绿雪茶奉答

春雨江南山敬亭本幽絕摘来烟鬢中佳殍名绿雪故人劳见遗莺花晚春节香如兰露滋色比清泉冽?向晴窗下恐为尘滓?细啜咏新诗风味谁能别

题画

山腰白云如织素小亭正对云生处一邱一壑自盘互咫尺平桥不知路古寺荒邨远树边疎钟声不隔秋烟等闲惊起幽人梦鹭浴南谿夕照天

江眉瞻太守为予作买花行读而赋此

客从匡庐来弭节慈仁寺予当花市开肩輿时一至珠玑罗绮前趋走不停视惟向卖花翁低迷苦留迟太守笑予狂秉心尚童穉为作买花行纵横数百字嗟予林壑性卉木有奇嗜十年

客京国苦负平生意幽燕气寒冽风日江南异浊苦街头泉硲确城中地嘉树与芳草纵爱何由蒔诘屈盆中梅花稀色顛顚豪家温室中不惜千钱费一入寒士宅枯槁旋委弃惟有野草花予力犹能致聊分薄俸钱窗前博菁翠何当归旧山卜筑营花事泉甘复土肥树石间罗置千株种梅桃十亩栽荷芰柳?任萧疎竹房自清閼繁艳付莺声余香分蝶翅高咏买花行为君一扬觴

## 种柳行

前人遗我松湖田倚山瞰壑松湖边中有湖水遶田脚春生秋涨清且涟我今筑堤带山?欲令瀦水如长川细浪回波二三里平分半种红白莲其余空明若澄镜菰蒲数点涵朝烟先教夹岸种杨柳柔条嫩绿陰相连上有百啖黄鹂鸣下有双飞白鹭眠蚤春凝翠山雨重入夏弄影凉风偏丹枫乌柏相间杂秋深照水如花妍更种垂杨三五株舞风拂地枝纖纖问予胡不种松柏松柏成陰三十年圃翁年已四十强霜生颊下华生颠及时种柳满千树眼看计日参青天富贵不愿灵和里繁华不愿章台前但愿柳成拂衣去年年常系钓鱼船

## 江南忆十首

长庆集中有忆江南词注云此曲亦名谢秋娘章五句乐天秦人也游宦於南深用相忆况予生长兹土者乎因广其意遂成十章

江南忆最忆小亭前送暑迎凉桐叶雨怯寒偎暖杏花烟风景胜当年

江南忆最忆近城山曲曲清泉垂石乳层层翠岫叠烟鬟数武隔尘寰

江南忆最忆小池隈近舍傍城三亩许水花木卉四时开薄薄有亭台

江南忆最忆是湖边赛社家家秔稻熟尝新处处鳊鱼鲜十里白花莲

江南忆最忆是江头杨柳岸藏沽酒肆桃花港泊钓鱼舟春水泛轻鸥

江南忆最忆笋樱时碧玉万竿抛锦箨火珠千点压高枝烹摘小花瓷

江南忆最忆是梅花几树傍谿围草阁一枝凝雪近窗纱多少尽堪夸

江南忆最忆是春深花谢海棠红似雨叶藏梅子绿成陰黄鸟惜春心

江南忆最忆竹林中回环白石陰陰路宛转清谿澹澹风穿破碧玲珑

江南忆最忆桂花丛深苑黄垂千点粟小城香满一秋风人在月轮中

頽首见白须

頽首见白须不用闚明镜嗟予形蚤衰流光疾如瞬闲看两飞丸坐失双青鬓涉世方苦深焉复与时竞心如古井波湛然自澄静亦如随风舟上下任游泳敢言味道腴委心付时命湖边二顷田丰年谷犹賸城隅二亩宅绿树当轩映菰蒲烟水姿麋鹿谿山性惟有

君亲恩盈盈满方寸【仓顺叶】

康熙辛酉十二月十六日予四十五生日率尔书怀遂成四百五十字

入春尚旬日积雪照庭户亲戚冲晨寒携樽扣环堵忽记悬弧辰今年四十五老去髭须白痛後齿牙腐衰慵日有增余勇岂堪贾深閱人世情潭潭尽城府我本山野人十年挂圭组清秩随夔龙昌时邁

尧禹鸿拙不营巢一枝借廊庑啾嘈巢中雏黄口饱天庾尽日对金銮终朝依绣黼近案含鸡舌当筵劈麟脯裘珍艳鸂鶒杯绿擎鹦鹉晓候龙楼钟暮听花街鼓身荷邱山恩力乏涓埃补五际谢芳华六经闇训诂野性本疎狂积劳成惰窳荷勑从从容垂绅觉颺缕况予幼伶仃慈母蚤荼苦游子滞京华高堂背严父岂堪读蒿莪何从陟岵岵无限松楸原偏艰一抔土妻子仍短褐北门伤贫窶膝偏绕五男瓮不盈三鬴曾无伏腊资敢言慕华廛思以寸草心得间告

明主布袜蹋青鞵幽宫卜宁宇毕世颂

君亲天年老樊圃下泽车可乘寻幽杖须拄或在山之阳或在河之浒麋鹿为交游渔樵作侪伍自耕湖畔田占天种黍稌自构湖上居随地营洲浦高柳挂长罾新荷泥柔橹投竿出鳊鳞飞缴落鸿羽骑驴覓弟兄放犊呼童竖更欲龙眠西小筑临花鵝竹路横苍烟桃谿乱红雨树绿鸟嚶嚶花深蝶栩栩中结三椽茅素书列今古科头听祝鸡短衣看射虎一任亲知疎兼恕儿童侮庶以疎慵身物外多所取升沈会有时邱樊勿轻诮聊因对樽酒赋诗记年谱

南归留别澹人侍讲近公编修

九重本深閤右掖开双扉与君若梁燕出入青琐闱晚钟月初上晨钟露未曦携手蹋永巷形影相依依笑语形迹捐纏绵意入微岂无同气亲投分如君稀偕趋金华席分着香貂衣诗成便相示错落倾珠玑时时闚翰墨脱手烟云霏常期偶君子白首愿莫违何意春明门陌柳齐分飞达夫扈东巡仙跸随龙旗牧之直深殿清昼居紫薇予抱邱壑心十载如渴饥

圣慈蒙俞允放艇江南归担笈出凤城投竿寻鱼矶丰沛与京洛节序同芳菲勗君报

明主努力奉恩辉

文端集卷八



# 卷九

钦定四库全书

文端集卷九

大学士张英撰

存诚堂诗集五

古体诗四十九首

春归日舟中三首

柳花逐东风同向春归处今年许乞身独惜春光暮  
绯桃折一枝青瓷晓含露沙岸草花间燕子飞  
无数牙樯动笙管兰桡入鸥鹭自熬一鑪香  
綈緼短窗聚自煮一瓯茶耳畔松声度夷旷  
抒天真冲恬得吾素间持枣与栗謹譁餌童孺  
怅望故山下乱花照樊圃我方寻春来归途值  
春去惟期櫻笋时放艇江淮路

我昔游吴门送春千人石是日倾城出壶觞罗绮陌  
花市踟躕红蚕苑桑条碧画舫卷帘帷春衣换  
絺綌池边架月楼士女纷布席喧阗虎邱路歌管  
竞晨夕一曲春归词声共啼鹃惜冶游良可嗤  
簪履憎狼藉惟有惜春心令人重紉绹

我欲营山亭衆卉列芳蒨每逢春日归折简致羣  
彦芳辰为良媒园蔬作清宴当阶草不除绕户谿  
常濺结幄资藤陰铺茵藉花片俛视文鳞游仰听  
黄鹂啖探香投蝶羣翩游狎梁燕醉以木瘿杯  
饫以青精饭偕作送春诗续入幽栖传如此三十  
年身名复何美为我语阳春岁当肃宾饯

拟欧阳永叔归田四时乐即用原韵

东风随意生春草野棠一径柴门小节序才过三  
月三荠菜羹香朝饭饱三篙水绿陂塘寬一犁  
雨足田畴好野夫自爱衿衣轻倚树临流听时鸟  
田家此乐几人知更复几人乞身蚤愿言珍重  
芰荷裳期向渔樵覓终老

第六男阿同晬盘日舟中

首夏清和天忆汝悬弧日呱呱凤城西赐庐迤  
深密今值岁序周画桡漾清泌江南旧风俗  
粧间枣栗嘻嘻弄斑管次第抚书帙讵敢诩宁馨  
青绡聊可必嘉名唤阿同瞳子点双漆秀慧羣  
儿爱常坐老夫膝好作农家儿余方腰短絳

## 放歌

月饭不尽米四斗【南史何胤语】月饭不尽钱一缗思我於世亦易足胡为竭蹷仇此身高牙大纛聚忧患长鑱短锺良苦辛同为鼎鼎百年客锱铢较量忧乐均瞿塘如马不可渡太行九折摧车轮若比世情犹坦途说与应须愁杀人薄薄山田悦收获青刍白粳糟?新鸡豚保社少机事酒酣同作尧天民满路松花不须买莫负黄莺紫燕晨

## 榴花贮瓶中

野岸维扁舟暖风绽榴火童子浣花瓷贮此珊瑚朶忆我山亭边繁英正旖旎叶裹青虫翻枝立黄莺妥可惜照眼姿空落园丁锁红雨没层阶锦茵栖螺嬴朱夏渺轻掷登舟计殊左会当白露下龋齿餐秋果

## 五日舟中

世怜介子推禁烟甘冷食心伤屈大夫竞渡沈黍稷惜哉贤直人未解当世惑譬彼门中兰耜之不遗力还令千载下感时心惻惻我今值良辰片颿挂河侧蒲叶泛邨醪聊藉驻颜色临流投彩丝水深波浪黑矫首读天问忆此何穷极

## 郊行

性拙寡所谐蚤岁归田园篮舆游近郊指顾农家邨暖暖茅茨接依依桑柘繁今年雨泽时耕获及高原良苗怀好风浅碧翻波痕叹彼耨耨者劳汗滴秋禾根我独饱稻粱毕世惭

## 君恩

## 陈问斋注杜成赠之

浣花谿上翁落拓着诗史会心复几人灵光闷千禩我友太邱生读书冠吾里注杜平生力独往摩坚垒遂使少陵翁声息卷中起注意不注词衆论芟糟粕短章复长謡深期发微旨掀髯时一谈高言灿霞绮今年书既成举酒为君酬遥遥终古间两峰永同峙【问斋名式同里人能诗着杜意】

## 题江眉瞻太守秋树读书图

我爱松下人清才粲如玉赋诗三十年鲍谢踵芳躅行吟钴鉧潭坐对匡庐瀑今古才人宦蹟同江州司马柳州牧君方蒿目赋春陵未许松风卧空谷平生雅嗜在林泉画里秋山映书绿我辟龙眠烟际峰为种青松间梅竹待子功成返旧山共住青谿饮黄犢

## 两轩成诗以落之二十韵

甲子上巳日吾庐肇版筑閱时弥九旬亭轩已麤足北轩资旷爽数椽倚山?绕屋罗千峰横天琢苍玉偃松纷万态岭岫互连续遥岑补青霭展对如长幅水榭敞西隅俯看清池曲梧柳覆清陰芙蕖艳繁縟中庭治闲壤待以艺兰菊碧涧当阶流泠泠近可掬南轩迴幽窅满帘映寒竹微风戛球琳四壁湛深绿海棠间绯桃曲檻穠华簇修除学圃斋补葺梅花屋经营亦已瘁聊可避寒燠朝对岚光餐夜就荷香宿稻畦接前邨十里散遥瞩入室延四友陶白与苏陆白云青山下

赐书已先告日夕爱吾庐悠然咏薖轴

## 短歌行

问我何所慕尽日此中居上为横空紫翠之巘岫下为逼人清冷之芙蕖茶瓯墨沼泛松影根梢具者千株余妩媚偃蹇各有态龙拏虎攫当吾庐造物奉予亦已过食葵饮水长晏如

答徐健庵见寄即次来韵

自顾镜中髮霜华日已半戢影栖空山遯迹托荒甸烟云穷物态卉木观时变百尺寒潭碧静对涤尘念弥望山杜鹃高下列芳蕕乔木冠遥岑飞泉落层巘薜石垂钓丝藤陰枕书卷聊息蒲柳姿敢慙林泉愿仆本山野人夙昔忝

宸眷贱疴时自伤

主恩梦常恋故人在丹青国史综纪传鸿羽忽遐征蓬庐枉书翰清言灿霞绮朱云卷河汉展读临松风何殊接良讌

式庐诗为方子合山作

幽兰翳空谷迹远情难亲自非古良牧谁作褰芳人吾党合山子蚤岁耽隐沦读书务经术器业无涯垠十亩稻花斋聊复全其真亲戚罕覩面况乃车鳞鳞式庐久不举典礼贤侯新举事敦古义能令风俗淳贤侯何以来干旌賁城闉姝子何以告高论裨吾民采风奏太史兹事俱足陈【合山名中履无可师第三子隐於稻花斋】

## 积雨

积雨竈湿迟炊烟松梢滴溜如鸣泉谿河水涨隔城市着我听雨山窗眠黄鹂舌涩蛙鼓闹饥鸦挟雏啼树颠圃竹欹斜失行次庭萱污湿摧芳妍卧柳根浮起高岸蚤秧鍼没冲平田墙倾屋漏那足惜池中坠我新开莲但恐雨多有时竭旱溢燥湿还相旋好筑陂塘谨收护勿教东

逝归长川

放翁于盛暑作夏白紵词二首今夏酷热因次其韵

澄潭苕藻如浮空柳丝摇曳生微风湘竹为帘柏为榻横陈碧玉芙蓉中葛衣新试冰线缕团扇停挥坐忘暑黄鹂终日唤不休何用喃喃教鹦鹉

小亭素壁无纖尘蚤起未见樵苏人碧荷亭亭立秋水华清晓浴杨太真啜茗摊书晨且夕陰晴衆壑分顏色珠帘乍卷斜阳沈岭月团团飞白壁

子由寄怀子瞻每讽韦苏州何时风雨夜复此对牀眠之句甲子秋赋古诗五章寄吴门学博三兄以复此对牀眠为韵

长夏困炎燄今岁暑尤酷平明冲草露来就山窗竹赤日照松岭火云如万烛青天鸟不飞桑陰喘黄犍南风十日晴百泉断飞瀑体羸旧耐暑凭几汗如沐去年冬苦寒檐冰挂琼玉低头语童子天道崇往复

仆本山泽人恩遇昔无比朝暾与夕阳出入觚棱紫忆辞文石阶手捧金凤纸抚膺伤微疴寂寂久淹此昨闻陈瑶编问名及贱子

圣慈濡万物不忘被簪履海内方恬熙力跻勲华美愿以朝宗心倾此涧谿水【刊易经讲义英以假归未列名特命增入总裁官内】我有北山园荷耰理荒秽新构迎凉轩恰与千峰对烟云繚绕之峰峰如螺黛复有虬龙枝偃侧纷衆态俯看方塘莲红白分锦队细雨出文鳞斑剥夸玳瑁独游谁与欢薄俗寡俦辈念我同气人临风寄长慨

一官寄吴会苜蓿不充肠谋身若无策教士端有方臯比座岳岳讲鼓声琅琅大儿髮垂肩双燕新颀颀中男复秀慧趋拜阿叔傍幼儿如琢玉绣褓吹微香闲官易乞假宁不怀其乡萧萧竹窗下方今施两牀

弟蚤垂霜鬢兄复蒙华颠会当弃尘土耦耕原上田同看秋月白共把春花妍获稻酿醇醴投竿烹小鲜酌以古瓦盆糟牀泻鸣泉风雨万松黑谿响如长川一灯竹间屋相对空山眠赋诗志吾愿此事知何年

玉儿璐儿霖孙入山定省作此示之

山栖且炎热当午羣卉薦蚊蚋苦嚙我长喙单衣穿避此施帘幙蒸溽如火然近闻城中人喘汗皆欲颠娇痴三岁儿箠箠恣所便叫号骂阿母不使登牀眠今朝喜蚤凉羣儿来翩翩值我胸次恶气逆中沸煎短衣戏我侧使我疾顿蠲璐儿先赋诗夸我池中莲玉儿才患多逡巡出两篇抚掌发狂笑此乐予所偏忆儿学语时一字亦可怜况今成七字琅琅若珠蟻老夫正岑

寂三五山月圆留儿看清影饭以谿头鲜

### 寄心亭诗

北轩避烦溽看月延修廊远注清浅流泛我临轩觞瑶华敛朝旭翠盖攢银塘百尺青萝峰窈窕当曲房书卷杂乱陈一榻横中央追念畴昔恩三载辞玉堂俾我谢朱绂纳此山中凉昔人亦有言芰荷以为裳洁已卧邱壑寄心在

君王当轩揭斯语永佩期不忘【王子安采莲赋永洁已於邱壑恒寄心於君王故以名亭】

### 课仆种菜

堂陰有隙地荆榛初翦除当窗课老仆枕书看挥耰蚤秋种蔓菁滋植时有余雨过簇菜甲省视朝夕殊鄙性癖藜藿鼎食非所须老穉慎采摘手口俱足娱含露良清芬负霜偏隹腴物各有正味何妨盐豉无待我蔬满把此乐封侯如

### 种菜诗用钝庵韵

画地为畦似枰局手种芜菁随雨绿露叶霜根滑且甜一饱人生良易足垂垂豆荚韭花滋谋我冬菹尚及时圃翁朝起眉色喜此乐今请尝试之

放翁读张志和渔歌因思故山隐居追拟其意予读放翁诗作此贻湖上仲兄六首

湖光如练万峰青新向湖山构草亭花作隄柳为屏家与双鸥共一汀

鸭绿真如泻碧油鹅儿点缀小池幽明月夜好风秋一家齐坐板桥头

烟水渔樵细讨论龐公隐处长儿孙芙蓉国槿花邨不知何处入柴门

门迎秋水碧茫茫红白芙蕖覆锦塘莲子嫩藕丝香带着荷花唤客尝

蟹佃渔郎傍水居鸣榔齐过绿杨渠烟漠漠雨踈踈网船归唱五更初

平湖风定浪花圆两两归舟向远天红树外夕阳边片帆飞过小窗前

### 与白云巖僧

奇峰削苍玉万笏攢云端偃松皆十围石罅恣屈盘云气时荡漾碧海翻层澜晴昼见花雨崖颠泻飞湍青乌翔佛顶離離如鸣鸾老僧住石龕定钟彻巖岵天风与相和讵作尘寰看

昔人云人生惟寒食重九不可虚度

古人珍节物佳时数重九况我居山中萧然若园叟甘菊吐芳华纵横被畦亩枫柏杂丹黄锦绣冒陵阜双屐登云冈一榻对松牖邨醪泻秋露霜螯亦在手肯教东篱花千秋归五柳

甲子除夕

残岁逼人事闐闐各有营独我掩关坐心与双鹤清水仙侧银盘几席纷琼英华灯灿屋角蚤梅列餅罍积雪照庭户寒逼灯窗明一龕爰长夜书卷纵复横起弄壁间影邈然非世情

方舒来自姑熟相访山中

蚤春山峭寒林花犹寂寂故人枉轩车十载面惊覩束髮友方子疑义资讲析文章有矩矱名場蚤陵轍拔帜常先登气酣万人敌至今盼烟霄长鸣骥伏枥一官寄江干六经为启迪年年邱壠思不畏江帆逖抚摩原上松絮醪必亲沥感慨念先畴高谈常楚激酌酒语故人古义重捧檄努力骋九衢漆髮欣未晷况有三株树照乘光的烁【舒来名逢月予同学友为姑熟学博】

乙丑五月寄吴门学博三兄生日十六韵

翹首当夏五菡萏吴门花敬持碧莲叶酌此天半霞为兄介大年听我歌勿譁琅琅庙堂器识量无津涯蚤建骚坛帜摘词正而葩风雅追黄初亦不愧专家儒官冷郑?问字趋侯芭晴日丽臯比春风吹绦纱譬彼割小鲜鼎俎试模顰终当吮鸿笔蔚为邦国华自予返林壑穷谷栖谿舂十亩艺松桂三载友麀麇

君恩沁?隔未敢恋幽遐方将理黄犊远驾燕云车何时对牀眠汲泉同泛茶毫颐互相祝娱老还桑麻

浮山十坐处诗

浮山在大江以北最为奇特寰宇记载其巘三百有五十峰七十有二今巘之着名可指数者尚三十余山周五里高不及三里洞壑盘互烟云吐纳平湖浸其?长江带其前青苍秀削凌虚镜流固足奇也癸亥秋予信宿其间与山足和尚极探寻之胜因拈十坐处欲系以诗久而未就今始各成数韵地胜则情易愜境絶则语难工聊以志畴昔之愿於不忘耳

华严寺後双桂下

招提境已穷一径入深竹百簇青琅玕寒翠冒山?古桂挺双柯交枝絶凡木奇石碍飞鸟排空削苍玉中有藏经巘紫苔翳幽谷我来炎暑中凉飈气长肃桂下趺跏人但见须眉緑【寺後

有藏经巖】

金谷巖西种茶处

三十六岩中金谷尤轩翔下建五丈旗佛身相等量峰顶无字碑屹立摩穹苍青鸟乘天风佛顶吹笙簧高楼接飞泉俛看松千章滴珠复幽窅谿谿当其傍丹壁垂紫萝亘天如石梁山畔荷耒人坐卧茗花香【金谷岩上有石卓立昔人称为无字碑旁有滴珠岩绿萝岩时有青鸟飞来鸣於岩端】

紫霞关下

空山一片石鸿荒劈巨灵疏凿非禹功无乃劳五丁天险既已辟山翠无时局从此陟丹梯樵路穿青冥乔柯散佳憩息如邮亭上有仙人牀偃卧期千龄【仙人牀石在关上】

首楞巖

振衣紫霞关首楞在其上如登燕子龕地狭景弥旷九子隔江峰青苍郁相向鴈侣落平湖渔汀没秋涨古木参差中烟光渺难状侧足度危岑苔滑不容杖尚有旧游人姓字留孤嶂【石壁题云望九华若笋长江如带游浮山不游首楞不如无游石险处有锺伯敬辈题名】

石龙峰松下

奇石亘长谷蜿蜒如石龙延步俨崇冈仰眺成危峰如卧复如攫磊落千岁松下视晚翠巖苍莽豺虎踪斜日回紫翠百叠青芙蓉我欲谢尘滓夕景长扶筇【下看晚翠巖极幽蒨人迹罕至】

陆子巖前竹下

长廊名浩歎石窟尤离奇天然辟户牖烟景相蔽亏窈窕如曲房暎以檀栾姿微飈戛修玉荡日如沦漪曾有探奇人高咏天风诗远公亦已去浮图冠屨复闻欧阳子来与高僧碁至今乌啄木响落空山时苔痕蚀棋局黑白谁能知【陆子名宰山陰人雷鲤诗有天风醉花鸟之句欧阳公曾与远录禅师围碁於此有石屋名浩歎廊】

指月石

蹑步攀枯藤言登指月石谁辟奇险径巨斧生履迹垂手摩松颠沆漭山云白陰壑转幽邃羣岫互奔绎回睇石莲峰仙葩粲朱碧天池划澄泓云半葭苇积欲毕探奇情扶携藉禅客【石莲峰上有石纹如莲数十朵大盈丈红蓝悉备雨後洗石则益见峰顶最高处有天池四时不涸中生苇荻】

### 佛母巘石楠树下

海涛回天风乃从石上生始知造物力搏掬非恒情亦号连云峡青壁类削成朝曦与夕阳丹霞弥赤城猿鸟絶行迹烟景相纵横我来佛母巘对此心魂惊欲书贝多叶壮观难可名【海岛巘有石如城长里许上有纹如波涛涌起】

### 响雪桥

张公昔隐此泉有丹砂香左跨绕云栈石磴悬崇冈右带响雪桥潺湲落谿梁千巘莽回互天地皆苍凉或有鬼神守荆榛閤灵光延缘石桥望幽絶谁能量徒闻夕阳楼遗迹空渺茫【张公名同之宋人】

### 妙高峰石上

子瞻咏庐山欲识庐山面余登妙高峰兹山乃全见鸟道乱石丛得松意弥倦眙愕经时定甫敢送遥盼巘壑荡烟云丹碧陰晴变邨树青数丛江云白千片短松号晚鸦奇观怯深恋残阳照归影南湖淨如练

### 题周广庵渔艇图

春江无际扁舟小风动渔竿何嫋嫋桃花流水鳊鱼肥最怜此句诗怀好笔牀茶竈伴幽人白鹭青山同缥缈閱尽天涯行路难人生只合烟波老

### 文端集卷九



# 卷十

钦定四库全书

文端集卷十

大学士张英撰

存诚堂诗集六

古体诗十九首

山灵代梅语

南殿秘阁炉火温盆梅新绽香雪繁抱书拥裘坐花下此身忘却居天阍  穠坐?春梦逼遭花  
勾引山翁园低枝窈窕垂碧沼老树欹侧当闲门度岭一步香彻骨何况坐卧融心魂山鸟一  
声山月白霏微烟湿梅花邨老翁此时复何处攀衣狂敲石上蹲落花千片如舞雪等闲堆没  
长松根拊掌得句向花说似诗非诗凭较论两度花时主人出旧山路蚀苍苔痕枝头疎密复  
谁数雀翻鸦啄空黄昏山灵移书代梅语心同芳草思王孙衰佣合向此中老放归蚤乞

明主恩

除日忆园梅用子瞻韵

短墙碧磴幽人邨古铁作树香为魂冻蕊犹黏晓霜重高枝初破山月昏先生自爱树围屋路  
人争指雪堆园看花有时勿孟浪寒消香转需微温山?树密曦影迟麦饭既舖回朝瞰花须乍  
舒花瓣簇珠光照尸香塞门我昔居此竟三载相忆那能无一言只今春风已十日一枝未见  
临匏樽

题徐公肃先生小像

清高金茎露正直朱丝弦敬藉少陵语再拜题华笺朝野仰公望太华凌紫烟山岛自疎峙浩  
澹如长川宠辱惊世人讵能汨其天霖雨未满区惋惜成华颠清风闻坐歎偃仰梧阴偏雏凤  
遶其侧的烁皆珠蠙且操汗青笔点抹生民篇【时方监修明史】

李厚庵归省送之

皓鹤振修羽来从海云碧遽以兰陔情中肠自煎迫相别觚棱闲执手吐胸膈独有

君亲恩惭汗动心魄畴昔常语我报恩非一策但存区区诚勿复论形迹耕凿为尧民亦以醺帝泽或为渐于磐或为介于石惟此忠与孝留芬在简籍君行侍华发承欢爱晨夕处则为曾闵出当俚旦爽计君还家时余亦整云翮

## 题恽南田花卉册子二首

### 紫藤花

山中紫藤花弥蔓满巘谷樵人不知惜刈以束朴 我独披荆榛移植傍庭屋青丝长数尺延缘登灌木花时穗离离百琲紫瓔簇风入致翩翻露重气清馥采摘芬可茹候共春菰熟会当成虬干藉以媚幽独

### 荷花

我昔垂帘坐清夏当砌冷泉流石罅平川十亩稻花中小作横塘临水榭碧水新开一朵莲半闌半掩骋娇妩流莺唤起午睡醒茶香细啜帘影下复有峰头百尺松撩人影入花瓷泻餐香饮翠恰三年造物嗔人不相借只今莲子凭谁拾风凉露重红衣卸

### 寒夜

寒夜熏短衾熟睡遂言归梦我白头人欢聚忘酸悲辟彼旧鸡犬门巷不知非回头数松竹历历无忘遗庭鹤刷鲜羽长鸣相追依思苦易为梦斯理何庸推万物良复故所悲年岁衰何当返山泽长为时所麾

### 寄木厓

硕人寄適轴高风在河墅列笏插诸峰开襟俯平楚衡门倚清流茅檐接花屿孤亭延景光?竹祛严暑中有嗜古人百城同寝处奇文灿天葩七襄入机杼赋诗登黄初笙镛间祝敌才高遇弥嗇弹冠慙白杵今年七十翁道气日腾举清泉白石间圣贤作徒侣欲寄生日诗逡巡拙词语自昔渭南翁澹荡若耶渚万首古无俦篇章号鸿钜耄耄气益遒目光炳双炬平生所伏膺愿言持寿汝牛腰端可压鹤背亦堪许

### 寄霜鹤

襄阳耆旧传卓荦推左思千载寒知合清风常在兹移家居谷口柴门环清漪古墙护?竹碧玉寒参差绀梅百年树偃侧当阶披摩诘久独处性与丘樊宜左厢贮茶臼南荣启书帷蓑笠自淳古霜雪灿须眉冥冥霞际鹤轩盖安能淄我亦有茅宇结构西山陲旦夕过谿上邂逅懽相持鄙志景高洁云壑贞松姿五年赋契濶旧柯繁新枝何当弃尘累高翥会有时阴巘富苍术阳陂多紫芝相期各善饭采药长追随

## 寄题羹湖龙眠山庄

衆峰縈一谿曲折十余里澹沲烟云寬窈窕林壑美中有最古园回环抱清泚细路缘山椒垂藤接步履云根削青苍苔痕涩殷紫酷爱兹径僻信可界尘滓河声西南来石梁何齿齿人语近不闻隔岸飞涛里曩昔偕来游荒途入荆枳予方卜筑初君亦经营始亭因栗?偏楼缘杏花起列果树美箭灌蔬艺芳芷园林日以佳慙予去如驶比闻?探胜幽巘得奇诡疏凿老不疲自荷金鸦嘴定当烹肉芝还将吸石髓嚶嚶求友生招招待舟子独寐同寡懽延伫两无已埽我巘耕堂从君閱耘耔

## 北轩後种竹得笋

植物数清芬簣簴推第一种类复区分中有坚韧质一竿围尺余十丈高无匹烟梢叶叶奇霜节茎茎直茎含澹荡风叶透玲珑日陰摇暑月寒翠滴晴云湿雪压与风摧亭亭无偃侧所嗟樊圃间尤物艰种植竹祖虽频移龙孙非易茁北轩有孤干逾年忽增十园丁远相报开书动颜色始缘礪壑疎终绕阶除密坐对一林香端可忘肉食会当置匡牀晚翠映书帙

## 玉儿书来道小谿两岸种桃柳百余株

草堂带山麓门对清浅谿迢迤松岭北曲折花邨西最宜临水处柳径与桃蹊緑荫漾清泚红雨蹋香泥波底戏文鳞枝头鸣黄鹂浮栢落英满垂钓浓阴低虽无泛舟乐足令游筇迷十年畜此愿此愿多乖睽昨日山中信阿玉自封题种桃倚短?植柳眠长堤桃试红萼小柳翦青丝齐春风日滋长芳景端可俟他日西谿上幅巾堪杖藜

## 读道书二十韵

学禅成大觉服药登上僊莲台挂珠络鹤驾凌紫烟二者信可乐乐在超人天以余忖量之乐不如归田收得不赀身谢此区中缘急埽巘畔屋高步谿南阡云岚与烟翠攢簇当我前饫以青精饭濯以丹砂泉胸怀自开拓耳目皆芳鲜一日惊悸去二日忧烦蠲三日视听泯有若婴儿然浑浑寒螭蛰蠕蠕春蚕眠不醒亦不寐真息长縣縣化如入水雀蛻比经秋蝉顿使凡骨换还觉沉痾痊豁然一长歎跃出羲皇先天地领空濶日月忘推迁手攀河汉流足蹋崆峒颠蜉蝣悯羣动蝼蛄视豪贤苟非知道者斯理不易传

## 追懽

古人言追懽其义当何居将谓衆人乐而我与追随将谓懽易去努力追逐之好花开易落好月圆易亏宾亲正聚首倏忽生睽离山水甫登蹑陰晴未可期翠管歌复歇红袖舞还垂朱顔照青鬓瞥眼生白髭何况尘劳事如蚕自吐丝微躯苦缚束纏縣无了时懽情良有几疾如流电驰揅焚与拯溺未许须臾迟嗣後偶逢懽高兴誓不移园花烂如锦庭月圆如规林壑得佳趣故人懽相持或遇良讌会笙管佐游嬉或遇闲岁月摆脱尘事羈宝此如拱璧百虑一时麾

掀髯舒寸心放歌豁双眉临风发千笑仰天倾一卮讵可当前失徒劳去後思

## 人生

人生譬石火倏如流电惊日月无根蒂东跃忽西倾达人解其意流光难与争借彼豪端字寄我心中情言欢若涉笑写叹如有声万类罗腕下一字分枯荣丽如春葩发皎如朝霞明翠如新竹竒香如芳兰茎宛转说哀怨曲折如流鶯倒翻沧海澜吞吐如长鲸江山资润色河岳凭精英千篇任瑰伟只语堪纵横一片性灵光抒写寄太清太清无穷极谁能磨其名君看陶靖节万古如平生

## 官道

高柳一行直其下临官道风起霾尘沙雨过积淋潦半夜露未曦亭午日方杲但闻去来人马蹄蹋秋草乌栖恨不迟鸡鸣恨不蚤微闻柳阴中叹息有邨媪今年骑马客看比去年老人生非金石齿髮谁能保莫自逞丹顔宁得几时好

## 上真定梁公

百川趋溟渤羣山仰崑仑万类皆有托而况吾道尊钜公起河北岳峙联弟昆勲业冠诸曹四十历寒暄秉轴际昌期元化日以敦民气入钧陶薄海跻春温文章灿天葩脱腕皆瑶琨蕉林美词翰吹气如兰荪欧阳金石录荣光烛庭轩俛仰极千古退食恒埽门皎皎贞松姿云际安可扞霜干数十围撑拄乾与坤芑萝本微弱附丽亦腾骞翹首望丹壑永荷涵濡恩

## 送健庵大司寇归崑山

滹沱水初泮春风吹柳陌故人去京华翩翩振羽翮倾盖遡廿年吴会双泉宅玉堂喜追随联影槐厅席丹黄秘合书十载数晨夕猥以蒿蔚姿挹领椒兰益君才俪江海巨手光典册寰中照碑版落腕流金石置身万卷中精英日探索唱叹皆古音结撰卑时格雅乐鏞球陈凡响荆榛辟

至尊獎文教薄海事经籍君用儒术钦激赏尤弗释只以承恩?转使陈情剧鸿帙藉编摩移局近山泽依然黼藻功谩诩烟霞迹牛腰载秘文兹事罕畴昔拥书林屋?涤砚花谿碧我亦乘秋风相从访游屐皖口与吴阊春江共潮汐

## 新秋

昨夕雷雨过郊原何青青新蔬三两畦濯秀当我庭日澹云影薄飞虫隔疏?枕前茗椀净手中纨扇停身心两闲适午梦微凉醒

文端集卷十

# 卷十一

钦定四库全书

文端集卷十一

大学士张英撰

存诚堂诗集七

古体诗三十首

白松十韵

白松挺奇质高格无纤埃如对修洁士隼整爱丰裁青铜点朱碧斑剥古尊罍耸干若凝雪蟠根疑积苔凤毛声瑟瑟龙鳞色皛皛玲珑晓日映潇洒天风来近树吹微香肌理神僊胎允宜白鹤观只合吹笙台百尺潇湘竹风度差可陪回头看榆柳琐屑皆凡材

勺园牡丹甚盛三兄新作小轩对之花时觴咏其中有怀胜赏因寄以诗

城南方塘净如练密卉疎筠列芳藹主人旧种洛阳花百朶春?压山县近添幽馆对芳丛曲径朱栏藏宛转此花夙昔性所耽六度春风不相见闻道年来色转奇綃堆绣簇霞千片香风粉膩杨妃脂露华红湿西施面朶朶葳蕤赤玉盘枝枝摇曳锦团扇吴门先生浮大白细把微吟足欢譙寄语春风作意妍明年一倍增娇茜不分天涯作客人归心输与双梁燕

芙蓉岛诗

茧帷幽梦逼清晓僊人相唤芙蓉岛此地真堪来作翁谿光十里如霜縞数峰窈窕落平川淼淼双流入怀抱春巘秋巘四时佳雨岫烟霭终日好蟠松古?影谿斜枝叶交加荡文藻手种芙蓉万朶花霞光一片朝阳杲石罅低藏渔父竿松阴侧出樵人道中有芋畝十亩田土?泉香发秔稻沙鸥鱼翠时时来满径落花常不埽荷锄为农三十秋自斲黄精餌芝草玉井花开十丈莲霜林果剥如瓜枣醉时笑拍洪崖肩与尔风流成二老

赠王鹤汀学士

润比良玉质芬若幽兰情夙昔爱君子高洁心所倾两度涉江水芳洲采薜蘅朱弦疏越间唱叹皆元声纨袴祛陋俗寒畯列嘉名千古秦淮月长同水镜清

勺药贮甌餅中小有佳致

虚堂下疏帘槐影漾?绿数朵殿春花鲜丽簇红玉濯以温泉波华清正新浴无计游丰台千亩  
恣遥瞩聊向花瓷中经旬看亦足山亭红药栏苦忆银塘曲

与近公有结屋避暑之志异时苟遂此志当讽斯篇

我有数亩城南坊颓垣断岸围方塘三年苦旱泉眼塞?泥龟坼?莠伤今年春雨喜沾濡溅溅  
波动鸣石梁碧筒万挺罗翠盖水芝百朵披红妆曩时种柳隔闾闾寄书已报阴覆墙会当结  
屋避炎暑穿林跨水延修廊南荣近接双梧桐西隅高拥千篔簹芳堤十丈偃彩虹芙蓉四面  
亭中央小舟鷁首青油幕平桥鴈齿红栏装?辟水南一区地窈窕丛桂藏曲房桃笙竹几随处  
有茗椀诗卷长相将垂帘终日坐?翠投竿有时临夕阳思我此时僦荒圃门临官道车尘扬炎  
风畏日射窗罅矮檐尺树同低昂譬彼水壶说炉冶益令肝肺生清凉人生适意须有时俛仰  
勿悲头上霜

泽州先生过郊居赠以诗即次原韵

西巘紫泉宫直庐隣键筦地僻解朝绅当午幸不綰敢冀竹林游籍咸同二阮【时携侄莹在  
西郊原韵小阮指莹】槐柳夹路隅美荫不须选平畴新雨过鲜翠堪撷揽清旦高轩来玉山  
照芜馆句比江峰青心共岭云远重以轡龙笔金碧相组纂冲暑□银鹿好我意殊善气慑双  
明珠报章不辞缓

送六侄廷莹还桐城

平生爱诵东坡句犀角丰盈美迟适七年骥子不相见来值予方在琐闥入门急唤问平安抚  
视摩挲烛再跋惠中秀外敏且愿世路人情皆朗豁土锉与我对牀眠絮问江乡夜常聒长夏  
扈从来郊垧携尔同行探古括从来鱼稻饱甘鲜强同阿叔餐粗粝千端万绪在名场识破天  
倪缘宦达譬彼蓼虫生芥畦难向巘蜂语辛辣尔翁林壑自俛仰老我东西苦涂抹会当奋翮  
学冥鸿蚤晚朝衫应可脱隔墙花气共霏霏比屋池流同活活弟兄老矣皆霜髯里巷过从任  
短褐惟应对客称好好毋事向空书咄咄送尔先逐秋风还东渡黄河经木末尔翁相望秋月  
圆桂英满地香堪掇予且飞章许猿鹤相违莫诉江天阔【东坡与侄迟适有犀角丰盈之句  
】

七夕梦中得首二句因续成之

秋水鸿鴈多秋江濶如许我欲乘轻舟采采芙蓉渚津梁不可越羽翮奚由举含情渺何限寄  
书托鲂鱖譬彼牵牛星隔河相尔汝

良足乐同静海励先生

何必思故乡郊居良足乐晓起推南窗青翠满寥廓井畔柳纤纤檐际花灼灼东隣禾已秀西

庄谷可获短衣步夕阳入眼差不恶起居复何如昂藏两髀鹤渐喜公事稀高眠听牛铎蔬嫩  
翦芥菰饭香参饔飧子弟间从游邨醪时共酌睡蚤嫌月迟夕凉脑衾薄人生攒百忧譬彼笋  
纒箨长往信不易小憩岂容错且作欢喜缘暂解忧患缚思乡令人瘦飞书谢林壑

### 题渔父罩鱼图

菰蒲叶绿湖水清唼浪游鱼逐队行渔翁有筐编竹成烟中小艇波无声等闲抛落鱼不惊香  
萍文藻仍纵横鱼兮鱼兮怡尔情勿用泼刺鳞尾赭三湘七泽秋盈盈蹄涔一勺亦澄泓聊复  
喁喁乐其生有时潮长陂岸平秋风鼓浪箬簑轻看尔濈濈还东瀛

### 对菊四首

吾生寄大块万怪惟一闲今年秋色里退直常掩关霜圃有佳卉移植开我颜不谓摇落候风  
姿絶人寰缟素冰雪皎紫茜云锦殷芳丛置几席坐卧寒香间但得悠然意何必见南山

雅尚爱林壑夙昔多远情一自撙世网展转亟相萦宝闲逾良玉寸晷非敢轻意感造物厚秋  
草发奇英天地有正色敛手对霜茎摊书度朝晚浊醪还自倾

我意营杰阁尸祝有四公陶白与苏陆澹荡高人踪乐天雅天趣水竹洛城东世路困子瞻皎  
皎若孤鸿赋诗多逸响万首龟堂翁近道贵自然洒然尘滓空頽首柴桑老真味独醇浓

客自西山来叹息秋光好霜林灿霞绮异采朝阳杲骇愕夸雄观铺张令人恼顾我七年来山  
林迹如埽庭陰转昞移良辰惜草草惟对一丛花长吟写幽抱

### 园花十二候歌

予既以十二花为候编辑小月令因作此歌命小郎廷瑒廷瓘习读暇时则令其?唱迭和以云  
幽人鼓吹故有取于词谐意浅童子可歌老妪能解遂不以鄙俚为嫌矣

立春梅蕊正芳妍?阁?堂半下帘自昔寒香比高士由来萼绿本神僊香雪草堂三十树苍枝  
古干破山烟玉雪冈头春似海闲披鹤氅看花田【一解】二月邨南杏花白粉腮檀口看微  
坼细雨轻烟放转迟晴云晓日光初射文杏廊前锦覆檐春晖阁上花侵席一夕东风春草生  
繁英乱点东西陌【二解】三月穠华属海棠轻盈佳丽?无双晓向朝阳翻锦帔夕烧高烛照  
红妆枝嫌玉蕊曾无态色妬梨花合断肠试向小楼?处立不须遥羨碧鸡坊【三解】寒食人  
家竹林里桃花处处低临水曾闻玉洞隐僊人还向清谿赚渔子红栏桥畔间疎杨绿树邨边  
伴穠李等闲千片点沦漪池面春风吹不起【四解】谷雨名花是牡丹千枝金粉压朱阑春  
熙堂畔青油幕晓露光生赤玉盘春到花时晴雨易蝶迷香国去来难姚黄欧碧潜谿紫绕砌  
容予尽日看【五解】勺药殿春顔色好樱红笋绿荷钱蚤春情尽付洛阳花婪尾余芳偏窈  
窕曲径长廊?古藤荷锄自种将离草赏花何必金带围不须多费天工巧【六解】五月榴花



火树然河源佳种昔流传乌柏叶经秋露赤佛桑花破岭云鲜几株斜映清池岸万点丹砂涌碧泉小院日长红满砌绿阴?护纸窗眠【七解】六月荷蕖锦塘曲翠盖红裳气芳郁绿水亭亭一朵开太真晓向华清浴扁舟?入藕花丛鸳鸯宿处花房簇晨昏餍饫水芝香谩向神僊学餐玉【八解】桂花开日香满城六经堂外交柯生枝垂金粟陰常密露湿天香夜转清云外月轮当夕满人间秋色此中分微云冉冉鹤欲下定有僊人吹玉笙【九解】菊花时节寻霜圃重阳故作霏微雨移植孤根古瓦盆顿教水阁成花屿天空木落羣卉摧别有幽姿偏媚妩世间蜂蝶绕朱门何曾解识陶家墅【十解】十月芙蓉傍水开拒霜原是不凡材茆亭四面绡成幄松馆千丛锦作堆北渚南汀随意种?红浅白间行栽蓬壶自有僊人岛何不长吟归去来【十一解】蜡梅开近寒时节雪屋红罍称孤洁蠟蜜攢成点额花水沉香透檀心缬纸窗谁与助清幽朱果垂枝枝欲折一斛珊瑚照夜珠空庭堆满鹅毛雪【十二解】为君数徧四时花金谷平泉底事夸十亩林塘居士宅一帘风月野人家但求暇日身无累不管流年鬓有华愿得常为农圃客幅巾筇杖老烟霞【十三解】

## 广园花十二候歌

既为园花十二候歌凡羣卉与之同时者咸属之以此十二种可以多植成林其他则参差掩映乎其间有主客陪贰之义焉小草蔓生承附接萼益态增妍良有取也复作广园花十二候歌以继之

名花十二管流年藻缋风光又一篇借问梅花谁作伴水僊孤冷恰相怜瑞香紫蒂衔枝小最宜插鬓香云绕别有金英点翠条怜渠亦解迎春蚤【一解】杏花枝畔绽樱桃木笔辛夷玉树高幽谷蚤兰初破雪香风一夕满亭臯【二解】海棠谁与争芳艳梨花月下依稀见娇姿尚有水林檎学弄春情殊婉变【三解】夭桃僊李好同时荆树繁枝点缀宜蕙草千茎围石磴丁香一簇覆柴篱【四解】牡丹富贵真无比绣球八宝攢珠蕊三千粉黛护龙绡水晶宫阙差堪拟莺粟平铺作锦茵蔷薇结幄罩香尘翦春罗巧醢醺瘦?有虞兮号美人【五解】芍药春残夏犹浅杜鹃花照东西巘木槿篱边蕊乍红芭蕉窗外阴初展【六解】榴花风温万绿稠素馨新上玉搔头小摘露葵堪作饌频看萱草解忘忧【七解】荷正芳时筠粉碧紫薇簷卜交红白水亭四面列秋兰晨夕香薰岭南客艳艳桃开夹竹花合欢叶密映窗纱鸡冠凤羽浑无赖屋角墙陰一道斜【八解】巘桂香浓风露冷绿橘黄柑共清景玉簪丛里断肠花夜伴疎桐落金井【九解】菊花风味迥无俦凡卉谁能耐九秋锦苞叶烧?院寂水红花覆小池幽【十解】秋风秋雨芙蓉国锦城万岭丹枫色殷红茜紫间苍松穿云跨水奇何极【十一解】花时最是蜡梅寒黯澹枇杷不耐看幸有山茶红似火清宵共度雪漫漫【十二解】闲花浪蕊寻常有乞种分栽动盈亩平章秋月与春风万紫千红娱一叟【十三解】荷耒带锄总逍遥餐艳披香也足豪薄构小园夸庾信多求异卉笑文饶?知鄙性原成癖难索傍人为解嘲自笑自吟还自乐他时应谱入风骚【十四解】

## 芙蓉岛十二咏

### 松堤

双涧夹平畴长堤堰谿水手自种山松千株?清泚中横樵采径人行翠微里谿声有时静日夕松籁起

芙蓉泚

经岁植芙蓉娉婷泣秋露松际亘花城一抹霞光曙下临清浅波盈盈娇欲语有客问衡门只在花?处

青槐陌

言度芙蓉城槐径延?入修条散清阴玉树参差立日影不到地幽杳苍苔湿时有耕稼人闲来挂蓑笠

莲谿

大谿西北来交流经石堰曲沼贮清泉绿荷点千片缅想林下风谢女落金钿何缘?山中临波见芳蒨

北玉雪冈

北阜何坡陀种梅绕山麓春鸟时一鸣寒香满幽谷寂寂茅亭晚齿齿石径曲会携陶令诗披裘雪中读

南玉雪冈

崇冈倚石谿侧近椒园道古梅间松杉诘屈树偏老一林晴雪霏十日春风蚤惟有山翁知破寒事幽讨

杏圃

文杏怯春寒高枝烘?日艳艳红粉妆墙头美人立轻烟缭绕之态憨若无质桃李步後尘覩面应自失

桂丛

南隅入短垣巖桂盈一亩山空秋露白埽花拥箕帚芬烈侵衣裾余香发樽瓿?宵对凉月清景两无负

兰皋

薤草芝兰丛孤芳欣有托  
光风泛紫英香气满林壑  
班荆对幽人衔露偏绰约  
古称同心言应难逾此乐

### 竹垞

余地翦榛芜临水堪种竹  
翠茎照白沙髣髴淇园绿  
高节饱风霜清阴荡炎溽  
时听戛玉声藉以疗吾俗

### 薇馆

阁前宫样花移植清池上  
爱此鸾凤姿临风解轻扬  
谁能经十旬璀璨红珠帐  
高馆日正长摊书永相向

### 枫亭

略约渡小谿数枫围石磴  
一夕江鴈飞霜叶红满径  
锦绣倚晴张茜紫经寒凝  
步履登山椒秋声饱清听  
李渭清侍读为予言滇南  
龙泉观水泉之奇赋此

昔游趵突泉奇峰出波面  
如雪复如玉喷薄珠常溅  
清济水性强湫流能隐见  
今复闻滇南澄潭水为綫  
日午涌清池环匝如素练  
潭广不逾丈紫鳞千万片  
中有小黑龙目睛如掣电  
造物信耽奇搏掣穷物变  
翰林奉简书天南远乘传  
为予话风土娓娓坐忘倦  
幽胜许旁搜斯游足嘉美

### 文端集卷十一

## 卷十二

钦定四库全书

文端集卷十二

大学士张英撰

存诚堂诗集八

古体诗四十首

东西龙眠山二十咏

吾邑西北倚山麓为城出宜民门取道於大士巘行数里渡谿河左则越巢三都馆右则青埠潭左氏昆弟居之两山低处中横一径吾诗所称谷口是也居民数家酒帘邨市樵子出入所经弛担结侣咸憩息於此自此而玉龙峡为东龙眠径越岭跨礧至似古山房泉源在焉石马潭为西龙眠径层峦叠岫倏忽开阖至社坛而窅然?矣凡予足迹所历各为六韵以志之余请俟之它日

大士巘

山县枕崇冈数武即丘阜悬崖斧劈痕临谿弥峻陡澄礧浸云根石龕若新剖曲磴缘翠竹方塘涵碧藕时有出郭人来游挈罇缶是吾入山径幽意恒探取

河墅

孤亭冒山巔素琴发清响苍苍原上松翠盖供俛仰潘子晚好静结庐寄霞想诘曲入花径窈奥闢书幌南荣与北牖容膝不希广予驾趣北山笋舆习来往【山巔有皆响亭】

越巢

古墙薜荔衣檀栾倚修竹路入老树西门对清谿曲时闻读书声中有幽人屋梅花几席香萱草阶除绿有客皓须眉翛然常野服昔贤遗烈在清风满巘谷【堂曰旧学左忠毅公读书处】

青埠潭

言过谷口东一水湛?碧对面青萝峰松阴落沙磧素鲋游空明波纹荡奇石昔闻堰谿水画舫

堪挂广只今春草?青苔迷往迹千载烈侯祠寒林亦萧槭【英烈侯祠在其侧】

### 三都馆

垂髫游龙眠癖爱三都馆野桥入平田松关客常款幽岫亘四围穿林自夷坦美箭上干云十亩清阴满结庐虽不多风神自萧散喜与人境疎长吟纵吾嬾

### 玉龙峡

我昔在内府得见公麟图苍莽玉龙峡雪瀑如溅珠此地水石佳名与图画符阴巖攢碧树幽响中笙竽逶迤林壑间常若匹练铺何当山雨中来观此景殊

### 杏花邨

吾祖松楸地自昔名花邨连蜷好峰聚喷薄清谿翻傍谿住老叟乔柯?柴门耕凿数百载世世贻子孙陵谷万事改衡宇今常存春风过陌上笑指桃花源

### 桃花洞

姚公读书处高寄烟云端古屋紫苔涩?林白昼寒修竹徧阳陂百簇青琅玕凌礪架危阁牀下飞激湍?寻水源地奇石尤漓峒径滑不胜步扶携来探看【姚端恪公读书处】

### 似古山房

自昔闻戴顓空山有幽宅闭户赏名泉奔流在肘腋翠筱青林中悬瀑高百尺旁构响雪亭手探练光白添衣坐?夏山风谢絺綌每当炎曦时怀此不能释【昔为隐士戴髡僧所居】

### 石马潭

结屋龙眠西沿谿路偏好峰峦莽回互水石相环抱石马立空潭洄波纷素縞曲礪尽文鱼幽径皆香草但闻樵歌声相和白云蚤曳杖蹑青鞵期向此间老

### 媚笔泉

山顶有名泉历落层云间昔人挥毫素淖砚爱潺湲游客稀偶过老僧常掩关别有罗汉台紫翠何其殷巉石栖短树俛临流水湾石上垂云字久没苔蘚斑【石上有垂云泚字苔蚀久矣】

### 赐金园

言陟夏佳岭遥见入林路清池当衡门影落峰顶树竹?灌木稠画眉啼不去荷锄杭稻田抱瓮  
菰芥圃黄犊近隣邨绿蓑好风雨古屋两三楹是吾閱耕处

### 芙蓉岛

冈峦势蜿蜒下有双谿送春水如白云潏沕山影动唤我芙蓉翁古僊曾入梦绕堤蒔秋英金  
粉露华重他年挽鹿车一丘良可共山中频寄书青松及时种

### 椒园

椒园南山下叠巘隐幽壑曲径缘古谿高下泉声落悬流注石棱缤纷挂珠络老梅立山烟迎  
门如皓鹤玉树大十围枝枝近高阁晨夕可来游只须过略约

### 断事坟

叹息金川门倒戈燕王师君臣有大义微官焉敢辞沉湘竟何处爪髮空在兹荒阡迹幽馆策  
杖不知疲仰睇层岭峻俛听寒涧悲松间古碑矗摩读夕阳时【方断事公讳法闻建文之难  
自投于江】

### 环翠山房

万峰如挺笏中央见平畴齿齿白石粲浩浩洪谿流?兀孤茅亭杰出当高丘羣山苍秀色到此  
凭阑收峰峰岚气逼树树烟光浮每语吴季子数椽须蚤谋

### 写园

短垣护松竹宛然一亩宫门临樵子路清谿流向东昔有耽吟客自名岳梦翁驾鹤去不返门  
闭双井桐图画秘全庵风景将无同吾庐幸不远相望苍霭中【公麟图中有秘全庵髣髴似  
之】

### 长松别业

山园各殊致陂池兹所偏疏凿广数亩芙蓉秋便娟鲂鲤长尺半花间时割鲜长松四五株磊  
砢生寒烟缃梅与翠竹掩映皆幽妍妙年高寄托王谢信多贤

### 黄柏山房

龙眠最?处云物迴幽窅石径盘山腰谿声互萦绕灌木何陰陰垂萝复嫋嫋中有乐耕堂凭阑  
接林杪片石琴台孤飞轩栗窠小莫嫌絶境偏远出尘 表

## 社坛

幽巖罕人迹此地堪避世一水自萦纡千峰转迢遰草?路易迷湍急裳屡揭吾兄性耽奇景麟  
结遐契远载吴门花驱驴入烟际选地种松杉聊为子孙计【三兄於此筑景麟堂】

## 十二月六日即事

梦登杰阁俛洪流烟波漠漠横小舟远叠层峦景弥旷近罗古木居偏幽啓牖凭阑正留憩叩  
门声急惊残睡东方才曙雪满阶忽报诸卿有封事

## 题画

秋山若新沐翠色滴巖峦幽人结茅宇窈窕当漓岷略约入荒径高柳垂碧湍时有隔谿叟策  
杖叩荆关斯境良不易唯向图中看

## 寄韦广庵

昔闻王摩诘晚岁耽清修琴牀间茶竈恬旷与天游鸢兹有伟人今古遥唱酬啓事重山简脱  
屣归林丘秉心自高洁澹荡师虚舟挥手谢尘滓道业期千秋眠食常一龕弥勒居上头我友  
岑仪部【谓羽长】精义同探搜江流渺无际高怀谁与俦天门望牛渚石色上层楼何时蹑  
芳躅偕翫春江鸥

## 读汲古阁毛子所镌放翁集有感

叹息龟堂叟磊落无近情室小不舒肘时听饥肠鸣神藻日骞翥珠源随地倾齿髮已大耄力  
厚思弥清吟篇累钜万骚坛谁与京聊自写胸次匪冀身後名宵冥寄天壤大海鸿毛轻焉知  
五百载嗜古有毛生旧帙拭尘土古镜发精英只语不敢遗宝惜如瑶琼雕镂比金石简编弥  
八紘山泽蕴良璧光气终必呈贤哉海虞客千禩陪休声

## 自题桃花钓艇小像

春风草色已平铺春水半篙生南湖自櫂小舟入鸥鹭临水桃花三两株微风徐引钓丝輓落  
花片片飞衣裾此时傲睨天地寛斜倚兰桨摊素书青山澹峙水澄湛纤尘不起波涛无我与  
万类同俛仰忘机共乐羲皇初寄语苇间垂钓侣莫将香饵误游鱼

## 正月六日

春回已再旬诘朝是人日苦忆故山下古梅?幽室苔封老干迟香蚤南枝密披离碧磻临横斜  
短墙出轻烟澹霭中风神总清逸江国气暄和微风转温律谿润柳先舒土?兰初茁南荣可洞

开北牖不须窒何事久羁栖朔风但严凜难寄一枝春望断江南驿清梦频往来浩叹抚书帙  
夜读松臯诗册有作

谷雨晚休憩皓月临阶屺轻寒下布帘水僊列绀几程子示新篇清言味殊旨冰雪盈怀抱芳香浸肌理故国梅花邨迢迢隔江水抚卷若欣遇三复不能已

燕九【京师以正月十九日为燕九节羣之白云观候真人降】

鐙月看方残节序数燕九白云鸾鹤声陈迹荒已久取醉倾都城相将挈罇瓠一时方外客幻妄无不有悬符曲背翁卖药龐眉叟诡状惊愚氓狂歌走邨妇哆口说神僊诳惑良可丑我闻蓬莱峰弱水隔尘垢碧玉琢庭阶彩云塞窗牖桃花炊香杭石髓酿天酒御风凌紫霄天帝为宾友岂肯回鹤驾蹋此利名藪吁嗟尘世人延望空翘首

长康为予画芙蓉岛图赋此

雪浪双谿向东注云巘翠巘相盘互短垣修竹隐萧斋凭君画出樵家路君言此地旧游偏风景依稀在眼前惟余石岸苍松色须饱风霜二十年

道士赠杏花一枝置胆餅中

大龙山畔石塘隈露裊烟笼十里开闻说如霞复如锦可怜时节不曾来只今尽日风尘里乍得一枝眉色喜粉腮未破春溶溶自拂银餅注新水

广济寺看海棠即赠天孚上人

万斛车尘吹?风扰扰闐闐喧嚣中焉知咫尺有佳地香林一鹤尘块空谷雨才过名卉发红云两簇楼西东我来正值烂熳时锦幢绣幄花重重自昔西川号繁艳海棠香国将无同别有神僊好丰骨苦教桃李若为容最是斜阳烘屋角粉腮乱点猩猩红惠休知予惜花意裴回宛转芳树丛为言居士今老矣一年一度难遭逢须乘旭景再来看烟开露湿春溶溶我闻斯语笑未荅发人?省如晨钟便是上乘微妙义不须?与叩南宗长康画南郭外桃花园小景题此於後

出郭春风散遥瞩千株万株柳新绿人家园圃带城斜桃花一片红云簇沿邨灼灼照清谿绕径娟娟倚修竹我昔携尊雨後來臙脂晚向华清浴隔岸谁家花最多枳篱苔径芰茅屋诂意萧斋傍短檠缩取春陰盈尺幅向前寒食几多时令人苦忆城南曲

天禧宫古松歌同说巘先生赋



平生几处见古松都城西畔天禧宫轮囷异姿饱霜雪纷拏逸势森虬龙响若琮琤戛苍玉色疑翡翠埋青铜低枝偃侧走平地高干窈窕摩紫穹荒祠锁三十树一树一画羞雷同瑯窗细碎古瓦坠画壁剥落莓苔封此松类有神物守肌理丰腴弥青葱浓阴地湿草舟碧幽林日薄光玲珑顿隔喧嚣若巖谷涛声白昼吹香风泽州先生偶税驾予亦走马来过从石牀倚徙久延望不觉曦驭腾高春君言榼山有此树霜皮合抱烟霭中予亦曾游秣陵路六朝旧树留江东不意马迹车轮边俛仰别有幽奇踪便当坐卧满十日一洗耳目尘滓空眼前奇物复谁数北寺万石华严钟

予学圃斋前有郁李一株因见乐天集中有惜郁李花诗即次其韵

浓缣爱花繁低小怜枝弱闲阶石砌边移近梅花萼缘条雪皑皑含烟春漠漠剪裁罗绮轻点染胭脂薄山园久岑寂流光任销铄正是艳阳时东风又开落

万寿寺华严钟歌次说巖先生韵

荒寺门迎大谿水古墙剥落荆榛高兀钜钟立庭庑翠色几矗长松稍直立二丈径十尺布指难与量周遭铜液如云火如电天地鑪冶斯铸陶霜晨撞击鬼神惧鉤閤鞞鞞紫霄上有华严十万字松江沈度挥霜毫刻画远胜云雷迹雕几不屑鱼龙跳一波一撇露锋颖笔势轩翥如鸿翱譬彼宝幢绣佛号香薰殿角风铃摇此钟初成在紫闼丁年移今萧条【此钟造于丁未年移置此寺亦丁未】劫火已吹楼殿去鲸鱼委地空蒲牢但见埋光向幽壑那复振响穿云标竭来对此三叹息为怜尘还爬搔神呵佛守亦妄语土花侵蚀偃藜蒿作者何人姚少师手翻云雨腾螭蛟金川门外鼓震地欲富欲贵皆尔曹钟解纽意不惜戈甲渡江江怒号身披紫衣近日月不闻搏拊陈虞韶齐黄九族惨白日天阴鬼哭声啾嘈忠臣义士甘鼎镬铸钟万石奚足豪噫吁嘻铸钟万石奚足豪【永乐四年制时为姚少师广孝监造】

送登州太守任在庵之官

渤海回紫澜万古嵎夷宅观日登蓬莱东望神僊迹瑶岛出波面数点如棋奕时平海若镜拾月堪挂席蜃市成奇观城阙通街陌好风荡微云转盼玻璃碧皇哉五马君声名古牧伯彦升起中土清才灿崑壁今为郡大夫昔本东瀛客轺车夙税驾正获两岐麦涵濡须仁澄清荷钜责德化师盖公琴书乐简僻平生康济心永言念畴昔

庭槐十韵

青槐何茂密当轩种双树滋植十年来清阴入门路高翠挂斜阳低枝沾晓露暑月延好风晨光集珍羽杳霭映帘顿有林壑趣种此亦偶然青葱悦朝暮岂意尔成围催予髮垂素爱此碧玉枝曾入甘泉赋托根赐庐中谅无斧斤惧寄语後來人风霜谨持护

闲居四时词

初试春衣白苧裁  
巖扉从此昼常开  
轻烟轻雨笼芳树  
新柳新鶯发旧醅  
草合日长帘影静  
杏花时节燕双来  
小亭沾洒近风泉  
地湿林?避暑偏  
翠竹万竿疎雨夜  
水芝千朵夕阳天  
人间便有方壶胜  
欲向三山唤僊侬  
白露添衣体乍轻  
山容如沐水痕清  
半窗幽梦梧桐雨  
一枕新凉蟋蟀声  
看罢东篱旧时菊  
芙蓉花下绕池行  
烟蓑雪笠钓寒江  
新得鲈鱼玉一双  
?着地鑪煨芋火  
洞开书阁看梅窗  
闲来检点牀头物  
螳绿鹅黄正满缸  
石谷为予画金园  
图卷子复作大幅  
仿香山池上篇  
意为赋长歌

石谷先生类臞鹤  
风神萧散意卓犖  
高人寄托无不可  
偶尔落笔摇五岳  
曩时惊见富春图  
十丈青岑隐丹壑  
神交意许三十年  
忽向京华走芒屨  
再拜喜识寒松姿  
逸致高怀老磅礴  
俛仰都无世俗情  
坐上吹香比兰药  
自昔曾与西田翁  
古今风雅同扬搉  
只今前辈若晨星  
衔盃话旧空萧索  
我家山杏霭间貌  
以丹青何绰约  
梅花?处着疎篱  
杨柳陰中藏略约  
一幅鹅谿池上篇  
竹塢荷汀景寥廓  
鄙人自爱愚谷愚  
先生为写乐天乐  
怜我风尘老未休  
苦忆谿山自煎斲  
譬彼井谷有枯鳞  
暂转清波供瀉瀉  
秋窗日对烟云生  
怀抱经时差不恶  
湿翠香嵐足千古  
濩落园林欣有托

东坡有和渊明怨诗楚调示龐主簿及邓治中诗读而爱之遂用其韵

南山衆所见陶咏独悠然  
叹息头上霜换我镜中年  
人生如坠叶忧乐随所偏  
丰腴慕朝市枯槁耽园田  
猗与东臯子醉乡受一?  
晨兴荷锄往夕寝抱瓮眠  
欢戚等飞埃寒暑忘推迁  
落花堆我侧幽鸟啼我前  
挂瓢饮谿水策杖入邨烟  
还令简牘上千载称豪贤

文端集卷十二

# 卷十三

钦定四库全书

文端集卷十三

大学士张英撰

存诚堂诗集九

近体诗一百十四首

送李鬢岭先辈山居四首

自有巖栖志於今几十年青山留隱逸白首到林泉书卷移家易松云隔岭偏寒宵风雪後清  
兴与谁传公麟堪住处随地是龙眠山色宜朝暮梅花老岁年抱琴?竹里伴客小谿边为报春  
烟起呼童学种田莫?嗟尘网劳劳始放闲松根容歛傲筇杖任跻攀径小都横石篱疎好看山  
夕阳花外落手自闭柴关但得佳山水何妨婚嫁身寒衣新布衲野服旧纱巾采药邀隣叟寻  
兰赠故人门前松色老百尺见龙鳞

信臣牧五读书山中诗以怀之

不待梅花尽应知不肯还抱书随?日泼墨写寒山沽酒烟邨外悬鐙竹隄间好同何次道辛苦  
闭柴关

过霜鹤昆弟龙眠山庄五首

谷口龙眠路沿谿老树中稻田新涨合花屿小桥通结屋依层翠编篱覆落红往来城市近沽  
酒属樵童谿馆榛芜後诛茅结短檐门因新笋闭屋为老梅添花影移藤架松陰落布帘园林  
与丘壑幽事此能兼寒知闻旧阁石路上嶙峋兄弟俱才子园林亦比隣莺花随地好笋蕨一  
时春谿畔过从易扶筇不厌频少保藏书处惟余十亩存清风依草阁碧血滴松根世代看陵  
谷耕耘约子孙一经耒且读辛苦慰忠魂【寒知阁爲左忠毅公读书处】

雨过谿流急初晴款竹篱龙眠芳草路驴背夕阳时慰我三春约醺君隔岁诗笋香花落候况  
复听黄鹂

雨後过漱石亭二首

清流带西郭一径入柴关过雨客初到叩门僧未还雀喧花自静谿闊石长闲隔树秋风起樵

歌徧晚山荒园人境外漱石小亭幽竹澹容僧俗花飞任客愁谿声偏入夜岚气总如秋雨後  
泉方好何人雨後游

在郡城忆牧五庭中双桂

海门忽覩黄金粟苦忆君家双树傍酿作桂浆千日醉散爲秋雨一城香月枝露重阶常润僊  
萼云深户自凉定有夜来花下客隔帘清歡共飞觴

晚春郊外二首

平郊一道蹋晴沙春色留人春日斜紫燕飞时穿柳絮黄鹂啼处落松花幽谿水饮青丝骑碧  
草香承油壁车日暮苦吟何所羨远邨如画两三家

草生河畔碧如苔岁岁春光不用媒风雨有期寒食到莺花无恙隔年来却添离思萦高柳惟  
许新诗送落梅独客何心闲倚杖子规声里最裴回

醺友人见赠

荒亭遥对白云间地足蓬蒿嬾未删开户最宜春夜月到门无限夕阳山秋当静处蝉声歇人  
正吟时竹影闲更爱城东高士过余香三日袭柴关

过谿南有怀故人

谿上驱驴过短垣故人曾此闭柴门方塘断岸经春雨野水平桥复旧痕梅种竹窗花渐发诗  
题藓壁墨犹存临风忽忆前年事水鸟衔鱼噪夕昏

冬日

绳牀竹几小窗前手爇清香?着縣冬日爲人来草阁梅花与客共寒烟嵇康达命原宜嬾摩诘  
能诗自解禅但得身闲兼地僻闭门一壑亦翛然

庚子放後舟中赠信臣二首

与君相对数秋晨几度高吟涕泪新携手正当黄落日入门俱有白头人岂应我辈长贫贱莫  
漫相逢说隐沦枫叶亦知游子意寒声萧瑟古江津

一叶轻舟逐水湄西风吹客到家迟依然江岸芦花路况是秋深暮雨时暂屈敢言同鹤胫长  
愁只恐负蛾眉惜陰亭畔苹香老难荐湘累楚客祠【古人云功名时屈时伸如鹤胫然】

## 次韵答信臣二首

八月寒江秋正清与君同作秣陵行  
晓过茅店看霜迹夜泊芦洲听雨声  
旧路总余游子恨新诗弥见故人情  
高吟正复增惆怅难遣人间百感平

依旧驱车往复还秋花重与闭柴关  
云霄待客何年事风雪容人此日闲  
泪落顿添桃叶水情多梦雨花山君  
归抱病予愁絶相对何曾一解颜

## 集左橘亭小圃二首

荒园手自翦荆扉侍御先生此息机  
几树梅花传晚节满庭橘柚凛霜威  
纸窗风雨书声静草阁萧疎鹤梦归  
天壤勲名留伯仲遗经读处莫沾衣  
【左侍御三山公为忠毅公弟】幽径闲  
来趁晚晴故人归复自臯城淮南招  
客皆词赋灵运能诗本弟兄午夜清霜  
增酒数一帘明月驻歌声茗香客醉狂  
吟後移得琅玕影正横

## 之郡城道中望龙山三首

二龙山色翠漫漫常向宜城陌上看  
望入江南秋色里青当皖口白云端  
遥连野水岚光湿半背斜阳树影寒  
极目千峰倍惆怅何年策杖蹑层峦

不因谿水泛残红谁信桃源与世通  
鸟路云深松叶里人家春老杏花中  
悬崖终古留僊竈絶壁千寻叹鬼工  
山寺一声清磬好簔簑西畔石桥东

野老家家获稻梁一川风景近柴桑  
晚花着屐寻霜圃秋水扶筇渡石塘  
隔岸乱镫螯正美千邨老树橘才黄  
何年丛桂招人隐北渚南汀筑草堂

## 闰七夕

碧霄无际彩云流乞巧今年巧倍醺  
天上香车双七夕人间团扇又三秋  
辛勤乌鹊还成渡消瘦青蛾几上楼  
翻羨秋宵容易得盈盈一水不须愁

## 虞美人花

翦尽春罗赛得无倚风似欲倩人扶  
乌江尺地全非楚青塚闲花尚字虞  
种向九秋宜丽服开当三月徧平芜  
一年一度看浓艳絶胜明妃见画图  
【此花初种时宜于中秋丽人绮服】

## 镫花

银烛作花花正然寒宵春色倍堪怜  
月光暗处垂金粟佛火堆中长白莲  
旅客敲残秋漏里美

人挑落晚风前何如绣阁珠帘下并蒂同心照绮筵

### 秋海棠花

秋花亦占海棠名玉露金风别有情兰纵比幽伤冷落杏虽如色让轻盈微香应欲消遣恨红泪依然泣旧盟节节珊瑚低拂地临风一笑许倾城

### 偶饮大匡山亭二首

过君别业即淹留曲径深林恣意游共指云峰高阁敞忽穿石壁小亭幽层峦望处临官舍古木疎时见戍楼携得楸枰沽得酒寒风萧瑟不须愁

城外谿通城内岑泉声环遶石楼深林从落後偏宜望梅未开时便许寻宅畔烟霞堪稳卧

君恩岁月与高吟丹铅坐拥良非易莫为浮云感素心

### 为友人题裴航游僊图便面六首

吟到樊姨旧赠诗忽从邨路见蛾眉神僊纵道多奇蹟说着裴航蹟更奇

老媪呼来见玉颜明璫纤手绿云鬟相逢何地无僊子多在芦花驿路间

帘下才闌半面春千缙玉杵此情真神僊不死皆情种月学人间薄幸人

觅徧天涯道路长故将辛苦试僊郎岂应天上元霜易翻爲人间玉杵忙

只手携来问水湄云英重见旧茅茨怀中兔影如明月光照名姝十二时

陌上车声衣上尘一回老却一回春玉京抛得崎岖路便是神僊队里人

### 络纬声四首

络纬声中秋夜厌草根凄切透书帘问渠何事清宵苦空被人间懒妇嫌

瓜蔓丛深咽露微如何不织御寒衣清霜一夜飘零後粉蝶蜂腰一样归

一声断处秋盈盈天遣人间织妇惊老大女儿不解事停鍼只当听虫声

晚凉飒飒雨霏霏瓜叶稀时叫渐微病妇临风忽长叹今年八口计寒衣

## 远峰亭初成信臣见过赠诗五首即次韵奉答

一片城隅地，耒耨来瓦砾。余经春成小筑，尽日赋闲居。荒径添藜竹，高窗拥素书。闭门无剥啄，芳草上阶除。结屋依山麓，平原望白沙。故人同夕照，天际正残霞。带月梧桐影，迎风茉莉花。寒声留客听，络纬满秋瓜。新诗冰雪字，好向竹窗悬。小咏风前句，微凉日暮天。远邨依树出，樵唱隔林传。自爱闲吟地，城隅有一？宵凉人未散，新月上高岑。鸟影没残照，秋声满竹阴。云连千堞晚，虫遶一镫深。小榻临窗置，微寒蚤欲侵。龙眠读书处，水竹小堂名。爱子寻泉石，慙予隔市城。亦曾过白社，相与听黄莺。更讽江峰句，偏增夙昔情。

## 咏水僊花八韵

自有神僊骨，况依清浅波。前身应孝女，小字比湘娥。种别玲珑巧，花怜姊妹多。衫裁微碧绢，结翦澹黄罗。影入残年烛，香留彻夜哦。玉盆围白石，银蒜藉青莎。梅婢那堪受，兰妻应若何。清芬推第一，花史许谁过。

## 春暮过信臣龙眠草堂二首

春山独往听黄鹂，画得龙眠只自题。犊路半随流水曲，田家只在杏花西。新移石竹迎门绿，手种山蔬逐路低。偏有长康难画处，书声寒夜雨凄凄。

高吟日日送斜晖，招客寒山共掩扉。陂下麦田沽酒路，门前春水钓鱼矶。人从静後偏宜嬾，家在尘中未肯归。愧我暂来还欲去，羞看白鸟向云飞。

## 江邨

江上青帘卖酒家，停舟才见一谿斜。秋风荞麦邨邨雪，夜月蒹葭处处花。

## 深坐

击柝声声过戍楼，小亭深坐爱淹留。鸟翻竹叶频疑雨，虫恋瓜藤蚤报秋。

## 采石怀古

悬崖百尺俛江流，上有诗人太白楼。牛渚欲寻何处是，天门遥望不胜秋。松声夜共寒潮落，石色晴看画阁浮。僊客骑鲸已千载，白云明月属渔舟。

## 过邹县谒孟庙?赋十四韵

尼山炳长夜，邹邑振宗风。陷溺过尧水，疏排俪禹功。七篇垂道法，千禩格愚蒙。俎豆周区夏，精

灵霄故宫清晨起严肃数里见崇隆风土闾山左弦歌接鲁东雕甍凌碧汉丹壁映长虹蔽日林陰密盘花石柱工垂旒簪白玉披袞绣华虫蝌蚪丰碑壮牺牛祭器充及门诸弟子从祀一堂中还觅蟠松际因知寝殿通徽称加孟母遗像识邾公肃拜轩楹侧瞻依阙里同

### 放鹤亭

已过云龙麓还登放鹤亭高踪徒寂寂清唳亦冥冥一派河光白千畦麦秀青僊禽渺何处烟际指南汀

### 鍾离古蹟四首

落叶霜天作雨声驱车濠水不胜情牛羊日暮通侯宅禾黍秋风帝子城尽伐禁松陵塚见渐偷宫瓦御楼倾北连芒砀看云气极目荒丘感叹生

秋草寒烟落日斜衰杨风起散寒鸦黄巾一自成封豕赤帝翻教哭断蛇王气几年消碧落谿流无处觅红纱寝园未必皆遗老徧种东陵五色瓜

东南遥望几孤邨野日荒荒白昼昏九庙笙鏞归劫火百年汤沐说遗恩草埋墓道麒麟碣漏冷铜壶翡翠痕闻道奉祠零落甚断桥衰柳故侯门

凋残金碧旧禅关僧闭闲庭草色殷谁向荒原寻马鬣惟从古寺识龙顔优昙花冷三千界苔蘚碑封第一山自昔兴亡等闲事不须惆怅夕阳间

### 闵子祠

下马秋原拜闵祠祠倾谁与覆茅茨数家石屋贤人里一片荒坟孝子碑汶水风清辞世往芦花衣冷畏人知可怜陌上俱游子回首乡关日暮时

### 戚里

戚里歌钟旧赐楼濯龙门上几经秋玉鱼长伴衰杨老石马空迷碧草愁当日望云随帝子百年食采列通侯只今零落残阳里賸有红墙遶故丘

### 除夕河间道中次昭兹韵

椒盘柏酒异乡同此夕惊心叹转蓬鹤髮老亲千里外鸡声残梦五更中星悬屋角光全白鐙近牀头影乍红南去归鸿凭寄语

### 帝城明日足春风



### 甲辰元旦次前韵

蓟北风烟故国同不须千里怨飘蓬柳深细雨龙池外花满宜春御苑中莺语渐催宫草绿马蹄行蹋上林红建章一夜千门晓从此朝朝待好风

### 慈仁寺

长安千骑蹋香尘尽是看松古寺人海市乍开楼观日石家初试绮罗春玉藏锦篋夸前汉珠泻金盘出大秦看到山门将日落更谁来问老龙鳞

### 春半

春半江南烂漫时朔风吹雪点须眉白杨几树鸦空遶翠麦千畦雉尚饥芳草不牵池上梦寒梅难寄陇头枝五侯温室花争放未送青青到柳丝

### 寒食河间道中

驱车日暮尚裴回寒食今朝何处栖渐喜柳从归路碧始知春自故乡来千邨禁火烟空冷几树临风花渐开丘壠旧山兄弟在漫忧陰雨积莓苔

### 亚父塚

驱车路入古彭城亚父坟前春草生历数天教分楚汉英雄人岂谢良平碑留姓字千年恨魂断河流午夜声往迹恰隣高帝庙相看应使壮心惊【塚南有汉高皇庙】

### 过九里山二首

遗迹彭城夕照边中原百战亦徒然帐中气为美人尽江左羞因父老怜汉业萧条成往事楚歌凄断自千年游人极目空惆怅数点青峦起暮烟

刘项应知不并存当时一剑失鸿门悲歌漫下乌骓泪王气全消白帝魂晚日乱山旌影动霜天百代战云昏看来逐鹿都如此指点休从胜负论

### 归渡黄河

春水黄河接远天人归依旧夕阳边马衔青草嘶沙岸客傍梨花唤渡船波影滢洄成九曲涛声澎湃自千年祖生空有闻鸡志击楫中流一慨然

### 放归二首

衣上空沾京洛尘闭门犹许作闲人旧栽松竹惊心看久别琴书到眼新花事芳菲看渐晚莺声圆滑听才真翻怜蓟北多羁旅输却江南一度春

莫叹寻春归较迟风光正值夏初时细翻藻荇收鱼子牢护樱桃恼雀儿穿破间阶容碧笋叫残清梦任黄鹂垂檐梅子离离绿忆杀去年花满枝

春晚同孝仪从房师即墨黄公泛舟淮河并观骑射【黄公时为凤阳司理】

千畦麦穗带城斜供帐行旌驻水涯明月雕弓穿柳叶春风金勒映桃花褰帷许列康成席鼓楫疑同博望槎漫道使君归路晚还停铙吹看桑麻

鍾离遇徐莘叟前辈却赠

谈经曾压汉廷儒今见风流赐监湖一自芳洲褰杜若从教宦迹托蓴鲈倦辞丹地含鸡舌醉解宫袍拥凤雏春宴得陪莲漏永鸟啼花落听吴歊【楚江典试後即请告时携令嗣游】信宿暂如三兄西山别墅次信臣壁上韵三首

深径寒林叶渐凋此中人久赋招招梦同春草因曾到路觉秋山转不遥一带苍巘垂石乳数家茅屋住峰腰支颐笑指云生处髣髴闻歌是晚樵

手自披榛葺故庐闭门聊且遂吾初夕阳山下闻驱犊秋柳陰中看打鱼兰佩香偏宜卉服芒屨健可谢篮輿隔谿数武邻丘壑常傍松楸读父书【伯父方伯公墓在西山】千个簔簞未觉贫茅檐况复一时新构成药圃蜂常闹看破蕉陰鹿也驯栗里果肥喧稚子枫林叶落见比邻只今预订桃花约莫负明年此地春

寒食埽先慈殡所以未归丘墓感赋二首

陟岵悲来五父衢路经荒岭更崎岖空山去郭十余里老树成陰三两株地僻草花眠乳鹿春深风雨唤慈乌松楸未卜陶家宅廿载泉台梦稳无

兄弟无由种墓田每逢寒食哭荒阡爲贪白日千年事耽却黄泉几岁眠泪尽啼鹃空复尔梦凭归鹤亦茫然北邙寸土艰如此羞向东风吹纸钱

绣球花

萼绿应知是後身澹如新柳白如银请看姊妹繁华队尽是神僊冰雪人翠黛渐舒眉色浅玉颜齐簇粉腮匀黄鹂声唤东风急吹落梅花在暮春

春郊

昨夜春衫翦绦纱阿谁挈伴向谁家游丝不解牵纨袖弱草偏宜驻钿车团扇故遮憎柳眼小桥迟过为桃花欲图蛱蝶无佳样记取风前一道斜

## 七夕

凉宵斜月照疏棂一树秋声梧叶庭最喜风光当七夕又教儿女认双星去年夜雨山邨梦前岁秋香木末亭莫道人间无远别几回同尔倚云屏

## 牡丹

万叠罗衣倚画栏沉香亭畔昔同看和风梦暖红珠帐晓露光凝赤玉盘粉颊微痕脂欲透绦绡斜映锦成团上林三月花千种更有何花压牡丹

## 梅花诗三十首

横斜多在短墙东半放微舒清露中吟入暗香诗冷艳梦回芳径月朦胧几株最爱前邨白一种尤怜照水红自是东皇憎寂寞故将寒蕊试春风

苍枝经岁古苔封忽点疎花在暮冬时近艳阳应有待天怜寒谷若为容牀头屋角香先透月下谿边影自重此际与谁同晚节层巘冻雨滴青松

一天雪意压明缸臞骨棱棱战未降老树数花开隔岸春风昨夜渡寒江遥怜瘦影临官阁静对香痕落纸窗可惜黄莺啼不到任他山雀自双双

清谿茅屋复疎篱临水临檐初放时雪里自支高士骨帘前欲点美人眉疑传沧海珠林种谁琢空庭玉树枝偏以岁寒为令节旁人错认晓风吹

朱梅几树遶山扉爱尔偏当雪正霏掩映珊瑚银海浪轻笼红玉白绡衣也知冰骨姿原冷未觉琼枝体太肥长信只今推第一浓将香粉抹杨妃

携樽好是看花初李径桃蹊尽不如幽谷春陰含雨重野田寒烧破烟疎有情许伴孤山鹤何客闲骑灞水驴最忆一丛窗下影龙眠东畔故人居

幽姿应悔识林逋引得闲人种几株深苑巧增宫女艳空山偏学老僧臞半湾流水看逾好数点莓苔画得无此际若教霜月照分明一幅晚香图

还如仙李植丹梯数点寒云水一谿山雀啄花清露里寒鸦挂影夕阳西参差画阁春偏蚤掩映江邨路欲迷风起枝头飞似雪游人莫道旧隋堤

孤情未易与时谐只合龙鍾傍鹿柴  
草阁梦回依纸帐山桥花落衬芒屨  
低枝自覆横琴石老干全拖隔水厓  
插向胆甌谁可伴炉香茗椀在萧斋

清谿一带是谁栽岁岁春光倩作媒  
笛弄晚风偏历乱月临芳树亦徘徊  
潇湘神女和烟立姑射仙人蹋雪来  
盘屈盆中非所愿羡君犹傍水仙开

欲晴欲雨是芳晨南北枝头开渐匀  
自分有香留野客不妨多刺谢樵人  
好同兰麝称同调惟许梨花步後尘  
谷口山中无岁月千株放尽始知春

繁花枝上已纷纷老树谿边卧冻云  
开落非关春色异寒暄全自岭头分  
何郎粉汗应难傅荀令衣香不待薰  
独以孤标先衆卉岂因风雪惜离羣

苍岩翠壁长孤根常许移家托小园  
风暖乍闻香绕树雪晴尤爱月留痕  
枝封石屋烧丹地花覆旗亭卖酒邨  
一自罗浮春梦後更谁人与伴黄昏

如画枯枝墨未乾赏心端在雨中看  
支筇滑路寻幽寺放艇清谿过远峦  
冻折有声翻玉佩冰凝无力倚阑干  
桥边若遇襄阳客为尔殷勤道岁寒

岁晚携樽探旧山古梅招客入烟鬟  
偶逢石上兼谿上多傍松间与竹间  
高士苦吟扃小阁老僧香定在深关  
此时一树偏清絶雪没枝头苔藓斑

梅花一度一春天偏为人间管岁年  
餐雪本无烟火气埽眉不借粉脂妍  
短檠幽梦萦诗笔断岸香云湿钓船  
昨夜湖边有微霰冰凝寒玉隔苍烟

芳心初绽雪初消未许春光在柳条  
隋苑岂知裁素练秦宫不解卷轻绡  
惟予闭户清吟赏念尔冲寒浊酒浇  
说与俗人应未识水边山畔自萧萧

嫩蘂疎枝影自交一帘新月映花梢  
纵横字体摹张旭冷落诗情托孟郊  
折得晚香兰可伴惊闻清唳鹤还巢  
嘉名异日传调鼎记取蟠根在草茅

五月江城夜笛高一枝摇落在亭臯  
曾因托咏传南雅惜未搴芳入楚骚  
犹觉礪松逃世苦翻怜江柳送人劳  
摘来和雪偏堪嚼磊块何须醉浊醪

无数寒花发旧柯闲庭从此苦吟多  
十分春信劳青帝一点芳心托素娥  
开落总宜人澹荡醉醒偏称影婆娑  
布帘香透寒鐙暗听我清狂彻夜歌

爱尔根梢亦自嘉耐寒不数拒霜花  
每从枝上分香雪旋向铛中淪芥茶  
南国诗筒迷驿使广陵春梦冷官衙  
江东久隐罗昭谏爲看参差几树斜

一岁烦君领衆芳水边石畔占春光自将孤洁蘼霜雪嬾与繁华鬪艳阳有梦何曾迷蛺蝶问  
名犹喜字鸳鸯央官人竞学新妆巧尽点眉心几瓣黄

作赋曾传宋广平花期独与岁寒盟谿山冻雨封千树殿阁晴光动九英艳质自能忘粉黛素  
心应不负冰清携来书卷花间读共尔披香入玉京

一梢寒玉偃空庭还与幽人伴醉醒月下晚香依铁笛鐙前疎影落银鉶旧栽久许邻松石初  
放偏知近草亭若使东皇肯珍重三春常到水晶屏

谁道清寒苦不胜冷然香色在层冰飞来江岸疑残雪挂向岩西学古藤月映夜珠朝露重风  
低碧玉晚烟凝湖山深处开千树欲擢轻舳恨未能

花史推君第一流春光占尽在扬州孤根点缀萧斋寂老树披离古洞幽雨雪相逢吟易苦寒  
香持赠句难蘼临风忽起故人思欲折无由寄陇头

满庭寒蘂驻春陰几点新蜂特地寻南国名花原并蒂上林佳卉本同心绿英眉黛争浓澹紫  
萼唇脂鬪浅深绮阁画栏无限树一枝先上美人簪

名园花信尔先探霜雪年年与性谙十月蚤开传上国一枝堪寄在江南微舒檀口歌初歇澹  
抹朱顏酒半酣摇落空庭春事晚好分红雨到双柑

遶屋枝枝近短檐晚烟初罩雨廉纤摘将寒蘂诗堪祭悟入微香花可拈乍斂芳心如避客巧  
回半面欲闌帘幽人久已无尘障爲尔清宵酒数添

古梅卧处倚松杉花落春风覆石岩结子有心抛锦带向人无力卸轻衫香谿暖漾鱼争沫晴  
雪霏微鸟不衔应有新飞双白燕遶枝惟听语呢喃

### 文端集卷十三

<集部,别集类,清代,文端集>

# 卷十四

钦定四库全书

文端集卷十四

大学士张英撰

存诚堂诗集十

近体诗八十首

丁未春释菜

先师庙?赋二十韵

昭代崇文日羣英习礼时桥门环彩仗璧水簇春旗逵路纷冠盖长廊集羽仪赐名皆勒石历代有丰碑斑駁搜前哲琳琅读古辞殿高低燕雀松偃走蛟螭积翠黄金瓦蟠花白玉墀漆经文典贵石鼓字离奇龙篆存周迹鸿章想汉规层台容晋接千仞许羣闕绣柱扶丹桷重氍映绦帷高窗悬绮缀古壁网罟罍乐器纷匏竹铜樽列象牺?行释菜礼偕咏采芹诗草绿侵袍色花红映酒卮平生怀盛事此际愜心期太学人才地司成国子师抡才皆董贾结念在臯夔事业辉麟阁文章烂凤池愿言崇圣训持以报雍熙

忆家山诗十首

勺园风景重相思有梦先归春草池里巷过从兄弟乐园林佳胜夏秋时穿阶新笋生何地拂檻名花发几枝最是石堤临水处远心长綰绿杨丝【勺园】

西南别业傍城隈澄对轩中首重回碧柳影从冰簟拂白莲花抱水亭开微波似织凉初起隔岸如丝雨欲来浊酒一尊诗一卷知君梦不到尘埃【澄对轩】

兄弟躬耕自结庐湖山深处狎樵渔稻香自与荷香接松影还兼竹影疎鱼鱸似银收网後藕丝如雪出泥初棣棠花下羣回首定念天涯有索居【松湖】

远峰亭畔绿陰遮半亩琅玕一径斜风卷江云看九子雨来山郭暗千家儿童笑逐枝头鸟杖履闲寻叶底花华髮频年惟绕膝平生不愿客天涯【远峰亭】

花亚轩中树影稠微凉才动暑全收绳牀午梦湘帘暗茗椀春香纸阁幽翠竹便堪消永日海棠蚤已报新秋北堂况复依萱影絶胜风尘事远游【花亚轩】

元度城南辟草庐门迎荒圃种山蔬蚁浮春瓮常留客蠹落匡牀自着书竹路过从精舍近荷香披拂晚凉初廿年风雨频游地花落花开总忆余【伊蒿小圃】

楼接苍峦俛县门城中胜地属偏园家余闲地皆松竹世看名花到子孙小院微凉侵簟扇西山紫翠自朝昏高窗吟望增惆怅绿鬓红绡何处邨【叠翠楼有牡丹为先世手植罗昭谏有看到子孙能几家之句】

回轩僻巷有精庐门闭高梧影更疎翠竹笋成迷巷陌紫薇花发映庭除东墙老圃朝耰菜小阁佳儿夜读书棠棣天南知烂漫寂寥依旧子云居【半圃】

半亩潘园种竹余安仁聊且赋闲居故乡别後俱千里京国春来少素书【先是木厓有山左之行】游屐倦时花事好草堂开处绿陰疎老亲绣佛吟诗暇日日输君奉板舆【石经斋】龙眠深处结茅茨忆尔空山冰雪时岑寂久从爲客惯清寒翻觉畏人知荒厨积雨迟烟火草阁悬灯下布帷底事吟成转呜咽泪痕倾向蓼莪诗【龙眠水竹山房】

### 慈仁寺海棠

长安初见海棠红带露含烟古寺中酒盏时来浇艳质车尘不解避芳丛新妆厌浥朝酣雨锦佩招摇暮倚风苦忆江南千万树莫愁湖畔石城东

### 院中秋晚

御河流向禁城东古屋参差烟霭中匹马空庭秋草绿寒鸦高树夕阳红霜催柳色凋秦塞月傍砧声出汉宫尺素渐稀衣渐薄可堪惆怅对秋风

### 秋夜宿院中二首

向夕摊书坐何曾异薛萝月临丹地迴秋傍古槐多凉气才侵簟微云欲渡河

### 圣朝勤问夜将曙听鸣珂

康乐多佳句慙予非惠连茶香同永夜鐙火各青氍树色连双阙钟声落九天高吟闲不寐凉月度花砖【时同礼存宗兄】

### 中秋夕赋得何处秋光好四首

何处秋光好家园忆老亲花间人似鹤月下髮如银珍果宜佳会轻衫称健身膝前三岁弟学语听才真何处秋光好园林忆弟兄蟹螯烹正美秫稻酿初成枫叶红千树桂花香一城等闲行乐处偏动旅游情何处秋光好家山忆旧游龙眠新雨沐浮渡晚烟收数步从看竹诸峰尽

入楼湖边饶胜事菱茨满汀洲何处秋光好闲窗忆旧欢赋诗常暗记作字倩同看月夕中庭  
敞花时别圃宽桂香深处坐独对露华溥

投座师大宗伯真定梁公二十韵

仰止宗工久

熙朝盛羽仪文昌符象纬海岳毓灵奇日下金茎露云中玉树枝廿年辉紫极双壁映彤墀尹  
陟诚无愧机云俨在斯壮猷元老藉邦代重臣资经画安桑土勲名勒鼎碑五兵彰赫濯九域  
际雍熙汉室修文教虞廷命伯夷

帝心爰简在羣议洽畴咨肃穆凝天祉寅清格地只弓旌诚重典衡监藉无私骐骥登台日珊  
瑚出海时抡才皆素士报国有鸿词自顾盐车质深惭伯乐知公门容作树鄙念正倾葵遽返  
东山驾长銜北海卮图书谐夙愿山水惬幽期立雪思清论扶风想绛帷

中朝司马重难久卧东篱

集胡氏园林十首

嬾从绮陌共鸣珂却向幽林埽薜萝自是功成闲岁月手栽松竹听清歌

小山叠翠起平芜曲曲朱栏入画图久矣江南台榭少谁云佳丽数姑苏

一曲清渠泛紫澜画船斜系玉阑干回思此景依稀似曾向秦淮渡口看

曲洞幽房往复回忽从高处敞亭台白羊几点平芜绿一派西山苍翠来

蕊珠宫里夜溶溶红雪歌儿绣幙重避客娇羞才唤出两行银烛照芙蓉

箫管真疑落九天游丝百尺绕芳筵黄莺新啭银塘柳难比歌喉溜滴圆

梁上轻尘落吹台彩云天际亦裴回谩言歌舞教成易十斛明珠换不来

蛾眉如画翠屏中绣阁珠帘一点红白鹤亦知新曲好唳声原不为秋空

司空肠断语应真听入微时唤絶伦一叠清歌频击节等闲倾尽瓮头春

晚风清露袭虚堂好客情深秋夜长红烛清樽许消受彩绳何用系斜阳【壁上龚大司马诗  
有安得彩绳千百尺画楼高处系斜阳之句】四女祠【四女以养亲不字祠去德州四十里



南归宿此益增感叹因成长句】

四女无家翻有祠明妆犹得伴  
顰眉谁言夫壻铅华日堪换  
双亲菽水时古壁难寻黄绢字  
荒阶空偃绿槐枝独怜名利天  
涯子南北年年怨路岐

登聊城光岳楼

光岳楼高复几重陵风天际绣  
芙蓉数丛烟树分齐鲁万叠晴  
峦俛岱宗画栋遥连青汉起尘  
窗长藉白云封仲连一矢成千  
载牢落荒城想故踪

安山道上新柳

一行疎柳受斜风偏向河桥水  
驿逢路比回肠千寸结家从归  
梦片时通倚风有恨怜人瘦带  
雨如啼妬眼红陌上飞花舟上  
客三春与尔共飘蓬

挂劒台

延陵遗迹到於今指顾犹堪感  
客襟风起白苹吹劒草雨滋苍  
蘚没碑陰长虹不散千年气秋  
水长悬一片心翻覆人间等闲  
事因君高义起愁吟

淮陰城下

桃花春浪拥孤城合派河淮此  
际清九服洪流归大泽万方嘉  
种达神京帆檣云影东南集鐙  
火波光上下明独惜未登高阁  
望中宵欹枕海涛声

海印庵忆旧

兄弟扁舟江上人昔年曾此滞  
河滨秣陵烟树迷青嶂采石风  
涛起白苹避暑同依僧舍柳摊  
书还埽佛龕尘重过旧路无相  
识谁解临风感叹频

与浮山金谷岩僧

岩壑诸名胜香林此最幽岚光  
千树碧石气四时秋灵鸟常呼  
佛飞泉自入楼曾来分定宿良  
会订重游【岩中有青鸟常鸣于  
佛座声如笙瑟】

四秋诗四首【同四松木厓三兄作】

秋荷

荷衣经雨覆横塘旧日田田今浅黄无复青钱低贴水惟余翠盖晚迎凉一枝菡萏三秋露隔岸芙蓉昨夜霜莫道红妆零落尽赠人偏爱采莲房

### 秋鷺

曾听黄鹂各赋诗澹烟新柳在龙池只今红树双飞处谁复春陰百啭时歌调晚风应渐涩羽毛清露恰相宜金衣若向篱边过莫认霜天菊一枝

### 秋草

芊芊无复徧香堤雨後霜前若翦齐难报春晖犹有恨时含清露总如啼寒烟陌上连天远秋色江南逐路低此际闲吟还极目关情何异蹋花蹊

### 秋燕

主人台榭尚经过掠羽新秋意若何玳瑁梁空雏渐长水晶帘动影偏多鸣蝉无意休争语江鴈相逢一和歌莫羨梨花庭院好澹烟疎柳任婆娑

又赋得秋荷秋鷺二章次四松韵即赠之

芙蕖冉冉立寒塘不向花时鬪艳粧乍褪红衣沙岸冷频摇白羽水亭凉独怜潋灩垂秋露未觉萧疎带晓霜此是青莲投老日风流莫漫说徐娘

三春已去听黄鹂忆尔歌喉絶妙时上苑奇花无数树建章新柳最高枝啼残红叶声偏巧听入霜天韵转悲公子老来无滑调诗家堪比少陵诗

语菊二首【同四松木厓三兄作】

芰荷老後见寒香邨落萧萧夜有霜别圃秋光初烂漫东篱闲客偶相将冷风细翦金爲缕凉月斜闌玉作璫彭泽只今消息远露华枫叶共苍苍

金英历落向斜曛得傍寒香是此君晚节同予吟白露闲心共尔对秋云清芬自古惟兰近甘苦谁人与薏分花史只从顔色辨嘉名应独数黄筋【黄筋皆菊种甘菊苦薏】

### 菊答二首

山边黄叶共萧森常有诗人着意寻九月花时何太晚重阳秋雨易成陰敢辞节序烟霜日少慰人间摇落心靖节归来多好句凭谁爲我一高吟

疎篱掩映一丛花含露含烟影半斜自分寒香堪满把岂同芳杜却盈车惟宜泽畔闲人种偏称孤山处士家不向庭中怨移植知君端不爱春华

### 赠友人隐居浮山

吴融居处自爲邨浮渡烟岚近在门避世岭皆名佛子荷耒人本是王孙春烟种秫闲田外夕照吟诗古树根三十六峰峰顶路凭君捉笔写秋痕【浮山有佛子岭居近之】

### 送四松先生之金陵

扶筇何处意翛然桃叶谿头酒肆边戚里歌楼空蔓草南朝古寺半荒烟凤凰台影江流合燕子涛声瓜步连怀古只今谁第一久知元白让诗篇【将从金陵之瓜步】

### 秋浦晤任鹳峰即赠

海门风浪里偶挂片帆来秋浦冰初结齐山雪未开游筇偏瓦砾客户亦莓苔叹尔羁栖久任华本异才

### 冬日登齐山

牧之游处一扶筇几点苔痕想故踪石影洞中惊虎豹翠微天际列芙蓉千家近接城南路九子移来江上峰闲客正携邨市酒落晖何意到青松【齐山有九峰亦名九子】

### 大隐园诗四首【园在金陵为族叔观察公别业】

杨柳春烟覆白门冶城佳气满亭轩香山居士今遗老监水风流在小园鸥梦池边稀过客凤雏花下引诸孙谢公此地多游迹丝竹东山意尚存

大隐由来卧一丘亭台絶胜辋川幽小山积翠藏书屋曲水流纹荡画楼花草自成三径色风烟不改六朝秋步兵老後无尘累筇杖芒屨任所游

弘济江流接翠微移来此景是耶非凭栏细数鱼儿影叠石还如燕子矶山路逶迤松柏暗水亭摇曳芰荷围画楼东畔芳菲处梅杏深藏白板扉

秣陵闲櫂远相将信宿园林美辟疆饮共竹林随杖履梦同春草近池塘雅闻羣从皆花笔唤出佳儿尽锦裆雪屋西偏书阁近诵声清夜彻回廊

### 采石

晴霞落日映长川采石重来夜泊船断壁千寻悬古屋苍松百尺冷春烟江通建业潮声急山望天门黛色连流水绿杨如画里此中堪着李青莲

### 春深兰陵舟中遇雪二首

兰陵一櫂雨如丝三月还如腊月时积雪几曾杨柳惯深寒从未杏花知苍烟遥望春申浦芳草难寻泰伯祠天意不从游子惜可怜消息误南枝

冻雨河声咽不流柴门雪後酒帘收夜阑诗共吟残烛春尽人犹拥敝裘柳色一行垂断?花时三月在扁舟张融漫道无家住未必当时不解愁

### 同陈幼木同年泛舟虎丘四首

流水桃花处从君荡画桡维舟频近寺闲话忽过桥茗椀隣船送香烟画阁消凭栏谁最胜春色菜花遥虎丘山畔路一道柳陰斜酒艇常延客人家半卖花停桡寻小圃放屐爱晴沙莫向桥头去笙歌转觉譁系舟延步好还过劔池游客意醉奇石春风吹画楼桥回人影乱花发酒帘稠最爱长廊後烟光衆壑收幽谷推元墓寒香万树栽如何今日酒却话去年梅胜事多延伫伊人每溯洄兹游偏月夕深愧入城来

### 三月十四夜过念斋园中

良宵清话茗香随曲径疎篱遶涧池鹤舞自骄明月影人过却在落花时小龕佛据枯藤坐高阁门依老树支欲学东坡书小记中庭苻藻正参差

### 胥门怀古

伍相名留雉堞碑草生吴苑旧台池只今抉目悬门日可忆吹箫入市时敌国功名归少伯君王佳丽得西施空余一片孤臣泪白马中流欲恨谁

### 同黄继武赵明远吴翼生同年集顾松交吏部园林二首

芳园柳色正春融良夜清樽此际同花下等闲逢石丈池边倾倒醉山公摘蔬留客宜春雨种蕙当门待晓风一自归田成小筑烟霞深处见冥鸿

疎篱曲径偶相将自古林泉羨辟疆入画数峰如礪谷爲园十亩半池塘侵阶勺药围书屋映水桃花覆石梁不信吴阊城市里一家清梦属沧浪

### 缪子长先生邀同薛书先生念斋昆弟游支硎山历诸胜因留信宿四首

山寺入門後清流亂石紋岩飛千尺雪樹隱一谿云消暑宜亭畔听泉想夜分諸公閑徙倚涼雨自紛紛金碧華山寺香林自古今谿回千嶂遠路入萬松深鳥語移長日鐘聲送夕陰石牀  
猶可卧共子息尘心曲徑將窮處幽林指法螺路疑流水斷門識古藤多老衲勞相引遊人不  
易過寫經思處土丘壠近維摩【法螺庵爲趙凡夫寫經處墓在焉】

支硎高閣上瓜果晚涼時石色靜如佛山容澹若詩筍輿閑謝客筇杖付吳兒登陟人逾健尊  
前白髮垂晚春同幼木翼生孝儀玉青泛小艇觀賣牡丹人家窮精舍最幽處二首

無意入邨落名花見萬枝移來新雨後賣向晚春時濃艷成香谷繁華入綉帏玉盤尤可愛含  
露傍柴籬半塘山後寺籬落小橋西丘壑人逾遠柴桑路欲迷方塘迎戶碧密竹亞花低便是  
桃源客何心逐馬蹄

### 與歸孝儀四首

癸卯秋孝儀與予同出即墨黃公門下同門生八人孝儀最少乙巳丙午歲同客中都對榻聯  
吟舉觴飛翰歡相得也嗣是孝儀抱劉蕢之恨風尘分袂各在天涯頃予客吳門孝儀適自海  
虞來遇于吳翼生坐上相見甚慰孝儀留吳門讀書僧寮晨夕過從讀其感懷十章未免傷于  
忧憤予之望于孝儀者方大不欲以悲歌損其性靈故作後二章以解之

吳門草綠旧高台東望虞山几溯洄隔歲馬蹄燕市別三春蜡屐虎丘來故人久抱芳時恨明  
月何期良夜栢離思等閑無說處勞君錦字手親裁

淮南曾忆旧風烟綵帳羣推最少年蕭寺苦吟人似玉官齋良讌酒如泉懽從別館扶紅袖醉  
蹋春郊墜錦鞦一自扶風分散後素心無復照華筵

愁吟莫作斷腸聲年少宜捐磊塊情浴日奇姿真寶樹凌云仙掌待金莖橘林無實傳清白花  
萼多才屬弟兄不是途窮悲阮籍傷秋何事太縱橫

牛衣縱道恨難持蘭若幽栖意轉悲一點佛鐙春夢後數聲清磬夜吟時鳳雛未息營巢急鵬  
翮將飛刷羽宜心緒莫教搖落蚤損人懷抱是淒其

### 上宋其武先生二首

#### 揮手云霄別

帝京蚤遺簪纓卧江城訐謨當代推文正史筆時流让子京館閣才皆居後輩門牆人亦冠諸  
生欣瞻華髮青山老三十年來海內名【房師蔣公及念齋輩皆出門下】

園林深处晚涼天賓從多才集綺筵客聚星占來百里堂成日喜對雙泉停車酒向元亭載立

雪人依绦帐眠遥指玉峰移画舫杨梅新熟任留连【时寓双泉堂计甫草诸子咸集】

赠虞山友人

海虞词客远相过一櫂吴门叩薜萝天末故人良会少雨中闲话旧游多寄诗真与梅花似对酒其如磊块何剑气珠光终出匣相逢漫许作悲歌

赠何匡山次梅邨先生韵

蚤年逸兴在沧浪水国移家髮半苍但有一经杨子宅曾无千树木奴庄清琴浊酒莺花日雨笠烟蓑蟹稻乡棠?渐高身渐隐已将心事托渔郎

文端集卷十四

# 卷十五

钦定四库全书

文端集卷十五

大学士张英撰

存诚堂诗集十一

近体诗九十首

櫓李道中即事二首

吴门朝放艇暮宿古由拳河濶才容櫓桑低可覆肩城中流水入桥下布帆悬时向篷窗问鲈鱼出网鲜最爱桐乡道人家一水涯河流如曲沼画舫胜萧斋丝管隣船听谿山客路偕红楼十二曲垂手尽吴娃

立秋前一日櫓李道中

长堤草色望中殷才过平桥隔市闌衣带一湾通越水烟鬟数点见吴山卷帘时唤渔舟近听雨能消画舫闲明日新秋犹是客不堪乡思五湖间

秋夜同念斋泛舟登湖心亭二首

扁舟人在锦塘西指点南屏望欲迷秋水只今环岳墓绿杨无复映苏堤一湖明月千峰出十里荷花两岸齐欲共暝鸦投宿处晚钟烟际觅招提

向夕携尊初泛湖新秋风月属吾徒相将高阁人逾迴凭眺孤山鹤可呼岩壑四围环翠黛波光千点散蛟珠湖中百幅云林画领取烟峦第一图

七月十五日夜湖上

新秋客路在余杭此夕偏教断客肠钟磬数声河两岸火珠千点水中央果蔬竟日惟呼佛涕泪多时一望乡莫向断桥高处立镫光云影总悲凉

越州怀古诗八首

越王城

勾践平吴後东南霸业豪登山思采戢饮水问投醪战士空黄壤歌台尽碧蒿可能衣锦日还忆抱冰劳【戢山越王采戢处戢蔬属】

### 蠡城

臣妾蒙羞日艰难百战心霸成封苦竹身隐铸黄金勾践安难共陶朱累亦深何如五湖外烟水到於今【苦竹城越封范蠡处】

### 浣纱溪

闻说浣纱处苔痕岁岁新至今吴苑草常占越江春邨女顰难效君王宠絶伦断无亡国後还伴五湖人

### 严陵江

千嶂桐庐道清风几溯洄不知天子贵犹是故人来垂钓本无意披裘亦浪猜翻嫌人好事高筑子陵台

### 曹娥江

一痛双蛾斂投渊比汨罗魂应凭逝水步岂学凌波庙貌鬢犹小碑陰字不磨至今思孝女江亦号曹娥

### 兰亭

千古山陰道犹传修禊时激湍遗响在陈迹古人悲觴咏空兰渚风流见墨池昭陵留片牋愁杀辨才师

### 谢康乐墓

风流推谢客词藻冠江东游迹空山徧诗怀梦草同乌衣非旧日鹤墓自秋风五字今犹丽芙蓉照水红

### 镜湖

贺监归来地菰蒲起夕陰逢人曾解佩垂老竟抽簪盛事谁能继高踪未可寻镜湖分一曲方见主恩深山阴范祖生以秋兰沙角菱饷予诗以谢之

兰犹含晓露菱复采秋汀味解诗肠渴香宜客梦醒双棱堆玉碗并蒂插银鉶遗自五湖上清



宵伴醪醕越州书肆得伯母方夫人纫兰阁集感赋二首

粉蠹余来字开缄未忍看廿年耀翟茀三命重花冠绣阁诗偏好危城死最难至今遗草在香盥读纫兰【伯父讳秉丈崇祯中爲山东左方伯城溃伯父死之夫人暨副室皆自投于湖而死】

此卷家藏久流传到越州丹铅经陆羽闺阁自千秋青史应难泯鸿编已见收可怜从死处风雨历城头【集爲陆景业鉴定列朝诗选载其事甚详】

山阴晤楚中宋蓉庵却赠

词赋千秋让楚骚只今侍从说枚臯帘前修史围红袖殿上成诗得锦袍古蹟偶停兰渚櫂高吟堪和浙江涛萧斋雨後逢秋爽明月秋空对彩毫

中秋同孝仪玉青看月分韵得中秋二首

瓜果樽前听鴈鸿空庭客影偶相同人如秋水三更月心似寒花一夜风杨柳丰姿清露里芙蓉顔色晓霜中由来此恨无人识搔首淮南小桂丛

潮落钱塘晚更幽人生莫作少年游异乡无意逢悬榻静夜何心各倚楼客子诗情如桂冷美人怀抱比胶投七年几处同携手又记山陰一度秋

登越州能仁寺楼

名胜东南数越州客来凭眺寺西楼迎门一水明如练绕郭千峰翠欲流望海亭连官舍近卧龙山拥郡城幽旧家零落斜阳里古木萧萧万树秋

镜湖边旧家园亭三首

画檻全倾看月廊菱花开徧旧横塘梧桐子熟无人拾断壁垂藤挂白杨

谁种青松映碧池种来应是小松枝於今苍老无人见辜负根梢入画时

数株松桂一池莲若构园亭趁少年花落花开头白後任他孙子付寒烟

题画芙蓉菊小竹枝同貯罨中

美人顔色宜三醉高士风流耐九秋得傍此君同处住胜他篱落与江头【楚中有三醉芙蓉】

## 重过湖上

芒屨曾蹋冷泉寺画舫还登明月楼才见藕花红似锦枯荷断梗又深秋

## 吴门竹枝词二十首

杨花落後春潮长入网霜鳞玉不如骄语吴侬傲幸杀千钱昨日吃鲋鱼【吴人吃鲋鱼以价高者相诮】

无限春风杨柳岸凭栏垂手各纤纤画船一曲笙歌好十里红楼尽卷帘

节近清明看赛会流传何日到於今阊门内外人如蚁一日姑苏损万金

旌旗百队香尘卷五色披离望若云绣服乌纱车上客金牌高署武安君

粧成太保佳儿好绣褓金环巧作春何事神前轻设誓银铛贯索路傍人

寒食由来传施食诸神尽向虎丘行招魂四六何人作笑杀头名张士诚

浴佛佳辰逢立夏樱桃竹笋虎丘来一声昨夜春归曲新绿陰中缓举觥

送春何处宜弦索驾月轩中叶正青谱出十番新曲子游人齐簇小楼听

五月龙舟水神庙儿郎击鼓夺标时波心跳掷如飞燕自脱红衫裹鸭儿

六月葑门河两岸红妆队里画船随荷花生日人争看借问何人见一枝

古寺曝书当六日缥緗万卷付娉婷莫教黼面残妆粉浣却维摩贝叶经

虎丘待月中秋节玉管冰弦薄暮过山畔若教明月上便愁无地驻笙歌

名园随意成丘壑曲水疎花映小峦一自南垣工累石假山雪洞更谁看【张南垣工累石不为假山雪洞而自佳】

唐宋丹青初搨帖名香旧玉古图章个中真贗谁能识斑剥先教看锦囊

虎丘偶见牡丹市浅白深红万朵开花史不知花性惯浪言三月不宜栽

吴市花儿半塘住小山盆景索千钱酒船摇向河堤看三月家家卖杜鹃

冶游尽是谁家子两两三三占翠微广袖方袍无个事茜红衫衬薄罗衣  
挝鼓一通多逸气老年白相坐当中四围弦索清歌遶争和称衡白髮翁  
谁家女伴停兰櫂帘外双鬟对扇茶却向绿杨深处泊小舟窗内一罇花  
蛾眉薄命等闲事空把丹青巧擅名小叠香罗两行字新诗花月送卿卿

### 禹庙

禹庙苍山窟丹楹望若霞百灵纷玉帛万壑隐龙蛇碑没周秦字珪藏日月华神功留海岳遗迹岂幽遐【禹发宛委山石柜得赤珪如日碧珪如月】

### 南鎮

奠丽同南极优崇比华衡垂旒山影合拄笏海云生灵爽尊中土明禋走上卿荆扬达巴蜀万里荷平成【时遣少司寇王海丰致祭】

### 登子招游秋水园二首

南华别筑掩苍苔菱叶谿桥好溯洄树是辋川图里见石从海岳袖中来朱栏路接青山近雪屋窗临秋水开便是莲花方丈客吟同鸥鹭莫相猜【园有小轩题曰莲花方丈】田舍渔家老树傍此中风景近柴桑监湖一勺分清沼禹穴千峰出短墙小艇行随菱叶暗高楼梦入稻花香山阴古蹟多寥落剩有南谿旧草堂

### 游曹山三首

谁削苍巘曲曲幽云根千叠覆清流石从断处才容櫂峰到奇时尽入楼好鸟自依兰浆语嘉鱼不避画船游平生浪说佳山水对此殊慙檻外鸥

青棘山房小径东田间瓜叶豆花丛桥连野竹人闲到门闭秋桐路未通片石疎林如北苑远山低树似南宫夕阳原上偏吟望曾住诗人陆放翁

知君不负五湖盟晓露提壶唤客行筇杖孤情如鹤健木兰双桨学鸥轻山连谢墅峰偏丽江近曹娥水最清探尽幽奇称胜事好将怀抱托秋声【兹游同范祖生】

龙吟山房诗【越州相传明隆庆中朱金庭赆诸南明大綬罗康洲万化张阳和元忬同读书卧龙山下大风雨夜各祝曰吾辈若皆成状元则闻龙吟如是龙吟者三朱独起而祝曰吾作宰相当连吟果连吟者三诸丙辰罗戊辰张辛未俱牖唱第一朱独秉钧衡因识其处为龙吟

山房三公皆謚文懿张謚文恭】

几点台星映九重明时发采并儒宗特膺芝宇三孤席各占蓬山第一峰韦布灵皆鍾岳渎诗书气可动彫龙山昏木落萧萧夜风雨听来非暝钟

闻木垕以六月自都还兼有悼亡之戚诗以怀之三首

橐笔游京洛惊心往复回只来摹石鼓犹未到金台法驾新临学温纶正爱才春明门外路两两去邹枚【与令嗣同返】

半年驴背上念子去来劳路涉五千里霜添几二毛风尘新涕泪寒暑旧终袍春夏黄河水经过值怒涛悼亡偏客路别语寄天涯操作称贤妇徽音续大家竟虚童子案不返少君车痛杀诸雏小啼饥唤阿爷

闻信臣不第却寄

少年轻遇合容易说封侯白璧犹难献苍天何以疇心枯桃渡月泪尽秣陵秋风雨寒江梦期君在石头

重阳雨中次宋蓉庵韵二首

易听重阳雨难为秋夜心客怀同磊落诗味任探寻百感入残梦孤吟拥素琴空阶犹滴沥何不倦宵深一雨过重九东篱何处花寒枝香自抱湿叶影偏嘉爲我开乡国从君感岁华故园兄弟在摘取帽同斜

将渡钱塘留别宋蓉庵即用前韵

新诗字字擅风骚野鹤孤吟在九臯寺冷尽教看古佛人闲日许对方袍君从镜水听秋雨客又钱塘涉怒涛分得兰亭笺一幅时将悬腕忆挥毫

同孝仪登吴山

吴越高峰最上头天风吹落海波秋江横潮影千层白树带湖光一片幽选石数经山畔路振衣同陟寺西楼重阳风雨登临兴此日携来续旧游

客余杭寒山旧庐

无数林峦在一丘家山日日恣探游平桥絶磴穿奇石古木高枝拂画楼秦望时从青霭见钱塘秋共白云流花间犹有仙人鹤清唳霜天起客愁

## 客中

黄叶无端遶树鸣寒镫独抱故园情经秋客梦俱乡梦将晓风声似雨声几处湖山成浪迹十年辛苦误时名由来骨肉人间重却比鸿毛一样轻

十月十五日有怀玉青客山陰时予寓居钱塘

怜君何事叹浮家高谊爲予远泛槎千里江船同雨雪一年春事负莺花客中离别情偏苦霜後凄清路转赊共子钱塘居两岸暮潮声里即天涯

与孙紫奇觴咏之暇因赠长句

钱塘如带遶庭前第一峰高画阁连磊落人真如白鹤萧凉诗亦似朱弦镫前细听秋宵雨石上同吟夕照天我向冷泉亭畔遇许君风味足纏緜

同友人登吴山鍾翠亭

诸峰谁第一爲我问山灵石影立孤鹤江光抱小亭潮过邨树没天接海云青散髮同吾子狂歌入杳冥

## 湖海

湖海凋青鬓贫无骨肉欢别离人共老世路客逾难月皎愁牕白秋深怯簟寒钱塘千里隔无计问平安

忆兄弟五首

少小垂髫日棠花相映开那知离别苦都逐壮年来湖海诗空满风尘鬓易催山亭梅未放曾记一裘回犹是披裘出秋风白葛斜一爲经岁客开徧故园花破艇频移屋支机远泛槎江天春浪後风雪别吾家城隅临水阁一夜芰荷开文鲤衔书至幽禽唤客来露华芳草径雪藕晚凉栢澄对轩中事游人最溯洄【澄对轩在勺园中】

荷耒兄与弟湖上晚偏幽水国鱼虾市山田秔稻秋迟归慙候鴈浪迹比轻鸥江海无知己何心别故畴廿载谋丘壠山灵识此心清谿驴背稳黄叶屐痕深秋气生凉雨霜天脱茂林遥知图五岳蹋徧故山岑

## 滞京口

何事栖栖苦京江雨雪行千艘争带水万橹杂鸡声睡爲乡心减身从客路轻低徊三十载潦

倒悟浮生

夜从京口至燕子矶

好风那忍泊深夜客还惊  
鐙照空江水心孤远浪声  
烟深千嶂没云薄数星明  
京口过宏济轻帆百里行

巢湖晓行二首

客程贪蚤发水驿傍湖西  
烟草分鞭影霜华没马蹄  
寒深天欲曙光减月初低  
底事劳劳苦含凄泣路迷  
客心残梦里潦倒出柴门  
人语寒相答星稀光乍昏  
谿流寻马迹沙路认潮痕  
莫更嗟行役明朝是故园

与信臣

一夕故人话何来此客窗  
翦鐙怜旧影听雨在春江  
清梦留僧榻高吟动佛幢  
竹边临断岸深夜水淙淙

拟古四时别词十二首

离愁最是怯春寒南浦冰棱去路难  
梦到梅花旧书屋篷窗一夜雪漫漫

门掩春融石径斜主人何事逐天涯  
暖风昨夜霏微雨开徧墙头山杏花

黄莺啼过海棠红粉蝶双穿  
匀药丛君似柳丝垂旧树我如飞絮入东风

雨过园林绿映眉几枝新笋出阳陂  
青梅渐长樱桃熟稚子牵来初摘时

白葛衣单受好风清陰山路入双桐窗间  
无意摇团扇吹落榴花满地红

荷叶荷花覆几层苦心莲子恨难胜  
漫疑六月全无暑小阁匡牀簟似冰

曾当七夕赋新诗吟向双星敛拜时  
此际莫教重记忆恐惊秋色入蛾眉

露下空庭试薄寒桂香深夜倚阑干  
一般秋月圆如镜独向山陰水阁看

暮潮声里渡钱塘越水吴山路转长  
前日书中曾有约误教屈指到重阳

人在西泠黄叶飞開箱重叠去时衣  
经秋客子无消息谁识天涯归未归

一夜河流冻未开客心何事苦裴回多情雪片如相约又向兰陵道上来  
听我清商苦调歌四时花信付烟波漫将诗写离人恨诗思争如别思多

文端集卷十五

<集部,别集类,清代,文端集>

# 卷十六

钦定四库全书

文端集卷十六

大学士张英撰

存诚堂诗集十二

近体诗一百十七首

己酉腊月二十五日葬先慈高岭山元日展墓作

鹤驭何年返碧城紫泥空换旧铭旌梅花曲路迎车盖风雪寒山走弟兄遶墓松陰将万树傍  
坟茅屋只三楹自慙南北天涯子泪湿重泉此际情

芳园二首

芳园春半杏花时暖日轻云澹沲姿何处青山当户影谁家红树出墙枝柳丝晴漾千重碧鸟  
语新翻百种奇似此清光幸同赏那能花下不成诗

客从高处倚庭柯南陌才青是浅莎千里故人新燕到一年春色杏花多黄莺飞过衔红雨粉  
蝶双穿入绛罗寄语东皇好珍重常留此景伴清歌

片野堂诗爲司马孙余庵先生赋次四松原韵四首

数武城西路春山便觉多绿陰黄鸟树芳草白羊坡华髮闲闲客篮輿日日过东山谢丝竹高  
隐在烟萝青门耆旧在瓜圃见东陵问柳思眠起看花感废兴园丁留客馔公子读书鐙似此  
真幽赏劳人梦未曾园林多野色殆宕是春风竹亚新书阁花明古佛宫平桥穿密箐曲径入  
芳丛无数桃花好临流觉更红绳牀连石几息静似空山药圃行常徧花田种未闲听莺时倚  
徙将鹤共跻攀应畏游人迹频年闭竹关

泊青谿

江上月初生临风画舸行朱栏秋水濶白芷晚凉轻箫鼓中流发鐙光两岸明旧游如可忆沙  
路向孤城

泊荻港



十日扁舟上家山，  
滯望中爲憐鄉國路不憚。  
石尤風鷗泛秋江，  
白霞燒晚樹紅。  
從茲姜被意，  
竟夕與誰同。

### 江上

客子揚帆京洛游，  
分携正值芰荷秋。  
千岩石色天門屋，  
萬樹松聲采石樓。  
碧水自環青雀舫，  
朱欄常近白鷗洲。  
謝家況有臨風句，  
良夜扣舷歌未休。

### 長干

一夕汀洲鴻鴈飛，  
白門楊柳漸霏微。  
江聲自抱三山碧，  
雲物何知六代非。  
桃葉渡頭歌吹歇，  
雨花臺畔酒帘稀。  
輕帆不解高吟意，  
流過空江燕子磯。

### ？江

？江秋櫂倚蒹葭，  
却憶芜城是帝家。  
碧水至今思錦纜，  
玉簫終古怨瓊花。  
廣陵秋色看潮汐，  
小杜詩篇滿狹斜。  
一自背城勞使相，  
廿年無復舊繁華。

### 黃河

激箭黃流夜半過，  
雷轰電掣欲如何。  
千山驟雨齊飛瀑，  
萬馬嘶風競渡河。  
舊路幾年迷斷岸，  
客心終夕系危波。  
吟成莫向船窗讀，  
恐有魚龍听浩歌。

### 傷劉苔水

一紙書來萬斛愁，  
西園詞客失應劉。  
瓊花去後原無種，  
玉樹凋時不待秋。  
作賦竟同昌谷恨，  
遺書誰向茂陵求。  
最憐無限人琴恟，  
總帳惟聞哭白頭。

### 嗜退庵詩【爲嚴存庵尊甫先生作】

獨愛忘機學漢陰，  
問名先識隱淪心。  
高人居亦稱愚谷，  
閑客詩偏号醉吟。  
雪影鴻飛滄海曲，  
秋空鶴唳碧山岑。  
家風況與桐廬近，  
莫道羊裘變古今。

### 寄座師給諫荏平王公二首

頻年獻納禁庭陰，  
暫爾投閑憩茂林。  
詞藻琅琅兼衆妙，  
丰稜岳岳本千尋。  
遙知風雨東山夢，  
時抱冰霜左掖心。  
自是敷天思補牘，  
康成翹首望尤深。

畫省歸來已隔年，  
家居勝事盡流傳。  
久知逸興寰中少，  
聞道幽居郭外偏。  
坐擁圖書開小徑，  
手

栽花竹满平泉在 山旧有登临蹟尽入先生杖履前

集曹颂嘉同年独笑亭

车马长安道何曾识醉乡 琴书留客看风雪笑人忙  
痛饮宜残腊新欢发旧狂弟兄良讌会次第入春阳

寒夜示内侄尧元四首【时将之雄山省覲】

醉中无意语偏觉尔能真 潦倒常深夜辛勤说两亲  
每当风雪候难作去留人好自垂鞭影官斋柏酒新  
相对那堪别其如腊尽催衙将京洛酒话到故山梅  
寒夜乡关迴天涯骨肉陪旅居未萧瑟锦字尔能裁  
雪晴寒更厉永夜北风高自笑闲官冷深慚病妇劳  
愁拌今夕醉诗减旧时豪顾影搔青髻将无有二毛  
兄弟频年别殊慙骨肉恩家贫官更拙田瘠税犹存  
邨市湖连屋荒园竹覆门因君离索感发我醉中言

羹湖自雄县以果蔬雉兔见遗答之

荒斋将腊尽南陌正春初 驿使来风雪深情托果蔬  
烹鲜分雉兔厨饌损豚鱼怪杀诸雏喜争看阿舅书

双鬟曲十首【爲念斋作】

银烛生花照绮窗传来消息自吴江好将合浦珠千颗  
换得崑山玉一双

秋风吹到画船迟千里寒江入梦思日日金钱劳暗卜  
河干犹是未冰时

澹着胭脂浅着黄吴侬别自有新妆樱桃杨柳应如许  
不耐人夸白侍郎

绣幕香衾宿粉凝名花浥露可能胜怪来学士趋朝晚  
日过花砖第几层

花间燕燕复莺莺绣阁珠帘结队行翻笑仙人无伴侣  
只教名唤董双成

宫衣覆着麝兰香莲烛双擎夜转长暗语仙郎添半臂  
黄金鸳瓦满新霜

翠袖双双拂画栏教他鹦鹉唤名难凭君次第探花信  
若个谁分蕙与兰

视草归来日半斜水沉香里问儿家凭他温室中庭树  
不敌琼枝姊妹花

君是蓬山第一流退朝行入燕莺俦海中仙果应连理  
枝上名花已并头

京洛寒威透碧纱殷勤好自护兰芽知君欲觅宜男草不是偏怜解语花

辛亥元旦蚤

朝恭赋三十韵

午夜和风转朝来满

帝畿晴霞笼绛阙曙日动青旗气始开璇历春先到御衣上公环紫极多士集彤闱衆志期呼祝

皇心重报祈风鸣千骑拥云动六龙飞斋肃

宸顏穆馨香

帝监微百灵纷共飨五祀顺无违【首举祀事方受朝贺】

法驾中宵度

銮輿昧爽归鹄行云结队仙仗锦成围方色车前盖中黄輦上帟缀衣纷彩绣击鼓引朱绯歌吹天门落旌旗御路辉未央宫钥动长乐禁烟霏离极方悬照坤宁正启扉一心劳寝膳两代颂音徽献寿华樽满当阳湛露曦羣方归

帝瑞【时举觀典】絕域觀

天威【高丽使臣方在朝班】虎拜千声合龙光万姓依柏梁新焕采松牖旧崔嵬日暖炉烟直风轻旆影稀宫云垂黶黶苑柳报芳菲殿上岐同薛城南杜与韦舞看诸部集乐听五弦挥宴锡丹墀渥香分紫袖馐汝阳堪取醉曼倩莫愁饥玉椀葡萄绿银盘雉兔肥醪偏倾琥珀吟独媿珠玑嘉会賡黄竹隆恩拜紫薇臣心如草树歌舞向春晖读蛟门舍人禁庭鐙夕诗有作即次同年曹升六韵二首

月迎金掌露华明九陌无尘夜转清仙跸到时鐙作仗宫绯环处锦爲城看残玉蘂三千树听彻霓裳第一声何异泛槎银海曲好持机石问君平

鱼钥宵沉宫漏明舍人倬直近西清绛霄花满宜春苑碧海珠悬不夜城鸾掖自成良讌曲凤池难继和歌声侍郎兄弟多才藻五色蛮笺咏太平【侍郎谓澹余少宰】

长安鐙市诗六首

金勒青丝往复还元都观里扣双鰐春归玉宇星辰上人在霓裳月露间红粉千丛西子面轻  
销百幅米家山青油也向繁华队休沐来乘此日间

万点红镫照上都移来两浙与三吴暖风不向梅花度春色先从锦幄铺映日青霞悬翡翠照  
人明月结珍珠谁家堪出千缗买空满城南古寺隅

天街风日起晴沙紫陌追随白鼻騊梅萼蚤红宜暖室海棠催放护轻纱名笺锦匣夸前代古  
帖瑶函出内家独让秦淮镫市好千门开徧水仙花

月色如银夜最良春风遥度绮罗香钟声九陌连长乐镫火千门彻未央海市亭台皆蜃气仙  
人楼阁总珠光爱看琪树琼葩里中有昇平字一行

五侯门外满香尘烟火楼前巧作春忽见六鳌移地轴近看三岛接天津临风菡萏千花丽带  
露葡萄万颗匀但愿君心常似此光明烛徧普天人

鱼钥终宵禁闼开侯家行乐比蓬莱藁珠夜看当筵落琼树新移绕砌栽皎月独临金掌出红  
镫双引璧人来还将一曲春光好劝进玻璃七宝杯

元宵後一日同唐偕藻孔霁庵耿又朴谢方山集董默庵寓斋

同君三载问蓴鲈【默庵亦同请假归】重话长安旧酒垆秘阁儒臣皆鲁国【孔耿谢董皆  
山左】汉庭经术重江都红镫漫使春华歇璧月何曾昨夜殊为惜輭香尘不寐马蹄蹋徧帝  
城隅

赠同年马于蕃

金台石鼓且重寻莫碎长安市上琴鷗鹖已抆秋露起珊瑚犹滞海云深家庭至性传华萼奕  
世清贫少橘林献策漫因家客荐苍苍于尔岂无心

寄王烟客先生二首

五湖三足鲈蓴箬杖吴舫赋隐沦旧典曲台曾珥笔老投幽壑自垂纶青门路接乌衣巷白  
社花迎皂帽人海内只今耆旧少东臯独许伴松筠

雅闻词藻压三吴洛社香山胜此无邨架千编皆锦字辋川片纸亦骊珠【先生书画皆工】  
丝纶世济传鸾掖花萼联辉引凤雏独有采芝人自远图成五岳着潜夫

出郭从玉泉山历碧云香山晚宿承恩寺得诗六首

## 山色新从出郭逢

帝京西畔碧千重芙蓉黛色盘高掌金碧晴光变衆峰远自鴈门趋朔漠近成天堑控居庸夏云安得奇如此马首曾经望岱宗

清时休沐凤城边枕簟移来近紫泉云影乍开新雨过荷香初动蚤凉偏坐围衆壑千峰丽闲对清池一镜圆寄语輭红尘里客佳山原在马蹄前

曲曲幽栖探不穷萧凉六月已秋风松杉自绕香林路唐宋犹存古佛宫盘磴逶迤清霭外荒台掩映翠微中泠泠最是龙湫水泻入华林御苑东

松云深护藏经楼华表何人最上头原庙只今无旧蹟茂陵终古亦荒丘金貂空使丰碑壮石马何知碧草愁永巷当年无限事凭谁一问大长秋【碧云寺後爲诸宦官墓】马鬣封题自勒名何关紫闼与苍生累朝惟有中涓贵勅使徒伤国体轻鉤党至今留叹息内家从此失昇平一丘白骨还依佛常听寒钟午夜声

西来山色此偏幽况是深林鸟倦投坐近松根常坠露梦回禅榻蚤惊秋诗堪适意何辞拙佛本无言不待薝茉莉晚香初放处碧天无际白云流

## 和李高阳阁师

## 经筵

## 赐宴诗韵四首

儒臣东观振华裾雉尾云开讲幄初洙泗微言传大学唐虞心法在尚书【时讲大学尚书各一章】礼行鼎盛春秋日时值慈宁寝膳余上相独陈丹扆训

## 温纶时见

## 圣颜舒

高敞金华五色裾崑仑阳馭照临初迓英阁啓延都讲崇政筵开爲说书钜典由来行二仲万几亦自有三余好将一德调元化繁露何须拟仲舒

止辇无劳更引裾衢尊正是拜恩初荣沾东壁师臣重光动文昌太史书宫僕自随天仗列香烟犹遶佩声余羣公咸饫金茎露太乙波深化日舒

螭陛鸾坡集彩裾上公趋进讲筵初致身自许伊周绩忧国时陈水旱书望比华衡真不媿才

搜海岳更无余於今揆席推文靖天际卿云正卷舒

## 题画二首

绿覆书牀梧叶新山风欲动水生鳞世间自有羲皇梦让与茅亭画里人

百叠青山树几丛小亭横截乱流中微凉不是摇团扇新涨来时自晚风

## 题赵阆仙僧服图二首

白袷萧然自拂尘冰霜爲骨玉爲神如何秋水长林下忽见鵷鸾队里人

摩诘晚年居士服乐天先世海山人君今方作巖廊客此是前身与後身

## 赠东海董樵四首

东海留奇士吟诗慕古狂沈忧伤老眼埋恨客他乡一任柴桑酒频沾薜荔裳知君无限思落月照横塘辙迹江南徧骚坛旧有声友朋爲骨肉山水足平生禹穴乘潮看吴门蹋月行廿年投老後渤海学躬耕宝树惊先折猗兰复继萎遂成儿女节不顾老夫悲落尽蛟人泪吟残幼妇词篋中书一卷冰雪不堪持【樵翁郎君蚤世子妇殉节有节孝传】

白髮萧萧客燕台老更过春风吹冀野落日照滹沱求骏空遗迹骑驴任放歌知君怀古意石鼓字堪摩

## 李侍郎园【即墨黄公寓居】

京洛风尘地园林此最幽板桥穿密篠曲水抱危楼爲驻扶风席常陪夜月游西山朝暮见烟霭雨初收

## 赠螺浮黄门次龚合肥韵二首

十年霜雪老黄门抗疏羣知国体尊岳鹿摧来非有意山龙补处自无痕谩言盘错昭臣节偏向风尘识主恩亲见闾阎凋敝甚郑图还与绘千邨

十年霜雪老黄门湖海归来道气尊彩笔重论当代事青蒲复认旧时痕长沙原有孤臣迹湘水难邀汉主恩争似

九重思谏议忽传丹诏起南邨【螺浮於辅臣当国时会抗疏请亲政遂外迁长沙今复入爲给谏】

姚龙怀先生自黄门擢副宪赋赠二首

南宪新恩属钜公廿年头白谏垣中苍生润泽同湖海丹陛勳名仰华嵩独坐兰台罗绣豸特膺石室领花骢殊迁自是兴朝事难得懽声远近同

黄扉启沃冠羣伦前後封章欲等身

圣主寬仁来说论老成忠爱被

温纶事关国体真能谏诚动

天顏若有神最喜綵舆清路日手携甘雨柏台春【时方久旱除书下日霖雨】

和四松先生见怀诗四首

四松老後更婆娑不顾萧萧白髮多此日诗犹传上谷当年官亦近滹沱千丝绣作玲珑字百琲珠成宛转歌圣主好文多鸚荐叹君独未对銮坡【先生官河间司李汉中司马有塞北吟】

亭畔全疎长者车南园游讌近何如穠华拂檻春风後新笋留人晓露余黄鸟陰中堪载酒白鸥队里好裁书吾家康乐同吟处水满横塘花满庐【谓勺园】

岳梦归来髮半丝十年鸾鹤戏清池青青河畔吟芳草灼灼山中采紫芝高会不殊彭泽酒元音堪续少陵诗九秋一日谁能遣落月临风重所思

吴舳一自别江城枕上黄河午夜声人影星霜趋綵阙马蹄朝暮蹋春明长安儿女消闲昼故国莺花系远情独有镜湖湖上客鴈鸿声里寄芳蘅【时四松方有山阴之游】

赠石林二首

仙郎清望压词曹白袷高谈逸气豪壮志总归京洛酒新诗犹带广陵涛城边禁柳萦金勒殿阁春云拂彩毫环视吾侪君最少十年期尔拥旌旄

大隱何人绮季俦青门耆旧老沧洲凤雏自宿云中树鹤髮闲梳水上楼春草易添乡国梦风尘且共

帝京游好将珥笔承亲志冀北江南莫谩愁【水上楼尊甫读书处】

七月十五夜二首

去年瓜步路前岁段桥东佛号千声合河鐙万点红帝京风露蚤民俗鬼神同无限松楸感频  
年叹转蓬微雨夜来过香车出内城荒阡陈麦饭古寺偏钟声战骨秋原塚啼痕少妇情白杨  
衰草际易令客愁生新秋由高梁桥历西山诸刹宿碧云寺八首

夙约偏微雨冲泥出郭行蹄痕山路浅野水石桥平几处邨围寺千株柳抱城垂鞭禾黍外今  
日听秋声似向江南路菰蒲野市连乱流侵古道小雨爱秋田云白山腰寺风鸣树杪泉最宜  
人迹少石径绿陰偏金谷遗园在居人识故侯雨淋将断壁水照半颓楼柳色围黄犊荷香付  
白鸥可怜摇落处闲却一年秋诸天华藏里古佛绣幢中金碧穷民力神灵役鬼工入云看石  
碣尽日听松风不信香林外犹传兜率宫幽敞香山路高亭占翠微野如秋水净山似乱云飞  
远色堪凭槛空青欲上衣却思奇絶处月满雪初霏无数前朝寺林臯逐处逢闭门深护薜高  
阁俯看松绮缀喧巢雀旛幢隐绣龙殿台宫瓦色烟际碧芙蓉苍松千百树一树一徘徊常护  
香台老曾迎翠輦来高枝藏鸟鼠薄暮走风雷未受秦封後犹能避劫灰佛阁悬鐙处清吟拥  
薄衾来从微雨後卧向白云深石榻山中梦晨钟世外心京华有闲客两宿此香林

#### 送房师即墨黄公之任盐山四首

叔度胶东蚤着声不其书带拥康成人同海滢千寻岳官领淮南十八城常沛春温回棘草又  
从秋雨采芳蘅欣同诸子陪清歡庾亮楼前月最明【黄公以凤阳司李持衡南闱】海滨东  
畔有幽居门对扶桑日照初听履家声传棨戟连鑣名士盛簪裾讵知鈎党因文字不道穷奇  
在里闾贝锦雪消恩愈渥紫宸前日下除书

春明门外迓鸣驺水涨园林又蚤秋深夜月明留画阁满城山色在高楼云亭数过探奇字河  
朔频来续胜游安道墙东还不远苇边闲却剡谿舟【时同戴还素寓居梁家园】畿东赤县  
简平津又见铜章墨绶新千里家山堪奉母频年宦蹟总亲民官贫惟酌廉泉水地瘠劳吹黍  
谷春三辅苍生根本计伫看黄霸沐恩纶

#### 雨中同友人坐梁家园

尽日征尘逐转蓬此来闲坐几人同荒园对酒新秋後高阁添衣暮雨中芦荻纵横临浅水青  
萍开合受斜风凭君醉话沧洲兴相望劳山渤海东

#### 九日後买菊数种漫成二首

小阁数丛菊花时损俸钱故园篱落下秋色又经年诗思劳相促风尘好共怜几枝鐙下影多  
在素琴边花事久寥濶秋光慰所思参差当夕照髣髴似东篱隐觉金门远香偏纸阁宜故人  
如乍见绕榻夜吟诗初冬同沈康臣曹升六夏隣湘乔石林坐黑龙潭晚过城南小园二首

且向车尘外提壶挈伴行闲人潭上影落叶树边声野水南邨晚高窗小阁晴淹留还竟日清  
话各平生谁问荒园路城闉歌吹西槐铺双树暗松偃片云低岁月吾侪惜柴篱野客迷莫教



骑马去茅舍未鸡栖王子玠招同年诸子讌集园林因怀座师司马公率赋二首

殿上星辰听履声兴朝文正重知名农田大计筹三壤帷幄訏谟息五兵褒令功成闲绿野谢公身隐系苍生江南犹有蓴鲈美消息今传在冶城

萧然纸阁掩双扉几个簪笻夕照稀坐拥

赐书犹绦帐亭通曲巷本乌衣晚凉着树青如洗疎雨宜人暑渐微我媿鲤庭门下士常同花萼共相辉

赠王敬哉先生二首

北平山色拥神京海岳精英此笃生当代师儒推祭酒举朝耆德重春卿世居秘阁分藜火联步台司听履声自是清时荣国老不须缟岭更吹笙

平泉还与辋川同羣向金门识钜公小构园林容大隐偶成书画亦元功青山歎傲诸卿上白髮萧疎万卷中一代勳名兼著作河汾常此振宗风

姚龙怀先生自副宪晋少司寇赋赠二首

清时重望属姚元上殿频倾白兽尊经国疏陈皆密勿明刑寄重赖平反

朝廷有道昭臣直天下无冤荷

圣恩常伯同时三定国北台秋宪总春温【时同在司寇者真定梁公山东高念东先生】

恩波无际海天寛两度除书出禁闌方直真堪爲宪长慈明端不负刑官桁杨爱见生尘网庭树欣看集凤鸾努力太平期不朽似君知遇古今难

同馆友人花烛诗四首

杏园春暖立羣仙三十人中最少年香阁乍看红烛引宫衣新见彩丝牵雪中鹤氅尤堪赏道上羊车着意妍坐对玉人无辨处全凭云鬓与花钿

非关人赋定情迟彩翮联飞到赤墀浓蘸玉堂花下笔双描金屋镜中眉荔枝含露初尝日茉莉临风欲采时咫尺银河天上水御沟流入凤凰池

南国名花碧玉阑画船移向五云端朝衣亲绣双双鸟妆镜频闌对对鸾春信恰当长至近香温未觉北来寒可曾携得桐花凤倒挂帘栊倚醉看【闽有桐花凤一名倒挂鸟】深闺未御

七香车先署芳名在五花仙乐谱来调引凤宫妆说与教盘鸦莫冲晓露晨趋直须避轻寒蚤  
放衙花烛从来多锦字几人能向玉堂夸

### 赠故鄉隐者

蚤年橐笔旧知名野鹤翛然远世情扶杖漫寻驱犊路种花常听读书声吟当秋露餐黄菊卧  
看朝霞起赤城遥忆家山隐君子忘机久与白鸥盟

### 蛟门纳姬爲赋香奁诗八首

纸阁秋深翠幔重暖香红玉琢芙蓉湘云迢递三千里来自西陵南北峰【姬本山陰人】

曾向曹娥江上行曹山如画水痕清西施不尽江山秀香水谿头春又生

於越明珠照上都等闲佳丽属儿夫眉痕曲曲描秦望波影盈盈翦监湖

客窗新见绣帘遮良夜迎来七宝车百尺梧桐犹忆否风流应不数琼花【百尺梧桐蛟门阁名】

狂客无端近绣帷京华兄弟最相知钱塘儿女娇痴惯背着红镫小立时

夜阑客醉语尤顛被酒还来玉镜前帘内双鬟遮道语帐中人已卸花钿

定情初赋入承明夫婿连朝直禁城落笔纶扉开御帙兰香今日满西清

锦字千行酒一卮舍人吾辈最能诗水晶帘下闲时节无数香奁絶妙词

### 爲梁承笃题柳邨渔乐图四首

谁写湖天柳万丝携从京洛倩题诗无端惹起江南思正是鱼肥蟹熟时

春水舟轻泛白苹自倾新酿自投纶可知鲈膾蓴丝味不到人间肉食人

多是春风醉不醒全家都住白鸥汀妬他画近渔舟处柳色山光着意青

有客幽居与世遗爱看波净放船时知君抱膝篷窗下吟到鱼儿细雨诗

### 文端集卷十六

# 卷十七

钦定四库全书

文端集卷十七

大学士张英撰

存诚堂诗集十三

近体诗八十首

康臣索观予诗集枉示诗和之二首

眼常愁夜暗硯未解春寒旧帙凭鸦抹荒吟任蠹餐芳洲劳采杜幽谷忽生兰手把琼瑶句低徊欲和难君本山陰客高吟领衆峰荡舟曾一往积翠几千重怀古慙佳句开编想故踪何时寒雪後同话禹陵松【予曾有山陰怀古诗】

二月看花王子玠斋中

满城风雪度花朝谁见青阳着柳条小阁交枝围密簷海棠接叶晕红潮顿忘冀北寒威力未觉江南春色遥赖有东臯多逸兴芳时樽酒日相招

寒食游西山二首

宦游俱是客紫陌各留连断碣斜阳路荒陵寒食天莺花同故国丘陇隔经年麦饭谁家子春风墓草前青林红壁遶隐见若残霞底事中涓墓偏依老衲家轻烟栖冶树春草媚晴沙飏觉马蹄疾垂鞭过杏花

送吴五崖视榷临清

绦节新颁领度支含香旧典白云司地连瓠子清漳遶人与桃花春水期画阁临流堪纵目高楼望岳足衔卮隐之夙昔清名著舳舻南来尽口碑

寄梅渊公

标格真同梅子真廿年相忆隔江滨文韦风气开吾党书画源流见古人谢李芳踪知不远陵阳佳地恰爲隣鹿车并挽铜官路潭水桃花岁岁春

## 送梁予培之任钱塘令二首

门巷乌衣世泽长清时作牧向钱塘才人胜地兼相得吏事诗情两不妨湖外青山披案牒花间白舫课农桑柳邨全似西陵路佳处新添宓子堂【予培有柳邨渔乐图】

还向江淮续旧游彩丝双引使君舟人来吴越三千里官领东南第一州谢客亭边杨柳暗苏公堤畔芰荷秋只今水色山光里竹马争迎郭细侯

## 答四松先生寄怀诗即次来韵二首

纸阁秋阴日影迟琳琅四壁寄予诗不嫌小草劳相忆幸有芳兰慰所思青幕车中春雨路黄金瓦上晓霜时难将烟火人间语麝和柴桑绝妙词

芒屨青山雪满颠高吟落落度余年平生酷嗜惟之子百卷新诗定许传松菊远寻鸥鹭外琼瑶常寄鴈鸿先桃花潭水情无限作赋思乡媿仲宣

## 三兄勺园新阁成于辛亥秋四松辈皆有诗落之经年未得属和时近九日感念故园因次原韵四首

高处定同登阑干北望凭池添新阁影鱼戏读书灯古堞云千点秋山翠几层天涯人未识欲梦更何能竹中新构屋客过喜淹留荷响凉初动山晴雨欲收雪飞偏绕树月满正当楼此际方干辈狂吟最上头方塘秋涨濶逸兴似沧溟室有仙灵气云依树杪亭岸蓉临水白园橘避霜青当我成诗日黄花正满庭远寄登临句经年索苦吟只添乡思急难遣客愁侵竹报平安字花知摇落心江南同冀北相忆定谁深

## 送五兄下第南归

征鸿分影两经年又听骊歌唱日边入洛已过强仕日还家空赋四愁篇黄河马渡霜初落古驿人归菊正妍目击京华颠顚客耕耘莫厌傍湖田

## 送邓田功下第归里

东篱花发送将归落拓频年又拂衣词赋漫因东阁重松筠未觉北山非【家有北山草堂】风高冀野骅骝去霜渡滹沱木叶稀不达如君勿长叹素心知不羡轻肥

## 重九即事寄怀四松先生二首

霜後庭柯叶影疎菊花围坐闭门居顿教旅舍成篱落未觉秋光让敝庐纸阁上灯枝入画布帘悬地客摊书频年风雨重阳惯新月惊看照绮疏

有客投闲寄薜萝黄花白髮共婆娑陶潜去後无知己司马归来任放歌竹掩小亭应怅望荷  
残别墅几经过佳时故国三千里木落空添易水波【四松曾任上谷司马】

### 送宋牧仲归大梁次徐方虎韵四首

昨夜桑乾秋水生将归宋玉独含情渭城先唱徐陵句枫叶黄花远送行

漳河秋色鴈鸿天铜雀台荒客路偏桑落酒香初下马貂褕珍重晚风前

班马萧萧嘶北风不须回首暮烟中洛阳且得三春住看过名花一捻红

闻说箏郎太瘦生鸣箏骑马蹋歌行霜天古驿秋如许莫谱梁州入破声

大司农梁公继夫人挽诗六章即次司农公悼亡诗原韵

秋水莲花藉作胎鍾家礼法谢家才仙人偶向人间住环佩天风自去来

自是聪明减岁华蛾眉新月影西斜长安昨夜秋风急吹落优昙第一花

玉台金缕忽承尘翟第鱼轩色尚新兴庆蚤朝诸命妇首行今更属何人

鹤佩随风返碧云步虚声绕郁金帟尚书自写乌啼曲纵是神仙不忍闻

熏暖朝衣唤着时水沉香缕一丝丝于今一任鸡声急泉路云深知未知

无凭天问欲如何忍令韶华委逝波永日朝回秋簟冷梧桐叶上雨声多

### 谷日登万岁山

### 层峦曲磴

帝城边登眺平临尺五天碧落晓浮三殿影翠微春暖万家烟湖光渐绿冰初泮輶路才青柳  
欲眠昔日洗妆临水阁年年芳草自芊緜

### 许荪洲庭前双松次韵二首

萧然官舍见双松诘曲空阶偃箏龙北阙晴笼金碧影西山雨接翠微峰枝留玉署经年雪涛  
杂华清午夜钟京洛僦居嘉树少羹君幽赏已秋冬

卜居应爲饱看松影落晴窗  
矫若龙闕世最宜贞晚节  
置身端合在高峰  
临风髣髴疑清佩  
入梦萧凉似晓钟  
冰雪与君同闭户  
两株苍翠足三冬

### 爲石林题画幅十二首

乱石谿桥接短篱  
杏花齐放柳如丝  
那堪尽日尘中住  
看到江南二月时  
野水微波动石梁  
苍山千叠晚风凉  
可知书阁芭蕉下  
不少闲人话昼长  
柴门花径水西东  
相对扁舟雪鬢翁  
正欲卖鱼沽酒去  
鲜鳞澄刺月明中  
岚光如滴正春初  
树色花田锦不如  
近日桃源无客到  
不须重画武陵渔  
低垂老树结烟鬟  
古屋参差水石间  
絶与大江风景似  
落帆初泊二梁山  
萧萧邨落掩柴篱  
远寺钟声出树时  
一岁秋从黄叶老  
石梁松畔几人知  
澄江如练放扁舟  
千里江光尽入楼  
美杀秋风楼上客  
明霞落处数轻鸥  
径转峰回古木阴  
悬泉飞雨出空林  
临流亭子谿桥上一樣烟  
峦世外心谿山宜夏亦宜秋  
水面茅亭石上楼  
恰与少陵诗句似  
扶筇二老各风流  
碧岑黄叶影萧萧  
秋色林间似可招  
客正吟诗高阁晚  
白云何意满山腰  
千峰雪霁练光匀  
有客红衫乌角巾  
故国梅花谿上路  
吟残驴背独斯人  
山光如沐晓来新  
树色高低雨後匀  
泼得墨痕浓似酒  
羞将轻浅学时人

### 校士闈中题壁

高楼钟鼓梦魂猜  
觉後知登选骏台  
敢负昔年辛苦地  
杏花曾见泪痕来

### 送何次德归金陵次蕤音侍御韵

冀北人归屡数奇  
江南犹不负花期  
刘蕡伉直无酸泪  
曼倩恢谐有令仪  
诸弟乌衣皆彩笔  
双亲鸠杖各厖眉  
人生胜事君兼有  
况复诗名谢客儿

### 仲兄自南来留京师浹旬而归诗以送之四首

归梦频年忆弟兄南来鴈影独含情莺声故国青山别驴背秋风白髮生京洛轮蹄怜薄宦湖田岁月羡躬耕那堪对酒分携去柳正浓时唱渭城

别业城南桃李蹊街栢先与问幽栖爲言树色新藏屋却忆荷香旧拂堤疎竹渐添书阁外垂杨恰覆水亭西长安三月犹如许白草黄沙没马蹄

湖山仲子老渔蓑摇落诸昆髮蚤蟠十载相看贫贱在一官赢得别离多松楸几处频回首薜荔何年遂放歌我有远心终自慰不教人爲惜蹉跎

春暮人归逐鴈鸿频年湖海已成翁?堂修竹千竿里小艇新荷十里中紫蟹衔霜迎夜火红鳞出水媚秋风每从送客增惆怅惜别思乡此际同

### 送蔡石公归德清

秋风将夕至人去禁庭阴岂爲浮云感知君道气深烟霞南国梦蔬水北堂心闻说幽栖地丹峰映碧浔

### 南苑月下同岷瞻漫成四首

御苑秋清日平郊雨霁初暮鸦归树满夜火隔林疎斜月临驰道轻云覆直庐匡时经术在词赋薄相如野濶秋光迴平沙幕影攢钟鸣千树里漏转五云端匹马嘶风急单衣对月寒枕书闲不寐卷幔与同看武备清时重霜风羽猎催射熊千骑拥试马六军来柳色行宫暗炉烟讲幄开叨陪香案吏金石赋天台向夕同清歡论心入夜阑功名吾道重遭遇古人难黼坐资微密苍生待治安退朝书一卷休暇勉加餐

### 送石林归宝应省覲二首

同是南来燕相依白板扉今年秋色里日送故人归湖水迎门濶鲈鱼压钓肥高堂正华髮此乐似君稀晚凉微雨後多是过君时棐几书帘暗红镫夜漏迟狂歌题素绢小饮出花瓷良会从兹减临风重所思

### 送素存宗兄归京江省覲四首

丹地追随久霜天鴈影稀京华秋色晚江海侍臣归北固逢鲈脍东山映彩衣

君恩休暇日分得奉春晖

平子家何处烟波海岳庵频年留冀北归梦满江南瓜步云边树金焦水上岚清秋陪杖履一好重探京洛栖迟客萧斋恰望衡摊书分夜火入署共鸡声秋水还家路霜风惜别情趋朝

期旦晚相忆满西清承欢多胜事辛苦弟兄心一自元方去三年感至今养雏成健翮巢鹤有深林【时爲礼存营窀穸】姜被皆名士池塘续旧吟

大司农梁公出画蝶扇命题二首

写生偏爱草虫微螺黛爲裳粉作衣最是闲情看不厌野花藜里蝶双飞

轻绡裁作白团扇尝在尚书篋底存公子携从阶下走扑来新蝶一双痕

爲蛟门题王筠侣画扇二首

经霜红叶一枝斜暝色孤栖缩项鸦高士自嫌王谢贵平生不爱写春华

红袖招人去酒垆草虫花鸟近时无汪伦好事新求得淡墨轻红柏叶图【筠侣名崇节宛平人文贞公之弟】

送周星公归西安省亲

翠靄秦关送客行

君恩暂许去承明挂帆不是蓴鲈兴捧檄偏含菽水情花满粉榆筇杖稳春深鄠杜葛衣轻驻顏欲问安期术仙掌云中晓露清

春晚同康臣简人子厚偕藻诸子出东郊游憩因得观安亲王园亭四首

三月河桥柳色新含烟带雨绿初匀尘中车马疲官长郭外莺花属野人客緒愁吟伤短鬓酒旗闲访趁残春京华同是天涯子感物思乡意最真

晴郊徐引紫丝纆出郭才知春昼长堤柳风轻莺语滑水芹香暖燕飞忙新丰酒幔飘红杏杜曲歌声隔海棠忽忆征南人去後鼓鼙湘浦战云黄

帝子园林绿水隈金輿常自凤城来西山翠巘当楼出南国名花绕砌开碧树千重围礀谷清波四面亭台凌空阁道偏奇絕一片流云共溯洄

玉砌雕阑本内家移来丘壑有烟霞古藤奇石盘松径高柳扁舟系水涯频许游人闚秘阁还容闲客泛仙槎近来岐薛稀游讌头白中官自看花

送钱饮光归里门二首



短鬓萧疎蓟北行元龙豪气尚纵横故人洛社多耆旧流辈骚坛熟姓名坐拥虎皮谈易罢歌  
停象管待诗成尚书最重平津客垂老知音感易生【饮光名澄之同里人工诗文客都门爲  
龚合肥重客】

湖海人归已廿年卜居犹待卖文钱欲谐禽向三山约须觅枞江二顷田花雨红时携锄往荷  
香深处抱书眠翦镫频话家园好未遂沧浪意惘然

### 赠许伊蒿三首

淮南冀北历风烟执手长安一慨然驱马恰逢三月暮公车曾谢廿年前深藏剑气干云直久  
掩珠光出海圆一代元音欣有托烦君鼓吹凤城边【伊蒿廿年前已爲明经上第辞不就】  
几点春花入户开小窗明月故人来频年难得家山话此日同衔客舍栢莫向征途伤短鬓还  
看京国有高台公孙对策年相似鸿鴈秋光驿路催

重晤当时砚北人劳劳衰鬓久风尘家园兄弟经年老故里莺花入梦频竹覆小亭堪放屐荷  
侵水槛足垂纶仙灵订我柴桑约何日山中间许询

### 送寄亭归松江四首

平子风流旧有名新诗传诵满都城锦笺百幅挥毫就常听春蚕食叶声

名士无劳叹数奇韩翃徐穉重当时君才伯仲何嗟晚百尺珊瑚照凤池【韩徐谓元少方虎  
】

鸠杖双扶雪满顛眼看雏凤又蹁跹归来珍重承欢日新钓鲈鱼玉脍鲜

江南蚤促舍人装燕市台高待驪驪期尔同吟春草句莫教相忆梦池塘

### 送宋中郎同年之任修武

燕台送尔意何深嵩洛云山自古今王屋峰前看露冕黄河曲里听鸣琴可知桑柘行春日不  
改梅花作赋心近日循良多上赏期君入侍禁庭阴

### 文端集卷十七

# 卷十八

钦定四库全书

文端集卷十八

大学士张英撰

存诚堂诗集十四

近体诗六十三首

四月望日同五崖南溟诸子出郭游寄畅园遂过丰台看芍药四首

年年花事约来游偶尔招寻愿已酬柳叠浓阴迷古道麦迎新雨漾平畴马蹄但觉红尘软鸟语全从碧树幽白袷蚤凉吟歎久顿教逸兴满沧洲

侯家台榭掩青莎系马今年喜再过新涨平时登画阁午阴圆处对庭柯水铺荷芰连朝满风落藤花昨夜多媿我常随王谢燕横塘曲径任婆娑

韦曲春残杜宇催联镳爲看药栏来香生篱落晴偏暖锦覆花田午正开好友心情宜出郭闲曹休沐任衔杯绿阴乍愜投林意坐遍农家石上苔

家家红药殿春阳极目花畦烂衆芳锦佩乱翻琼玉圃彩霞遥映赤城梁一川风露莺声丽十里繁华蝶翅香不减广陵高讌会名花应有带围黄

题桔槔图

布谷陇头鸣平畦春水生清流黄犍健新涨白鸥轻野老耕耘计田家妇子情何时筇杖往饱听桔槔声

题梁予培揖石斋图二首

方袍长揖意何殷东壁奇峰一片云堪惜古人犹未免惟知夸向大将军

曾向吴山树底逢青苍面面削芙蓉问君画里新移得锺翠亭边第几峰【锺翠亭在吴山最胜处予培时爲钱塘令】

立秋後十日同康臣五崖南溟携尊寄畅园率成二十韵

京洛车尘满园林野色饶趁晴聊出郭休沐共联镳雨霁谿还涨风高柳暗凋古槐蝉噪急丰草马声骄水乱兼葭影篱荒木槿条平芜秋冉冉别馆路萧萧门巷成邨落池塘远市朝树欹眠碧涧楼敞入青霄莲萼虚堂静藤阴曲径遥幽斋双白板断岸小红桥密茭中流采微香隔浦招相将登画阁何异泛兰桡波细珠帘卷凉轻翠盖摇花齐因宿雨叶长趁新潮埜趣频年减尘心此际消林飏知鸟度萍动识鱼跳萝幄摊书卷荷筒折酒瓢提壶纷士女取醉任渔樵归骑仍潦倒明蟾剩寂寥何时营小筑相约避烦嚣

### 上房师即墨黄公

岱宗瞻气象蓬岛毓灵奇东海回风笔朝霞浴日姿分符三辅近【从盐山令入官计部】报政隔年期邨鼓传輿颂棠阴照路碑湛恩濡瘠土古法治今兹斥鹵成佳壤萑苻化健儿玺书褒雉瑞仙舄到龙墀计部咨钱谷农曹领度支青缣眠独晚粉署出常迟裕国攄筹画登朝盛羽仪书帷容日接带草许频闌不独生成感深叨覆露慈桂香樽满日霜白鴈来时耿耿秋河碧星光映紫芝

### 馆师孝感熊公母李大夫人节寿诗

天章荣寿母坤德毓宗工世泽传仙李高门俪鸞熊柳顔芳轨接鍾郝令仪同教子经兼史传家孝与忠七襄成黼黻双玉琢玲珑茹檠三旬後铅华五夜中冰心寒浦月霜节劲松风南望赧天保冈陵指华嵩

### 蜡梅

幽花合种水云乡疑是庭梅发蚤香对客谩夸琼玉树辟寒新翦郁金裳洗红偏觉和条瘦谢艳争看点额黄蜂蝶不来名卉尽托君高致殿羣芳

### 蛟门尊甫观澜先生年九十犹善饭读书

广陵传大耋双鬓久皤然就室尝珍日登朝赐几年灵光余鲁殿弱水看桑田已觉期颐近犹闻手一编昔共金门客銜栢话老亲竟辞双凤阙归作五湖人杖履花时健蓴鲈笠泽春三公输一日吾党羨汪伦

### 题画二首

邨边老树渐成阴有客微吟策杖寻回首枳篱双掩处桃花春昼草堂深

萧萧门巷似家山薄有林泉屋数间最是江南三月好几年常在画中看

### 送赵铁源编修校士粤東二首

秘阁词臣简上方玉衡金监照南荒青藜色映珊瑚彩碧海兵销日月光【时方用兵西南】  
天藻五云飞翰墨使车双璧动星铍番禺山畔论文暇羌管无劳忆故乡

倚楼新句似冰清传诵因知惜别情六载才名高虎观七千江路涉羊城诗从荔子香中得人  
向梅花岭上行隔岁迟君归玉署好拏芳杜报承明

夹竹桃诗同孙杞瞻裴晋度赋四首

莫漫歌桃叶偏宜赋竹枝缀条红浅澹映树绿参差堪引渔郎櫂还迷帝女祠此君犹未免芳  
意向人持穠艳花偏晚簋簠叶正新渭川初避暑玉洞尚留春直节思君子朱颜惜美人湘帘  
深掩映罗绮各相亲花满瑶池日偏听黄竹歌仙源如可问好共子猷过绿映淇泉暗红飞露  
井多龙鍾当五月或恐醉颜酡【五月十八爲竹醉日】

武陵湘浦路归梦满江湖虚忆千年实何堪一日无只宜临水岸岂意拂云衢晚节如相似芳  
心幸不孤

又次杞瞻韵六首

阮籍频来赏刘郎倩作媒簪沾红雨润花压绿阴开映水非依柳迎寒岂伴梅清樽盈竹叶常  
教玉人颓江南春雨後密筱映芳丛苦忆乡园里惊看小苑中枝分千亩緑花借六桥红几尺  
琅玕上婵娟立晚风何事倚修竹嫣然点绿苔只应贪结子好待凤雏来筠粉红妆腻绡衣碧  
玉裁从来天上树常避俗人栽春色移长夏闲花丽复幽青鸾红粉队彩凤碧云头高士邻桃  
渡佳人醉竹楼潇湘千古泪点点落春流霜筠多劲质亦解鬪羣芳数朶溥朝露疎枝泛夕凉  
影连青玉案色映紫霞觞最爱萧疎里春风满画廊倾城悦名士春色是良媒正对萧萧影还  
怜灼灼开丛篁成绮树节候近黄梅幸托霜根老芳菲岂易颓

送子修同年归溧阳省覲四首

驱车一自别湖天秘阁词曹近十年骑马每随仙仗里挥豪常在

御牀前莺花处处旗亭酒屏障家家蜀锦笺似子风流京国少何堪惜别禁云边

数载联裾在凤池与君同得奉光仪西园玉醴承恩日南苑宫樱拜赐时行殿晓烟朝进讲直  
庐春雨夜成诗从兹铜鹤前头立风度常思玉树枝

蔬水宁亲愿不违

君恩特许覲庭闱毛生拜阙持丹诰莱子还家着赐衣匹马莫辞乡路远居人争看侍臣归只  
今长荡湖边去蓴菜鲈鱼秋正肥

绿槐丹地共横经好友关情比鹄鵠几度衔栢思旧雨十年同学渐晨星高踪自是云中鹄佳地还隣木末亭圣主九重宵旰日烟霞莫恋白鸥汀

### 同年诸子於寄畅园爲子修饯饮五首

经年游讌少荷绽此初过叶覆平桥密花迎曲檻多入林开枕簟隔水驻笙歌还送南归客乡心奈尔何幽林时雨歇骑马蹋晴沙蝉噪偏临水荷香不在花朱栏新画阁古树旧浮槎丘壑留余赏风流说米家苹香含宿雨人影落清池脱帽狂呼酒高吟卧听棋渔樵任杂遯鸥鹭莫惊疑惆悵斜阳外微凉惜别时风生荷盖上欲去重淹留浮果游鱼出移尊小阁幽孤邨堪避暑六月蚤迎秋南陌劳劳者征车似水流频年游赏地今日独归人冉冉江南客栖栖冀北春傍篱思荷锺临渚忆垂纶初服何时遂渔樵乞此身

### 寄省斋

先世风流绿野存韦家相业有文孙庭前彩袖围双鹤天上琪花照一门书画扁舟桃叶水莺花别筑谢公墩东坡自谱南飞曲诗满床头酒满尊

### 重九前二日夜同念斋话太湖光福之胜偶成二首

迂嬾连朝出每迟过从舍此更何之高谈不似尘中话妙悟多於病起时黄菊乡园千里隔紫螯风味两人知清樽自是吾侪乐今古迢遥寄所思

闲话家山益惘然洞庭林屋四时天千邨花圃延游屐万叠谿光引画船梅浪风翻银海雪梨云香暗锦城烟与君豫订栖迟日取次探幽住一年

### 同念斋坐善果寺

荒寺萧萧木落时何来闲客共栖迟斜阳影里闻清磬黄叶声中读古碑破衲正逢僧定出空塔坐见堽阴移与君竟日香林话十丈红尘满路岐

### 十月初二日景山侍宴

御苑秋深叶正飞金铺碧瓦散晴晖平台万树连青琐北极三峰护紫微属国象胥沾

圣泽羣公虎拜奉恩辉书生豹尾云中立入侍名王尽锦衣

### 送姚注若归里门二首

朔风远送故人车听我清歌且勿譁万石诸郎皆谨厚谢庭羣彦复才华风流觴咏堪千古礼

法文章数一家未达如君莫惆怅且归幽筑看梅花

城西手自辟荆关松竹经年待客还远市林塘供馔傲闭门丘壑任跻攀清阴低覆亭边树积翠遥看郭外山来岁春风相忆处枕书浮白落花间【注若新筑兹园始成】

喜姚小山自德安令以卓异入都二首

蚤年射策重西京出宰江州最有声力减租庸纾瘠土计增壁垒保孤城书生百里兼谈武循吏千家学治兵今日岩廊虚左席好将经术致昇平

一卷吾家道韞诗珊瑚篋底总相随元霜更许迎桃叶红雪还能赋竹枝锦瑟定知宜玉树鵷雏应待浴龙池期君香绕鸣珂日正是珠擎绣褱时【吾从妹适小山着有保艾阁集】

题画

枳篱茅屋迥无尘满径苔痕不记春一自陶潜爲吏去北窗间卧复何人

七月十七夜将晓金水桥看月

万井鷄声绕建章西清云树转苍茫石桥倒影看残月金水微波动蚤凉曙色觚棱先送晓露华松柏暗生香几年坐听南宫漏千步廊前数鴈行

又成絕句

台殿参差入望寬黄金鸳瓦玉阑干十年一片长安月常向东华待晓看

同项眉山前辈素存宗兄緘斋歌起玉依同年饮城南小园

百丈黄尘惹鬓丝偶因逃暑入花篱清曹闲客荒园路白袷高谈夕照时松劲最怜垂地影槐低偏惜碍人枝爲看暝色苍烟好莫讶停车去转迟

宿吕仙祠【门临泡子河】

携来枕簟听钟声泡子河边月正明丹鼎烟霞迷旧性黄粱事业误浮生严城柝急乌啼蚤古屋鐙悬鹤梦清我欲采芝行药去从君一问碧山程

姚小山相订游城南寄畅园不果往示同游诸子二首

习家池馆正芳菲有客相将款竹扉南陌垂鞭乘晓露小亭铺簟待斜晖红蕖颭水侵人影高

树分凉到客衣惆怅由来平子惯年年幽赏愿多违

明河翘首隔烟霞博望虚传欲泛槎底事三山疑海上等闲十里即天涯多惭关吏还携酒【右安门尉是日治具】深愧园丁爲埽花游客莫将幽胜事輒红尘里向人夸

送方邵邨还金陵二首

海天高翥羨冥鸿建业移家隐桂丛此日桑乾重策马当年京洛旧乘骢丹顏歎傲诸卿上墨渾淋漓五夜中自是清才兼衆妙一时倾倒识宗工

闲情藻思满沧洲常向旗亭物外游燕市黄花争迓客津门紫蟹正迎秋高谈尽爱陈惊坐佳句羣推赵倚楼木落霜飞偏惜别石城南望大江流

题画梧亭小景三首

幽人小筑石桥东纸阁湘帘正晚风满地碧云波荡漾始知疎月在梧桐

书窗疎影绿参差好是清秋落叶时一夜新诗吟不寐朝来题满碧梧枝

背郭临谿老树傍小桥流水入方塘他年若得林泉住多种红蕖与绿杨

送七弟归里四首

七载惊离别今看颇有髭性能敦孝友雅复善文词醇谨吾真爱清寒尔最知劳劳问亲故姜被夜阑时鴈影霜天度新沾陌上尘只因余薄宦深愧尔长贫闭户承家学重泉慰老亲要知天意在培植藉艰辛故山云树外惜别动离愁远客当残岁长途倚敝裘风霜看岱色冰雪入河流犹喜家园好烽烟已尽收手植寒花在归时忆正开莫将京国态话向故山梅历乱江城雪团圞伏腊栢读书兼教弟珍重问南来

上李高阳阁师

寰区鍾间气象纬诞师臣补袞传家学登庸迈等伦端卿推世范文靖本天人

圣主凭依重

先皇顾问频蚤年登秘阁壮岁秉洪钧治道从容论訃谟密勿陈高深同海岳翼贊在丝纶挽俗还三古调元序五辰持躬方且直爱士澹弥真宏獎皆才隼旁搜极隐沦屡崇槐位秩三典杏园春事业符天纪声华溢地垠诗尤刊月露学独辟荆榛揆席祓符集台阶景福臻斗杓方建亥崧岳庆生申厚德培仙李长龄颂大椿金章传奕代玉醴赐千巡共仰台星丽光辉映紫

宸

文端集卷十八



# 卷十九

钦定四库全书

文端集卷十九

大学士张英撰

存诚堂诗集十五

近体诗八十首

送彦昭还里二首大郎士黄予壻也前年来赘京师时挈壻女同行

频年坎 奈才何惊入新霜鬓渐皤骨肉翻从京国聚牢骚常听醉吟多黄花恰送人归里落叶偏催马渡河爲忆讲堂春昼好臯比差许胜烟萝

娇女年年绕膝行鹊巢初御返江城远游喜赋将雏曲薄宦深惭卖犬情故国田庐堪燕誉外家兄弟美冰清高堂日奉含饴乐绮阁春风叶凤鸣

题汪蛟门舍人百尺梧桐阁图因送其归省四首

舍人觞咏颇能豪十二澄泥佐吮毫高阁醉吟江月落新诗堪敌广陵涛【蛟门有十二研斋】

廿四桥边有故庐高梧修竹映阶除东华十丈红尘里乞得闲身且着书

华髮高堂比偃佺冲寒归养独翻然齿将甲子生汪季目见成名已十年【尊甫观澜先生年九十余】

芜城柳色锦帆云浮玉江泉手自分杖履可随书可读此生双得不如君

午日讲筵

瑶函永日侍宸枫讲幄西清阁道通彩绶天中传令节冰壶殿角动微风香分艾叶牙签绿色映榴花玉简红不用广陵求百链

君王宝监六经中

赠王近微先生

苍松盖偃九华芝中有仙人冰雪姿幽梦不缘丹诏起赏心惟许白云知雪间鸿爪看轩冕花外莺声倒接?仰止高风稀得似吮豪曾赋墨庄诗【先生屡膺荐辟固辞不赴】

即事二首

鐙夕诸王宴禁阑蜜罗柑贮紫金盘尽颁

御馔偏留得指点西头赐讲官

紫阁新悬五色丝蒲香樗火映龙墀中官满注雄精醖尚待

君王罢讲时

题赠宗至鎮公四首

清时帝子奉恩光金殿东头第一行若木连枝丛玉叶仙源分派接银潢紫庭霞起陪芝盖梁苑花飞集羽觞自是九天鸾凤侣桂宫兰坂日翱翔

闻礼闻诗道气浓天家兄弟尽璜琮东平乐善传家学沛献能文号雅宗对客清吟常磊落退朝儒服自雍容从来仰止天孙岳何幸光仪此日逢

虚怀若谷獎羣伦宾从邹枚授简频爱士不矜轩冕贵怜才常问薜萝人手挥白雪朱弦古自写黄庭彩笔新莫讶冰心恒独映蓬瀛高处本无尘

曲曲朱栏帝子居琴樽潇洒间图书闲窗竹色秋声满小阁梧阴夜雨疎绮砌春翻红勺药湘帘宵透碧蟾蜍悬知漏转花深处日日高吟步玉除

春日西苑石桥南望

杏花开满石桥西杨柳参差绿覆堤湖上日斜春水濶波痕动处浴鳬鷺

何日

何日青山下诛茅结数椽暮蝉千树柳晓露一池莲摘豆朝餐饱抛书午睡偏便须从此去蓑笠老江烟九日同说岩?庵两前辈澹人近公直

南书房限登字

木落鸿飞晓露澄家山兄弟正偕登故园黄叶三千里深殿朱栏十二层数子秋吟同禁漏百城朝拥对觚棱此身惟觉

君恩重欲遂岩耕苦未能

又限高字

临渭亭前拂彩毫分题不减昔时豪人间秋到龙墀蚤天际云依凤阙高九日风光偕胜侣十年京国媿词曹相期珍重茱萸节明镜新闾感二毛

读尧峰集

予每谓人当有性情之乐然未敢轻以语人即语人亦多不解读尧峰集髣髴遇之知钝翁於此中有得也率尔成一絕句

禁漏沉沉出每迟昨宵归梦到柴篱起来自拥羊裘坐爱读尧峰一卷诗

寄柯素培银台【时母夫人年八十余】

每瞻风度慰平生曲巷比隣听履声自着彩衣娱寿母顿教白社有清卿一门耆耄通仙籍诸子才华满帝京遥忆梅花最深处麻姑膝下坐吹笙

贈施愚山二首

共住江南北才名仰顾厨青山耽旧业丹诏起醇儒久爱诗篇好兼闻道气殊明时方侧席莫拟着潜夫邹鲁弦歌地抡文最有声檐帷看泰岱函席接蓬瀛大雅伤沦弃宗风赖拄撑岂应将五字独数谢宣城

寄题仲姊龙眠山房三首

郭外名山近新闻选一丘垂帘花屿晚洗砚碧潭幽竹杪泉声落松顛阁影浮诸甥能色养奉母数来游野性耽林壑孤云寄所如十年京国梦千纸故园书鸟倦思投树龙眠拟卜居家山幽胜地何处是吾庐欲遂吾庐愿殷勤嘱魏舒衆峰罗户牖一水入庭除树色千章密花田十亩余幅巾藤杖日相约比隣居

题石林扁舟钓鱼图四首

柳下扁舟一钓竿画时容易到时难五湖烟水知无限但许人从纸上看

故人家傍射阳湖闻说园林比画图此愿有时应得遂只愁添着白髭须

輭红尘里是长安满眼卢生梦未阑敢信湖山曾有分莫将蓑笠等闲看

细草微风绿波此中赢得醉吟多扣舷若咏沧浪句须念题诗张志和

送吴壻驥偕次女还桐城

大雅推先子襟怀若饮醇凤毛今楚楚麟趾本振振鞠育凌风翼辛勤履雪人冠纓承世泽师友在天伦薄俗惊吾里潜光喜至亲读书心贵小求益意须真莫厌编摹苦长辞剥啄频楼高听曙鼓径僻闭秋筠羽翮能殊衆扶摇自絶尘寸阴如尺璧珍重少年春

送仲张南还二首

挥毫击鉢爱诗成平子才华满

帝京琐院人争推藻监登坛赋可掷金声莫因去住尊前话轻感浮沉世上名眼底扬雄曾未荐千秋惭对汉诸卿

频年京洛共栖迟忽见吴舫送别离世路崎岖淹壮岁高才沦落叹明时鵲鵲枝上花连萼鸚鵡栢中雪映眉暂向沧江修菽水五湖秋蚤足蓴丝

送李天生检讨还秦中四首

当宁旁求切张罗得凤麟同朝传盛事空谷起斯人壮志经纶濶高怀器业醇爱君风味好不改旧松筠鸿编须巨手何意独抽簪芸阁他年事兰陔此日心上书臣愿切优诏

主恩深珍重承欢去非关恋碧岑【时方纂修明史】

仲蔚蓬蒿径曾闻客款扉频教清梦接飏遣素心违翦烛期同话吟诗却送归蓟门秋色蚤河柳正依依报国儒臣事君归岂漫然地维连蜀道天险扼秦川塞北多鸣镝河西有控弦

圣朝恩泽厚藉与远人传

赠孙恺士孝廉

孙绰才名久频年客

帝乡登车陪仗节观日近扶桑诗重鸡林价金辞陆贾装归来报

天子声誉动岩廊【曾随侍卫之朝鲜辞其馈金】

偶作

二十年前种竹诗倚窗遥计密阴时只今辜负窗前竹露压烟笼碧玉枝【予己亥初筑远峰亭作种竹诗有倚窗遥计密阴时之句李芥须赏之客徐莘叟前辈家作移竹诗用此结句也共臯城徐太史倚窗遥计密阴时今偶忆及续成絕句】

寄仲姊三首

同气俱华髮深推道韞贤礼遵慈母训诗续大家篇珠树三枝秀篮舆一径偏春晖堂上燕会见羽毛鲜壻真夸玉润翁独愧冰清纸阁连鸳瓦璫箫近凤城杏花迎客骑榴火促归程期慰倚闾望徒牵弱女情【甥爲予第二壻时就婚长安送归】

星光悬屋角多是入门时慧爱羣儿语贫怜巧妇炊家山清梦绕宦味白髭知骨肉如相念裁书莫厌迟

奉挽座师给諫荏平王公

世仰河汾学人鍾泰岱英訏谟推大諫雅度重清卿久负寰中望常标物外情独留遗草在朝野共吞声节物逢休沐林峦数往还旷怀耽好景游迹徧空山梦憩松窗下诗留藓壁间来青轩里句指顾动天顔【英扈跸至来青轩上见壁上有公诗赐问谨对臣康熙二年举人臣曰高典江南乡试】

寒松凌絕壑清誉冠时贤蚤岁登华省长贫少俸钱书犹堆邳架花自发平泉客满公孙阁风流海内传千里荏山道经年感叹频荐刍空怅望执紼久逡巡共洒扶风泪深慙立雪人些词同宋玉哀挽送车尘

爲澹人题

赐榴图

榴房新结水晶圆齟齬迎秋色倍妍深识侍臣将母意常教怀橘

至尊前

送倪甥伯醇南归

魏舒挟策远相过惜尔长贫衣薜萝太史缥囊书蚤读成均石鼓字新摩青山路遠倪寬宅匹

马人归鲁肃河犹喜故庐三径好梅花春信动南坡【伯醇居鲁王河有子敬遗迹】

送王仲昭还钱塘

明珠百琲思如泉脱腕新诗洛下传

天子好文官特简相公爱士榻常悬青山丛桂仍招隐白髮苍松与记年和靖千秋湖上客梅花鹤梦两翛然【仲昭名嗣槐杭州人爲益都冯相国重客诏以年老有文学特予中书舍人衔】

对盆中绯桃花却忆

故国春山路桃花剧可怜浅深丛竹里红白小谿边带雨迷邨市和烟压钓船只因温室树相忆却年年

晓起

疲马嘶中夜听鸡陌上趋寒星当曙白霜月入烟孤波静鱼初跃林鲜鸟乍呼山窗幽梦稳谁与问潜夫

蚤经玉螭桥

晓日华林道鳬鹭宿浅沙新荷香在叶芳草露爲华碧瓦迷朝雾红亭接曙霞几年骑马客鞭影起林鸦

送丁鴈水之任贑州

旌节?州使新从粉署来江连章贡水城对郁孤台共喜休兵日欣逢济世才政闲吟好句香接岭南梅

寄冒巢民二首

翛然野鹤迴无尘竹隲花谿洽隐沦闲听耆颐谈往事陶潜窗下葛天民

海上神仙近可呼紫芝瑶草接方壶鹿门况有云英伴自写生绡五岳图

瓶花

一年花事胆瓶中拂研犹含晓露红偏到华清最深处撩人无限是春风

游仙诗二首

碧窗仙馆接蓬瀛玉蘂云芽绕坐生七宝玻璃倾石髓水沉香里听吹笙

十二层城倚碧空满楼明月满帘风洪崖相约骖鸾处千树桃花晓露中

赠姑苏周履坦【履坦供奉内廷时上命爲予画小像】

直庐铃索地曾识顾长康写照传

天语挥毫近御香

宸顔频激赏衰质藉恩光底事耽湖海轻帆别

帝乡

送何牧伍之任洪雅

鱼鳧天堑下王师何逊新硎出宰时客路秋云过剑阁官斋山色对峨眉遗黎尚有花邨在循吏真於黍谷宜好把灋谿诗一卷看销兵甲理东菑

野老

野老青藜杖空山白葛衣菜畦朝露往花径夕阳归竹色忘荣落鸥言无是非此间差不恶消息愧知稀

抱膝

抱膝扁舟上天光接水云芙蓉清照里明镜对湘君逸兴看鱼乐闲情入鹭羣不知霄壤内何处着尘氛

却忆

却忆空潭碧风亭一水隈清流衔砌转飞瀑溅珠来梧影当窗落兰香遶榻开数声黄鸟歇高枕梦初回

却笑

一湾新涨里千树绿杨边濯足还垂钓清歌自扣舷长腰炊玉粒缩项煮银鳊却笑秦楼客吹

箫枉学仙

拟王右丞田园诗十首

白袷轻衫策杖柳阴十里新铺幽径一声黄鸟何羨輿前八驂  
垂地柳丝千尺飏风裊露轻盈中有柴门隐约日高惟听春声  
深苑重帘小阁枝压梅花万重户外久无人迹读书煨芋三冬  
梅子风光将近櫻桃时节初过碧爱上林玉簪净怜出水钱荷  
三间五间茅屋千山万山落霞欲觅先生何处小桥流水桃花  
漫道平泉金谷山人絕世繁华朝露晴光匀药晚烟明月梨花  
瓜蔓寒侵篱落豆花秋满堦除留客山厨晚饭起来自翦新蔬  
别业新题学圃园翁自署山癯穉子扶輿捧杖奚僮挈榼提壶  
比舍家家竹径肩輿日日松阴寄语风流贺监惟输头白抽簪  
倦後清泉煮茗睡起罗衣御风竹榻蕙兰香里水亭菡萏波中

赐鱼晚餐

翠釜烹鲜雪满匙团圞儿女晚餐时莫因天上鱼羹味漫起江东鲈膾思

湖上

湖上春残灌木稠田田荷叶送扁舟朱櫻碧笋鲋鱼白不羨人间万户侯

秋兰

楚泽来高士风流迴絕尘梦魂依九畹时序避三春枝弱常含露香轻不媚人湘娥临洛浦应是此花身

何处



何处年光好春风匀药栏鸟啼深柳墅鱼上落花滩山水奇怀得烟云放眼看此生差可慰随分有余欢

寄于北溟抚军

厚德于门夙所钦高名独满禁庭陰扬清激浊匡时略暎雪怀冰济世心地近五云新秉钺公来三日恰爲霖宸衷最念苍生切报国醺知重古今

柬新安汪快士

蚤年同有烟霞癖输与黄山老布衣春雨花田频入梦秋林霜鹤共忘机句中野色含青霭卷里泉声落翠微白岳何时随步履岂令丘壑愿常违【快士有山水癖自称黄山老布衣】

示南归老仆

汝归好向龙眠路爲我经营十亩居园果分移成聚落山泉疏引到庭除须教竹圃阴常满莫遣梅亭影尚疎辛苦荷耰春雨後南鸿珍重寄来书

文端集卷十九

## 卷二十

钦定四库全书

文端集卷二十

大学士张英撰

存诚堂集十六

近体诗四十四首

题羹湖画奇石修竹图四首

架竹危楼入渺茫插天奇石削青苍披图忽见家山面金谷岩西浩歎廊【金谷岩浩歎廊皆浮山最佳处】

百尺璚琳列翠屏听庵皴法瘦偏灵点苍山色曾经见笔底芙蓉别样青【羹湖别号听庵】

片片棱峯鬬蔚蓝枝枝疎影拂烟岚偶然写傍簷簷谷莫便将归海岳庵

故园遥寄大江滨薄有苍岩与緑筠苔蘚没来风折尽纳凉醒酒让何人

送弟怡斋归里门省亲

数载居隣太液池惠连觞咏每相随拜官喜近莺花日将母先归雨雪时布被好同明月夜彩衣亲捧大年卮重来细听家山话玉螭春深柳正垂

岁除前一日退直

退食轻寒昼掩关梅花香色卷书间移来暖室三春卉乞得劳生一日闲手倦安弦忘绿水梦来隐几即青山当窓莫漫闚明镜六七年来鬓已斑

送储庶子玉依归阳羨省亲

柳陰凉处骑駸駸鹤苑谁听禁漏沈捧檄正逢将母日含饴还慰报刘心东吴风俗毘陵古南国谿山罨画深庙後蚤香春芥路可能容我共探寻

寄李清照先生

儒宗海内仰晨星司马曾同策大廷柱下博闻推旧史济南遗老重传经  
隐当盛代甘头白业在名山有汗青侍从几年陪谢凤岿然弥想鹤仪形  
【叔父大司马公同年进士】

### 荒邨

偶向平沙外荒邨信马蹄谿回杨柳暗雨过杏花低生事圃尤乐春陰菜欲齐  
何须武陵曲鸡犬令人迷

### 扈从至马兰口登长城二首

戍楼临絶徼何意得跻攀纵目城南堡惊心塞北山云陰迷古堞峯势逼萧关  
战垒清时废微茫草树间帝治称无外嬴秦始筑墉高低縣衆壑掩映带羣峯  
万古风霜色终朝虎豹踪兴亡不在险谩诔一丸封

### 宿黄花山

四围青嶂绕东菑栗里柴门护短篱好水好山春草路轻烟轻雨杏花时  
池鱼忽纵曾游壑笼鹤惊回旧宿枝归向红尘最深处马蹄何事更嫌迟

### 望盘龙山

横云诸岭峻东接蓟门烟石色幽燕冷钟声古塞传佛飘鐙作供僧藉果为田  
纵目劳延望曾无福地缘

### 退直小暇插瓶中勺药

拣得将离四五枝沸汤亲注白花瓷夜来纸帐高悬却领取繁香梦醒时

### 送哲如三兄南归二首

诗怀逸兴旧萧然风雨江南忆惠连别绪才倾桑落酒归心先寄木兰船  
逃名蚤岁移邨社避俗全家傍墓田自是桃源鸡犬乐莫将轻与世人传

路过西岭隔云居辋水蓝田恍不如花径到门惟野客山厨入馔有谿鱼  
黄鹂緑树经春晚紫笋红蕖入夏初似此风光正堪惜肯教明月小窗虚

### 寄念斋

林屋谿山震泽烟爱君门系荡湖船莺花最是留人处邱壑多於入仕年  
小圃养亲原近市空

堂留客日听泉临风欲寄无他语惟赋斯干吉梦篇

寄魏柏乡合师

清时元老狎樵渔弼亮功成赋遂初白社渐忘纶阁贵黑头蚤傍午桥居姬公制作原多艺司马勲名半着书海内正思公再入未容萝薜久悬车

送施愚山侍读校士中州

仕籍频年苦翳尘元音大雅亦荆榛一经犹是寒微路特简无如冰雪人弦诵旧传东海上监衡今见大河滨嵩山少室曾游处重赋云烟锦字新

送七弟还里门三首

天高霜叶落相送雁南征久客思泉石长贫愧弟兄连枝同宦隐小草代躬耕世味予谙惯缄书无限情差有儒官好刚无民社忧横经犹故国司铎尚清流暇日还堪惜需时莫漫愁春花开落後应报石田秋【时弟方需次学博】

莫轻乡国好此意答亲知有鹤栖珠树长鸣忆旧枝相劳营别墅兼为理东菑蚤种临窗竹邮筒慰所思

八弟亲迎赋此志喜

堂前幼弟悬弧日七十严亲髮已华梨枣昔犹看遶膝苹蘩今喜咏宜家名门燕綈双红缕小阁香添旧碧纱莲炬花钿人尽羡偏教兄嫂隔天涯

题戴文进画渔家乐卷子二首

鹭渚鸥汀倚櫂过卖鱼沽酒醉还歌全家尽日随烟水不识人间风浪多

松湖别墅傍渔矶久掩谿头白板扉忽见画图还记忆秋风昨夜鳊鱼肥

送邓田公之任唐山

北山家学本师承经济才人衆所称寄重循良应不媿道兼风雅更谁能云生钜野挥弦看秋满尧峯揽辔登夙昔浣花诗最爱期君三复在春陵

嘲璐儿

老凤毵毵强自娱匡牀襍被咏将雏娇痴索问朝回日携得金盘细果无【宫中称珍果为细果】

玉儿十龄能诵尚书毛诗喜赋二首

驹齿初韶髮覆眉颇怜聪慧异羣儿已通典故兼风雅远胜而翁十岁时

退直疎慵畏简编每呼稚子向灯前老夫茶熟香温後爱听幽风无逸篇

读澹人侍讲扈从关外诸诗

枚臯扈跸骑駸駸东渡榆关古塞深大旆陰中花叶影属车声里短长吟文多石鼓山经字赋比甘泉羽猎心警服诸藩威德远饶歌新谱

盛朝音

即事二首

寒雀无声雪满天

赐来桐酒侍臣偏镜中更觉

君恩重能使丹顔似少年

当筵撒下紫金罍醇酎新从塞北来辰刻殿西方进讲承

恩未敢尽深栝

种水僊二首

水僊初茁似兰芽种向清泉衬白沙自笑疎慵偏好事薰炉终夕护寒花

名花栽法未全谙嫩緑清香性所耽白石盆中千万朵小楼灯市忆江南

赐第中举子及孙孙名金螯儿二首

小字金螯岂无意金螯坊在隔墙东他年记取悬弧地太液西头赐第中

抱子添孙感岁华一年两见茁兰芽燕巢定见雏成长不是寻常王谢家

## 禁中对探春花

柔条花满雪皑皑内使褰帘进御来费尽南园温室火探春十月已先开

## 二十四日听

## 恩诏二首

当轩凤藻太平春学士冰衔紫诰新惭愧江南圭窦客丝纶四代作词臣【恩诏赠父祖皆翰林学士兼礼部侍郎时廷瓚亦官翰林编修】风木人间重所悲恩辉难定九原知心伤鹤髮劬劳者未见腰金衣【去声】翟时

## 除夕内殿侍

## 宴二首

长安万户送残年爆竹声喧柏酒传争似满庭烧桦烛紫云堆里听钧天

手扞碧落数华星坐接金张近紫屏小户不辞先酩酊玉柅

## 亲赐语叮咛

## 人日

重帘温室静无譁细啜宣城綠雪茶闲理旧琴深夜坐炉傍新放海棠花

## 送石林校士粤西二首

词臣简命重临轩百粤新沾异数恩【以平定补行乡试】文教远能通象郡山川奇益助龙门抡才自昔收寒畯作赋频年感

## 至尊正喜苍梧烽火息春风南国采芳荪

锋车驿路指衡阳输子探奇最擅场千里江云开岳麓九嶷峯影落潇湘蛮烟客至梅花白瘴岭人归荔子香足蹟天涯谁得似诗篇珍重纪南荒

## 文端集卷二十

# 卷二十一

钦定四库全书

文端集卷二十一

大学士张英撰

存诚堂集十七

近体诗六十五首

阻风二首

连日轻帆滞水湄窗临沙岸接柴篱焚香夜对妻儿话只当萧斋风雨时

系缆停桡阻石尤纤回信宿此汀洲世间何事容人算不拟将心更学愁

四弟武仕送予至潞河赋此

惠连惜别远相随醇谨承家尔最宜为爱纸窗情话好不嫌沙岸片帆迟携来邨酒停舟後呼取河鱼出网时风定月高春水濶清歌听我扣舷诗

舟中

麦覆平畦绿渐匀好风帘外起青苹胆瓶自插桃花朶春色今年倍可人

三月十八日

东巡逢

圣节虎拜忆旌门得与呼嵩日真成扈跸恩歌风欢故老讲武讐诸藩流滞周南客长吟柳外邨

轻舸

轻舸三月赋归欤人似汀鸥迥自如菱菜白时炊黍米杨花飞处卖河鱼香添炉火早餐後茶爱铛声午梦余檻外清波帘外月何须高枕必吾庐

夜泊

铃柝无声夜转迟荒灯古岸一舟维世间饶有惊心处不独孤邨夜泊时

草花

雨湿青莎野岸垂草花红白一枝枝自开自落无人管只有衔泥燕子知

河干柳

长堤种柳远成行临水枝枝出短墙最爱微风新雨後也如千个看簔簔

倚櫂

倚櫂待新月时听乌榜歌晚风吹麦穗夕照满春波祇觉乡关远偏逢水驿多

君恩闲岁月飘泊意如何

过四女祠

春水重过四女祠曾停孤櫂苦吟诗犹然十五年前客非复丹颜黑髮时

舟中书怀

此身已乞向林邱飞札经营宅畔楼良夜何堪闻击柝芳时那合住扁舟闲看儿女纾乡思数  
捡图书慰旅愁好与湖田兄弟约取鱼尝稻订新秋

自遣

河流无力送轻桡苦忆前汀长暮潮浊酒一瓯聊自遣麦秋天气雨萧萧

偶然作二首

卷地南风逆浪生栖迟空羡渚鸥轻世间何事容人算千里河流一月程

举网投竿事总虚春流空满绿杨渠世间何事容人算水畔经旬断卖鱼

雨後



细麦轻花带雨痕卷帘闲立听潺湲  
遥天雨过云开处一片斜阳在远邨

### 舟夜泊

古岸烟将暝人冲宿鸟过月光将树影窈窕落清波  
急鼓催兰桨悬镫照画舸素琴寻旧曲幽意觉来多

### 安得

河水妬人乡思急咫尺不与前谿通  
安得深林桃竹簟坐卧一枕槐花风

### 山东道中

百泉劳灌注千里送舟航石堰河流曲邨籤水驿长  
寺过杨柳暗邨近枣花香莫忆江南路春风恰艳阳

### 红药

红药朱樱烂漫天归帆偏滞白杨边  
人生几度看花眼一别青山十六年

### 舟行杂诗十四首

试香评茗有余闲廿四年诗手自删自是耽吟成癖性  
放言安敢拟香山【香山诗莫怪气粗言语大新排十五卷诗成】

七弦冷冷送斜晖苹末风生乍入衣鸥鹭绕船飞不去  
应知此曲是忘机【琴中有鸥鹭忘机曲】

兰桨风轻叠鼓催拨帘闲看水花开诗成自起添炉火  
一缕香消午睡来

菖蒲学泛酒微酡邨市龙舟鼓枻过多少隣船鸦髻女  
凭肩齐听采莲歌

倦听儿女语喁喁竹簟绳牀细细风一觉晚凉容易好  
渐偷身入黑甜中

节过传柑疏蚤陈江南慙负一年春金华秘殿都辞却  
耐作河干守牖人

纵苦淹留莫漫嫌此心端合置安恬鸟声过处闲欹枕  
树色来时自卷帘

仲子韶龄甫佩觿羣儿层递与肩齐娇痴百态差堪喜  
不耐门东索果噉

却拟烟波人渺渺翻成乡国思  
平生最爱清光好怕见临窗月又圆  
曲曲河流遶翠汀蔚蓝天色远峯青  
今年秋蛩蝉声好人在扁舟柳下听  
水鸟菰蒲噪夕阳渔舟逆浪听鸣榔  
南阳湖畔钓帘久为爱谿山似故乡  
山青湖碧柳毵毵向夕微凉梦独酣  
莫怪先生眉色喜计程明日是江南  
蛩起凉生水一湾芙蓉香在卷书间  
闲情欲胜谿边鸟黛色新看雨後山  
运河濶水此初经櫂语渔讴入窈冥  
地近下邳黄石路平湖十里草烟青

### 答隣舟友人

柳覆平堤漾碧流月高清咏在隣舟  
故园久负莺花约长路翻成汗漫游  
赖有琼琚投锦字如拏兰芷向芳洲  
吟来画舫新凉满更复何心怨石尤

### 南旺

此日乘流便维舟日已曛河枯双派接  
山断百泉分地拥南湖日波涵泰岱云  
尚书遗像在安济想前勲【岸有宋尚书祠】

### 舟中秋兰盛开漫成二首

画舫蒲帆溯水湄秋兰绕榻影披离花  
慵作态姿原澹香久沦肌客未知晓梦  
将残欹枕处微凉初动卷帘时故园望  
里增惆怅赖尔清芬慰所思

空谷奇姿迥絶伦移来九畹忆灵均一  
枝自饮清秋露何处堪容世俗人风味  
远同彭泽宰轻盈如见洛川神几回索  
句微香里相对惟慙笔有尘

### 营读易楼成三首

幽居深似野人家小构山楼一径斜开  
户特教临水石拂窗时觉有烟霞萧疎  
近对过墙竹绰约低临遶砌花珍重

### 君恩闲岁月莫将尘土负年华

修梧翠竹蚤年移今见凌霄蔽日枝  
轩冕许抛犹喜健园林容到莫嫌迟  
楼陰片石开三径檻外名花接四时  
但愿闭门无剥啄茶鑪诗卷日相随

老梅作态试南枝屋角墙头独咏时顾影鸟犹怜好树梳翎鹤自爱清池况予农圃三生癖久客风尘十载思体健时清机事少不耽吟歎更何之

### 前探梅絕句二首

女墙宫堞噪寒鸦油壁湘帘坐小车老我情怀谁得似满天风雪看梅花

为惜寒梅护短篱几株疎影落清池山人十月探花信喜见南檐第一枝

### 过仲兄湖上

蚤年挥手谢尘埃自结衡门水一隈远岫似鬟新雨沐平湖如镜晓烟开鹭眠沙尾时双起潮打桥头日几回幽事肯容孤赏尽篮舆穿着万松来

### 春蚤

春蚤园亭柳未催主人何事重徘徊疎林新得一双鹤小苑初开几树梅经雨不嫌苔径滑冲寒常破晓烟来兰芽近日山翁赠自洗香泥取次栽

### 後探梅絕句三首

玉蘂琼葩自结隣交枝接影十分春劳劳十载京华客须得梅花为洗尘

山窗面面对疎梅掩映清谿与緑苔诗客已偷三日醉园官未报五分开【放翁诗蜀中梅花园官报五分开则游人竞往】

溶溶花睡压栏干轻雨轻烟欲放难留得暗香三五日昔人曾与贺春寒

### 山庄看梅花四首

岭云栖不散山雨泥春阴闻道梅花发还将蜡屐寻树欹沙岸古香护竹篱深竟夕当檐坐清寒沁此心纵横纷衆态低亚小谿通花发轻雷後春深细雨中烟霏知露重香静觉山空倚徙无穷意何人解与同端合临清磻偏宜挂碧岑根梢枯衲相香色道人心斑剥莓苔积披离苦竹侵寒宵霜月夜髣髴听长吟接影交柯处香光满四围树深堂邃古花密昼霏微径僻蜂知晚天寒雀到稀樵归烟暝後自起掩荆扉

### 山中即事十二首

荷耒喜见草微青手种朱櫻遶翠屏秋获倘教余数斛诛茅先构也红亭

澹澹春陰薄薄寒经行不觉过层峦等闲一幅云林画只把吾庐隔水看

燕市盆梅不易栽园官温室火频催今年饱着看花眼绕屋沿谿烂漫开

烈侯祠畔酒旗斜谷口深林处士家一雨才过惊蛰节谿山到处是梅花【谷口为唐英烈侯张公祠墓吴中称梅花为惊蛰花】

梅花开落已经旬来往山中不厌频偶尔低徊小窗下紫兰香细欲留人

轻寒幸不负花朝自荷春勑斲药苗忽见岭松低亚处一峯晴雪补山腰

羊裘信宿白云端不识春风料峭寒日暮奚童携酒至开帘先问鹤平安

门对方塘俯碧流柳风初暖菜花稠波心吹浪圆如镜忽见文鱼逐队游

前宵风雨起奔雷惆怅空山笛里梅枝上渐稀人始到殷勤为送落花来

短檠红烛放翁诗窗掩梅花月上迟茗椀炉香意亲切空山一夕最闲时

窗横远岫青千点谿邊寒梅影一池老我闭门耽静对暖风晴日落花时

倦倚梅根久立时关情惟恐落花知微风忽向枝头过香雪中间自咏诗

四弟武仕之任武昌别驾为赋二首

世食参藩泽城南有故庐枝垂松柏?花爱棣棠舒欲链层霄翮先题剧郡輿慈亲严却鮓莫寄  
武昌鱼连枝昆与季卓荦爱尤偏挂笏逢佳地鸣珂正少年湖湘多旧蹟清白久流传一櫂春  
江接含情望汝贤【伯父方伯公曾官楚中】

文端集卷二十一

## 卷二十二

钦定四库全书

文端集卷二十二

大学士张英撰

存诚堂集十八

近体诗七十八首

过木厓河墅二首

出郭横青嶂当门泻碧湍石棱盘磴仄野色倚阑宽树及春阴种松兼暮雨看从来多逸兴垂老得烟峦篱护方塘碧桥回小径深已看杨柳拂更待芰荷侵一壑容吾友千峯识此心惟应谢尘累轩豁日长吟

过有怀甥白鹿山庄二首

倚櫂入烟鬟南浮水石间湖田留世泽松桂老名山古屋丹题在丰碑绿字殷一邱经四代风节满人寰【南浮山在庄前明善先生廷尉公中丞公世居於此】

楼居良不翬结构倚层峯一径盘修竹孤亭俯万松鸟声时自媚山翠日为容避世琴尊里知君道气浓

游龙山五首

稻畦松迳接处处爱邨烟绣岭千屏列明湖一镜圆土腴禾覆垄人满杏为田福地成真语花源岂浪传乌栖双桨急归宿旧烟萝谿逐渔罾转邨沿竹圃多衆山堆晚翠夕照起微波端为经时雨潮痕没芰荷乱山藏一壑行觉月谿长竹路过危谿松阴覆古墙厨烟分磳冷山雾焙茶香髣髴匡庐顶棋声响石牀【月谿内有月珠庵最幽胜】

屡负春深约花时不易逢何年容采药此地足为农天际看龙岭波心落鹤峯横斜山畔石常似乱云封密树连邨暗深庄处士家篱根新笋箨松顶古藤花凿牖千峯簇疏池一径斜爱君诗画里尽日伴麝麝【深庄为友人刘超宗居】

渔父

谿头渔父影鬢髻低结芰茅倚綠藤刚掩柴门沽酒去一双鱼翠立空罾

### 夏日山居五首

松风满耳杂鸣禽避暑无如此地深安顿竹牀茶臼处小窗恰对古梅陰

邨烟漠漠望中微隔涧遥看竹里扉松岫稻田千顷碧横空白鹭一双飞

园翁为我摘新蔬炊熟黄粱正午余一枕凉天初睡觉好风吹乱竹窗书

日长似得几朝闲浴罢移牀更看山一种晚香曾未识来从莲叶稻花间

山人蚤起爱新凉绕迳贪寻水草香竹露涓涓似微雨南山松顶见朝阳

### 寄说岩宗伯

袖中文字比骊珠乞得经年卧五湖学种樱桃才半亩也红亭子至今无【说岩曾为余作也红亭记】

### 夏日斋中即事二首

为爱朝凉起偏知夏漏长行随梧竹影坐袞蕙兰香石罈鱼鬲牖墙陰鹤转廊尘中人鹿鹿谁与说羲皇古瓦垂青蔓闲阶上碧莎夜深微雨後秋色草花多小病疎巾栉低窗稳歎歌乐天潇洒外今昔许谁过

### 盆兰先後作花

清晓凉飈睡足来茗香事毕小徘徊花神解事君知否检点盆兰次第开

### 避暑二首

碧树覆檐牙重门隔市譁菖蒲衔石草薈卜贮瓶花橘数垂枝实兰培出土芽不须河朔饮幽事总堪夸薄有岩居趣摊书綠?中回廊涵翠竹曲檻倚疎桐茗竈分微火桃笙逐好风海棠秋色蚤衔露一枝红

### 雨後行龙眠道中

蚤凉出郭觉情亲河濶桑浓景一新石角磷磷偏碍路谿声曲曲解随人簔笠色净霜初落?榼风轻綠渐匀正是莺嚙好时节可堪城市往经旬

## 急雨

赤日流金草木摧倏然云雾起奔雷老夫企脚当风处卧看翻盆雨势来

## 烹茶

泉自花陰汲铛随树影移松声才歇处蟹眼渐生时綠雪从斟浅香云欲啜迟只须分茗笋不在试枪旗

## 闲中二首

晓天凉雨入房枕卧近修廊竹一丛遶迳数声清喉苦瓶中知是鹤粮空

殷勤为我报山翁苦忆陰崖大壑风莫怪经旬住城市秋兰花满小轩中

## 立秋次日食新

风雨时和乐有年蚤禾新刈傍湖田尊开酒库应无算菜送园官不取钱荐庙白炊香稻熟留宾红割锦鳞鲜太平自愿为农老幽雅常吹七月篇

## 谩道

谩道全无着将闲寄此心装池新得画位置借来琴圃事耽微雨花时惜寸陰草香栖鹤地一日几探寻

## 宿仲兄湖上

万顷湖连屋移家隐此中门低桑叶暗径曲槿花红潮恋经秋雨涛喧入夜风一镫瞻绣佛姜被老年同

## 小葺思过轩成

秋深营?室仅可置匡牀锦苕翻浓艳拳柑逗浅黄趺跏双膝影缭绕一帘香爱静今成癖何心与世忘

## 松湖山庄收获十絶句

芄芃禾稼满高原人带腰镰处处邨恰喜归田逢大有农夫举酒庆曾孙

潮落新秋古岸平  
隔湖云澹雨初晴  
晚来企脚松棚下  
月照隣家打稻声  
水北山南见一川  
家家钱鏵在秋前  
蚤禾刈罢重耕稼  
再熟湖干下渚田  
沙田待雨等闲情  
不耐天公五日晴  
今岁农夫俱额手  
水边未听桔槔声  
一筇偶过野人家  
檐挂鱼罾返照斜  
草迳柴门鷺鸭乱  
清池低映紫薇花  
渔翁住处傍南湖  
留客霜鳞玉不殊  
茭白藕丝随意足  
杂罗菱芡与菰蒲  
渔庄蟹舍白鸥洲  
佳地殊堪十日留  
最爱湖光绕山麓  
短松低堰系扁舟  
星罗尽是佃农居  
拟向中田自结庐  
初夏来看荷覆水  
小舟江上送鲋鱼  
閱尽浮云意久慵  
懒将衰质日为容  
瓦盆浊酒茅檐下  
渐喜心情似老农  
我欲临流发浩歌  
倚山筑岸贮清波  
种荷栽柳三年事  
好泛渔舟挂绿蓑

## 初秋二首

黄叶初离树  
人归旧草亭  
吟孤双鹤侍  
坐久一峯青  
竹为妨梅翦  
门因避客扃  
桂华含蚤露  
香雾扑疎棂  
尽閱寰中趣  
深耽物外情  
扶花承夕露  
翦蔓避秋声  
鐙影帘栊静  
橙香枕簟清  
拥衾还叹息  
弥觉道心生

## 杜门

杜门无长物  
秋树老夫家  
手把临窗卷  
心耽绕砌花  
昔同乌近日常  
与鹤餐霞桂  
雨兰风里差  
堪纪岁华

## 社饮

低迷桑叶路  
放浪竹皮冠  
谷贱邨醪醺  
年丰社饮欢  
前身应圃史  
老我作农官  
土鼓吹邠雅  
吾兼咏考盘

## 送尧元之任漳州别驾四首

潮落寒江昨夜风  
惜陰亭畔送征鸿  
好将碧水丹山色  
尽入檐帷画舫中  
旧路细看棠?满  
彩衣重溅荔枝红  
遥知瓯越龐眉叟  
扶杖争来问阿翁



京华九月返轺车新佩银黄耀故庐天末人归多难後日南恩拜一官初懽承大母亲调膳志养严君慰倚闾佐郡莫嫌犹蠖屈古人风烈重题舆

木叶萧萧拂去旌蚤梅花傍岭头生鲸波息处新投甲蟹户归时正偃兵才自冰霜成练达地宜盘错立功名好从幕府抒筹策千里骅骝第一程

蚤岁光芒照乘珠十年筋力尽驰驱才人今已分民社新妇从兹事舅姑壮志蚤宜闲玉勒寸心知久贮冰壶春江南望无穷意爱听贤声自海隅

## 山居二首

一月疎过岭北园蛛丝当路雀迎门秋山易作烟霞态松籁不闻城市喧久坐烛残书卷剩迟眠香重被池温五更梦醒萧萧叶检点平生未报恩

笋舆芒屨日相随山北山南未觉疲幽涧独寻澄碧处秋林蚤爱嫩黄时会回九折羊肠驭新得层霄鹤背骑漫道神僊不可即稚川弘景是吾师

## 甲子惊蛰後一日入山二首

冻蘂粘枝重可嗟疎林无复见横斜腊前乍暖春前雪浪掷园梅一度花

乞得隣花趁雨移只愁耽却种花时笑予不学刘伶癖长见闲人荷锄随

## 媚笔泉

薜石离奇金碧画澄潭深靛蔚蓝天几回抛却篮舆去缓步行吟媚笔泉

## 语客

骑驴客去漫嫌迟借我山窗信宿宜好景莫从城市过最撩人是夕阳时

## 邨南

日晚邨南驻小车人同飞鸟共明霞吟过树底微风起影落谿流返照斜远度岭云寻蕙草闲搜石磴置梅花欲归只隔樵歌路便是青山谢朓家

## 山行杂诗八首

谷口幽居美左思緑杨疎处见茅茨玉兰花发山如雪衬着青松看转奇

柳含朝露杏含烟嫩綠匀黄菜麦田寒暖陰晴俱有着最宜人是养花天  
桃李惊开一夜风逗人无奈隔谿红春深切莫辜游赏花事山容日不同  
山迳常从雨後回邨烟澹处野花开谿流一夜春潮长雪浪晴翻石壁来  
山桃红覆野人居新綠交加锦不如行向树陰深处久落花飞絮满篮舆  
才过谷雨惜残春红渐稀疎綠渐匀吟就小诗聊自适掉头不管路傍人  
山迳盘纡待晓归千山紫翠自霏微黄莺啼处徘徊听小雨轻陰未湿衣  
小桥流水带邨斜放眼看春觉转赧红茜满林山蹢躅松颠高引紫藤花  
蚤起书触目所见三首

蚤起扶筇步小池麦田风细綠参差黄鹂隔树遥相唤恰是春陰欲雨时  
前邨忽见雨蒙蒙鸟乱鸦啼一树风回看山腰作云气短松如荠白波中  
雨歇园林放脚行一声黄鸟一心清双飞偏爱新桐影啼向浓陰太着情  
一邱二首

一邱一壑慰平生小构幽居遂远情欲设闲门向深綠隔花临水费经营  
一树寒梅碧玉枝当阶古干旧披离偶然推却东墙去乍觉横斜势转奇  
营北轩

手辟层轩自葺篱还疏曲沼翫沦漪松横远岫遥临户泉绕阶除细入池侵檻蚤荷圆似镜眠  
堤新柳碧成丝容予歎傲梧陰下领取风恬月皎时

### 山居杂诗九首

吹笙扶杖有双童跨磻穿云见此翁天下闲人谁得似看松采药水声中  
何事捻须求句好不须叉手限诗成闲吟半格无多语得意黄鹂三两声

涧草溪花驻小车岚光烟霭媚幽居无穷物外相怜意料得青山亦爱予  
浅深浓澹各成奇如见公麟老画师欲向山中看树色晚春天气暮秋时  
岂无人似放翁颠笑插花枝意自妍碧水丹山收拾稳凭人相唤作神僊  
石步粼粼可渡河水明沙白动微波欲知山路纡回入一道清谿十度过  
南窗山翠北窗松顷刻陰晴景不同造物年来差解事置予百幅画图中  
新得清冷绕户泉还移白石老梅边主人尽日开顏笑细酌频看意欲僊  
蚤年挥手紫云边尽日行吟綠水前欲覓先生何处去万松深处一池莲

文端集卷二十二

## 卷二十三

钦定四库全书

文端集卷二十三

大学士张英撰

存诚堂集十九

近体诗七十七首

结屋

结屋邻松近疏池引磻频芙蓉经岁种梧柳一时新荷贴青钱小波生绮縠匀闲来看稚子长日静垂纶

南荣

结构南荣只数椽好山屏障恰天然尽收松色层轩里细挹荷香小槛前梧叶半窗临曲沼稻花十亩对平川日长坐听渔樵话惟觉

君恩此际偏

山居杂诗八首

吟诗啜茗小窗前忽见人耕原上田正是晚春烟雨後青蓑黄犊满平川

秧鍼渐绿水平渠鸥泛莺啼迴自如才过午餐行饭去梅花谿上数文鱼

谿河雨过石磷磷中有文儵碧玉鳞今夜山窗留客话隔河呼取钓鱼人

林深溪急路透迤篮笋常渐雨涨时最爱多年住山客堪怜十岁负薪儿

白藕花开碧玉姿倚风含露立多时方塘潋灩才新绿若个凌波第一枝

满把园丁摘野蔬一竿童子得谿鱼勸来晚食松陰下不信侯鯖得胜渠

梅邨栗里恰相连最爱东隅一径偏特构南轩临竹圃万竿烟雨小牕前

听罢桑阴布谷催蚤秔晚秔已全栽水平秧绿柴门掩齐唱樵歌入市来

## 幽居二首

小构幽居隐礧阿柳风荷露任婆娑门前一带沿谿路不是樵人不肯过

竹梢垂露傍檐低山雨山烟曙色迷幽梦欲醒支枕听小窗微白唤黄鹂

## 夏日山居杂诗十四首

雨後黄鹂锦翼新梧桐花下去来频金梭自掷浓阴里不独唳声最可人

恐负湘波洛水姿凭阑细数一枝枝自从碧玉搔头日看到红衣褪腕时

斜日山腰弄晚晴卷帘初见白云生门前流水经新涨犹作林间风雨声

一碗茶香一缕烟小亭端不愧幽偏新荷绰约帘栊外流水潺湲枕簟前

老我初营水上亭稻香松籁醉还醒一池波浸琉璃碗四壁山围翡翠屏

蔬圃常耽雨後來绕篱花衬屐痕开去年食芋邻家美乞得蹲鸱傍水栽

知是神僊第一班偶餐烟火到人间祇今一榻栖真处恰对门前玉几山

晚看松色入青冥团扇疎帘坐水亭最是稻花莲叶里乱飞萤火似繁星

石根泉脉绕阶清屋角墙阴紫藓生十日不雨衆泉竭犹能小作潺湲声

日移云际千峯影手把牀头一卷书怪底近来诗味好经旬常对玉芙蓉

坐欹竹檻俯鸣泉家在千峯落照前点染谿山如濯锦白莲苍栝晚霞天

珠帘三面对澄波小啜云腴午睡过一部野人新鼓吹山南山北插田歌

耽看晨烟与夕霞总将林壑住为家小窗昨夜新香别斲得山南百合花

嶂合谿回入窈冥画眉唳处衆山青山人久住浑间事掩卷惟予着意听

构南轩成

学圃斋南曲曲廊新营土屋燕泥香秋帘滴翠围湘竹春槛穠华压海棠幽草尽教侵仄迳高槐恰与受斜阳河亭水榭犹嫌热输与清陰此地凉

### 纳凉北轩

茗椀桃笙一室中小留香篆闭房栊柳丝细织西窗日松顶遥分北牖风架叠浓陰延宿鸟帘垂疎影障飞虫频年世路羸谖却检点谁堪此味同

### 读子瞻诗二首

### 直庐归後卧烟霞感旧怀

恩讵有涯我亦曾分烟柳句恰如苏轼紫薇花

穠华酷嗜已成痴尤爱临阶三两枝解事东坡老居士卷中多有惜花诗

### 山居即事七首

松崖明月柳谿风恰与闲人此际同曲檻小亭何所似扁舟泊在藕花中

插柳经春如我长荷花一岁簇方塘常冲蚤露青鞵湿遶岸来闻莲叶香

架头苏陆有遗书特地携来共索居日与两君偕卧起人间何客得同渠

南风六月井泉乾谁遣乖龙转碧湍抱瓮老人今亦勸栽花容易灌花难

日高花事已阑珊晓起须从露未乾天下几人真解事栽花容易看花难

一亩塘如栝面寛芙蕖新叶近阑干北山云起风兼雨颗颗明珠落翠盘

邨落烟生亦渺茫山腰云白转青苍凭他纨扇冰壶里不敌荷亭一雨凉

### 草堂

草堂一坐动经旬饮翠餐香有夙因山气佳时在朝夕难将说与暂来人

### 初秋坐读易楼二首

砌生幽草石生苔人自空山避暑回巢补新泥秋燕乳兰培旧本晚花开围鐙儿喜如羣谢对

案妻能似老菜豆粥花瓷同一色夕凉高咏复谁猜

河汉西流夜转清严城击柝复三更窗间清梦梧桐雨簟上新凉蟋蟀声深护兰香垂纸帐细听松籁近茶铛丹颜漆髮年年换弥感平生学道情

坐四面芙蓉亭

亭延湖水濶万顷接双扉翠叶笼朱柰清池映紫薇河鱼秋水上邨酒晚凉归真学忘机叟沙鸥狎不飞

喜雨

蒿目惊心原上田螳迁鸠唤已频愆连朝几见黑云满当昼真看白雨悬枯藓顿教回紫翠高檐骤与落清泉新凉社饮鸡豚熟犹得吹邠庆有年

山泽

山泽何堪老一经且将方略付园丁陰晴细验春秋社昏旦频看黍谷星耰竹恐伤鞭逸出种蔬先爱甲微青长鑱短锄随处指点松根斲茯苓

寄许伊蒿时为邳州学博

荷香松籁日栖迟千里圯桥寄所思空谷每当飞瀑处黄河却忆听潮时风前得句应搔首烛下谈经旧解颐皆响亭边秋雁过凭将说与许询知

此味

帘外苍深列万松红蕖碧叶胆瓶中窗间叠膝焚香坐此味何人解与同

与羹湖

君营谿馆迓慈亲我亦扶輿步後尘是佛是仙凭说与四年前是八旬人

过越巢闻读书声

波回叶乱度谿风谿上停车夕照红但是书声吾爱听况从秋树竹林中

归卧

归卧花林两度红孙能扶杖可称翁田园自放农堪老饮啄无多鹤与同宦迹十年香案侧生涯一径古梅中姓名喜未沾尘土着意清寒感化工

### 中秋雨

姮娥宝扇已重遮无复清宵见月华山雾白时疎雨过分畦看种米囊花

### 蚤起

窗白鸦翻曙色来山翁蚤起被花催披衣先到芙蓉岸衔露一枝犹未开

### 桑下读放翁集

手中书是剑南编来看新犁原上田坐傍桑陰牛粪读故应远胜水沈前

### 芙蓉二首

秋水澄潭映碧空一枝垂影綠波中花从开落分深浅只有芙蓉晚更红

风尘老我已成翁窗下檠边尚未慵喜看玉儿刚十二也能捉笔咏寒蓉

### 自题新诗後

卷中何处着纖尘句句新诗自写真留向人寰任埋弃千秋定有爱予人

### 对小池芙蓉因忆湖上

拒霜风节岂凡葩开傍荷汀柳岸斜粉缣总含秋夜露红潮初晕午时花绣屏遥倚枫千树明镜低临水一涯若问湖干居士宅牡丹须与让繁华

### 八月二十六日得房师即墨黄公书

蚤侍扶风讲席余七年不见剧愁予空山雾雨萧萧夜东海新来一纸书

### 勸山脚地种花二首

拟构茅亭綠树边看勸山麓作花田翦蔬客到新凉日抱瓮人闲细雨天永叔诗中思颍水文饶海外忆平泉几人稳作林塘主今古风流定孰贤



花畦曲折槿篱通位置经营课小童常要晚春连蚤夏还须浅白间深红茅亭近着留佳客石径平铺便老翁底事却闲桑下地移牀来看夕阳中

## 山雨二首

墅莽花发白如霜乌柏迎寒弄浅黄牧竖骑牛草间路山烟山雨隔垂阳

腰镰处处刈田禾浹日愁霖可奈何最是嫩黄深绿好蚤秋山色雨中过

## 小园

小园门迳一弓宽却对松阴俯碧湍爱看梅花临水处特教添取石阑干

## 窗间

平远荒邨墅烧寒窗间手掩一编看柳阴疎处驱黄犊何用丹青覓范宽

隔谿【孙曰璵字受采少司马之孙能读书属丈得疾于场屋而歿惜之居椒园与余庄隔谿】

隔谿山馆碧嶙峋中有骅骝本絶尘痛惜夜珠轻弹却玉兰花下读书人

## 甲子重九二首

客散空山独欹时绕阶甘菊放犹迟闲门老树青虫集夜雨新寒黄叶知邻叟相过携芋栗园丁自课葺柴篱古人节物关心甚搔手能无九日诗

深山俯仰意萧骚木落云飞岭岫高菊澹偏能逢此日山青独喜对吾曹无心更可随鸿鹄有手惟堪持蟹蚤夕照篮舆枫叶路犹惭岩畔酒人豪

## 赐金园十二咏

### 学圃斋

圃翁性嗜圃嘉蔬日翦溉叹息潘安仁岂识霜薤味

### 香雪草堂

老梅既多姿临水复幽绝春风动微波满庭落香雪

南轩

昼永莺频换风微蝶故斜海棠最娇妩坐看南荣花

北轩

左倚松桂磴右临荷芰湾梧桐高百尺叶底见青山

寄心亭

如钱复如镜芳华绽南圃含露虽娟娟莲子寸心苦

也红亭

含桃出禁阑金盘久萧索垂老向深山持竿驱墅雀

清池

方塘贮流水澄澈映山椒送我扶筇影红栏过小桥

竹坞

头番初成竹霜浓锦箨新但求藜藿饱数笋过残春

桃谿

临磻堆红白春风为洗妆莫随流水去勾引到渔郎

松迳

半里深松迳苍烟翠霭多道人行饭处西崦日来过

芙蓉泚

欲制芙蓉裳采采秋云里何事涉江头门对清谿水

碧潭

长松?古潭湛湛如碧玉一日一回来照我须眉绿文端集卷二十三

## 卷二十四

钦定四库全书

文端集卷二十四

大学士张英撰

存诚堂集二十

近体诗七十六首

入山

更将何物伴行藏  
琴荐茶铛与笔牀  
邻舍祇因沽酒熟  
輿台总为入山忙  
朝看丹树千峯锦  
夕对青橙一榻香  
打稻歌声中夜起  
悬知明月满前廊

北轩与内人晚坐

野鹤幽栖珠树林  
海天谁复问鸿冥  
闲诗适意容麤放  
小户当栢易醉醒  
镜里不知双鬓白  
眼前惟觉衆峯青  
山妻解伴於陵子  
相对芙蓉水一亭

珍裘

狐白珍裘比雪妍  
同时拜

赐五云边几人曾到空山里  
披向梅花老树前

寒夜汲泉摘篱菊泛之

纵横满地古梅枝  
月影朦胧雾重时  
旋汲山泉泛甘菊  
一瓯香雪沁心脾

夜雨

桐叶轻黄柏叶赭  
一秋能得几时晴  
明朝恰有登山约  
惆怅檐淋此夜声

姚天池邀游山园雨不果往

夙约登山已再愆  
连宵支枕听潺湲  
纒緜意似深秋雨  
料峭寒生小雪天  
泉挂高檐云似海  
坐

围残菊日如年人生良会谁能定红树青樽事偶然

即事

向夕传呼近阁门仰听

天语比春温丝纶岂是逋臣事簪履难忘

圣主恩自分形骸宜薙泽敢因泉石恋邱樊集贤学士如墙立落笔中书眼渐昏

过鸡鸣寺【甲申年十一月三日先母太淑人五十初度饭僧于鸡鸣寺子时八龄从父兄游至今不能髣髴其地惟记大银杏一株在佛堂右甲子年十一月五日重至其下老树无恙增尺许围先後相距恰四十年日月适符为之感怆不能去】

髫稚曾随入梵筵鸡鸣山寺石城边香台难覓经行蹟藓石犹刊旧施钱学舍亭轩凄暮草佛龕钟磬冷朝烟婆娑老树空塔立别尔风霜四十年

腊月八日眠樵木厓霜鹤过山庄小饮二左留宿

肃穆羣峯敛山烟午未开门低风偃竹枝冷雪封梅俭岁邨醪薄寒宵好客来一镫华髮叟幽话幸相陪

乙丑元日立春

三载恩波事耦耕年华又喜入昇平万家晴雪装琼树一夕春星转玉衡火?梅花居士屋风占黍稌老农情勾芒恰喜逢元日南亩悬知庆阜成

深坐

闭门深坐爱吾庐乐事无多致有余陰壑雪犹供茗椀阳坡荠可作厨蔬树堪入画偏增雀鹤本亲人岂为鱼欲渡谿河访精舍屡询山路滑何如

中年

中年万事不相关惟见林峦一破顔出处规模钱若水诗篇枕藉白香山五官用尽都成拙百计轮来未胜闲陌上樵人时放担听予高咏落花间【放翁诗闭门谁共处枕藉乐天诗】

难遣

松肪一碗胜明缸短髮鬢髻影自双难遣梅花寒处立夜深犹自挂西窗

人日课童子理园圃

人日春晴体乍舒闲驱稚子理荒芜梅边稳置支琴石竹下新移淪茗鑪幽径滑时扶榔栗小谿平处坐 璚若教添取公麟笔处处堪将入画图

人日

人日春风蚤新晴鸟乍啼米囊犹带雪豆甲已掀泥冰壑埋樵径阳坡数麦畦山寒门晏后虎迹满前谿【莺粟花一名米囊花】

步履

步履看松去邻庵不待招春晴谿自涨山远雪初消双屐宜沙路孤筇怯板桥梅花犹寂寞探取向南条予拟为楼压园梅之颠口鹤背楼偶读放翁咏梅诗亦有洛浦凌波矜絶态猴山骑鹤想前身之句

危楼欲构压花丛恰喜拈诗得放翁卷幔摊书孤月冷倚阑吹笛万山空微风弄影波初泛暖日生香雪乍融何异玉京银海曲身骑白鹤碧霄中

读书罢忽起见月

雪霁谿声响石梁逼人松色夜苍茫忍寒趁烛终诗卷忘却梅边月似霜

梅花二首

松陰漠漠竹萧萧别有心情爱寂寥一树梅花好风月无人知处领清宵

山烟山雨作春寒处处梅花隔水看矮屋疎篱亦佳致岂如勺药倩朱栏

东轩梅数十株临水二株尤奇古作小亭对之

梅花时节苦春陰索笑惟余绕砌吟枝压冷云当户重庭霏香雾闭门深熙荃画本纷千态郊岛诗情满一林莫道春风开独蚤许君犹是岁寒心

春山八咏同羹湖作

岭上云

触石排空总异姿轻陰欲渡綠谿迟闲看舒卷为霖日多在徘徊出岫时峯顶乍携双袖满窗间潜润七弦知一从紉纁歌成後常与山家护竹篱

### 原上邨

几家砧杵隔寒原一幅林峦对小轩綠树陰中闻水碓夕阳多处见柴门嵐光常借炊烟色山径新添墅烧痕昨日隣翁归较晚犬声如豹月黄昏

### 谿上路

山深谿径自萦回地僻人稀长綠苔春陇草生黄犊过秋篱花发白衣来偶添略约前邨近闲倚孤筇野客陪尽日总无车马到往还麋鹿莫惊猜

### 石上泉

层岩飞瀑日潺湲紫蘚青蒲不记年自作雪霜幽壑里时闻琴筑小窗前影穿密树千珠散潭聚游鱼一镜圆不独浮桮兼酿酒濯纓知向此中偏

### 池上梅

无数琼英点旧柯寒心相对欲如何高标自具神僊骨瘦影偏临清浅波山鸟蹋枝栖雪冷文鱼吹浪唼花多放翁饶有关情句一度尊前一浩歌

### 岩上竹

丛棘何堪翳此君翦除疎凿不辞勤簣簞静洗千竿翠岩谷新添一片云细路远从山麓遶浓陰近傍石泉分还期小构茅亭看解箨香风静里闻

### 松上鹤

翩翩雪羽九皋禽只合栖迟托茂林风劲乍闻松籁起梦醒犹忆海云深关情蓬岛当年事回首樊笼此日心寄语烟霞旧俦侣乘轩可似碧山岑

### 陌上花

蹋歌南陌近清明短後新栽白紵轻旧过谿桥曾识路许多红紫不知名横侵屐齿骚人趣斜插钗头少妇情社饮醉眠随处好只愁风雨杜鹃声

### 夜半看月至池上

闲中消息少人知难得朋侪是此时爱与梅花同皓月不嫌风露立清池波生苹末原无定烟失林梢亦乍奇好景恨无摩诘画千秋留取一篇诗

### 山櫻桃

樊圃含桃飄雪後山櫻花发色尤妍红珠斗帳輸他好白石清泉觉尔偏

### 闻廷瓚分校礼闈

南宮承命校专经敢谓新陰在鲤庭屈指岁华刚一纪抡文重到第三厅【予癸丑分校礼闈官次第三居会经堂第三厅乙丑廷瓚分校官次亦如之复居此厅】

### 雨中过桃花园七弟治具

南陌寻春已较迟桃花邨落雨如丝不逢玉洞烧丹日却对巴江濯锦时低树露凝红厌浥比邻烟重影迷离水生屐齿青泥路挈榼来看亦自奇

### 谿头

翫卷谿头旧釣丝园林归卧莫嫌迟放翁甲子当予岁尚欠云山万首诗

### 倪绘江表弟贈锦鸡一双兼以诗四首即来韵答之

雉媒麦陇正残春罗毕招来捷有神遺我更兼新句好鷓鴣从此让才人

青田双鹤本胎僊介性文禽许并传岂似雪衣徒解语彩縵金锁被人怜

清泉红豆新恩重丛竹香茅旧侶多爱尔对啼花径晚莫将文彩恋岩阿

山鸡璀璨锦为名自昔华虫彩绣荣从此翬飞阿阁上回头丹壑若为情

### 初夏

小池初漾嫩荷风曲径新添苦竹丛布谷鸟啼春雨後分秧人乱夕阳中偶居山泽心常恋岂信田园乐易穷满院浓陰深碧处残花犹见数枝红

### 竹醉日

小檻临流避暑宜抱书终日对沦漪经旬?榼新藏壑隔岁芙蓉渐满池节到梅黄天欲睡候逢

竹醉雨偏知千峯净洗参差绿犹是清和夏浅时

雨中书所见

谿声活活雨霏霏驱犊邨童戴笠归百叠松岑幽翠滴黄鹂时拂画屏飞

为东来题陈原舒画花草十二种

冰绡斜倚碧琅玕似有若无着意看盛暑携来帘影下风神怯尔太清寒【梅竹折枝】

武陵人去水茫茫琼实双苞不易尝却似天台新摘取红颗犹带露华香【折枝桃实】

魏紫已随芳树杳姚黄亦逐彩云空自从妃子凭栏後管领春风一捻红【红牡丹】

澹烟明月拥湘娥秋水新裁薄薄罗却向黄陵邀女伴夜深来听竹枝歌【水僊】

荷盖田田绿映池芙蓉叶底未开时何人移向轻绡上恰似银塘第一枝【荷花】

穠华翠叶傍兰丛亦自嫣然晓露中堪笑老翁痴欲绝看花爱到小桃红【金凤花】

一枝纂纂覆丹邱闻道如瓜不可求得向僊亭食僊枣东坡何恨谪黄州【折枝枣】

浅施檀粉独嫣然澹着鵷黄意倍妍背立墙阴如静女一庭风露蚤秋天【秋葵花】

紫衣初褪白绡轻赤玉盘堆蜜水晶想见沈香亭畔立一枝风露入华清【荔枝】

露白霜浓菊一枝萧然寄傲在东篱祇今风格谁能似如对陶潜古调诗【菊】

帐里悲歌事已非美人名马幸同归至今江岸闲花草犹见当时旧舞衣【虞美人花】

澹写甘蕉向雪中披离岑寂似山翁缘何复作繁华梦添取茶花数点红【雪蕉茶花】

大雨後

终朝檐溜如泉注向晚溪声昔所无绝似黄河风雨夜至今心怯此危途

避暑

避暑亭轩傍水开筠丝闲卷独徘徊云根忽抱山腰起雨脚遥穿松顶来簷底新教尝苦菜枕



前时听落黄梅人间清福谁能领此际应无客与陪

### 饮镇皖楼赠薛梁公抚军二首

东臯杰阁俯晴川经始重来作镇年树色岚光千岭月渔歌帆影一江烟庾公兴与层楼迥叔子名同胜地传自是政成多暇日新诗高和五云边

浮图旧蹟比崑崙飞鸟时从户牖过芳草地连南浦近画屏山带夕阳多檻飘歌管云常在镜点渔舟水不波登眺一尊陪剑履祇因岁稔庆时和

### 看花宜蚤起

种荷经岁满芳汀翠盖红衣一水亭风偃穠华偎野岸露和香气扑疎棂朝阳初射前峯紫宿雾犹笼衆壑青自是看花宜蚤起黄鹂作意唤人醒

### 静里

梧覆高檐竹覆廊碧芙蕖渐满方塘半窗深緑花兼叶一榻清吟茗共香书卷抛来朝睡稳山泉浴罢夕陰凉昔人竞说田园趣静里探寻味转长

### 絶句二首

旋汲山泉彻骨清当风自起扇茶铛暑中不耐敲门客误恼枝头啄木声

好将林下羲皇日採取琴中太古音心与七弦同似水一庭斜日转桐陰

### 山居即事二首

窻护炉烟裊篆丝等闲出定意迟迟稻花緑偃风回处莲叶香浓雨过时摘豆遶篱寻僻径洗茶移具向清池茫茫今古人何限管领风光定属谁

久向尘嚣谢俗缘闲中忙事亦幽偏露垂自翦当门柳雨过来扶蘸水莲分礪每教烹緑雪履霜时复弄朱弦枕前榻畔知何有陶白遗诗只一编【范文正公琴只学履霜一操】

### 夏佳岭二首

媚笔才过水一湾杜鹃花里小跻攀莫嫌度岭劳筋力隔断尘寰是此山【媚笔泉在岭之南】

山境遥从岭际分岭南云物是比邻莫嫌地窄园林小犹与孤松作主人【予山庄以岭上孤松为境】

初过宝穰堂【在松湖庄】

宝穰堂从隔岁谋主人今始得来游青松枝亚明湖出古栗陰团小径幽远涨初生逢暮雨晚禾重艺趁新秋闲来检点人间事社饮渔歌第一流

松湖後收获诗八首

谢家子弟一尊同嫋嫋鱼竿澹澹风最是月明湖水濶轻舠柔櫓万花中

叶罩平湖静不流藕丝菱角挂扁舟隔花稚子遥相唤摘得莲房恰并头

荷柳松筠满四邻此中无地着纖尘堊边鹭立如迎客叶底鳬藏不畏人

侵晨得得看花忙雨送轻陰露送凉小艇系从高树岸藕花深处扇茶香

秋潮清浅是今年叶密花红着意妍立向棣棠花下望彩霞一片蔚蓝天

渔歌声里记春秋藤径茅亭事事幽怪底老翁年七十鐙前作字尚蝇头【湖上仲兄着书能作细字】

高原禾黍已芊緜潮晚偏收下瀝田自荷

君恩三载住桐乡两度见丰年【比来甲子乙丑岁皆大稔】

西山云气正嵯峨把酒垂纶任放歌总是平湖莲叶满人间不解有风波

题澹人所藏文衡山泼墨山水图

直庐茗椀校讐闲忽见飞涛杳霭间却似晓烟春雨後湖干日对米家山

曾囑

手种芙蓉近碧湍深红浅白覆阑干别时曾囑龐家妇秋叶黄时一探看

文端集卷二十四

## 卷二十五

钦定四库全书

文端集卷二十五

大学士张英撰

存诚堂集二十一

近体诗三十四首

夜出神武门

马散天街濶长堤偃玉虹空林晴雪後寒月水烟中人聚平桥火鸦翻古栝风梅花香载路清  
夜故园同

十二月二十日

内直看赵松雪水邨图三首

风流无奈赵王孙画出江南水上邨瞥向澹烟疎柳处依稀重认旧柴门

青箬吹香雨後风秋山秋水总空蒙谁将宝穰堂前景移入觚棱晚照中【宝穰堂予松湖别  
业名也】

罽毼闲来挂短篱潮生风急雨如丝鹊华秋色无由见沙渚烟汀澹益奇【董文敏跋云松雪  
尽鹊华秋色图与此图同为王敬美家物此图澹远更出其上】

二十二日

内直看李公麟龙眠山庄图粉本

画里龙眠首重回笑余新自故山来祇今欲覓垂云泚难洗空青万古苔【图中有垂云泚今  
尚可髣髴其处】

丙寅正月二日

内直用司农梁公除夕韵

山泽臞姿恰五旬重来宫掖物华新为沾柏叶尊前酒乍觉桃花颊上春内直鐙残犹对客故园梅发正怀人东风青徧王孙草不减霜毫色似银

### 唐六如画梅花折枝二首

冻蘂寒香似有情当窗忽见一枝横不缘人与梅花似敢折梅花为写生

六如居士本天真澹写疎梅笔有神恰似春深花落後披帷初见李夫人

### 寄题继谿草堂四首

别业依青嶂农家共一林泉流芳砌徧花隐曲廊深才子耽幽事佳时惬赏心春风正骀宕遥忆旧登临山麓斜分径花丛隐结庐翠烟凝古桧碧涧乱红蕖辟地贪分竹疏池学种鱼老亲多暇日一卷课春耰石门飞瀑近为置一亭看松影层岩合梅花曲径盘晴空云自白春尽雪常寒恐被徐凝诮题诗欲寄难共有园林僻多君逸兴矜輶移幽磻石船载冶城花勺药扶朱檻簷簷护碧沙那堪人日过相望在天涯题严荪友为澹人画江邨草堂图二首

漠漠烟汀接短篱打鱼船系绿杨枝有人草阁青鐙里卧听江湖月上时

自是才人寄托遥等闲画出便萧萧待予小艇来相访记取谿边略彳桥

### 忆仲兄湖上三首

湖山存旧业浩淼接长川宅倚平安竹门迎伏腊田桔槔红树外笕簷绿杨边鸡黍南垞近相留可判年地偏人事简长日闭花关潮接当门柳青回隔岸山家才杭稻足亭共水云闲常有深秋约芙蓉曲沼间湖干栖仲子生计托渔庄西塞山前雨青蓑笠子香花间看织网烟际听鸣榔他日鸂鶒扁舟老是乡东皋为伯父方伯公旧园侄我思新之

跨磻平桥古东皋俯一川稻花吹柳陌山翠接城烟蘊藉推前辈风流倚後贤路人谈往事池馆似当年

### 秋树草堂

路指乔松入幽居近复偏曲廊凭古木杰构傍名泉春昼檐花密霜晨岭树妍娱亲见昆弟时导板舆前

### 似古山房

境外幽人宅庭轩倚翠微斜过深竹径忽见乱泉飞湍急连朝雨寒添六月衣主人摇落後萝

薛闭山扉

咏园

数武离闾闾涓涓响涧泉鸟闾筠馆静花亚石池圆深翠孤亭出平芜远岫悬与予栖鹤地只隔女墙烟

越巢

路傍青谿转垂藤见茷门竹孙新箨满梅子绿阴繁见客短衣惯寻山旧笠存草堂书拥坐吟歊閱朝昏

河墅

春光宜北阜冬日爱南荣倚石长廊邃当轩曲沼清荷藏新浴鹤柳待旧啼莺举趾先畴近移家看耦耕

正月十六日扈从南苑看烟火二首

春城歌吹传柑日南苑

宸游诏许从星渚霞标纷万象银花火树涌千峯明月初平螭螭桥彼都人士夕相招紫烟破处红镫出十二珠帘倚碧霄

春山用阮亭韵三首

霏微残夜雨山路不成泥旧燕寻巢入幽禽选树啼秧随春水绿花向夕阳低谿上堪行乐心情付杖藜鹿砦深藏屋牛涔浅印泥草花双蝶绕谿树乱莺啼杨柳吹绵嫩樱桃结子低老夫犹健在闲与荷青藜荷耒临磻谷闲洗种花泥陇雉冲人过谿禽照影啼雨催菰甲满风约麦痕低童子呼朝饭新香出糝藜直庐中同说岩先生读阮亭南海诗即用其见赠原韵寄阮亭

风雪山城别天涯复几时梅花江北路荔子岭南诗不觉清吟久重闻禁漏迟直庐相忆处应遣故人知

送友人归郁洲山【山在海中去海洲岸四十里】

春明归櫂客栖隐郁洲山湏洞风尘外烟云杳霭间东溟银汉接西塞绿蓑闲奇思兼清兴扁舟恣往还

香山集有浔阳三春诗作

帝城春三首

春生

雪晴宫瓦碧参差澹沲春生太液池冰泮有声微绿处柳垂无力嫩黄时窗横梅蘂香初觉衾覆貂褕暖渐知几度江南还冀北莫嫌花信较来迟

春来

凤城游骑锦鞯香桃李随风出御墙陌上清明沽酒闹担头红紫卖花忙新莺树底啼春晚双燕梁间话昼长开偏杜鹃山径合可能无忆陆浑庄

春去

梅子离离叶底青小园春去户常扃抛来风月知谁管老却莺花不暂停上苑朱樱初入笼丰台红药乍登瓶子规催徧千山绿深掩芸窗怯与听

题禹尚基江邨图

昔爱王孙笔疎杨映水邨浦烟迷钓艇江色动柴门复见高人致惟存澹墨痕期君深卜筑画里着庭轩

文端集卷二十五

## 卷二十六

钦定四库全书

文端集卷二十六

大学士张英撰

存诚堂集二十二

近体诗三十四首

七夕前一日次说岩先生韵

隔岁偏如此夕何南飞鸟鹊待相过层霄夜觉新寒蚤碧落人赢别恨多茉莉晚风吹小苑梧桐疎雨坠秋河儿童预拟穿鍼节共拜盈盈清浅波

十二月七日从院长除兵部侍郎

惭无藻思佐文风讵有良谋翊武功犹喜官阶随座主共论邦政绦纱中【时真定梁公为大司马】

读子瞻词

老夫终日为花忙一日三回索酒尝三十年中尽潇洒也应三万六千场

丁卯人日题画八截句

渐引樵柯入白云东西路傍石梁分空山旧是经行处碧涧长松断事坟【方断事公墓在公园北有茂松清流断事死建文难】

远涨来时岭岫明山腰树杪白波生披图似共春山响石马潭边雪浪声【石马潭乃山径最佳处】

翠壁丹岩影倒垂横斜多有瘦梅枝水边但着闲亭子便是丹青絶妙时

媚笔泉光舞雪涛萧萧霜叶响林皋潮痕新没平沙路策杖难辞度岭劳【媚笔泉有谿经水涨则深四五尺俨然碧潭矣别取径山麓古栗数十株黄叶霜天酷似此图也】



解缆朝辞黄鹤楼随风吹过白鸥洲千顷平湖青竹筏一声横笛苇花秋【此景略似松湖】

碧涧香杭水自春山椒路倚两三松画图瞥见曾相识新买邻家若个峯【山园新买北峯髣髴似此】

煨芋炉头活火生松肪偏照读书明栖鸦何事忽惊起雪压枯杨夜有声【煨山芋点松火雪夜读书自是空山胜境曾听雪压枯枝有声乃实景也】拥被推窗未觉寒松岩竹隔雪漫漫窗前堆满千峯白落尽梅花始放看【丁卯人日暂得休沐出安节弟兄画册各系以诗其中多有与故山髣髴者诗意亦及之志吾好耳】

送徐电发还吴江

徐孺东归惜别离吴舫春泛日迟迟惊看笠泽人千里愁折旗亭柳一枝风物蓴鲈夸胜地乡园梅笋正佳时沈郎谢病应相见为语年来满髯丝【沈云步与电发同里】

放衙

放衙差蚤意飞扬拍马归来底事忙红蓼暗随秋雨发绿槐初转午阴凉闲眠旧榻堆书满近隔疎帘焙药香何必松风筠露下高怀方许遂清狂

六月除礼部右侍郎仍兼学士

文昌卿席已频登报国酹知总未能惭愧

君恩时记取名衔依旧一条冰

玉簪花二首

清芬合是水僊俦屋角墙阴作意秋多感西风偏解事为侬琢出玉搔头

高髻浓梳翠鬟匀宝笄初见一枝新谁知湏洞风尘里别有冰心玉骨人

中庭小作药栏

一年花事药栏收短架疎篱引蔓稠雨後有蛩晴有蝶露葵宜夏蓼宜秋高眠怕听敲门客饱食甘为抱瓮俦何必园林千万树探奇选胜作欢游

答中州冀渭公

皓鹤翩跹刷羽遥锦江归後卧烟霄高谈旧接乌衣里古貌新逢玉螭桥久驻丹颜诗转细重添苍鬓雪潜消苏门自是神僊窟宏景松风定可招

### 枕畔

枕畔传香漏鐙前揽布袍天青残月白渐觉曙光高聒耳鸡声蚤惊心蝶梦劳如何霜鬓满岁月等秋毫

### 秋海棠

豆荚疎篱引蔓长水红花暎夕葵黄新秋晴雨多无准一片闲情护海棠

### 畏人

华林西畔远嚣尘深掩庭扉惯畏人蚁战酣时眠白昼马蹄忙处乞闲身花开不觉临窗久枣熟犹思上树频枫茜蟹肥黄菊近梦回乡国最情亲

### 武仕弟从楚移米及盆桂至

香稻流匙滑秋花绕榻开最怜乡味好远附客艘来凉月悬当户霜螯佐举杯久稀深夜坐兹夕重徘徊题冀渭公所藏杨椒山画梅花并诗卷子四首【有序】

椒山先生当明世宗时抗言罹祸冀梅轩公时为刑曹陰左右之椒山画古梅并系长歌贻梅轩孙渭公世守之当时文人继和题识甚夥夫椒山之为臣子致身君父梅轩之为寮采急难友朋渭公之为子孙显扬祖父诸公之为篇什裨益风教览斯卷也四善备焉皆可述而颂也

折取寒梅赠披图见古人祇因霜雪苦弥觉色香真朋友存胶漆文章护鬼神贞风兼大雅吟罢却沾巾浩气凌岩谷寒葩耻艳阳独留孤干在长?百泉香旧蹟传丹萼新诗满缥囊斗芒如可烛嵩麓有辉光斯人皆已没墨渾未全乾大节臣心苦危途友谊难开花偏曲佶结子总辛酸满纸寒光透从君作史看蚤年耽道味还自蜀江浚人有宗风在诗皆祖德吟高谈惊广坐长歎返幽林看取天心复梅花托意深【渭公从蜀中太守回】

### 寄丹枫

相忆城陰一草亭祇今耆旧若晨星谢家羣从推模楷江左宗风赖典型山色远随鸠杖徧松声近傍鹤巢听何时石马潭边路共向云深鬪茯苓

### 重至马兰峪一首

## 古塞重为扈

跽行清时惟见乐春耕山回夕照孤邨出月上疎林万幕平沙路双单留戍堡云峯高下隐边城青松如旧髭须白卧听萧萧班马声

## 和泽州先生寄湖上翁韵二首

湖干新与寄诗筒心逐蒲帆向远空乡国山青频入梦弟兄头白总成翁琼瑶乞得皆奇字兰蕙贻来尽好风四面芙蓉亭上客剡棹深映一谿红【湖上翁有亭在水中余取右丞句顔之曰四面芙蓉亭】

种菜连畦灌小筒汉陰机息万缘空多年车马城中客几见渔樵泽畔翁千岭晓光怜远翠一湖新緑爱微风相思最是桃邨路花落春深满径红

## 新营阳和坊宅

新结幽居瞰碧塘緑杨深处水芝香烟霞漫拟期僊磴竹石聊同履道坊南郭花邨连绮陌西山翠巘入斜阳扁舟更泊芙蓉岸稳置渔竿与笔牀

## 读易楼下紫牡丹以十月作花四朶极为繁艳

洛水名葩手自栽紫英曾自魏家来那堪故国三年别又报春花十月开国艳漫夸凝露质天香还有拒霜才乡园兄弟争吟赏远慰离情锦字裁

## 奉挽座师宛平刘公

杏苑曾分一顾荣孝威风度满西清北平桀戟传家世京洛文章数弟兄易水几年蓑笠往西山昨日杖藜行重过宣武门前第總帟凄凉百感生

## 文端集卷二十六

## 卷二十七

钦定四库全书

文端集卷二十七

大学士张英撰

存诚堂集二十三

近体诗五十六首

己巳春日入邓尉山九絕句

虎山桥外柳谿斜接屋连邨学种花自是山田收获少梅园桂圃是生涯

万峯山北野人家笋菊新为客点茶借我片时高阁上轻烟细雨看梅花

百叠云生震泽湖春衣端不耐沾濡叩门一笑翁迎客莫讶田家雨具无

墓田丙舍傍湖偏夜扣花关一饷眠曾写分云亭上额白云相待已年年【予家居时念齐索予书分云亭额取放翁白云一半肯分吾之句】马家山畔笋舆来曲径深松雪万堆已见香光云壑满梅花未报五分开

平生野性癖烟霞此地端堪老岁华岩桂岭梅连巷陌结庐但看四隣花

邓尉山南古殿台金银佛寺面湖开千松影里丹楼出万顷波心白舫来

西施洞口野花明俛瞰南湖镜水平石上千年珠履蹟春风又见緑苔生

柳色轻柔緑渐匀杏烟初破一枝新莺花弄尽春情态无计堪留瞥过人

过双泉草堂

太平桥畔故人居小作林塘致有余曾忆廿年携手处双泉犹是种花初

冷泉亭

百尺苍岩灌木陰一谿流水寺门深香山作郡杭州日几度斜阳伴醉吟

云栖

复嶂层峦一径纡绿筠苍栝密还疎行人莫漫增留恋尽有家山得似渠

灵隐寺

灵鹫烟霞古木新飞来峯色最嶙峋谁教琢取成龙象掩却名山斧劈皴

锡山秦家园二首

墅绕清池一镜圆亭桥花竹各便娟为园近傍名山侧石罅分来第二泉

老树霜皮态转妍含清堂畔绿阴偏

至尊相问何年种自入秦家二百年

夜登江岸至瓜步

心惊浩荡古江滨渔火人家夜问津古寺月沈钟定後一瓯香饭最甘人

泛舟入会稽二首

兰渚风流久寂寥夜深双桨一谿遥江峯雪霁悬孤月泽国春寒长暮潮麦陇青青迷断岸烟  
邨漠漠聚平桥从来酷爱龟堂客欲荐湘蓴未可招

越水吴山旧溯洄廿年白髮尽相催谁知禹庙空山里又扈鸾旗翠輦来

七弟从靖江来晤於毘陵

海云忽送雁鸿声来伴春帆一日程身到江南仍是客牀聯夜雨若为情须眉濩落宜高卧岩  
谷荒凉待耦耕相对扁舟思转剧钓竿烟水足平生

西郊

苍茫山色紫泉宫风土清佳鄆杜同桥跨绿畴藏宛转阁凭芳树隐玲珑竹边花蘸霏微雨柳  
外舟移澹荡风最爱南邨谿水碧潺湲声入上林中

宿邨墅

邨墅门临驿路傍  
暂移襆被置匡牀  
凉生暮草虫先觉  
月近秋宵漏渐长  
蝶梦我贪蕉鹿在  
马蹄人逐晓鸡忙  
年来万事惟推分  
喧寂无心亦两忘

### 坐谿上却忆

薄有城南数亩池  
终期归老结茅茨  
细吹绮縠风生处  
满泛金波月上时  
蒲叶影中藏翡翠  
藕花丛里宿鸕鷀  
华林西畔香谿水  
静对无端寄所思

### 读白诗二首

醉吟千首总萧疎  
底事闲情苦让渠  
世上风光全管领  
苏杭太守洛城居

霓裳旧曲三升酒  
履道新居十亩池  
不解乐天缘底事  
犹从宰相乞分司

### 名园

水流琴筑树生香  
十二红阑绕曲房  
一径晚花春未去  
数声啼鸟日偏长  
露桃枝覆银牀湿  
湘竹帘深绮户凉  
独有金笼鹦鹉意  
含愁不解爱雕梁

### 赋得老农诗十四韵

检点人间事为农乐不支  
但知勤四体不解蹙双眉  
岁月催耕管陰晴布谷知  
灌花朝抱瓮护竹夕编篱  
荷锄轻蓑稳腰鎌短褐宜  
一犁春雨後双屐晚晴时  
柳岸收鱼笱花邨趣酒旗  
儿孙居比屋姻娅满东菑  
饶有闲懽笑都无远别离  
先秋输井税及暖盖茅茨  
齿长鸡豚社家隣土谷祠  
放歌忘远近薄醉任倾欹  
略识租牛契粗闻秧马诗  
羲皇如可接沮溺是吾师

### 题截句成复为此乱之

荣枯喧寂由人看  
饥饱寒温着自身  
不会心人端不解  
千秋定有会心人

### 一枕

一枕邯鄲鬢已丝  
僊翁未唤醒迟迟  
无端富贵兼忧惧  
总是黄粱未熟时

### 追凉

追凉陪侍宿郊垧  
退直披襟柳下亭  
雨後西山如画处  
晴霞衬出远峯青

### 忆昔

杏园犹忆昔年春  
齐到蓬山十五人  
松院壶觞时并入  
槐厅灯火夜相亲  
回头半是凋残客  
屈指稀逢强健身  
我较诸君良厚幸  
岂容更恼鬓华新  
【康熙六年时同入翰林者  
缪念齐 彤 张 礼 存 玉 裁 董 默 庵 讷 夏 隣 湘 沅 史 子 修 鹤 龄 卢 西 宁 琦 谢 瞻 在 兆 昌 储 玉 依 振 潘 起 岱 翹 生 唐 偕 藻 朝 彝 丁 次 兰 蕙 王 子 厚 曰 温 杨 简 人 仙 枝 刘 茗 水 泽 溥 泊 予 十五人今礼存隣湘子修起岱子厚简人茗水皆物故】

郊居多暇因编辑旧诗

华林西畔柳芊绵  
僦得农家屋数椽  
散步不离鷺鸭队  
闲吟一到芥菰边  
绳牀竹簟新凉夜  
茗椀絺衣夕照天  
独住经句差小快  
笥中诗草与重编

新月

一湾初月影纖纖  
清浅余光照短檐  
天上玉鉤闲处着  
新凉正下水晶帘

试取三首

乍听寒衣动暮砧  
云轻河淡漏沈沈  
秋宵渐觉迟眠好  
试取冰弦作泛音

桂候兰时一掷过  
偶然独醉强嵯峨  
黄鸡白日人空老  
几听玲珑宛转歌

一枝栖借十年恩  
阶走瓜藤雀报门  
再到西华无个事  
金螯重字第三孙

题蔡方麓趋朝图二首

鸡鸣盥漱古良箴  
敢怯新霜恋锦衾  
香暖朝衣留宿火  
从来辛苦近臣心

觚棱晓色动栖乌  
中夜频传

内勅呼新出词头  
金凤纸吮豪惟待蔡君谟

从汤泉望长城

设险谋虽远劳人事  
不经万夫成白骨  
百雉入青冥迢递经岩壑  
凭陵矗日星大哉尧舜业  
荒服与来庭与湘北素存  
两先生订游盘山予以扈从  
温泉不果往

共有名山约褰裳  
惜未从子方临翠沼  
君已蹑云峯老衲茶瓜话  
深林虎豹踪凭将幽絕处  
说与未来筇

## 茅山僧二首

路入谿谿瘦石棱寒云片片压枯藤焉知古塞荒山窟犹有楞伽白髮僧

已公茅屋杳难寻但有钟声落翠岑白草满山行径絶石龕松火闭门深

## 夜坐福泉庵三首

松老泉幽夜转清蒲团火暖话无生添香正是传钟候绕殿时闻赞佛声放眼云峯千点外回头尘界一毛轻谁人肯劝归休蚤惟有山僧不世情

斗室炉温失晓眠一镫话向老僧偏浮生最是闲难得消得华清第一泉

南塘故迹已茫然閱武亭荒暮草烟惟有残碑数行字游人哦向石池边

## 读山谷乌帽红尘之句有作二首

太液冰开社日前春波摇动緑杨烟朝昏赢得频偷眼玉螭桥西水贴天

年光漠漠不相关乌帽红尘日往还无限桃花春浪暖芳汀惟有白鸥闲

## 四时诗

小阁轻陰近竹西窗间人与玉兰齐珠帘初卷杏花低避暑层轩俯激湍一庭风露洗红兰北窗千挺碧琅玕十里明湖峯更青白鸥黄叶满沙汀四面芙蓉一水亭别有轻寒处士家小窗深院曲栏斜一树黄梅蜡瓣花

## 十二月十日除大司空有作

苦思岩畔閱耕农蠖蛰禽栖一亩宫深愧衰慵无报称滥将名姓列三公

## 闻友人谈吴下园亭之胜輒仿白意二首

千堆松色压层峦一带桃花覆碧滩莫漫吾庐嫌窄小烟云林壑望中寬

岸梅交影落清渠亭榭无多致有余三十年来花下坐餐香饮翠更谁如

## 新从谿外购得南庄



旧来游憩地隔水得幽峦谷口看逾曲岚光望转宽送迎双涧绕奔绎衆峯攒好种松千挺青山梦可安

文端集卷二十七

<集部,别集类,清代,文端集>

## 卷二十八

钦定四库全书

文端集卷二十八

大学士张英撰

存诚堂集二十四

近体诗九十五首

送友人之建宁幕

严陵江路接东陲碧涧丹岩忆武夷此日秋山应待客吾家太守最能诗欲知风物看兰树难遣乡心托荔枝旧是紫阳游学地景行还与荐芳藹【太守谓颍州两如】

七月除大宗伯兼掌翰林詹事赋此

清卿三绶紫金鱼深惧衰慵报答疎折坂何堪重叱驭拜

恩双阙意踌躇【子昔从院长迁少司马】

石匣镇

古戍荒山窟烟云朔漠连沙吹边地雪峯接塞垣天龙节新恩驻鱼符故老传空城留石匣形胜忆当年

密云

远岫横云际苍茫入望平双崖分古道千岭带孤城此日虚亭障当时驻甲兵霜风吹白草犹作暮钲声曾於吕僊祠梦中得中二聯岁久忆及因续成之

芝房莲漏渐稀微髣髴高吟旧竹扉斑剥莓苔侵客户空蒙苍翠湿人衣春风浩荡兰盈把古树披离栗十围此意分明曾说与岂应长遣素心违

岁晚寄廷玉廷璐并与霖孙八首

辛苦衔泥葺敝庐画梁香壁燕雏居来年惊蛰春风晚频寄南塘种树书

圃艺新花足寄情池笼疎柳好经行从来剥啄非佳事一任苔痕满径生  
来往经过谷口居乌衣子弟爱谦虚谿边长者鬓眉古记取临流蚤下车  
长安莫道隔天涯怕听喧传轻薄儿咫尺墙东家督近端严直谅旧吾师  
圃翁生计癖烟霞藉汝频来探物华屋漏墙倾犹不惜十分珍重古梅花  
新购谿南十亩庄经营惟有种松忙春烟春雨移花日须向前山蚤斲将  
柏酒初堪桦烛明须知慈母此时情少年努力承欢处里巷人称好弟兄  
少小离家远御轮春风不见佩兰人烟波彭蠡湖边路一櫂归来最怆神  
岁晚有怀山庄八首

一林香雪锦平铺拟结危楼瞰玉壶不道十年空有愿竹鸡松鼠占高梧  
门对横塘映碧虚一园梅影落清渠每从行饭花陰里悄地来闚玳瑁鱼  
西岭虬枝偃盖团苍烟翠雨照人寒寄声隣舍贤孙子好护松楸与借看  
隔谿新墅比柴桑翠壑丹岩绕石梁别拟傍山成小径便从竹崦过南庄  
小构亭轩转曲廊方池红白水芝香行人争道垂杨好百尺青丝拂地长  
曾见公麟旧粉笺谿峦髣髴尚依然空潭片石垂云汧相国重题媚笔泉  
方壶曾往叩僊灵卜尽筵筮百不听归路只隣春枕上梦魂偏识衆峯青  
寒宵鐙火梦初亲呼我芙蓉岛上人它日谿南种秋卉明霞千片隔红尘  
除日

内直

老来何处送年华帘额薰炉本内家请看阁门春帖子一聯凤彩映宫花【凤彩句乃門聯也】

## 瘞马诗

白家骆马已长辞瘞向郊原解敝帷犹记翻盆深夜雨独乘电影过桥时

## 泽州先生见和前诗复次韵二首

彩旂清蹕远从行蹠躔霜桥夜向明在日几曾金络首空令帷盖有余情

自是平生足畏途不怜宋鹊与韩卢死生堪托由来重垂老风尘叹所须

## 遗山集中有陶渊明晋之白乐天语

采菊风期近自然醉吟犹未免蹄筌瓣香元自归彭泽谩说渊明似乐天

## 送弟梓一之粤东二首

桂雨兰香尽日吹岭南风物重相思来游正是春深後细把轻红劈荔枝

邸舍频年话遂初劝栽松竹艺芙蕖南来好作归田计稳向湖山蚤卜居

## 晚出端门诣斋所

万点昏鸦集凤城晚随金钥出承明澹烟斜月笼高树匹马空庭啣草声

## 禁中观赵松雪秋林渡水图即用其韵

古柳横谿积蘚苔飞轩正对雪波开隣翁不负寻秋约黄叶黄花渡水来

## 燕文贵寒浦鱼罾图

烟水茫茫澹益奇更添沙尾宿鸬鹚蒹葭断处维孤艇一幅襄阳孟浩诗

## 李昭道山水殿阁图

复阁重楼倚翠峯朱桥画舫碧流中令人犹忆秦川好髣髴甘泉绣岭宫

## 黄荃雀梅图

一幅鵞谿见化工雀梅小景占春风千年枝上留残雪曾入宣和画谱中

蚤过玉螭桥二首

承光殿影白波翻古栝清陰覆短垣忽见柳丝青拂地夜来微雨过西园

寒食人家插柳条水云亭畔碧波遥

御园花事春如海来往低迷玉螭桥

夏浅二首

桑叶陰浓水满池荷钱暗与落花期山樱鸟啄红珠颗林笋人餐碧玉枝香雾氤氲迷粉蝶歌声宛转变黄鹂千金难向人间买夏浅春深最好时

身逐霜蹄底事忙吾庐高寄水云乡旧营花隍三间屋新购谿桥十亩庄邨绕綠畴偏衍沃峯围紫翠总苍茫何缘却向风尘老白尽髭须减尽狂

忆秦园山茶

忆昔毘陵细雨中秦家楼阁正春风窗窗堆满梅花雪衬出山茶一树红

辛未夏至有事北郊说岩先生斋宿于冬曹南亭予斋宿于翰林蒙惠以诗即次来韵

陌上杨花水上萍人生偕尔寄青冥晓趋莲漏同双阙夜展桃笙各一厅欲问海山家更远不逢僊伯梦难醒冬曹槐?词曹月检点流光已再经【先生重领冬官予亦再掌院事】

西郊杂诗二十七首

偶随

清跸侍甘泉长得追凉日暮天夕照西山云脚起携诗吟到菜畦边

几簇戎葵绕砌开久无新雨到根荑不逢闲客怜顚顚谁汲清泉一勺来

夕槐蝉噪晚风清小径闲行菜甲生瓜架忽看新水到桃花井畔轳轳声

柳墅门前官道铺黄鸡白日听传呼诗中差见田家乐犹有苏州范石湖

北牖南荣借一亭豆苗瓜蔓叶青青老翁戽水分畦白小作潺湲亦可听

草含珠露柳含烟再展匡牀一饷眠何处人间偏睡美晓星东上欲明天  
炎风炙日剧愁予拟结他年避暑庐檐接高梧窗映竹方塘三亩种芙蕖  
西隣一径槐成幄南陌千邨柳作堆独惜眼前双树好海棠开日不曾来  
柳陰沙路入湖湾方丈蓬壶指顾间闻道

御舟牵缆处菱荷香里看西山

不须桃李鬪天斜底事芙蕖颭晚霞最是野田芳草畔一枝闲澹女郎花  
少小日长思隐几冬烘头脑意难堪一从失却青青鬓始觉人间午睡甜  
夜雨连朝入晓晴困仓从此庆丰盈经旬不到南来雁农事频牵故国情  
苍茫邨树綠烟霏紫翠千峯日半规独立菜畦耽晚色平生珍重夕阳时  
残月微凉透碧纱草根虫语不成譁阶前綠蕪戎葵叶帐底香清茉莉花  
郊垌自昔晚凉偏烁石流金首?天闻说红尘最深处连宵挥扇不成眠  
平畴一望接林臯愁见芸田炙背劳听彻檐前深夜雨青青禾稼过墙高  
前朝陵墓久沧桑石马丰碑卧夕阳底事中涓留一窟至今争踢万泉庄  
浓陰高柳蟬千树嫋綠新蔬蝶一双极目苍烟十余里远过红壁隐琯窗  
翦拂檐花秋转盛经行畦菜夕偏凉但容饱食安眠过何必林泉是故乡  
人生自昔退休难小住茅茨便足懽绕砌露葵花灼灼高眠近隔碧纱看  
星火西流节叙更簾痕新觉蚤凉生白杨叶上萧萧雨已作秋宵第一声  
秋老烟光最所耽作书频与报江南龙眠万岭丹枫色为我殷勤十日探  
一从骚雅流传後大抵羈愁与贱贫若论今古吟诗客如我犹为幸甚人  
花名金凤苦低微萱草丛中接翅飞恰似邨庄小儿女银钗綠鬓紫罗衣

青龙桥畔柳毵毵野色泉声性所谙莫讶夕阳吟望久水邨漠漠似江南

御苑西通辇道铺水田杭稻杂菰蒲千峯黛色频回首十里秋荷裂帛湖

淙淙野水乱成谿获稻人家近大堤闲过牛庄小邨落秋风禾黍瓮山西

观内府藏宋理宗不允陈韡辞官手扎真蹟

秋壑朝堂秉政初士林风节更何如当时犹有辞荣者屡降南朝凤纸书

题高子奋僧话图

庭轩新辟径三三潇洒幽偏性所耽别墅种花闲岁月寒岩息影老瞿昙  
年车骑罗双戟此日维摩共一龕若问棠陰旧时路至今垂?满江潭

寄题仪园

幽居近傍女墙斜小构林塘领物华旧圃结庐饶水石山城出郭有烟霞  
門穿翠竹葳蕤径亭对寒蓉烂漫花闻道南园佳树满许分春事及隣家【汝书许赠予花树故及之】

雨夜

暑入连朝酷凉因夜雨频西畴欣有稼南陌净无尘峯矗云陰薄烟开草树新  
郊居观物候禾黍最情亲

寄二儿廷玉兼示六侄

曲沼春流石岸平迎凉拟构屋三楹欲教飒飒清风满安得陰阴灌木成  
好种碧梧笼小合最宜修竹带高城板桥南北留闲地看取波光与月明

读李献吉集

清时万类转龐鸿宫羽皆含正始风格律尚存元气在时人莫漫诮崆峒

西郊

西郊因廬直分地禁林陰别馆晴花满西山落照深轩车谙世路鲑菜发乡心  
节序催残鬓生涯付苦吟

## 读乐天诗

放怀天地总萧然前数潜明後乐天竹石幽居伊水入霓裳法曲柳枝妍家无尘累身兼鹤诗有烟霞宦亦僊为问洛阳归老日东都宾客太和年

## 乐事

梅花带雪压朱阑次第探春到牡丹曲沼波光翻碧藕小轩风露洗红兰凉生翠竹云千亩秋老寒蓉水一滩自是人间饶乐事只应收拾到身难

## 放翁有马上时看担上花之句赋其意

斲自花畦破绿苔老翁家本住丰台担头声唤春风起郭外人冲晓露来未觉色香经宿减乍惊红紫一篮开道傍有客垂鞭立叹息乡园没草莱

## 午睡

萧萧禾稼满西畴细雨轻烟尽日秋拨火添香难遣闷开缄披卷恰生愁陰陰况复槐当午栩栩宜从蝶与游斗帐冰纨湘簟碧策勲先覓睡乡侯

## 六侄为予说社坛之胜赋此

路隔层层石子河数椽茅屋寄岩阿只因礪壑离尘远更觉烟岚入画多社日赛神宜共往花时避客合潜过三年未遂寻幽兴为问松杉近若何

## 初秋

竹牀冰簟晚凉生云净峯高露气清南去鴈鸿秋有信西流河汉夜无声看过燕乳絺衣谢听到虫吟羽扇轻今古盈虚观物理且沽邨酒与同倾

## 四儿廷 送四女于归南还

黄犊巾车蚤戒涂小年儿女涉江湖方知白傅诗中意苦爱朱陈嫁娶图

## 郊居同近公

杜曲曾夸尺五天华林况接禁庭烟峯回紫塞围千亩地近丹陵涌百泉官柳大堤偏绰约草花别墅亦幽妍何须苦忆江南北豹尾云中可判年



## 步西郊

步履农家小憩留便堪俛仰狎沧洲不嫌南陌车尘近苦爱西隣树色稠半圃芥菰迎晓露一川禾黍媚清秋却思兄弟躬耕处万顷湖田数白鸥

## 题恽南田杂卉页子七首

### 粉桃花

冰绡为骨玉为情宋玉墙东笑靥生一树碧桃含露绽人间原有许飞琼

### 蚕豆

隔岁霜苗雪覆篱新香蚕月上花瓷从来野?饶风味笋绿樱红恰共时

### 朱樱

朱果垂枝近小楼黄鹂啼过绿阴稠何人为动金铃响一任山禽啄未休

### 牵牛花

数枝紫蔓短篱东賸月残风晓露中雨过天青好颜色被谁偷入野花丛

### 秋海棠

最怜娟秀倚朱阑性洁情孤灌溉难城北僊泉那易得秋花七载未客看【北城僊姑井水灌之叶不萎】

### 蜡梅山茶

平生酷爱黄梅萼一入京华系所思温室从教帘覆地频年不见岁寒姿

### 菊花

旧谱传来菊种繁秋英端藉玉为魂麤花浪蘂寻常见谁似霜天澹月痕

### 辛未九月得小憩

清秋暇日近重阳圃菊繁英照草堂花入陶家风味好地传甘谷水泉香金盘翠羽朝衔露雪

朶霜枝夜有光此际心情差不恶闲吟终夕绕匡牀

大内观字画六轴

王右丞诸葛运粮图

蜀道苍山古驿秋雪消巴峡大江流可怜筹画劳丞相挽粟空悲志未酬

郭忠恕山水

郭外邨南石径斜一行秋雁落平沙纸窗茅舍家家竹霜树寒林处处花

易元吉深树羣獐

日暖秋林柿叶肥水边麋鹿尽忘机呦呦浑不惊山鸟红树枝头自在飞

马逵松谿小艇

幽人寻蹟水云间坐卧扁舟看晚山倚櫂不知吟歎久松风吹过小谿湾

赵松雪秋林归骑图

结屋云崖雾壑中茅亭石磴倚深松马蹄今日归何晚蹋徧秋山第几峯

董文敏麦饼宴诗

华亭旧蹟五云笺麦麩新香列禁筵要识

九重珍重意来牟最喜入诗篇

文端集卷二十八

## 卷二十九

钦定四库全书

文端集卷二十九

大学士张英撰

存诚堂集二十五

近体诗八十三首

读渭南集东篱记

放翁卜筑号东篱辟地才堪寄一枝偶种数花成小径微涵勺水即清池  
监湖上有千秋蹟劒阁争传百卷诗多少高台起华馆寒烟衰草几人知

晓起

马首东隅曙渐高回看残月挂林臯城头雾宿鸦千点桥畔冰衔緑半篙  
常管欲明怜鷁鷁漫思得过学寒号山翁自拥青缣被梦入梅花意正豪

送绥仲归里省覲二首

冰满滹沱雪未晴轺车夙驾返江城官居薇省多才誉人赋兰陔有至情  
新捧丝纶知色喜漫收书卷觉装轻天涯骨肉团圞意难听骊驹第一声

华髮丹顔本异姿飞觥遥与祝期颐会看抵舍承欢日正是加餐勿药时  
西臯竹亭应启户北山花鵑待衔卮圃翁清兴犹如昨话向林猿野鹤知

退直夜坐

拂拭东华輭土尘鐙前弄影亦天真武夷茶味如君子苏陆诗篇似故人  
更漏渐长眠觉稳地炉初暖意相亲睡乡饶有封侯乐纸帐梅花一问津

学圃斋前古梅两干蠹伤其一赋此

关心频问旧庭柯白石墙陰覆緑莎老树横斜芳径好寒花遥映远山多  
百年香色惟君在双干荣枯奈尔何牢护南枝除蠹罅春风时与拂烟萝

## 雪中再过玉簫桥

凤城晴雪晓云鲜太液清光接远天积素更添宫瓦丽凝枝真觉古松妍千林霁景王摩诘一幅新诗孟浩然他日空山煨芋火旧游记取石桥边

## 衔盃

雪拥空庭树清宵听客吟鱼虾江县味伏腊故乡心水落樵蹊近山寒别馆深衔盃难忘处梅蕊照芳岑

## 食菰蒋米

烟汀沙渚挺霜茎风味偏含晓露清自是水边饶雁膳何时采采入甜羹

## 夕归

退直人归叩夕扃西风飒飒动疎棂每惊鸦宿门前树惯看参横屋角星浊酒唤来双颊暖旧诗哦向一镫青短墙近接旗亭路击柝声寒掩卷听

## 蚤起

禁钟初歇意频惊自拨熏鑪宿火明马上还将残梦去一天风雪晓鸡声

## 送除生南还

月照空庭雪一堆寒镫相对且衔盃春风草色江南路渐向梅花多庭来

## 岁晚寄二郎廷玉

城南营旧馆幽事尔须知地僻过从少堂深课读宜柳添垂岸影梅长出檐枝看取梁间燕衔泥绕户时

## 夜坐

地接深严蚤掩扉烟钟飘渺漏声微借来诗卷添良友话到田园抵鬲归拨火自偎红兽暖翦镫还惜玉虫飞关河风雪三千里稚子音书岁晚稀

## 挽左橘亭

才华蚤与太冲俦束髮论交已白头青史鸿名留大谏谢家羣从本英流书来故国椒浆远草  
掩荒庭橘树秋最是臯比心独苦蓼莪诗罢泣从游

### 掩关

寒花抱幽质共此卷书间黯澹深炉火陂陀小研山难将双璧价换取寸心闲老去无多愿焚  
香昼掩关

### 索居二首

节近传柑只索居不将尘俗翳清虚当轩倚柱斜阳暖细读樊川伴老书【余从泽州借劔南  
集答曰此予伴老书也樊川泽州别墅名】惊蛰到来三两日谿山遥忆发寒枝剑南百卷从  
头看每到梅花定有诗

### 十四日

满几铅黄手一编山经圃史自评论狂飈不放镡花节深闭帘栊看水僊

### 十五日二首

一鑪沈水一瓯茶心怯笙歌陌上譁七载睽离何足叹年年春事负梅花

矮纸幽窗短句裁青樽红烛水僊开儿童别有謹譁乐连袂蹋歌归去来

### 十六夜

帝里韶华艳此宵凤城西畔景偏饶珠幢璧玉旃檀佛宝马香车玉螭桥有客闲情常脉脉闭  
门寒月独萧萧惟余十里梅花路水国烟邨入梦遥

### 赠天坛道士二首

久别方壶忆僊僊忽骑鹤背禁城烟丹顏漆髮还如旧回首春风二十年

书卷堆中卧素琴为予挥手作长吟曾听幽籁松阴里重卷涛声下碧岑

### 西郊和泽州先生韵

走马来西郭平明杂梦醒花邨榆荚老槐路麦田青客贯新丰酒人过旧宿亭相隣墙树近风  
叶昼冥冥

同泽州先生再用前韵

随意过兰若相招午睡醒长松深院寂高柳古墙青草没春归路花飞夕照亭客心同澹荡小  
憩亦鸿冥二月廿二日同长康过西郊法华万壽摩诃诸寺四首

野色苍茫灌木稠西山翠靄接平畴从来韦杜莺花地多半园林属五侯

连蜷邨树起春烟南陌才青见麦田最是客心留赏处清谿流向綠杨边

劫火烧残古殿空曾移钟簏上阳宫贝多十万华严字尽在苔痕蘚蹟中

石屋松陰老衲家寻幽还傍短墙斜西隣偏有间田地一顷山园种杏花

龙眠小兰若八首

释子阿

一把茅遮老衲家倾欹石洞自飴飴春风最是阳坡蚤开徧櫻桃几树花

宝山

礪谷东偏古衲栖石棱盘磴入花蹊辋川曾说辛夷隄难比春山玉树齐

师子社

谷口才过一径幽数椽僧舍小林邱入山几度抛篮輦但有梅花便可游

清泰庵

盘纒云境入山阿曾扣禪关卧薜萝城郭千家青靄合湖天万顷白云多

尊胜庵

留客茶瓜话碧虚松岑竹径爱萧疎昔来未解无生理曾钓池头金 鱼

九峯

小结香茅岭树隈东隣禪客数追陪钟声初动山烟白恰自松阴密处来

育报庵

北岭盘纡路欲迷衆峯深处白云低闲门常见山僧往庵在长松碧磻西

别峯庵

别有谿山野径遥精蓝掩映隔山椒惟闻钟磬寒烟里絶磻深林过板桥

初夏园林十忆诗

新緑

千山嫩緑晓参差踟躅初红一两枝最爱春烟初散处还怜山雨欲晴时

新秧

榆荚松花夹路齐山翁蚤起自扶犁一声布谷霏微雨水满平池稻满畦

新篁

觺觺才看稍出土离离乍见影过墙初抛紫箨青如许筠粉吹香日正长

新荷

柳下轻风卷钓丝荷钱一夕点沦漪南垞欲问花多少只看田田出水时

新茶

云崖雾岫往携筐怪底山僧十日忙緑树陰陰人迹少枳篱茅屋焙茶香

新丝

清和天气雨初晴辛苦田家妇子情秧马才看过塋迹繰车又听隔篱声

新桐

勺药花繁燕子飞碧梧铺叶?岩扉云陰澹荡波清浅緑映山翁白葛衣

新蒲

水涨南塘石岸平青青蒲叶绕谿生游鱼争向滩头浅遗子时闻拨刺声  
新莺

小合窗临碧树谿声声清啾爱黄鹂儿童莫触花铃响留取枝头自在啼  
新燕

柳外双飞燕子斜营巢新定野人家清谿曲曲皆桃李衔得春泥半是花  
澹人寄文衡山鱼邨卷子兼系以诗即原韵和答四首

柳巷蒲谿一櫂通笋樱时节落花风烟波无限新诗好尽在渔歌杳霭中  
直庐槐?日迟迟正是怀君旧雨时吟到江邨寄来句渔竿心事两人知

蟹火渔榔有梦通心如黄叶怯霜风慙予五亩湖干宅深掩梅花夕照中  
衰慵岂合退休迟齿谿头童异曩时画里谿山吟望久临风说与故人知

牡丹时同泽州先生过法华寺僧说开数朶皆为人折去惟见佛前胆罔中平头紫一枝耳越  
月廷玉书来云读易楼前开一百七十余朶因赋

小圃穠华锦簇篱春风担却看花时寻芳惟伴樊川老弥勒龕前见一枝  
送长康之姑熟幕二首

喜共才人慰寂寥客中闲话尽渔樵思君恰值秋江晚采石松风夜听潮  
人似丹青卷碧霞龙眠深处好营家期君结屋清谿上同把渔竿数落花

太液

太液莲开倚碧空南枝缟素北枝红石桥莫讶频回首恰在轻烟细雨中  
在

内直见马远画松风水月图只清古数笔而神致完备



为赋截句

隔岸松欹古涧滨挂猿枝偃最风神由来笔墨宜高简百顷空潭月一轮

题画二首

寂寂茅亭雪照帷寒梅低偃覆檐枝闲吟掉臂花陰下正是诗成意嬾时

敝庐北阜有孤亭鹤去人稀户昼扃遥忆当年鐙火地煤花长对远峯青

远峯亭倚城西北隅隔墙则古灵泉寺太霞宫旧为予游目骋怀之地长康为作此图因赋二首

吾家亭子带城偏竹隲梅窗伴鹤眠何处烟钟催月落凤山西畔古灵泉

路过西巘蹋晴沙古屋丹题羽士家最爱柳塘行不足邨烟将暮夕阳斜

长康作松湖山邨图赋此二首

两两渔舟点暮烟菱荷杭稻满平川湖山不独堪留赏下有吾家二顷田

松湖兄弟各柴关北渚南垞爱往还树接断云天接水一湖烟雨米家山

小庭秋草作花

玉簪殊有道人风月季新苞数点红豆架瓜篱尽潇洒一年秋色蓼花中

红蓼花四首

秋水滩头着岸垂和烟和雨拂沦漪红丝斗帐条条影深护鸳鸯熟睡时

江南开徧旧渔矶渔父来时欸乃微叶密乍迷青篴舫花红偏照绿蓑衣

红粟枝繁鴈蚤来竹芭篱畔托根荻喜君不恋江湖濶种向闲门也自开

寂寥门巷夕阳斜爱尔垂檐近碧纱更有樊川老居士摊书秋对过墙花【说岩报书云旧种蓼花今高出墙矣】

园花十絶句

松过百年方偃盖笋经旬日已成林闲观物理皆如此莫为荣枯感道心  
篱槿半年相代谢牡丹十日占春光园花亦有乘除数浓淡中间较短长  
重台莲藕无嘉味千叶榴房子尽酸华实由来难并美园花消息与参看  
长松磊砢意寂寂下有凌霄时自妍纵使开花松顶上憎他天性爱扳缘  
花借过枝开转盛果经移接味方甘陰阳搏掬非常事物性何人静里探

桑以饲蚕专号叶牡丹尊重但称花罗敷陌上东园里管领风光属一家【吴人称叶不称桑  
洛人称花不称牡丹】

姚黄絶世绀梅艳数百年中覩异姿说与晋唐人未识始知天地日新奇【牡丹中异品及绀  
梅千叶者皆宋以後物】

桂挺寒岩忘岁月花经暖室易荣枯甘肥不是长生药耄耄终归山泽臞  
秋花闲种倚荆篱浅白轻红三两枝雨润日暄人尽识和风清露最相宜  
梅雨经时屋溜悬闲将石瓮贮来偏花中原有神僊品不饮街头苦浊泉  
内直见高房山苍山古木图

峯因积墨皴偏古树为撑云势益强能事由来鄙凡近寒山古木最苍茫  
郭河阳谿山图

深林萧槭水潺湲古寺层轩倚碧山睡起茅斋无一事午钟飘出白云间  
赵松雪春山水合图

风流仅见赵王孙水照春山湿翠痕谿上有人开草舍杏花相对映柴门  
刘照寒蓉双鴈图

难得秋光一日闲卷书长对琐窗间羡他旅雁双栖处芦荻芙蓉水一湾  
秋日退直

庭槐经手种掩映老夫家太液西园曲红墙绿树斜  
好将半闲日对此一秋花月夕明朝是垂帘候彩霞

文端集卷二十九

# 卷三十

钦定四库全书

文端集卷三十

大学士张英撰

笏素堂诗集一

癸酉正月十一日同李愚庵励近公过万寿寺

古寺人稀藓迹重畏吾邨畔数过从半篙新绿当门水千叠奇云别院松钟卸雕梁埋翡翠桥横锦石坠芙蓉谁知湏洞车尘外犹有闲情话夕春

题王石谷画黄砚芝黄山采芝图

江南山水窟奇峭天都峰万岭落云海雪浪铺长松怪石翳陰巘攫人如虬龙闻有丹砂泉波春溶溶云际挂飞瀑寒潭时自舂吾友性耽奇登蹑资一筇猥以鸾鹤姿狎此猿鸟踪披图赏不已涤我尘 曾岭岫本吾土宵隔关河重吾与石谷子魂梦时过从

题梅桐崖洗桐图

修桐本孤直卓立真罕俦濯以清冷泉皎洁当高秋吾有君子思致足与侔雅负神僊骨日与羲皇游闭门阅洗桐视听清且幽十载领柏台浩气凌沧州纵之弥六合卷之娱一邱君家敬亭山谢李遥唱酬吾亦同此意南望大江流

题画二首

春山新雨後千巘浮晓翠白云带林麓奇观非一致谿光泛涟漪石路杳深邃中有幽人居庭轩自清閤策杖渡横桥萧然寡尘累

崇冈千仞石万古苔痕斑悬崖挺杰阁杳霭烟云间结构临空际萝薜谁能攀门庭耽静寂日对谿南山时有骑驴客来叩柴荆关

题画截句四首

平湖漠漠起寒烟一点晴峦接远天此景依稀何所似潇湘春水岳阳边

幽人小艇白云间长繫南汀水一湾  
泛出芦花应有意烟波濶处看青山  
雨霁岚光澹益奇黄莺啼处绿参差  
山翁自爱茅亭好灌木陰陰夏浅时  
苍山叠嶂倚空蒙奇石磷磷曲涧通  
自是深林人迹少谿声朝暮翠微中  
夏日直

#### 丰泽园四首

槐陰渐满柳初成白髮频年侍从情  
书卷蚤趋西苑路桑田蚤舍接华清  
秋云亭畔树交加新水新陰石径斜  
绕砌青青书带草沿谿灼灼米囊花  
家住湖天柳万丝曾随蓑笠饷东菑  
於今倏见闲鸥鹭忆杀春陰布谷时  
平田水满漾新秧酷爱温风?稭香  
愿得身为邨社长小车轻盖课农桑

#### 虚堂

虚堂十笏日栖迟绿树疎帘掩映宜  
借问山翁逃暑处一炉香篆七条丝

七月十五日

#### 召於

#### 畅春园泛舟

#### 赐宴於

#### 渊监斋退云亭复

#### 命至

#### 佩文斋恭赋八首

#### 柳陰曲磻水波平陪侍

君王翠盖行两?水花相向处轻舫柔櫓入空明  
渊监斋前水四围儵鱼鸥鸟尽忘机一牀书帙

含青靄几点亭台落翠微

自惊尘眼入烟霞圆峤方壶赏物华静日帘垂清殿迴秋兰香徧岭南花

雪肤冰液紫囊封珍果新移

御苑中万里海南曾未识眼中初见荔枝红

琪树僊葩植几丛

天家物色更谁同佛桑花绽迎朝日一朵惊看照殿红曲磴长廊石径纡许窥秘阁

紫宸居

君王清宴娱图史四壁琅函插架书

天藻临池絶世工瑶函百轴

御香中摩挲老眼窥云汉凤彩龙雯矗紫穹

亭畔芳茵藉绿莎频斟玉醴醉顔酡花凝湛露垂垂发难比

君恩此际多

题子大濠阳朴园图

我闻濠阳天下稀芙渠千顷香四围浦溆参差菰蒋暗田畴旷衍杭稻肥堤柳陰浓水禽聒渚  
苹香暖谿鱼飞风景偏宜近城郭官桥古道开荆扉中有园亭朴而野读书味道忘尘机静对  
笭簖水澄澈远听桔槔烟霏微夕阳杳靄牧笛返月明欸乃渔舟归茅檐土壁少丹垆竹椽松  
桷无雕几世泽相承勿敢坠栝橈几杖思依依石谷丹青妙海内能写平远皆芳菲乔木深庄  
夏犹浅藕花别墅露才曦安能移家老此境翦韭烹鱼愿不违一曲沧浪櫂船去水云自制芰  
荷衣

寄澹人复用前韵四首

南北相思有梦通渔庄遥寄一谿风米家画里焚香坐常在菰蒲烟雨中

衰疾惟慙退隐迟柳蒲摇落雪霜时昔年同结渔竿愿独有青山白髮知

闻道园林一水通扁舟来往趁樵风着书千卷琳琅字高咏晴岚罨画中

佳句逡巡欲报迟江南三月落花时难将烟火人间语碧树青谿寄所知

题羹湖画龙眠山庄图兼寄省斋先生【上有省斋题句】

云巘翠壑龙眠西大谿十里缘芳堤结屋同居大谿北吾与听叟相扶携幽偏最爱栗窝小诘屈不觉松阴低乐耕堂高俯平楚青蓑细雨看锄犁山容谿响入太古鸟啼猿歔皆天倪种树初成果初结怜翁委蜕归丹梯笔墨苍茫写崖谷抚卷长叹思低迷吾庐十年委榛莽清宵有梦劳攀跻烟霏月冷树空老水流花落莺乱啼寄语青谿老居士【省斋自称青谿居士】芳草自昔多乖睽小园深琐勿复道黄柏山椒增惨凄惟有六朝金粉客花时莫忘听黄鹂

积雨

不须愁积雨犹可助清吟门掩青苔路窗低碧树阴睡情欹枕熟香气护帘深坐觉琴丝缓挑铎试泛音

奉和

圣制咏金莲花诗

托迹灵峰下移根玉殿西色将篱菊掩名共渚莲齐灼灼金英满翻翻翠叶低坐看瑶草近何异蹑丹梯御书笃素堂扁额特赐恭纪十韵

寒山樗栎材昌时忝遭遇丹地蟠孤根碧霄濯清露抚躬弥悚惕承

思益惊顾齿髮日就衰迂拙天所赋粗知历世难惟识守身固生平有微尚靡敢渝尺度集木复临渊凛凛结情愫锡以草堂名

天语曰笃素龙鸾字径尺瑶光悬宝璐愿言诒子孙千龄永无斲

小庭

小庭碧树覆晴檐坐觉清阴满一帘北牖山光悬画卷南窗花影落书籤数声渌水情偏适万事浮云梦久恬白陆诗篇随意读素心于汝独无嫌

故乡漕艘至有以鸚鵡见遗者

小草幽花雨後青携来鸚鵡挂闲庭身随雀舫家何远啖似莺簧舌本轻唤起晓天窗渐白叫

残停午梦初醒不须更学人言语唇吻雌黄久厌听

夏日

浅绛怜朝槿轻黄惜露葵草花深绿院秋雨晚凉时  
几堆书满疏帘着地垂吾庐虽不广犹足傲东篱【放翁有东篱记規制极隘】

积雨有作寄廷玉辈

藉解饥劬把浊醪好将书扎问儿曹难言花港观鱼乐  
不胜泥涂策马劳柳畔小桥新石堰墙阴古木旧亭臯  
悬知荷芰香风满放屣垂竿尽足豪

闲适用乐天韵

雨过空庭槐叶碧草花开落似残春湘帘深靓稀留客  
楚簟清漪稳称身茗瀹新泉声渐沸香添沉水意相亲  
谁知湏洞风尘里别有闲情逸致人

六月二十六日

隔帘瓜蔓绿参差叶底残红三两枝此际心情最间适  
朗吟白傅洛中诗

恭赋

无逸斋诗应

令

清严鹤禁迴无尘温清时闻道法亲自昔屏书无逸句  
高斋今见

御题新

东华曙色映蓬莱满架图书四壁开

无逸斋中勤诵读龙楼正是问

安回

梦坐小楼成末二句



鹿门偕隐小丹邱琴荐茶铛事事幽屋角东偏文杏影春风吹上读书楼

### 送钱菽邕之官苍谿

才子彤庭蚤策名新携彩绶剑门行远看雪岭过秦栈近对春江绕蜀城边徼残黎劳抚字循良异绩课农耕心知伫作承明客难遣霜天惜别情

### 二郎廷玉入都定省寒夜共话遂成四章

长安节序喜团圞手护梅花避峭寒紫笋黄柑皆土物素琴浊酒亦清欢惟期孝友承家好须解谦和涉世难不觉趋庭良夜永银河珠斗渐阑干

江乡远隔重牵情爱尔惟期宝令名薄有传家青史在何妨闭户绿苔生天伦共觅琴书乐子舍相联诵读声王谢风流休漫赏久知吾意厌肥轻

汉代贤良重力田吾家迈迹自东阡长聆无逸三宗训幼颂豳风七月篇波转桔槔鸣下泽云屯秔稻熟平川绘图拟入春秋社桑柘鸡豚乐有年

桥东裊露荷千点屋角吹香竹一湾登眺每从烟树外坐眠常在落花间闲人地位仙兼佛晚岁风流水共山净埽灵台无一事肯教容易老朱顏

### 寄三女

穉女关情久别离吾家道韞解吟诗蕉窗对镜图书满纸阁拈鍼笔札随香径自移闲草木胆瓶常贮好花枝每将雅句贻昆弟话向京华阿母知

### 次韵荅澹人二首

寒蕊供幽赏清吟想夜分乡园同入梦花事怅离羣老眼耽泉石新图愜见闻雪香亭畔景把翫最殷勤苦忆陪猿鹤知君鉴此情共期锄菜老独羨买山成白髮家偏远朱顏岁屡更寒宵吟丽句邱壑思纵横

### 为澹人题梓树花图二首

文梓花髭迴异观紫瓔朱络翠云端新来频寄山中信特地移根占一亩

江邨逸兴耽红雨为写生绡一幅春自昔乐天曾有句微之才是惜花人【白诗除郤微之见应爱人间少有惜花人】

## 题澹人北墅图

种树成陰须十年等闲求买苦无策东坡此语老解事乔柯珍重如拱壁一株两株皆足豪古干擎云根覆石何况嘉树罗千章苍深杳霭幽人宅我爱江邨新草堂谿流萦抱园林僻梅花十亩雪堆庄桂丛一望天香陌松岭排空紫翠翻梓泽飞英红雨积修篁处处烟梢青孤桐岁岁霜皮白天留此境待诗人云窗润阁搜陈迹双屐平桥鴈齿斜一擢轻舠鸭头窄荷亭花埠日垂纶蓴谿兰渚时铺席水禽沙鸟驯不惊啼烟唤雨同朝夕酣春避暑虽频来曲榭高楼自畴昔天下名园数锡山老樟颠蹶成萧槭【樟树最古近闻始作】几见轮囷合抱姿交柯接叶森如戟嗟予邱壑足平生性耽种树老成癖疎梅十挺松一亩对此小巫弥气索披图如探九曲谿引人着胜殊难释自是君身有僊骨瀛山缟岭娱僊客佗日功成息肩去细把庭柯增数尺

## 春晚天禧宫看松

荒殿松风昼掩关十围苍玉古苔斑徘徊清籟浓陰里髣髴深山大壑间幽境乍容成小憩浮生未许觅长闲百泉自是频来地驻马何妨数往还

## 法华寺看牡丹

飞霰才过花信迟余寒犹滞绿杨枝畏吾邨畔垂鞭客蚤是春残谷雨时

乙亥三月六日携六郎登积翠桥北瑶华岛时野桃初放岸柳微青俯视春波得十二韵

春情苦泥人言陟瑶华岛欵段缘石磴盼睐出林杪凭高散尘襟新晴觉春晓青归花柳迟红发山桃蚤西岭隐薄雾雪峰迴幽杳夕照入龙楼金碧绚霞表中?太液池烟波自空渺纵横九陌长荡漾一舟小圆殿影差参蟠龙势夭矫【谓古栝】石桥俨虹卧钿车正云绕倚徙复移时听禽藉芳草穉子有会心笑忆湖天好

乙亥三月中旬出西直门历近郊看杏花四首

堤柳新陰起宿鸦平明走马蹋晴沙初经细雨宜芳草未觉轻寒损杏花雾敛西邨飘酒幔尘消南陌度香车悬知今岁农桑乐麦陇青青一道斜

平芜芳景日芊緜纵轡郊园意旷然雪净遥峰横黛色?归高树起春烟最怜濯濯风前柳更爱涓涓雨後泉已识闲非容易得旋鑣莫厌夕阳天

比舍园林竞物华地连韦杜总清嘉碧谿雨足三篙水红杏烟笼十亩花柳?深藏邨市古槐根高拥石桥斜留连只在城西路更访松关老衲家

柳陌春深逸兴催  
徧寻兰若看花来  
泥融颇觉谿难过  
风紧曾无客与陪  
乍听莺啼闲觅句  
不妨马逸小成灾  
万端倚伏皆如此  
苦乐相招岂用猜

### 瓶中杏花

一枝山杏破轻寒  
最爱微舒色可餐  
乍白乍红为态好  
含烟含雨欲开难  
怯当荒圃风前立  
折向甌瓶帘下看  
佗日培栽三十树  
还营杰阁倚层峦

### 题古塘山庄图

吾邑倚山麓北郭景尤殊  
冈峦莽回互土壤偏沃腴  
园林饶美箭谿涧出灵蒲  
平远复幽邃邨墟如画图  
斯地称古塘景物更谁逾  
我出宜民门掀髯顿胡卢  
言过龙眠庄佳地日取途  
山椒构书屋石子甃  
咿唔清池抱一径古木罗百株  
麦蚕抗春草稼密胜秋荼  
爱赏无已时梦境犹奔趋  
吾弟出此画景乃吴客摹  
高低路髣髴远近谿盘纡  
长吟起叹咤山灵遥可呼  
何当返征轡篮笋践此区  
寄语嘱莺花勿俾芳岁徂

### 题羹湖画册巾车归里图四首

幅幅烟绡笔有神  
斯图展对独情亲  
梧桐秋雨江南路  
容作垂鞭饮马人

拍天风浪旅愁惊  
翦烛同予住凤城  
垂白倚门归梦切  
思君着笔此时情

曾携络秀挽巾车  
碧草芳时返故庐  
今日披图思往事  
道山人又上清虚

龙眠高阁挹飞泉  
洗石移花乐事偏  
碧落僊居刚十载  
黄垆客去已三年

乙亥三月二十日过广济寺看海棠即赠天孚五首

紫綵初放晓烟收  
晴日花光倚佛楼  
犹喜马蹄乘小暇  
海棠开日得频游

谷雨轻寒欲放迟  
陰晴最是看花时  
要知喻法深微处  
拈取临阶三两枝

茗香相对日迟迟  
裊露含烟半放宜  
採取人间消息理  
莫教开到十分时

古藤雪屋已公居  
竟日掩留对拥书  
一室兰香比幽谷  
扑人最是卷帘初

雪刺蒙头顾影慚  
人间何事不曾谙  
君营丈室维摩侧  
许借蒲团学小参

### 夏日即事二首

手植庭槐渐放芽西隣屋角已堪遮虚堂谢客容支枕旧架除藤为种花小瓮赋红倾潞酒半  
瓯香碧试闽茶人生底事多惆怅地北天南总是家

春归又负故人期廿载华林借一枝隔苑树笼栖鹤地旧宫花发浴蚕池梦回乡国鸡愁听泥  
滑天街马倦骑坐对小屏帘影静此心惟许七弦知

### 题马西樵画册十首

薄薄山田种黍宜数家山畔结茅茨春秋社饮无多路翠巘疏林土谷祠【予最爱鷺湖山下  
之诗谓其得田家丰乐太平景象兹虽尺幅而山色明秀茅舍清幽林端结构宜是从祠遂作  
此拟之】

荒山古木乱云生絶磴危桥少客行思向小庵深入定惟闻泉响续钟声【喧不碍寂者泉声  
也艷不伤道者花峪也巧不荡志者鸟语也乐不招尤者隐居也举世在明昧之间无人超苦  
乐之趣】

石壁青苍插江渚何人结屋沧波间闭门只有潮声入回首沙鸥共我闲【东西梁山即太白  
所谓天门中断楚江开也石脚插波悬崖置屋实有此景当夕阳返照片帆飞来幽旷清佳宜  
为诗人所赏】

蹋尽空林落叶声寻山莫计白云程高车驷马足忧患好句多从驴背成【垂钓竿坐蓝輦骑  
跛驴蹋芒屨皆隐者之事然闻达官案头有钓艇图不闻山人壁上有待漏图试取参之】

叹息人生万事愚谁从眼底觅清娱一间茅屋三株树便可相将入画图

秋林叶落雨如丝野老何曾解别离应是前邨沽酒去山妻相送过桥时【人生天涯远别多  
由声利场中山翁离数步山妻糴子往送来迎马知离别之苦此景可画】

少小离家学闭关曾携书卷石门山青松影里看飞瀑一幅吴绡紫翠间【吾里近城瀑布首  
则披雪次则石门又次则似古山房予自幼龄从叔兄读书於石门僧舍今此庵已成茂革可  
慨】

蟹舍鱼庄秋水生茅檐相对好躬耕平芜野色青如许动我湖干种柳情【予拟於松湖新庄  
筑堤种柳为观鱼泛舟之乐斯图先得我心矣】簞簞飒飒作秋声一把香茅结屋成但得蒲  
团趺坐稳自然消息悟无生【龙眠山中有修竹一亩欲置亭於其中预作一联云俗事无如  
斯地少道心常对此君清抱此愿十余年迄未偿也】

仲子湖干蚤结庐千山飞霰放船初拥裘醉卧蒲帆急瑶岛僊人本雪渔【西樵画有远趣武  
仕特以贻予六郎廷瑒持此求书遂各赋一首於後】

## 过宛平相国园亭

丞相园亭梦忆中廿年今始蹋芳丛垂藤到地闲门入奇石如林细磴通山杏子低幽径碧海棠花亚小楼红欲知物外栖迟意邱壑由来属谢公

## 即事二首

江乡蕙草如茅贱此地千钱购一丛培护剪浇劳日夕数枝香满小庭中

连朝走马问芳丛数过城西古佛宫遗我魏花双蒂好一年春色甌瓶中

乙亥四月二日蒙

## 召赐宴

## 畅春园盖

## 特旨也?成四首

深宵剥啄啓衡门凤纸来宣荷

异恩明日马蹄侵晓出琪花丛里到僊源

苑树新成?碧条水边同上木兰桡纡回山径过双柳红紫花围白板桥

## 斯游何异泛僊槎

瑞景轩南聚物华魏紫姚黄都看徧御阑千种洛阳花远砌斜倾赤玉盘轻陰更带露华溥侍臣不管雕阑隔争看中央绿牡丹

西郭邨中有文杏高柯花时极可爱赏忽一日见操斧尽伐为薪嗟叹不已因成此诗

红杏含烟四十株才逢花谢绿陰铺无端斤斧摧残尽叹息人间有底愚

## 曲讌承

## 诏步司农说蠹韵二首

花间漏尽昼沉沉曲宴频沾感寸心秘阁同承春殿诏卷阿期续盛唐音灵池鱼戏青萍合辇

路莺啼碧树深瑞景轩南铺绮席鞞红千朵暎华簪

清波同泛锦橈连指点楼台散晓烟柳暗花明春似海山紫水带景无边竹孙蚤出逢多雨杏子低垂兆有年自是

圣恩荣侍从侧身蓬岛亦仙缘

归来

马迹归来盥漱宜焦桐便理七弦丝一帘深绿槐舒叶半榻清芬蕙满枝苦忆白家池上宅爱吟宫尹洛中诗钓船只系绳牀脚最是吾庐得意时【白诗有谁家卧牀脚解系钓渔船】四月十五日过玉螭桥望北湖渔舟轻泛有致遂成口号

荷叶田田昨夜生南垞北岸贴波平明湖风定澄如镜最爱渔舟两两轻

澹人见赠芍药赋此二首

谢家红药正当堦定有琼琚好句排昨夜春风过邻圃数丛婪尾发萧斋

四月清和芍药天甌瓶花事一镫前寻芳犹记曾游处不到丰台二十年

秋日

经旬休沐蚤帘影静虚堂江蓼疑南浦秋花爱北墙黄柑齐佛指金粟聚天香再理清桀罢庭槐半夕阳

文端集卷三十

# 卷三十一

钦定四库全书

文端集卷三十一

大学士张英撰

笃素堂诗集二

秋夕鼓琴有作

含露沐新凉秋花好顏色闲澹足高致庭阶手滋植埽迹深闭门虚堂恣偃息帘影隔尘嚣琴徽代语默古调重希声冲和满胸臆幽泉滴寒岑鸣玉响清闕岂有箏笛喧颇觉琵琶仄始知昌黎诗陵轍非琴德

乙亥六月二十日奉

召至

畅春园赐食於

渊监斋宴毕敬观

御书於

佩文斋赐

御笔书扇并红白千叶莲各一餅恭赋六章同

召者大司农陈廷敬原任总宪王鸿绪学士顾藻少詹事高士奇太常少卿励杜讷督捕理事官胡会恩侍读学士史夔庶子孙岳颁及长男侍读学士廷瓚

时和鸣鸟听雛啗避暑亭臯愜

圣怀苑柳凉生宣政殿渠莲香绕读书斋林幽地静烟霞古径转谿回水石佳惟有侍臣恩眷渥木兰舟泛到萸阶

万几临御久精勤暇日

皇情涉典坟窗度竹风弥静远帘垂花气更氤氲芸香披卷侵晨色莲漏观书达夜分水变墨池何足讶琳琅千轴尽奎文

遏云亭畔列芳丛景物人间迥不同玉蕊乍惊天上树荔枝初见岭南红雕栏鸟语瞳矐日水殿兰香澹荡风总是生成饶雨露擢英竞秀碧霄中

侍从频年忝菽林

高斋赐宴近花阴大官列饌皆珍果中使擎杯尽异珍事絕千秋荣莫比

恩沾两代愧尤深矢音欲效林间鸟难诉微臣感遇心水榭西头绕曲廊渐移花影日偏长许窥玉检来深殿争乞龙牋近

御牀屡赐

宸章恩不厌频傳

天语意非常诸臣仰恃

优容度腐草羣分日月光

自昔诗称玉井莲锦塘今见露华鲜重台异种蓬壶客碧藕奇姿太液仙餅貯荷香分渥泽舟移花影度晴川一从拜赐芙蓉阙日日清芬几席前

题石谷画册二首

平林带远山断?围方塘高原隐茅屋似我松湖庄蚤禾乱黄云新秋□稻香扁舟繫門柳处处鸣渔榔苓箬出沙渚中有鲜鳞藏湖上白髮翁结屋汀鸥傍耕渔倚先业乐志良有方顏堂曰宝穡荷柳鱼稻乡土农皆本务後嗣期不忘

幽居出林杪斯语良可赋秋山自重叠落叶纷无数空林响樵柯山腰几家住鸡声乱白云谿光暎红树寒泉落层巘疎花隐樊圃邨烟接岚气杳霭日将暮我昔扶筇时幽景屡回顾披图苦寻绎髣髴龙眠路

题石谷画截句六首

崇冈灌木乱昏鸦跨礪穿松一径斜久别苍山旧书屋石桥西畔阿谁家

天空木落万峰稠山色朝来翠欲流底事春深不归去画图惟爱李营邱【龙眠当春深秋暮



风景最佳新绿丹枫万峰如锦奇观异状不可思议二者更以秋晚为胜青松滴翠古栗铺黄间以霜晨枫柏茜紫深红照耀林壑绣岭雕岩四时之景未有能过之者】

一带横林手自栽霜晨晴日果园开欲寻栗里幽人宅须渡平沙浅水来

谿水淙淙雨後生奔巘络石爱澄泓茅亭可有幽人到卧听鸣泉戛玉声

蓬子湾头水接天荻花深处起炊烟何时蓑笠江南雨醉上湖干放鸭船【人生适意湖居为最蒲帆兰櫂北渚南垞随意所之侣游有鸥鹭之羣兼味有鱼虾之美柳堤千尺可以纵步荷渠十亩可以快游晴日则渔笛满川风雨则绿蓑在野四时之景雪月尤佳六合之中烟霞独胜谋幽居者当敬以此告之不敢自秘也】

萧萧落叶杂归鸿秋在山人澹墨中我卻置身亭子内便同陶隐听松风【乙亥八月退食之余稍有暇晷垂帘虚室埽迹杜门茗椀在傍清琴可御友人赠以岩桂数本香气塞牖海棠秋草逞艷北墙视息其间亦良快矣鳬宗以画册见赠笔墨高妙烟云舒卷遂置我於林壑中各系以诗记今秋胜事并志良友之谊於不忘耳】

寄示诸子二首

清夜联牀有弟兄梅花寒月读书声而翁旧宿荒园角击柝乌蹄霜满城

文心须熟九还丹气静神清笔路寬此日短檠无夜课何劳辛苦蹋长干

阅盘山志寄青沟上人

我昔赋行役税驾盘山下高峰逼塞门苍巘横薊野黛色薄青冥睇望弥秀冶今读羣公诗烟霞供绘写久知林壑佳益觉尘 寡树杪乱云栖石虎飞泉洒松桧翳幽径薜荔纏古瓦霜柿艷清秋风篁却炎夏言念紫盖峰依然白莲社我本邱樊人落落风尘者夙愿在名山寄诗慙大雅倘许营一龕芟茅乞盈把

饮摩诃庵看杏花便过

御果园归涂憇元福宫

西郊富兰若摩诃庵最幽自昔文藻客挈榼频来游我往扣荆关绮杏花事稠嫩蕊烘澹日絶艷谁与侔丰肌裹仙骨坐令桃李羞俯视成奇观相将陟崇邱长林笼锦幄上有烟光浮更历

御果园千树交平畴晚过元福观苦为双松留乔柯凌碧落霜干直且遘孙枝走殿角一一皆龙虬归卧发佳梦满耳声飗飗

三月十六日过妙光阁遂之慈仁寺

尚书旧迹比轻尘细草幽花巧作春犹有山僧谈往事招魂无复画兰人【妙光阁为龚合肥宗伯燕游之地】

慈仁古寺昔游频廿载重来蹋輭尘不作小诗传後辈殿台谁识旧龙鳞

初夏二首

手培蕙草绿芊绵花蒂含珠剧可怜欲令微风领香气移来帘影小窗前

三冬温室护重帷始得红兰四五枝卻忆龙眠山畔路归樵花压担头时

长日四首

长日陰陰燕羽斜树头几点放槐芽兰枝花谢堆新绿初到江南谷雨茶

小雨轻陰入夏寒拥裘犹怯近栏干关心塞北风兼雪衣上冰花浑未残

观书摹帖已全删茗椀琴丝亦放闲知有年光无处觅卧游石谷画中山

忧喜人间总浪猜好怀能得几时开莫嫌春色堂堂去红药朱樱次第来

题乔无功孝廉饷乌图二首

庭乌反哺意勤渠叹息人生未得如一掬香粳深爱汝结巢常傍孝廉居

蚤岁中年违怙恃霜天愁听夜乌声披图瞥见衔悲客无限人间风木情

入夏即事四首

斗室湘帘也絶尘春深夏浅最撩人每逢岁岁清和月芍药香中住两旬

能白能红偏冶艷含脂含露最天斜人间自有留春处手种临阶月季花

几日晴云始破寒担头芍药满长安輭红怕蹋丰台路翦向银鉶尽日看

华林西畔掩双扉帘幙风轻燕子飞手弄朱弦看红药数声清越过中徽

## 法华寺老僧赠牡丹四朵有作四首

名花百朵近书楼未省儿童解爱否慙愧山僧知好事年年相赠紫平头

花中姚魏迴无伦我昔移来洛水春今日白头方解事看花不是种花人

春残布谷已频摧含露西山蚤斲来恰是老妻斋诵日胆餅先向佛前开

洛阳鄘峙远难寻吾本江南僻县人何事辛勤求异种家园珍重玉楼春

## 年华二首

最宜珍重是年华只合芳林傍水涯药谱茶经诚鄙事桃蹊李径即吾家支分耕获凭啼鸟莞  
钥门庭付落花手把剑南诗百卷蓬壶踪迹岂幽遐

静中风味试探寻茗椀鑪香伴素桺盆蕙便堪为茂草庭槐暂许作长林非无邱壑胸中事时  
有鸢鱼物外心家在海山隣弱水久稀消息到於今

## 丰台芍药吟四首

竹篱茅舍傍清湍种菜家家间药栏独有宛平丞相圃留花未折待人看

四月薰风?复晴通衢委巷卖花声繇英尽在长安陌误赚游人蚤出城

红雪歌儿鬪粉脂南窗北牖列参差晚花珍重莲香白别贮银餅三两枝

移植城中百不成泉甘土沃始敷荣由来不解随人意小草偏生物外情

予既得前四首与弟侄同看复为予道北轩事遂成末篇

短句吟成一破顏忽听弟侄话家山北轩饶有花千朵郤在清潭碧树间

## 夏至斋宿兰省与王昊庐先生谈龙眠秋色之胜遂成长句

苦忆龙眠爱秋晚为君摹写秋山容霜浓日澹色初染林臯飒飒多悲风柏栗松枫随地有頽  
黄紫翠攢一峰峰峰相续各为态上倚碧落烧晴空此时潭水澈骨清傍?数点新芙蓉不寒不  
暑衿衣便有客有酒巾车从紫蟹黄鸡味正美青刍玉粒香偏浓俯临大谿坐盘石矫首长歔  
摩苍穹飞鸟遥衢赤城起天光绚转朝霞中造物娱人亦已甚奉我绮屏绣幄千重重

## 先农坛古松

古坛数百载石屋傍长松一松?一亩翠色撑空蒙修柯动鳞甲诘屈森虬龙幽响吹笙竽飒飒回天风班剥何所似清庙罗钟镛古仙侍天阙肃穆修仪容灵液分海渎精气通华嵩上有鬼神守下无狐兔踪我昔当壮岁敛戢钦微躬言陪华亭叟【沈绎堂先生】更伴淄川翁【高念东先生】风尘久间隔奇观欣再逢徘徊清籁起偃仰苍云封灵物邈岁时廿年俄倾中细把青铜柯觉与畴昔同惟予华髮变感叹将何穷

## 蒙赐

### 御笔临米芾长幅恭纪

圣主求宁致清宴坐拥图书千万卷省览机政日中昃典学稽文意靡倦微臣岁久侍华清讲席经帷燕常见避暑多在甘泉宫柳风槐露迎凉院几畔秋兰袞袂香阶下新荷映波茜

圣情怡豫对清流微颺不用移宫扇日挥凤纸恒百幅退笔为山墨为淀远自篆籀逮挽近缥囊玉轴罗羣彦漏痕钗脚法益奇虎卧龙跳势屡变

御笔腕下集大成俯仰千秋称独擅临摹最爱米与苏古人重见开生面襄阳野老旧知名异代遭逢数称善当年承诏入深宫落笔惊奇响春殿米颠豪放本不羈紫袍自裹端溪砚长牋流传入内府侧近龙香荷宸盼字大如椀近数百淋漓潇洒吴淞绢钟王顔柳各有态尽入豪端供结撰劲笔轩翥摩丹青奇情天矫蹶飞电珠玑万斛神采殊珊瑚百尺霞光绚念臣朝夕傍几特与疏恩及愚贱兹幅拜赐出明光宝翰煌煌倚深眷荣光夜烛蓬蒿庐奕世家珍共钦羨

## 丙子秋日直

### 畅春园

### 韵松轩即事兼呈泽州江邨静海虞山四首

西郊幽旷水泉清近接羣峰紫翠横太液疏池千涧入灵和种柳十年成承

恩数忝丹青直顾影频惊白髮生宫漏声希铃索静慵开书帙此时情

## 水云佳地敞

宸居日日朋簪此曳裾

龙御紫庭朝听政凤栖阿阁旧摊书【轩乃  
诸皇子读书之处】传餐中使过瑶岛涤砚凉波引石渠久傍星辰高处立卷帘常怯对清虚

树接郊垧入翠微不辞骑马侍

彤闱佳时载笔臣何幸

圣主耽书古所稀地近清都兰桂绕阁临秋水鹭鸥飞频来渐觉蒹葭老风露新添白袷衣

海云东望接沧溟一片秋光满

御屏雨过平芜沙路白风回高柳绿墙青休兵可望登三古垂老惟思守一经宇内羣公欣有  
托抱蓑吾欲返烟汀

眼昏

行年甲子已全周眼暗经今有十秋云外犹能穷练影镜前未许辨蝇头久知识字多为累但  
可看山百不求目力漫从寥濶费意中思制小林邱

不寐

一月愁淋底事狂新晴今始见秋光萧萧终夜还疑雨深悔移牀近白杨

见进芙蓉者

江南秋色鴈声催新见寒蓉进

御来故国祇今湖水上倚风含露满汀开

宿法华寺

倦投古寺爱庭柯积雨墙陰长薜萝砌拥草花秋蝶满檐垂霜柿暮蝉多偶从禅榻分清磬却  
梦渔竿枕绿蓑最觉园蔬有佳味冲泥不厌屡经过

题梅桐崖横琴图二首

宛水先生鬓未星高怀逸兴寄青冥遥知目送飞鸿处一片间云在敬亭

自昔题诗咏洗桐横琴又复羨幽踪祇缘古澹人相似不独吟成万壑松

七弟自平山来晤於其别时作此示之

生平宦迹未亲民重尔分符赤县人  
两字箴铭惟恺悌千村妇子待慈仁  
世间境遇安为乐里社?濡感最真自昔参藩传治谱百年棠?浙江滨

畿南百里足婆娑地僻民淳稳歎歌  
山翠逶迤连北岳河流萦带近滹沱  
帘垂官阁春花满竹暎闲庭夕露多  
家室团圞称吏隐好将休养致人和

毘陵分手隔江烟南北鴈飞已八年  
薄宦携家深念尔严寒覩面倍欣然  
关心伯仲顔俱老回首田园意更偏  
壮岁劳人须努力容吾高枕白云边

闰三月二日同子侄辈过摩诃庵诣天禧宫看松兴胜庵看杏花万壽寺看钟沿谿河归四首

杏烟吹散半成尘瓜蔓初抽菜甲新  
自惜寻春来较晚穿林犹见看花人  
【摩诃庵遇史胄司辈携酒来游】

萧索琳宫大道傍雕檐画壁久微茫  
长松深琐无人到尽日空庭发古香

微颺潜起绿陰中差与琴声古澹同  
顿使尘心消歇尽由来陶隐爱松风

兰若幽偏旧迹存松林路接畏吾邨  
小亭西望春如水红杏花飞

御果园【兴胜寺有亭俯看杏花】

即事

木芍药开春晚晚近依棐几称幽清  
正当晓月黄昏後忽听冰弦一两声  
岂是鼠翻帘幔响非关风激纸窗鸣  
朝来检点餠花朵落向渠边几瓣轻

八月过明相国园还循河至高梁桥三首

纵辔晴郊野兴賒城闌西畔入烟霞  
几家地接灵和柳一路春残杜曲花

上林余泽散烟汀丞相园林喜不局  
欲向镜中看树色扁舟移过晚香亭  
【屏上画丛竹号晚香亭】

曲曲波光泛玉泉高梁桥北爱潺湲  
谁人解向红尘外行到清谿绿树边

题石谷寒泉落木图

萧萧衆木响霜叶落秋清云中远鴈度阶下寒蛩鸣谿流漱石漱琴筑相琮琤我昔山窗夜饱听同韶讌手把白傅诗瓿泛黄菊英尽涤尘世想深愜幽人情十载谢邱樊抚卷思纵横时方坐斋堂静虑寂无营空山共今夕忆我寒泉声

### 题石谷天香草阁图三首

我家亭子傍清池初种天香月露枝老树成围应有日秋风相待廿年时

披离巖桂紫苔斑下?寒泉碧一湾悟到木樨禅定处九秋风露满空山

城南杰阁带修廊锦石垂藤倚桂坊一种清秋高洁意最宜相近是簷簷【予擬构天香书阁於小桥曲沼之南新移丛桂枝甫覆檐石谷绘图亦傍石临水若为之?也喜而赋之】

### 题石谷画米家山二首

烟螺雾髻望成堆水气空蒙晓未开我爱松湖山数点桃花新涨雨中来

菰蒲风?上嘉鱼秔稻吹香六月初一笠一蓑吾已办赏心端合傍湖居【吾家湖上有先人旧业田非腴壤独蚤禾先秋而登耕渔并作弟兄接屋而居阡陌相望有可乐者湖畔一峰耸秀絶类斯图荷柳之隈惟松独茂烟水蒙蒙乃是真米家山也】

### 题姚注若画册十一首

新购谿南十亩庄年年书为种松忙犹思坐对龙髯古闻道青梢若我长【余以辛未种松于芙蓉岛得四千本今閱七年已高七八尺有盈丈者若见其虬枝偃盖古干挈云歎咏其间亦一盛事也】

山居无事日迟迟帘静香消与睡宜有梦不离幽径外鸟声飞上野棠枝【余壬戌以後谢客山居蓬径草庵饶有幽致栖迟三载此景依然重话旧游惘焉增慨】

朔雪燕霜柳最迟采兰修禊已多时祇今玉螭桥边过才见轻黄染旧枝

枞水松湖地接连平山远渚已幽偏依稀如见金环石杨柳烟中过钓船【湖畔有石圆净名金环石】

邨市人家柳?边白鱼入馔最芳鲜慙予旧是湖干客风景相违十二年

西郭层峦入翠微石门旧业掩荆扉梅花香里茅亭外尽日空山雪练飞【吾乡瀑泉甚多披雪及似古山房皆佳兹图类继谿石门从梅花影中望匹练尤胜也时与方子东来同识之】

霜叶迎风鬬茜红我曾步履入桥东雕巘绣岭千重色半在云中半水中【吴兴小司寇笔妙天下写秋林得荆关遗法园居养高兴致益豪点染入化以十二幅遗余良不易得也】

媚笔泉香藓石奇下临千尺瞰沦漪悬崖旧是垂云泚图画依稀李伯时【余在大内曾见龙眠山庄图粉本有玉龙峡则今之碾玉峡是也其秘全庵结屋山麓前临大谿樵径当门则今之写园似之有垂云泚奇石壁立大谿中今媚笔泉罗汉台犹可想见也】

傍水穿林石径纡幽泉香草世应无相将路入芙蓉岛遥见青松隐碧梧【从写园而西山脚插大谿中於此营一径迤逦里许可得水石营回之致由此达椒园芙蓉岛极为幽僻因识于此图之末云】

荷锺朝来过野塘篱边小圃爱蔬香侯鯖百种争能似豆角新肥带露尝

布谷声中初焙茶低枝小草发红芽山禽啄向春烟里误认谿边踟躕花【黄荃赵昌作花鸟多出新意遂冠絶一时兹幅染嫩叶如花轻红可爱是春色非秋色也因咏以诗】

文端集卷三十一



## 卷三十二

钦定四库全书

文端集卷三十二

大学士张英撰

笃素堂诗集三

题宫定庵四蹟图六首

少小联裾至乐存推梨让枣度朝昏多君四海飞腾日长记书声棣萼园【右兄弟读书图】

席?秋风蹢躅尘板桥霜迹骑駉駉柴门鸡黍山东路谁识佗年拥节人【右应试北征图】

玉皇香案旧才人自有文章动紫宸静海至今传轶事泽宫莲炬似车轮【静海励澹园先生每为予言里人梦红灯二椀自学宫出其一絶大乃公获隼之兆】

车骑雍容旧井庐承欢恰称彩衣裾谁能头白双亲健笑拆红绫第一书【南宫第一时双亲俱健】

地接东华水满谿柯亭刘井旧沙堤至今槐影深藏屋犹照当年太乙藜【右翰林读书图】

左驾苍龙右翠虬飞驰河伯与阳侯使君本是为霖客手把银潢洒绿畴【右祷雨图】

小集用东来伯顾鳧宗韵

小轩晴雨爱时和乳燕新泥葺旧窝庭满绿槐供偃仰阶翻红药尽婆娑壶觞此日分毫素麟凤诸公未网罗频问故园松竹好从来乡思向人多

日长

日长睡足午陰斜犹喜经旬蚤放衙客到常听江北语帘开初见岭南花琴?古澹平沙操瓿送清芬顾渚茶亲故儿童纷满眼何妨垂老客为家

韵松轩即事前十首【有序】

丁丑夏六月同陈大司农高詹事励银台孙大司成傅侍讲学士入直

韵松轩编纂碧谿高柳紫带直庐鸟语蝉声响答清昼傍有水神祠丹楹翠瓦下临深涧林陰蔽日赤曦忘暑时抱书卷过此游衍听隔花之宫漏挹别浦之荷香率成十絶句鄙僊无文蒙诸公属和遂尔成轴念夫交游聚散事等浮云文雅风流语传他日目前随意之挥洒异时触眼之琳琅倘得归老邱樊展对于松陰薜石之间殆欧阳公所谓回顾玉堂如在天上者耶并书以记其事

一道清谿迴絕尘日光穿树见纖鳞水边石上来趺坐便是骖鸾队里人

山畔苍然结小亭数峰垂影入沧溟中涓亦解临流赏指点波心看画屏【苍然亭名】

一水一山俱入画一花一草别成春人间何处能如此更说方壶恐未真

路过平桥青嶂绕门临谿水绿陰开洞天福地原无暑况复山烟送雨来

漏声隐隐水淙淙紫玉蟾蜍碧琐窗池馆人间称第一朋簪天下更无双

栽桃种柳几多时瞥见乔柯挂绿丝爱看清陰笼碧涧抱书常过水僊祠

午梦遥惊花外钟关情水态与云容隔墙便有莲华萼清远亭边石笋峰【清远亭名】

丹棱十里路非遥橐笔连朝侍紫霄霭霭微风波上度幽兰香自

御筵飘

尘嚣不到迴幽清半日微陰半日晴忽听进水传内使柳边遥过櫂船声

弱水何如

帝子家云中飞阁影横斜我来暫作承明客便泛吾家博望槎

韵松轩即事後十首次孙树峰大司成韵

千章灌木夏陰陰秘阁疎帘发苦吟底事谿边来去鸟亦耽丰草爱长林

方塘曲抱小山岑雨过凉生一探寻便是黄荃江?景菰蒲深处宿沙禽

云馆九天铃索净谿亭六月袷衣凉微之佗日山陰去僊吏人间说

玉皇

家在枞阳秋水边平湖万顷接山烟东坡梦作仇池长福地神鱼小有天

荷裳箬笠试新裁乞得闲身驾鹿回上界由来足官府思从勺水望蓬莱【时方上章乞休】

琼苑花枝玉井莲

天家景物总清妍只应书向琅玕节留与云孙奕世传北望祁连似砥平黄皮乌弋尽销兵正宜白首为农去卧听松风梦亦清

北峰云影已全移惟有仙家漏点迟莫怪频年惊节物才凋一叶是秋时【立秋後一日】

松陰低覆云千壑莲叶香深水一湾手种庭柯今几许倦飞鸥鸟合知还

几年偕入苑东门时见云从墨沼翻

天语亲承俱色喜华亭风格至今存【此专谓树峰天语嘉其书法可继美华亭】

便面画双鹭碧莲题曰路路清廉图奉

勅赋之

精白励臣衷含情藻绘中莲香披浅濲鹭羽立芳丛皎洁心常似尘埃意已空

圣怀勤赏咏长此振清风

送高江邨侍养归里

自吾与江邨同被赐庐居禁庭二十载出入形影俱鸿才愜优眷异采绚天衢对分金凤纸偕曳紫貂瑜君独有高堂灵萱日正舒衡宇近相接慈惠资?濡一朝奏天子乞养归平湖缕陈数千言字字倾蛟珠非不恋丹阙风土爱粉榆垂白性所宜东海古名区三公抵一日愿将慈母娱

至尊动色听欲报多踣蹐子情重违拂国土珍璠璣宫端晋显秩天藻承

赐书同辈有荣庆皆言公遇殊神武靖荒服囊鞬随属车黄河青海间王事许驰驱櫜枪既以扫端拱御金铺陈情返林壑勇退谁能如五色宫云中垂绅扶板輿雅诗颂吾友出处皆师模

寄廷玉属山中疏治谿塘四首

龙眠攒簇衆峰幽四面岚光抱绿畴地胜总堪营别墅滩高无计泛扁舟须知双涧从云落好引清谿遶屋流制就木兰书画舫芙蓉深处狎轻鸥

平生爱对碧潭空幸有洪波别涧通来自长松修竹外经过石堰小桥东菱荷铺处香风满桃杏开时锦浪红从此幽栖无憾事清流曲折画屏中

曲曲何妨暎短篱还留方沼翫涟漪闲寻奇石支桥路偶着茅亭傍水湄舴艋顿添渔钓乐桔槔还与稻粱宜清渠近绕绳牀脚好咏香山洛下诗【白诗芙蓉池在卧牀前】归计无端搅梦魂十年心事北山园松杉虽短堪围屋榉柳犹存可?门移竹栽花忘岁月看山弄水度朝昏秋晴难觅登临意只盼南鸿数寄言

枯坐

槐叶凋疏纸屋明茧翁枯坐负秋晴菊怜东壁参差影琴爱中徽拨刺声舌润汲泉烹绿雪指香和蜜剖青橙故山枫柏霜初染肠断丹霞与赤城

秋日过西郊诸园晚诣法华寺八首

秋日晴郊得胜游城西韦杜属通侯水分太液波常?树接华林地总幽

北渚南垞曲折流镜中幻出小林邱为怜旧是江南客借与轻舸竟日游

杰阁长廊一径斜赤栏桥畔碧窗纱主人犹在交河北独付苍头为埽花

疎柳余花?翠岑菱荷老後始探寻最宜叠石临流看数点芙蓉黛色深

画桷惊飞锦石攢重重金碧护雕栏放翁自赏东篱趣仅得盆池十笏寛

诛茅一把也幽偏心赏由来喜自然却忆苍崖丹嶂里瀑泉飞落万松巅

还鑣得得欸僧扉恰自前邨获刈归欲问梅花消息处霜林黄叶已纷飞

畏吾邨畔旧栖迟兰若重过复几时清磬一声人出定满庭霜柿正离离

丁丑九日

达士由来爱景光最珍寒食与重阳碧潭潦尽文鳞见丹树晴烘锦幄张十载壶觞高会香九秋松菊故园荒一龕剩有垂帘地整理餠花学赵昌

## 秋窗料理瓶花四首

自叠盆山插菊枝分红间白满花甃明知老去童心在只似雕虫作小诗

万紫千红纵目宜风沙无地玩芳时昔人手着瓶花史却胜黄荃画折枝【袁中郎着瓶史】

拣取花枝贮胆瓶要兼画意与诗情最怜影落纱窗上一幅轻绡为写生

捣练遥闻巷北砧薰衣低覆水南沉经旬粗得闲中味黄菊花围绿绮琴

即墨黄伯鉴馈柏叶露

蒸露犹存柏叶香一瓶遗自海云乡朝来摊卷黄花里百沸清泉自取尝

廷瓚承

## 命致祭衡岳

手持丹诏历间关乘传真成昼锦还木落洞庭秋色好计程明日到衡山

## 题李公凯小像二首

冰雪丰裁映紫髯青莲居士本臞僊世间何物供清听鹤唳松涛手一编

天禄讐书浑未闲时闻清佩直蓬山谁知澹荡高人意常在花谿薜石间

## 窗间二首

窗间枕藉劔南诗琴比陶家有七丝莫怪经旬常埽迹偶闲难得菊花时

园才五亩半池塘?绕红桃间绿杨底事悬图向东壁安排树石搅人肠

## 吾园四首

水复山重树色连纡回樵径大谿边吾园独占宽平地翡翠屏围数顷田

瓔络岩前雪浪浮玉龙峡底碧潭幽吾园独占双谿胜引入花邨绕砌流

布谷声声唤插田雨晴新绿正芊绵吾园不用栽花看满目猩红是杜鹃

稻获场空栗里开霜轻日?鴈初来吾园最是秋光好红叶千峰锦绣堆

### 对菊十二韵

春晚复夏初天地气芳燠万卉弄颜色红紫纷满目秋深叹摇落萧萧脱羣木隐显各有时物理重往复何来絶世姿东篱见丛菊灼灼紫蒂披粲粲金英簇轻霜湿华滋寒月照清淑晚蝶恋低枝余蜂领微馥色正格愈高体腴气弥肃造物娱寒士藉以媚幽独编荆作小圃覆泉为甘谷选取落英餐快展离骚读

### 丁丑十月既为皜亭记涉园图再题小像二首

坐?高梧倚桂丛读书味道日春容知君抱膝微吟处意在玲珑第几峰

千树松杉十亩筠海山佳地更无伦但能收拾楸枰後便是蓬壶深处人【图中画奕方罢】

### 忆松湖用东坡先生游孤山韵

桐之阳有松湖杭稻再熟佗地无松岭归樵相伴侣烟波纵櫂闻歌呼弟兄於此居其孥千树桃花春自娱杨柳覆门沙路远芙蓉园屋槿篱纡埠有扁舟庄有庐北渚南垞隣不孤红紫牵风足莲芡芳薜出水绕菰蒲世业遗自先大夫岁收百斛度朝哺鸣榔举网鱼拨刺不羡笠泽渔家图吁嗟此地乐有余十载归梦空蘧蘧尘网固结谁能逋境幽笔拙难为摹【东坡先生叠此韵四首思致高妙一再讽诵触湖山之思遂次原韵布鼓雷门之谓知不免耳】

### 冬日二首

埽地焚香一事无人间何地不方壶莫嫌春至无消息绕坐绀梅十二株

静拂冰弦思转清海南香里月三更无端窗外寒蛩歇应为平沙拨刺声

### 蒙

赐哈密瓜条味甘芬乃工部侍郎常绶携回者

西域新回使者车司空风景话流沙从来蒟酱无人识拜赐初尝哈密瓜

### 即事三首

年来性癖武夷茶风味温香比豆花融雪烹来忙小婢故应清兴似陶家

地鑪温室障蒲帘雪後曦光照短檐諫果拈来成一笑何时瀼尽始回甜

千年古栝承光殿一派寒林太液池人在金鰲桥上望满天风雪散朝时

？室中满置盆梅用东坡先生韵

疎枝寒蕊忆山村冰礪冷落幽人魂迴隔江云不可见蟠根矮树同朝昏研山西畔书幌侧交柯接影成小园瓦盆拥雪土常润地鑪宿火氈微温深夜相将炳明烛清晓乍喜迎初噉梅花诘曲居？室何殊方朔栖金门但能朗诵陆子诗不须更与醺一言计日春风花烂熳为尔满注花前樽

丁丑十月疏辞兼管翰林院詹事得

俞旨

起居注史殿西偏占领水街廿五年今日拜辞文石陛好将凤纸付时贤

白首儒臣典缥緗绦纱弟子尽琳琅种槐幸得依刘井佗日清陰满玉堂【予种槐於翰林凡十八株】

秩宗清重愧吾衰紫绶三重占凤池解郤只鱼何色喜笋香花落是归时

题翁康饴麻衣负土图

迎养京华翟茀荣花时常奉板輿行画图偏写麻衣泪知子含凄无限情

寸草春晖事惘然白华难补泪涓涓怜余蚤岁悲风木菽水输君五十年

文端集卷三十二

# 卷三十三

钦定四库全书

文端集卷三十三

大学士张英撰

笃素堂诗集四

山居幽事戏拟右丞体三十首

居傍幽巘石屋四面青苍削成才见峰腰雨过忽看松顶云生

近对层峦飞瀑匹练高悬翠微空谷凉风乍起满林烟雨霏霏

日?波平鸥泛谿清沙白鱼游一叶随风上下桃花流水扁舟

近柳依松小阁下临千顷湖平卵色青天雪净鱼鳞细浪风轻

四月园林笋茁村翁未觉寒酸十日苍龙解箨顿添碧玉千竿

别有幽人鼓吹桔槔声转清渠烟外歌随秧马柳边铎响柴车

秋浅栗房未老花稀莲子初垂挹取荷盘晓露煮来香沁心脾

赤脚婢能执?苍头仆解耘田水碓自舂香稻鱼梁偶得谿鲜

香雪深藏梅隄一林寒蕊开迟客梦不离西巘春风先到南枝【香雪草堂名】

樊圃浓沾晓露屐痕谨避新蔬采摘频扶豆架满携自执衣裾

静对松间绿绮琅然字字清圆乍觉松风吹去此声不在徽弦

岭上寒松天际乔柯夭矫披离一面迎风凝【去声】雪玉龙千尺尤奇

春暮千山染绿无边香气吹温几树桃花似锦柴门蝶闹蜂喧

最是秋容髣髴艷枫赭柏紫云铺锦幄龙绡十里人间别有清都



曲径潜过深绿小亭尽绕修篁不用频摇团扇陰浓地湿偏凉  
此地泉甘土沃人稀市远无譁黄鸟啼残柳絮白鸥睡稳苹花  
疏瀹双谿绕屋兰桡桂楫新成曲曲皆堪小驻芙蓉百丈花城  
历过鲸波千顷占取龙眠一峰曾记东坡好句白首新栽万松  
藟苔花时酒盏遣驱愁绪诗瓢把卷看松白昼焚香听雨深宵  
身世啓期三乐景物春秋二分花落一帘红雨稻香十亩黄云  
高下林间石磴蕙兰手种千丛香气氤氲巖谷花时跌坐其中  
雪断堦前履迹茅檐低接疏梅梢桡煨香满屋新得隣家芋魁  
结构小亭洲渚四围徧植新柯一櫺绿谿深入梨花低映春波  
磊块全消胷次忧烦不挂眉端甘脆芥松霜味清芬杞菊朝餐  
小楼高峙林杪面面窗扉洞开岚翠云中涌出雪涛天际飞来  
湖畔先畴二顷弟兄老学躬耕笠泽挂帆春雨洞庭横笛秋声  
竹鷗鸦催蚤起薜堦鹤伴闲行底事花陰伫立儿孙小阁书声  
爱看一犁春雨家家尽力农桑黄犊乌犍俱雅绿蓑青笠皆香  
春半杏花司令轻烟细雨佳时自是神僊丰艷粉腮微透胭脂  
石磴遥通水榭小桥近接筠廊垂柳袅娜波面藕花千朵银塘

### 严寒自遣

严寒小阁掩书窗坐拥珍裘旧驪驪藉释冰花烘?砚自浇梅蕊试温汤茗香澹泊消长夜妻子  
团圞话故乡我本疎慵粗解事六街风雪看人忙

### 夜坐

北风号庭槐声撼纸窗急小舟芦荻中万顷波涛立微疴得小憩譬彼虫蠖蛰梅花温室火谨避严寒入书卷亦高阁琴?且什袭心如澄潭月趺坐数呼吸眼光牛背上纸帐夜熠熠

### 和内人【时建兰作花】

故园芳径入丛兰惟有归田事最难近得乞休消息好应知喜色上眉端

香满疏帘玉镜台谢家庭畔紫兰开清吟正对名花发此际思君日几回

### 为内人书扇

谢傅庭前咏雪情敛华尚朴避才名孙曾满眼看三辈福慧双修自隔生紫綵重沾鸾凤字青帟不饰佩环声佗年鹤髮相庄处竹径荷亭景最清

### 送严州太守蒋受祉

黄绶新恩出九重富春江绕郡城东一楼画角丹崖里十幅蒲帆翠霭中竹马此时迎爱日羊裘终古振清风千峰题句今存否为访元英与放翁

### 廷瓚以祭告衡岳毕还里正值庭梅放时

燕巢营构十年余自种缙梅绕敝庐湘水人归霜落後萧斋花满雪霏初山中春晚园官报陇上香浓驿使书兄弟巡檐同索?题牋莫遣信音疎

### 下直

下直得小憩重云欲雪时拥被木繇?塞户蒲帘垂焚香古铜鸭瀹茗小花瓷江梅十二株结蕊抱寒枝温室火力微使我花信迟蜡瓣有奇馥坐久闻希夷思浅无杰句聊复成吾诗

### ?室中门人赠杂卉二首

温室垂帘气蚤融绦纱弟子馈芳丛最怜梅萼寒香里卻讶桃花朔雪中素壁夜添孤干影冰弦晓暎数枝红黄柑绿橘青铜镜位置聊同六一翁

村落移来纸阁藏不知鸳瓦有冰霜交枝乍喜花围坐繇艷惊看雪照堂古鼎温汤匀面粉地炉新火返?香从来不似江南树明月清宵影过墙

### 冬日即事八首

一鑪沉水一甌茶犹觉寒城暮柝譁老我乍闲情味别抱琴清夜向梅花  
绕榻寒葩影自横七弦手和若为情惟慙心腕多尘思难觅幽泉落磬声  
水僊花发点青莎但觉琼林姊妹多翦烛摊书良夜坐居然邵子有行窝  
狐腋为衾雪一牀三朝晏起味偏长小窗嫩日烘帘影无限春情泥海棠  
深护残香镇掩关手培寒蕊暂开颜长安声伎足豪侈斗室应无如我闲  
时逢休沐宜高枕书杂真行续矮牋要看孤烟紫岭岫鑪香移近研山前  
山妻颂佛礼精幢老我晨寒倒玉缸埽地焚香清福具况兼花事满晴窗  
儿返江乡雪正霏小轩琼蕊映堦墀到来甫过传柑节犹是梅花半放时

戊寅正月四日书阁即事二首

隔岁春还解沍寒名香珍茗足清欢齿衰自合思归剧滩急从来索退难琴按七?风月好花围  
四壁海天寬老妻翫歇缝裳手相对闲吟话夜阑

人间万事重循还识得应须一解顔薄有诗篇难免恨既叨圭组岂能闲四时佳卉徵瓶史数  
点危峰指砚山倚徙歡歌盆树侧也同邱壑任跻攀

一室中置寒花十数种几无坐处二首

碍履牵衣一室中深红浅白列芳丛盆花位置求安稳不独儿嬉笑放翁

交柯接蕊锦成攒煖室牀前十笏寬但可一春花事足从来容膝易为安

再叠尧峰山字韵诗六首

生涯晚岁卷书间怕听车声酷爱闲但得梅花香里坐闭门何地不空山

茅庵窈窕白云间药插渔竿廿载闲叹息人生何处老水流花落是家山

地鑪煨火小窗间催迫桃花不放闲争似春烟春雨後含情含态夕阳山

总是尘劳塞两间何人肯放此身闲惟余老子痴顽性隐几时犹梦故山

樵路烟村杳霭间松陰十亩可闲闲芙蓉露落臙脂港踣躅花开锦绣山

六街鐙火五云间笙管撩人苦未闲老我深宵对香雪儿来听话旧谿山

纸阁

纸阁蒲帘乐事賒探春梅萼两行斜居然香雪园中叟日日牀前埽落花

自题圃翁瓊笠采梅图

紫罽裁衣古夫须制笠寬近家营小圃别墅占幽岫晚岁情何寄梅花性所欢甌瓶一枝雪常共尔清寒

前岁种蕙草盆中今忽作幽兰五箭

杂蒔羣芳娱老眼喜看蕙草忽成兰离骚九畹分明别物理迁移欲辨难

曾孙牛郎

闭户那堪过社日弄琴聊与送梅花茗香之外无多事持抱曾孙一笑譁

春半

太液冰开绿渐匀杏烟轻笼

帝城春燕来絮语如归客花落愁怀似别人乡梦有时吟短句游踪无地蹋香尘祇今松岭樵歌路回望隣家木笔新

所愿

称身轻絮葛傍宅小园池弄水度朝暮看花纪岁时破闲聊展卷适意偶成诗茗餌余生足鸣琴理钓丝

清明二首

闲门插柳柳丝轻忽听儿童笑语声澹染麴尘才有色看来未省是清明

春风先入紫泉宫地湿林暄气蚤融昨日园官报行在山桃远寄一枝红【时】

【驾在五台将归园折山桃一枝寄行在报御园春色】

清明後二日西郊书触目二首

御园烟柳绿初匀韦杜城南别作春  
泽泽土膏移树日涓涓泉脉灌花人  
锦鞢细马纷驰道画毂香车动輭尘  
差觉故园风物蚤满枝红雨正芳晨

逶迤官道井干边借得农家屋数椽  
平楚乍看开曙色远林微觉动春烟  
喧蜂蝶莺犹澁时过清明柳尚眠  
检点吾生多幸事独伤容易掷流年

寄廷玉二首

驰书频与报山阿为我殷勤护旧柯  
乔木数株非易得新花百种未嫌多

曲折长廓可隔尘花篱编葺藉霜筠  
不须红紫堆三径但满清陰便可人

拟放翁闲中富贵

酣眠饱食任从容忧患危疑百不逢  
曲径萧疎穿万竹小楼苍翠压千峰  
蜂喧桃李衡门?鹭宿芙渠镜水溶  
散髮浩歌天壤内端知不爱酒泉封

蚤起之西郊

投枕近来增懒慢趋朝未许遂疏慵  
檐前斜挂昏黄月烟际遥开断续钟  
呖语婢贪春睡重迟鸣鷄怯晓霜  
浓阑干北斗低垂地无数轮蹄陌上逢

廷瓚新购北园赋此

吾乡北郭枕幽峦新购园林十亩寬  
曲沼波光浮檻入层巘石色倚阑看  
长松围屋将百挺好竹缘谿邵万竿  
佗日扁舟载茶具栽花弄水足盘桓

读放翁诗偶成四首

石帆山下禹祠边醉叟嵯峨二十年  
健笔高怀逢胜地尽搜清景入诗篇

遗编近代始流行照乘珠光万斛倾  
人在海山端不死水沉一炷荅毛生

挽强没羽本天才煅练诗篇老不衰  
夜夜神光生帐底固应奇句逼人來

憂玉敲金字字妍丹青画出閩風僊乐天七十詩懷減輸郤龜堂十五年

## 四月郊居二首

郊居端不負芳晨滿眼平芜柳色新近欲移房傍僧舍海棠雙樹苦留人

叶密何須錦成幄月明不藉玉為缸路人指點予栖處一樹梨花暎紙窗

## 送八弟之官咸陽二首

鴈序初銜一紙書老親暮齒見懸弧間關南北分棠影家世清貧少木奴薄祿一官多荏苒征  
塵十載總崎嶇終南黛色華林樹沃野秦封豈盡芜

晴郊驪唱別青門遠度函關憶弟暈日落西風吹渭水雨餘春草徧咸陽新豐舊店山川古漢  
代遺民里社存屈首微官師柳下循良冀爾蚤飛騫

## 題陳廣陵扈從北征圖八首

書生遙控鐵連錢隊入黃沙萬幕烟却笑龍門夸縱覽止從域內見山川

絕徼纖塵迅掃除羶裘君長拜穹廬

聖人神武清沙漠才子高吟在屬車

鄒枚筆札奉傳宣金風時分五色牋撰就鐸歌天上曲夜深待奏幔城邊

六軍萬騎陣雲屯豹尾清班不動塵盧橘江南傳塞外旌門拜

## 賜及儒臣

夢入烏孫天外磧手扞青塚路傍碑龍沙柳色榆關月親見唐人出塞詩

明駝寶馬翠雲裘羽箭雕弓賦壯游謾道詞臣無武略佗時孫子美兜鍪

春風三月歷秦關豹袖貂褕往復還京洛黃鸝啼柳絮雪花如掌是天山

鵷鵬健翮氣摩空鸚鵡隨飛度朔風【時廷瓚亦同扈從】為恃深恩忘遠別翠華黃幄紫雲  
中

### 题王石谷骑牛还山图

石谷山翁旧隐沦京华游迹动枫宸汉书一卷归吴苑挂角於今见古人

### 西郊漫兴三首

睡残过午日偏长欸段闲凭一徜徉闻有郑花开数亩畏吾邨畔小南庄

家家红药满畦栽土屋笆篱一半开偏我看花逢骤雨风恬日澹不曾来

沧波弱水本难求井谷蹄涔亦少休便是唐人小三昧四隣新绿一园收

### 题房师总宪蒋公趋朝图

威凤在朝阳揽辉听啾鹓巖廊登国珍光气仰璜琮吾师社稷器岳渎生钜公大贤应昌期万类资帡幪蚤年盛文誉言陟蓬莱峰天衢四十载事业夔与龙持宪肃百度精白殫寅恭纲纪佐清宴元气日龐鸿鸣珂紫霄上垂绅清露中举朝多後进敦硕推宗工幸生桃李蹊长养藉春风恒陪玉阶躅泰岱瞻仪容

### 六月九日移榻郊外

### 暑雨气蒸溽城市探汤如

圣词降温藹凉爽来郊居树色洗浓绿葛衣上簞舆草露未全曦呼吸皆清虚柳下欸旧扉老圃正挥锄禾麦过墙青瓜蔓走堦除埽地焚苍术餽粥烹新蔬蝉吟晚嘒嘒蝶梦午徐徐饱食复酣眠生事欣有余但许长高枕何必非吾庐

欧阳文忠与韩子苍约五十八致仕踰期七年而後践言寄以诗人事从来无定处世途多故践言难谁知颍水闲居士十顷西湖一钓竿和之曰

乐天未老分司去嗣後高人接踵难践诺断然先永叔芙蓉谿畔一渔竿

### 题梅渊公画册三首

物外人宜放眼寬一枫一栗足盘桓小亭望里无多景秋水平湖鸭嘴滩

攢峰叠岫入烟鬟李杜相逢饭颍山澹墨写来空翠滴矮笺何意见荆关

笔端何处着纖尘絕壑幽巖足鬼神貽我黄山松百尺祇今常忆敬亭人

## 郊外杂诗四首

曾经宿处认柴门流水潺潺绕断垣几树胡桃遮矮屋米家画里雨中村  
遥闻钟漏隔华清卻掩残书对短檠树暗荒园深夜雨寂寥能使道心生  
雨余凉月傍林明触我空山静夜情稍觉未忘尘世处微嫌墙角度车声  
西山雨过乱云飞櫺叶吟风暑气微返照斜临禾黍外一川苍翠上人衣

## 题画

风恬日?物华新树色岚光正暮春柳絮香飞啼鸟路桃花红暎荡舟人枳篱芳径多闲客茅屋  
青山远世尘自是昇平饶乐事歌衢击壤尽尧民

戊寅夏日郊居浹旬四郎廷 以养疴城中不能从书此十首与之

## 承

诏传温语追凉郭外风借居青樾馆却傍紫泉宫榆柳千村暗蓬蒿一径通经旬宣唤少吟卧  
绿陰中

西郊今鄂杜谿水独潺湲石濑新荷浦泉源古栝邨引流先奉御分????各为园处处芳荪遶余  
波亦

## 圣恩

断垣苔藓绿樊圃称幽栖柿叶当窗密瓜藤映户低雷声殷树北雨脚过庭西微觉惊残梦黄  
昏度马蹄平生憚拘束潇洒爱园居但有林为径何妨草结庐心同黄鸟乐意向绿陰舒晚食  
甘葵藿斜阳看种蔬向夕微凉动宜人理素琴平沙含古意流水识乡心幽籟生松壑清风过  
竹林疎慵近书帙聊此托长吟桃笙卧复起庭树影交加清露开帘重明河带月斜寒螿下  
语茉莉枕边花莫漫高吟歎中林有宿鸦睡起过亭午闲吟白日斜蝉声千树柳凤羽一丛花  
野客遗红藕隣僧馈紫筍身心安稳处幽事亦堪夸叔度来东郡相过避暑时梦同风雨夕话  
尽海山奇竹榻闲搜帙花陰静覆棋佗年浮渡约江路有前期【时即墨黄元美来访】

云气横西岭峰峰入宵冥郊原经雨足禾稼接山青白水分畦看寒泉汲井听渐知秋色近花  
底见流萤华藏何年寺松陰白日寒平生贪种树难得一株看皓质凌霜雪清音比凤鸾风尘  
欣覩此莫讶久盘桓



## 同元美过法华寺

园居苦炎蒸，驾言适招提。村过槐柳侧，路入禾黍西。老僧坐井栏，童子方灌畦。为我摘新蔬，炊菰复糝藜。移牀入深松，地湿林影低。殿前鸭脚树，高与云峰齐。白松有奇姿，肤香如柔荑。竟日饮空翠，使我野性迷。不觉曦阳度，但闻蟋蟀啼。惋惜日中去，未及林鸦栖。

## 避暑信宿法华寺四首

酷烈今年暑，殊非老所堪。幸能辞襜褕，暂许伴瞿昙。古屋青萝径，深林翠葆庵。竹风荷露好，斯际忆江南。当昼困炎暑，云峰矗目长。忽闻庭树响，顿觉客衣凉。蝶乱风翻草，鸦惊雨过墙。天工真老手，搏掬等寻常。薜萝延晚步，莲室爱西偏。蝉噪喧逾寂，松阴老更妍。微凉三伏雨，空翠一林烟。未遂麇麇性，吾生意惘然。畏吾邨畔寺，中有牡丹枝。珠颗榴房坼，霜林柿蒂垂。瓜蔬留客美，泉圃寄花宜。十载归田思，唯应老衲知。【予尝寓花于僧圃】

## 文端集卷三十三

# 卷三十四

钦定四库全书

文端集卷三十四

大学士张英撰

笃素堂诗集五

白鹿

呦呦山鹿本僊姿瑶岛分辉物色奇月皎细寻眠石处雪深难辨入林时芝衔五采身偏淡玉琢双麕影共随瑞应由来徵孝德同游鹤禁有光仪

园居

圃事吾麤习相看情易亲园丁三伏苦菜甲四时新插架瓜藤直分畦水泽匀寒菹稀更好采摘不嫌频

小憩

草径园三亩烟村树几行窗间闲帙满花底素琴张暑退睡方好泉新茗益香古今难适意小憩便清狂

读东坡耕种诗有作

子瞻谪黄州终窶艰釜鬲力耕求寸壤不敢厌墁墁荷耒来东坡乘春自垦辟荒涂翦荆榛枯井搜瓦石好雨渡江来顿使土膏泽先生善言农夙本农家客线 铺秧青棋局分畦白夕上露珠圆晴飏风叶碧留连移我情置身在疆场古来贤达人遭逢多困厄老以东坡名永言志畴昔谁知千载後声称常啧啧

戏拟放翁四首

陶令情怀亦爱庐况兼碧巘绕清渠细春香稻珠难比解箨新萌玉不如帘外花枝留语鸟水中山影衬游鱼长吟高卧真成懒乱叠鸣琴与素书

万叠青山一水横宜来此地学躬耕谿花尽向堦前转云叶多从栋里生秔稻年年观获乐子孙世世读书声令威千载人间语竹隴松坪尚有情

碧绕钓矶新涨色绿侵书幌古苔班堦前依柱多生竹枕上推窗即见山诗思斜阳高柳下琴声流水古松间茗香尽日无人到自昔应无如此间

公麟旧迹久微茫新压河流结草堂紫翠山烟迷鸟道碧空云影动谿光闲中尽味琴书乐蚤起贪闻草树香莫道总无人迹到樵歌归路意何长

### 读放翁诗有作

我读放翁诗为翁纪岁年石帆山下钓鱼船水满江湖诗满天高吟禹会窆亭前醉倒秦皇酒瓮边一字一句清且妍翠屏千丈落红泉岁开九帙方翩翩骑驴蹋歌邨市眠蛇年秋风梁木颠作诗四百七十有余篇枌金戛玉犹铿然兹事古今谁比肩頰首称曰诗中僊

### 暑中自适

溽暑不成寐盥漱拂晨起初阳射东林林间日华紫邸舍辟轩窗移牀绿陰里园茗发陈香井花汲新水随意抽书帙信手弄宫徵听蝉过柳枝看蝶抱花蕊綌衣午还卸豆粥晚偏美我本入世人触暑分应尔经旬少公事暂许谢尘滓陌上垂鞭客陇畔荷耰子视余俯仰情所获良独侈诗成一再咏凉飈满窗纸

### 远望

远望起墟烟闲行看汲泉雷声飞鸟外雨足夕阳边暝色催归骑凉飈歇暮蝉但将清兴往随处得幽偏

### 却暑

延爽苦无地却暑在忘机静坐展纨扇凉风生葛衣游心深竹磴结想古苔矶万木萧萧下清泉落翠微

### 听道上铃声

賁送封章一骑尘墙西輦道是通津铃声陌上无时歇老尽人间名利人

### 秋雨

秋雨驱残暑园居客思迷地洳苍藓滑林湿绿陰低聒喜听蝉歇闲容伴燕栖焚香欹枕处未觉景凄凄

### 与弹琴道士曹天全

花时蹋破紫苔斑物外幽人数往还腕下泠泠寒礪水月明常听古松间

不独闲心付七弦辞家出世合求仙前生应是王乔辈熟读黄庭正少年

偶作

东西路自岭头分日落归樵隔水闻差可引流还种树尚慙抱犊与梯云近移密竹巢鸠妇远作平沙引鹭羣为爱明时归校晚不辞人诵北山文

即事

閱尽人间角逐場老怀惟觉便农庄摘来豆荚羹汤美糝借荷花饼饵香

高人共有名山愿七事难兼李习之话到芙蓉溪上路略无余憾复何疑

忆山溪

一叶轻舟泛木兰随风流过落花滩人间何地无谿水难得千峰落影看

暑中读钱考功山中诸诗

节过新秋暑益奇浑无风动绿杨丝欲抽书帙消长日赖有钱郎清婉诗

题孙式如

赐扇

素箴湘筠巧制裁花陰半展月轮开凉飈不是寻常爽分得清风

鹤禁来

扁舟

一水千松照落霞晚风徐引钓丝斜何人得似扁舟客?绕芙蓉万朵花

暑中

尽日密林蝉叫暑忽闻高树亦吟风荒庭雨过琴丝缓万籟盈虚一气中

## 暑中过法华寺

频过兰若觉幽清老衲茶瓜世外情  
风透葛衣消暑气涛翻松籁作秋声  
餐分斋鉢神偏爽息数僧牀体倍轻  
亭午氤氲成小憩梦中犹绕豆花行

又

绕砌幽花镇日开为依老衲重徘徊  
上书若遂归休志相订禅关一宿来

枝干扶疎色莽苍挈云老树发新香  
佗时暗数曾游处殿角霜松不可忘

禾稼新秋雨复晴篮舆白葛晚凉行  
清谿曲抱城西路高柳长堤似掌平

## 戊寅中秋

秋来景物更谁同置我清陰翠靄中  
桂露夕溥穿树月兰香朝扑卷帘风  
琴含宫徵闲逾好诗继陶韦澹益工  
蔬食何妨坐良夜八关聊拟乐天翁

## 高粱溪上行

高粱桥北舍车行十里新堤輦道平  
夹?柳翻溪影动连朝霜落水痕清  
聊同濠濮邱中想小憩沧浪物外情  
安得扁舟南涧曲枕蓑欹桨钓丝轻

## 寄木厓八十生日

千尺松乔倚赤城江天南望若为情  
喜看硕果留丹嶂赖有灵光矗太清  
报荅平生应大耄折除官爵是才名  
漫言人是邱园客百卷文章已盛行

皆响亭边列嶂悬一觴一咏即飞僊  
松风高躅陶弘景耆旧新诗孟浩然  
题徧小桥三径竹花围别墅一谿烟  
楷模後輩谁能似名噪骚坛七十年

## 少宗伯韩慕庐蒙

赐御书笃志经学匾额恭题于後

大雅荆榛谁埽辟常洲韩子独穷经  
高才跌宕倾流輩健笔清疎写性灵  
激赏自应承紫綬宠颁曾见出青冥  
玉堂飞白同千古室有荣光炳日星

## 题画

初春山色蔚蓝烟才见涓涓雨後泉欲试单衣相称否谁家亭子杏花边

立春前一日

匡牀戢影倦轮蹄枝比鷓鴣得稳栖卢橘双悬书幌北绡梅丛发砚山西茶烹活火吹鱼眼炉  
剩余香煮麝脐明日故园春信蚤咏花轩畔酒堪携

董华亭书清福吟因其意而广之得三百字

试语世间人何者为清福我有一顷田乃在北山麓峰攒紫翠殷路遶幽潭曲阳坡景物鲜平  
畴土膏沃清流贯其中波纹净如縠逶迤桃?红环抱松堤绿高敞杏烟亭杳霭梅花屋傍砌一  
池莲沿篱万竿竹奇石卧幽花古藤挂乔木门径接陂桥庭轩称凉燠风月四时佳莺花终岁  
续中有白髮翁萧然常野服闲情托鱼鸟忘机友麋鹿焚香坐清昼扶策纵遐瞩目不离烟霞  
手自艺兰菊鲂鲤一竿取秔稻八口足鸡豚法王政场圃仿 俗诵读课儿孙耕耘问童仆晓  
林鸦唤起晚窗鹤同宿祠古四先生陶白与苏陆松籁杂琴声花飞乱枰局有时泛扁舟枕籍  
书一束船尾挂酒壶餽飮罗果?荡漾随春风鸥鹭行相逐驻楫芙蓉湾系艇簔笠澳划然发长  
啸幽响振嵒谷手拍洪崖肩高踵王乔躅耳不闻喧嚣心不惊宠辱乐且不自知忧从何处触  
倘肯从吾游焉敢矢弗告

小寒日梅放一枝

百计求闲苦太痴烂柯聊且坐观棋麝脐香?琴三叠鹿角霜浓酒一卮温室帘开新月夜瓦盆  
梅发小寒时冥鸿斥鷃无穷事一任天公更不疑

题友人姬侍图

犹见当年顾虎头子安潇洒水亭幽金铺特典图书地玉砌高吟殿阁秋惟见趋陪霄汉侧岂  
容闲入燕莺俦何妨写出婵娟想宗炳溪山本卧游

己卯元日梦奇石幽泉之胜五更不寐赋此

梦里茅庵景最幽荒山僻径小林邱屯云怪石当轩倚溅雪飞泉绕树流苍藓间堦逢老衲盘  
涡深涧见文僮山童捧出桃如瓮髣髴西渠与共游

小室梅花自冬徂春未谢

小窗腊近火频催绿萼仙姿绕坐开看过天街镫火夜春分犹有未残梅

题花溪石漾图为查子声山

桃花灼灼开春烟含露绰约清溪边石漾风景幽且妍菰蒲曲曲堪延缘翰林旧宅倚长川竹  
篱掩映茅数椽松陰丙舍同一湾读书垂钓盘涡间秋水神骨冰霜顔渔者岂必非神仙握管  
方在彤云颠此景安能来眼前我亦双溪营小园芙蓉岛?木兰船种桃蒔竹已十年水际松梢  
才覆肩榆柳径入秔稻田深山鸥鹭忘其天欲往从之阻间关坐对斯图神惘然

### 三月十日夜梦

月露轻寒夕吾亲入梦遥青山掩谢屐碧水泛吴 草湿沙间露花明柳外桥陶家循壑意未  
胜此飘飏

### 春晚登白塔山

瑶华传往古石径入丹梯?柳笼烟密山桃过雨齐桥回新涨迴阁亚偃松低莫讶频来熟吾家  
太液西三月十八日昇山田子治具从高粱桥沿溪游近郊诸寺

西郊晴日晓寒轻卸却篮輿傍水行翠陌烟波新柳色板桥风雨旧溪声莺花偶遂芳时约松  
桧犹含太古情胜友提樽淹夕照等闲心迹喜双清

### 初夏

千山浓淡绿参差夏浅春深景一奇溪上垂竿飞絮里林间烧笋落花时青秧待雨怜鸠妇朱  
果临风恼雀儿领略暄和闲岁月市朝山泽几人知

### 凤梨

凤梨珍果出南荒昔未标名纪职方班剥锦苞含脆质缤纷翠羽护清香提封远在波臣外修  
贡遥知驿路长总是

皇仁同絶域海邦风味入梯航

### 游仙诗

秋月暎寒潭皎皎含清虚不可谓之有焉可谓之无古仙凌鹤背来往紫云衢吹笛过洞庭鸣  
珂谒天都千年不火食兰露芬可茹绰约桃花顔莹洁冰雪肤尘世谤仙者蠢蠕何其愚

### 送徐华隐学士归里二首

湛深经术重人师松桂坚贞海鹤姿廿载侍臣

恩遇渥漭行为写落花诗

喜聆天语自丹霄宣召还趋鹤禁遥拜赐手持金凤纸传餐人过绿杨桥

己卯中秋後二日积陰始晴明月在窗夜永不成寐因题恽南田画鴈来红二首

篱筵竹下鬪髣髴华乌柏丹枫本一家细雨疎帘千种色始知秋叶胜秋花

芙蓉未放曲江头桂露兰烟已渐收一片井梧秋色老独教锦萸占风流

题王瑁湖下直传经图四首

江上秋风桂醑筵鹿萍当日附名贤紫云天际三珠树领袖坝簏四十年

画舸高斋碧树幽日斜下直比林邱金华夙望推都讲经术西清第一流

器量深沉属大儒槐庭世业在伊吾几人得似河汾席阿阁文章五凤雏

长安冠盖重貂蝉独对斯图意爽然吾友性耽林壑趣丰姿散朗似神仙

吾庐十一首

小筑吾庐近水涯望中何处似晴霞芙蓉溪畔东西?裊露含烟数里花

峰峰岚翠落清流惟有吾庐景物幽最爱梅花紫野径还宜垂柳系扁舟

水复山重遶碧畴吾庐独占大溪头千峰雨霁看新涨雪浪横空上小楼

竹隄梅冈往复回吾庐深隐絶尘埃稻香亭傍烟邨起秋水轩临雪磴开

松堤深琐绿杨烟水湛沙明见一川布谷声中春似锦桃花飞落菜花田

笔牀茶竈一舟中北渚南垞曲涧通摇过小桥柔櫓歇蒲帆斜挂芰荷风

枫柏頽红叶满枝黄鸡啄黍傍柴篱松陰路入秋妍馆正是田家获稻时

长廊下瞰碧莲沼小阁正对青萝峰【放翁梦入仙居得此】佳梦庭轩差比似蓬壶端不让仙踪



梨云桃浪影交加烟?红兰徧茁芽我忆舫舟亭畔路清溪围绕一邨花

懒慢心情耽水石幽奇踪迹狎禽鱼翠微堆里三间屋罨画溪中十?居

四序芳菲满曲栏不教容易觉春残莺啼碧树笙歌院花落红泉锦绣滩【禹鸿胪为余画芙蓉岛图将成景物有足赋者亭榭庭庑虽皆意中结构邱壑松竹桃杏梅柳之属则已具其大槩远想高望遂得斯篇己卯冬至月中澣】

双溪诗二十六首

垂云泚

白沙采樵路石脚插清渚拄杖响莓苔幽人澹如许

芙蓉溪亭

溪上芙蓉开湘娥明镜里不屑鬪春华依自宜秋水

南庄

牵牛花满架秧水绿芊绵要识农家苦门前种秫田

观获亭

秧马似騄駼腰镰如鴈齿但愿禾稼成岁岁常如此

秋妍馆

橙黄枫茜紫山澹水澄鲜寄语看山客珍重此秋妍

桂丛

山空秋月白露滴桂丛幽云际一声鹤仙人在上头

来鹤亭

手自种青松龙鳞见其老佗年松树下不生刺人草

千巘万壑之楼

旧说龙眠岫桃花滚浪同缘何朝暮景尽入此楼中

传恭堂

欲识传恭意无忘结构情柴门观获乐纸阁读书声

溪光岚翠亭

溪水满芳汀临溪构小亭衔鱼双翠鸟飞去入青冥

双溪草堂

绕砌双溪合文儵聚白沙绿杨千缕树红藕四围花

曲廊

樱桃绽晓风芍药含朝露步履向南荣渐入花深处

垂竿石

本为投竿去临流一解颜取鱼忘着饵常觉钓丝闲

舣舟亭

千尺芙蓉?双桡舴艋舟繫舟何处好古柳石桥头

佳梦轩

浅碧衬殷红如濯巴川锦山径尽繁华何用邯郸枕

梅冈

冻雨溪山路寒香一道斜南冈名玉雪高下尽梅花

莲渚

溪水东西?藕花杂红白中有金鲫鱼唼花尾盈尺

绿杨桥

垂柳接长堤饁东菑路小桥人迹稀春莺自来去

稻香亭

曙色满东畦扶筇看耘耔晨光照露颗芳气如兰芷

桃花流水扁舟

画舫水云间白鸥如我闲前山风雨急摇入紫菱湾

秋水轩

幽人爱澄澈开轩对明河临水不敢弄恐涴清浅波

鹤栈

饮啄伴梅花樵青相盼睐本是山泽姿笑尔乘轩辈

松堤

十载松堤树清陰已渐成不惟樵路隔已解作涛声

竹圃

瑟瑟青琅玕照我须眉绿欲谢大官庖烧笋簞簞谷

放舟亭

高阁绿杨中时来澹荡风焉知石渠下却与前溪通

大溪

放闸入大溪溪流西复东每当山雨足弄笛水烟中【芙蓉岛双溪仅有其地而亭池皆未具拟其规模位置应如是各命以名赋诗二十六首人意所成溪山不得不俯而从之矣属廷玉按图味诗以点缀邱壑应不相远异时对景吟讽斯篇亦可以知予此时之情事耳己卯冬至月廿六日】

香山集中有万事平分衆所知何尝苦乐不相随惟余耽酒吟诗客但有乐时无苦时因广其意得六长句

万事人间倚伏奇何尝苦乐不相随松棚一枕渔樵话社饮三巡土谷祠石上吹笙邀鹤伴牀头酿酒待花期枳篱茅屋园林小但有乐时无苦时

读史千秋叹奕棋何尝苦乐不相随一帘红雨花初落三径烟萝柳乍垂洗砚春波临襖帖焚香夜雨和陶诗浮名不挂闲宵梦但有乐时无苦时

大纛高牙拥路岐何尝苦乐不相随千村树竹迷幽径万壑烟霞护短篱古柳长堤扶杖稳碧莲小港泛舟宜清琴伴取闲诗卷但有乐时无苦时

紫绶金鱼上赤墀何尝苦乐不相随春烟古树经时雨寒食新花满故枝手种嘉蔬堪采掇自疏清涧看涟漪茫屨布袜朝乘兴但有乐时无苦时

绣阁罗帷簇粉脂何尝苦乐不相随玉玲珑【水仙名】本离尘客萼绿华为絶世姿一点芳心兰蕙露十分春色牡丹枝垂藤翠幄花茵?但有乐时无苦时

吹竹弹丝舞袖垂何尝苦乐不相随花围纸阁摊书卷竹覆渔矶引钓丝芍药浓香迷粉蝶梧桐新绿听黄鹂一瓿茗熟消尘事但有乐时无苦时

### 小憩

岁晚小休憩寒花塞满室绀梅交枝柯朱白影相昵袅娜红药翻艷冶绯桃密复有冰雪姿水仙最清逸香光动户牖盆盂碍书帙侧身入芳丛趺坐仅容膝炉火温夕薰窗明透冬日老怀无所欢藉以慰萧瑟

### 送姚君山之江西三首

圣代弓旌日见招可怜姚鹄尚飘飏锋车一去长安陌酒客诗人两寂寥

宦游三世总冰清无限京华寄庠情烛照西廊人未寝一帘寒月读书声

彭蠡波光动小孤匡山云气接香炉凭君为访西林寺白傅遗踪尚有无

除夕友人赠新开芍药四枝

花繁温室锦成窠除夕香侵玉叵罗忽见药栏开最早小窗明月已清和

庚辰正月十日即事

堦户还如作茧同地鑪温?得春融香分驿使江南白色借渔郎洞口红瓦枕梦游三岛外布帘

人蛰百花中黄柑手掬清芬满小有心情似放翁

题虚槎小像

作牧清时有凤麟丰貂紫绮旧才人冰心铁骨谁能似千树梅花是後身

题曼园小像二首

深树垂藤缓带居神仙丰骨更谁如一编静对松风里端是圯桥石上书

星光熠熠映三阶却寄闲情碧水厓仰止吾家公辅器汪陂千顷对澄怀

送杜宗伯还里

烟霞耆旧返沧州出处同时第一筹笠泽鱼鲑容晚食菱湖书画满扁舟雪虽垂领身犹健年未悬车志已酬从此稳栖珠树鹤神仙长伴季真游

秋晚即事

寥历天高鴈度迟满城砧杵动凉飈凄情庭草花开後澹荡秋光病起时桂寄空山寻老衲兰移温室属场师故乡书到重阳近疎菊寒蓉问短篱

上巳

上巳韶华满近垆?风吹面气冥冥花光欲动桃先艷春色将归柳最青修禊良辰宜曲水采兰佳会在芳汀此时寂寂应难话为忆南溪旧酒亭

寄顔澹园

弟兄名誉擅声华宣武门边曲巷斜白袷每招京洛客素琴雅称鲁儒家清吟数对高斋酒疎菊新开小苑花一自为霖向南北廿年消息隔天涯

病起

飒飒秋声杂暮砧遥怜宋玉此时心盆兰鰕 花开晚庭树萧疎落叶深节近重阳犹问菊病来十日未鸣琴且炊白饭图身健莫与寒螿鬪苦吟

题翁康飴观获图四首

村落黄云接壤同曾孙观获指溪东  
宽衣博带丰神古人在幽风藻绘中  
蚕女缫车动晚凉农夫钱鏹刈秋霜  
有田种秫原堪美况在清溪古树傍  
绚烂终归淡泊宜饱看身世已多时  
人间惟有农桑乐试读陶家种豆诗  
垂绅日日近承明偏系田家妇子情  
霖雨他时沾渥後幅巾来听叱牛声  
文端集卷三十四

# 卷三十五

钦定四库全书

文端集卷三十五

大学士张英撰

笃素堂诗集六

辛巳新岁四日

高枕经旬免坐衙徐看晴日下檐牙犹余腊瓮盈樽酒恰对薰鑪绕坐花挝鼓颇知隣舍乐卖  
饧莫厌市儿譁青梅翠滴杨梅紫且试江南顾渚茶

纸阁梅花

静对方知絶世姿横斜书幌一枝枝根梢磊砢疎偏好风骨清严澹益奇纸阁梦回春浅日布  
帘香耐夜寒时冰霜岁晚谁能识千首龟堂赠尔诗

春深

春深鑪火不须催温室初开二番梅京国且看花满屋乡园休忆雪成堆胶牙徧试盘中果婪  
尾徐倾烛下杯碧落空腾辞禄疏

君恩未许重徘徊

小室即事八首

碧玉疎梅影一行粉红桃萼倚东墙分明水照谿堂路忘却寒宵客

帝乡

琴丝挂处碍芳丛书幌开时点落红塞破屋庐无坐地剪浇人似卖花翁

喧寂闲忙各性宜繁华未必胜栖迟放翁九十谁能似挂杖行游日有诗

箫鼓如雷结队来 毵似火锦堂开幽人坐歛看天壤绿树黄鹂酒一杯

高窗?送初晴日古鼎香温浅碧茶九陌輭红尘里客几人静坐对梅花  
丹青一束写幽峦中有吾家旧考盘潦倒乡心无寄处镜前时展画图看  
烛龙飞度不容鞭老去流光倍倏然壁上题诗如昨日惊看已是十年前  
虬枝矮树足婆娑若比龟堂不啻过最爱朝来欹枕看笔牀琴荐落花多  
雪後过右阙

凤阙门西水满渠古坛松柏一千株褰帷路入琼瑶圃摩诘新成雪霁图

### 方壶二首

方壶事隔海云东剩有人间鹤发翁芒屨任沾兰蕙露蒲帆徐漾芰荷风穿云一礪来天上照  
水千峰落镜中稳闭桃源溪口路莫将渔子姓名通

曳杖行歌野水滨耕云亭草绿初匀花开恰似新来客松老真如古逸民栩栩蝶犹迷宿露翩  
翩鹤亦动香尘佗时画取田家乐一幅河阳未足真

### 寄荅范彪西同年

### 射策同时对

紫宸高贤白首卧松筠等身书卷师前哲毕世邱园养老亲天为吾侪留硕果人知斯道有传  
薪鸿编静读梅花下畀我仁风四座春

### 春晚

堂堂春色到将离寂寂情怀付竹枝庭有草花归燕识门无俗客落花知常疎冠带回翔地闲  
弄琴书卧起时昨日江乡传好语又言农事满东菑

### 辛巳春日之丰台二首

今朝无事探芳丛细雨初晴草露融出郭心情偏觉好篮輿十里绿陰中

一庭风露浩无边红紫相偎万朵妍赖有乌衣王谢宅药栏偷看已三年

### 四月清和二首



四月清和药圃开门稀剥啄长莓苔京华作意营幽事廊庙无端置散材匣底频搜儿札看担头多市野花栽故园兄弟俱衰老棠棣陰中首重回

溪畔田塍结小庐此身无计狎樵渔风光苦忆三三径问讯惟凭六六鱼竹绿生香迷别圃桃红飞片过前渠人间剩有垂云泚犹恐公麟画不如

寄亭治具游宛平相公怡园

胜日园林爱探寻多君载酒复携琴凭临杰阁岚光满偃息高斋树色深花檻新添芳砌外泉声旧落古藤陰不辞夕照归偏晚邱壑由来本素心

三月望後游天坛各道院二首

古坛云气外沙路一停车永日闲人酒春风博士家深林多野色荒圃有穠华紫绮留人久狂歌待日斜凭高营小阁指顾百花丛老树迎人入春城满望中绿槐铺辇路翠柏隐斋宫顿觉尘襟涤翩然鹤背同

南荣

中庭?高槐垂帘复深窈兰开满坐隅清芬彻昏晓公事喜多暇退食日方蚤舆马各休憩门庭迹如埽午睡却炎曦轻衣御纖縞红紫点青丛未觉庭轩小静坐抚鸣琴清音自缭绕有时淪佳茗宫观名泉好一啜复再啜悠然散怀抱西隣新月上晚凉月弥皎妻子坐南荣归鸦乱林杪儿亦生白须笑语悦翁媪尘虑都弃损天真可长葆

夜起移兰入檐下避雨二首

薄暮移兰出短檻为承沆瀣露华清香消宝鸭鸡初唱愁听芭蕉叶上声

闲庭幽事惜花难着意殷勤为探看莫讶老夫中夜起恐教风雨损红兰

辛巳六月廿一日寄亭声山招游祖家园观荷避暑

树深溪转

帝城隈疎豁偏宜避暑来车马早冲微雨过茶瓜坐待夕阳回绿杨烟重双塘合红藕花繁十亩开零落昔年游赏地波光犹绕旧池台

板桥村落静无譁藓湿泥融一道斜芳草含情迎旧雨古藤为客放新花树边酒榼游人迹陌上瓜塍老圃家宾从壶觞多逸兴图成诗就总堪夸

抱膝

廊庑经行连堂坳抱膝宜枝头红点缀帘外绿参差敞簾堆千卷闲花接四时清吟耽陆子犹足比东篱

菊

绿覆丛丛花万枝含烟带露满东篱曾经暑雨当春夏不负三秋漫烂时

题泽州陈先生午亭山图

泽州先生午亭住托心远在烟霞间云耶山耶太行麓冈峦盘互水潺湲展卷置身入巘谷纵观适意投烟鬟中有长松冒层岭桃花历落满春山先生世宅几何年叠岫奇峦紫翠殷筑城翼翼倚山麓有亭有阁同飞攀千树罩庐林影直一川满地苔花斑傍对浮屠列轮相门临古道接间关妇子耕耘雅可乐桑麻鸡犬不须删此是先生游钓处一水一石常往还思山容易令人老莫将林壑凋朱颜兹山兹图岂常有云树茫茫非等闲寄语山中旧猿鹤留君且与泽人寰

引退偶吟五首

三十余年侍从臣惭无文藻荅枫宸忽闻当宁传温语惭杀冰衔感激人

三径初开旧宅边一庭芳树簇寒烟老翁莫道归来晚已种梅花十五年

拜疏新陈引退词

九重宣诏出丹墀五更不寐聆

天语恰似南宫放榜时

风吹衣领雪翩翩拜

命南归喜自然万首鸿编须记取乞归犹及放翁年【放翁以六十五岁乞休】

小庭风月喜无边芳序才过惊蛰天寄语梅花须晚放君恩留与度寒年

得请

衰年脱屣远纷埃愿就空山养不才少听隣鸡深夜起闲看曙色纸窗来经营温室将迎雪检

点寒花欲放梅开看黄河水泮日晴沙新柳烟开

将归

松叶青青草放芽山童相报客还家才过惊蛰无多日犹有残梅晚着花

十二月初二日梅放数枝却忆归涂所见

地鑪朝夕如春梅萼才舒便可人几树寒香开蚤艷一年花事逗芳辰樱红杏白村村有柳眼  
桃腮处处新从此溪山无限好芒屨端许蹋香尘

寄溪上小园

圣恩垂老许抽簪便可移家住碧岑久置田园新入眼旧栽松竹渐成林龐公妻子同禅说郑  
谷烟霞识素心寄语壶觞风月道常留清景助清吟

老梅作花

寒梅敛未舒老干色偏腴合浦波初融融一串珠

置我

万斛车尘尽日忙拂衣挥袂汗如浆天公作意君知否置我金螯玉螯傍

题景峰皆山园图二首

高梧双影落空庭中有幽人醉复醒挂笏翠巘丹壑里一楼收得万峰青

山绕花村水抱庐丰年正是刈禾初先公家世兼农士銓艾声中听读书

壬午正月廿六日行有期矣

三千里外客还家文杏霏烟柳簇芽传语清溪南北好教莺语唤桃花

二月十七日宿沙河蚤起烟景清旷

烟开麦浪绿初生露滴茅根鸡未鸣惟有桥边东畔柳麴黄顔色晓寒轻

廿二日渡黄河

戏马台前春草生驱车路入古彭城谩言故国天涯远人到江南第一程

杏花

翠陌烟浓蹋浅沙主人萧散正还家莫将春色轻相负斜倚肩舆插杏花

小园诗

小园近居宅经营自屡岁我来谢烦嚣春风适修禊池水既渟泓庭树亦幽翳牡丹灿天葩海棠簇繁丽时序入丹榴红英点阶砌浓阴垂四幄翠色侵人袂穿林双白鹤花间发清泪叩门无杂宾欢言昆与弟翔步或高吟投枕得小憩四体任舒闲万累埽尘滞盈盈清浅波幽旷渺无际优哉复游哉是吾终老计

山中观农夫雨中力田之苦

黄梅节近苦滂沱正是山中力作多雨湿短蓑泥没骭农人犹听插田歌

赋得负杖阅巖耕

空林淹积雨扶杖偶闲游莎湿看眠犊泥深听叱牛树喧归鸟集山霁晚烟收自适巖居趣何妨信宿留

陰雨竟日小溪不能渡

翠靄空山雨雾初河泥深濶往来疎小儿夜课无鐙火乞得松肪自照书

北园荷花初开

青葱一林竹沦漪半亩莲人生但得此亦足遂幽偏自予来北墅万竹森如椽翠幄光照地凤羽影参天独惜池水深荷叶空田田白华三五朶照水亦娟娟山泉苦沙砾希见藕如船我幸山泽人兹福不能兼乃知造物意取予恶求全且耽千亩趣看取数枝妍

小园陰雨浹旬

经旬积雨长蒹葭泽国居然水一涯屋角数丛湘浦竹堂围四座岭南花近人鴈鹭何嫌鬧索果儿童不厌譁捡点经箱消睡物故人犹有碧山茶

小圃

小圃长廊雨最宜绕花临水路逶迤祇因地与隣园近泛取青萍绿满池

兰初开

归来秋兰盈盈满盆盎日夕劳顾视寒暄慎所向幸逢积雨後翠色喜无恙朝来簇百箭英  
气日腾上时方夏至初清芬日舒鬯藉以媚长昼聊可佐闲旷

兰开日闲居

积雨连宵未肯晴小池风定水痕生奚童亦解人深意报取兰开满一茎

鹤

花间相唤便相从老仆真成放鹤翁饷尔鱼虾应久识每当平旦起开笼

黄菊有于六月中开花者

榴火初开烂似霞如何篱落见黄花紫萸翠盖三秋色霜菊先开六月华

幽兰盛开至数百箭

碧梧黄鸟翠庭空中有幽兰数十丛坐爱清芬耽静对为君一月住城中

小庭兰蕙满

小庭兰蕙满带露白纷纷暑退清风至香从静里闻素波寒越女修竹怨湘君自慙谷中赏忘  
情岭上云【经句未入山】

避暑三首

避暑幽人户自扃日长午睡觉初醒闲中乐事君知否新摘莲房插满瓶

午陰初过转庭柯散髮披襟奈暑何识得物情予亦乐闲看鳬鴈浴清波

经营五?爱吾庐不用招呼客伴予野老胸中大有事剪兰浇菊数芙渠

夏日

浓陰高树蚤啼鸦唼喋游鳞戏浅沙鱼鸟颇忘城市客萧疎称是野人家种莲初长新开叶翦

蕙犹看二番花日暮湛华亭上望紫薇暎水似晴霞

入山

路入龙眠石径西松屏竹隲令人迷临流细数新荷叶恰听黄莺自在啼

五?园长夏

园林归卧莫嫌迟绿暗红稀避暑时啼树鸟知无俗响傍人鹤亦有奇姿墙陰路转幽兰谷桥畔花围锦石池老我得分优暇日临风搔首叹恩私

溪中谋具小艇

清波曲折数鲜鳞两?芙蓉夹去津计日放舟溪水上不妨天际有真人

长廊落成二首

逶迤路转小池东荷引清波柳受风避客莫嫌三径浅竹深遥入蕙兰丛

日长风定柳丝斜静听蝉吟细啜茶隔?鱼翻红浪出一川风落紫薇花

幽栖

小营别业遂幽栖避暑追凉自杖藜庭草茜红新雨後树陰润绿小池西噉啜影动看鱼跃剥啄声稀任鸟啼老我独闲谁可伴不须人渡落花溪

五亩园池种荷至秋始发

秋荷作叶满方池恰似田田贴水时我构小轩临水看愿开数朶照涟漪

出西郭视田禾

西畴来往任婆娑一径篮舆野色多社饮相呼知岁乐篝车满路识时和灌秧雨足支余溜获稻田空菽晚禾自是为农家世勤此身终合老巖阿

盆兰先後作花恰满五十日

斐几湘帘暎绿筠小窗风细净纖尘琼枝玉蕊随时发饱饫兰香恰五旬

### 种柳成陰当秋益密三首

昔年种树傍堤斜欲借青陰隔市譁最爱墙东看不厌绿杨陰压紫薇花

水畔微凉拂柳丝小池波动雨来时絺衣团扇无人识一片闲情碧水知

嫩色鹅黄染麴尘可怜濯濯几枝新关情最是吟秋柳一种轻盈更可人

余所居阳和坊可比白傅履道里

履道南坊构一?近居池馆亦翛然葛衣纨扇容吾嬾柳暗花浓喜地偏鹤正眠时惊鹊起鱼无人处蹴波圆几回断续蝉声里长日真堪似小年

### 桂花始开

秋林一何旷耳目寄寥廓黄叶落树杪桂香初破萼幸无剥啄声隔帘见白鹤林动知鸟归波喧见鱼跃尘虑一以寡鄙性耽寂莫俯观天壤间信无逾兹乐

### 溪中小艇成二首

新从碧涧泛舟回衣履犹沾石上苔睡起悠闲无一事满庭香露桂花开

山色苍凉水碧澄芙蓉小艇喜初登奚童亦解移兰櫂荡漾中流剥紫菱

### 桂花十数株中置一石台

日暮倚修廊徘徊桂花侧金英灿奇葩氤氲香雾塞贞干挺劲姿碧叶净如拭天地惜秋光畀此好顏色余亦淡荡人清懽澹无极

### 初凉

正是初凉落叶天絺衣新卸薄装絺三秋桂雨兰香里尽日无人手一编

### 入山泛舟

岭头枫叶已微丹才有芙蓉照碧滩我正扁舟溪上住不妨薄酒耐初寒

### 题小舟

一溪含浅碧棹影入寒山礪石丹青合云萝紫翠殷心同秋水净梦与白鸥闲尽日烟波里无人觉往还

诣胜山看芙蓉因忆听翁

昔共仙翁旧隐沦名山岁月老松筠亭基犹是当年地折取芙蓉忆故人

鐙下閱鴈湖听雪集有作即贈鴈湖

我读唐人诗钱郎爱清婉风流起後人高唱领词苑渭川竹千个湘渚兰九畹冰雪净聪明气格卑近挽一卷花间读悠然令人远

日暮看溪上芙蓉

夕阳泛溪水晚色上芙蓉倩女临粧镜烟鬟倚暮松江湖秋色好娟净若为容为尔关情久淹留待晚钟

勺园招游社坛

河流曲曲绕深松绣岭雕崖一万重八十老翁犹壮健深秋攜我一扶筇

夕归

路冻无行迹樵归老衲从陰云迷石磴积雪耀寒松沙白连平瀨天青显衆峰言旋时已暮烟际起昏钟

文端集卷三十五

<集部,别集类,清代,文端集>



# 卷三十六

钦定四库全书

文端集卷三十六

大学士张英撰

笃素堂诗集七

郑又蘧九十壽

乡国羣推九十翁  
餌芝道体日冲融  
康成雅擅通经誉  
谷口人依尚德风  
秋满万山枫叶紫  
酌宜大斗菊花丛  
期颐健比凌霄鹤  
硕果崑崙洛社中

腊梅二十树自去年十月开至今正月题曰古香十句纪之以诗

小庭何所有  
黄梅开近腊  
岁月历冬春  
香光迷纸阁  
梅花似美人  
此种类老衲  
凡卉有芳烈  
此香如艾纳  
坐卧香色中  
清吟绕一榻  
幸遇冬日寒  
蜂自杂遝

宿盱眙玻璃泉

山椒聚奇石崖畔出名泉  
泗水悬孤塔淮流涨百川  
烟波迷雉堞鐙火数渔船  
转徙殊堪悯应?

圣主怜

宿金山寺

千古山川丽孤峰景物幽  
乾坤劳砥柱日夜拥江流  
树色云中塔春风石上楼  
我来叨扈

蹕鐙火满汀洲

三月初二日蒙

恩赐

御书双溪秋水轩种花处扁额恭纪

龙眠十?庄烟柳听黄鹂  
两水落涧壑沿缘来丹梯  
游鱼淨可数纖鳞不能迷  
桃花夹两岸引之

入芳堤至尊劳问讯宝墨书双溪更有簪簪谷波?浴鳧鷖中有秋水轩芹藻出香泥

宸章若星汉悬向千峰西予昔癖种花颇为时俗诋焉知种花处亲承

御笔题

田间野花

村边麦浪影交加陌上驱车日欲斜红白枝枝偏近水野田蔓草夕阳花

独乐吟

秋水何沦漪茂树临清池喜无人迹到鸣鸟集高枝间关弄好音使我心自怡静日步长廊独  
乐良不疑

建兰作花

岭南花叶重培栽手护青青点绿苔客岁苦寒花事减幽窗犹见百枝开

兰开经旬未得入山

溪上经旬未泛槎溯洄何异隔蒹葭荷花久负山中约为惜盆兰正作花

泛舟

薄暮日欲落回舟泛清流蝉噪村逾静鸟唳林自幽心澹一无营喧寂任所投我心如明月浮  
云在下头

入山观荷花初放

予从京洛返东菑才见田田贴水时新叶渐看翻翠盖藕花初见出清池轻绡不染裁冰洁仙  
质无亏琢玉姿晨露乍曦山雨过此中相赏更相宜

八月十一日山中荷尚开数十朵

碧水清池一道斜自从榴火簇新芽红粧翠盖重阳节常看人间耐久花

正月二十七日宿山中夜大雪晓起作诗

晓起推窗见玉龙梅花尽被白云封平生谩说琼瑶岛谁见松梢雪万峯

梅花惊蛰已全开遶树耽吟日几回不是山中经信宿断无人蹋石溪来

作诗後廷璐入山

积素连空失磴阿寥寥山路断樵蓑玉峰千尺琼为树竟有人冲雪栈过

西渠先生侵晨至景麟堂复过双溪日未亭午约行四十余里成一律示予喜而赋之

龙马精神海鹤俦追陪晨夕得欢游一筇晓露平明出万壑烟霞顷刻收已见空山成独往还  
携余兴步双流剑南人物衣冠在大耄高踪不可酬

秋日

小圃秋陰暑渐凉紫薇花发照鱼梁何人领取闲中趣团扇行吟百步廊

寄廷玉【时奉】

【命充日讲起居注官】

承恩早岁玉京游汝正悬弧岁一周三十二年文陛上从前两世立螭头【予以癸丑岁充日  
讲起居注官时廷玉甫一龄廷瓚复继予後今廷玉新有是命前後凡三次矣】

除夕赋得十韵

腊梅三十株黄云塞户牖爱此香色古开当岑寂後不艷桃李姿岁寒常相守纸阁啓南荣晴  
光朝暮受郊原梅未发春色在瓦缶短枝何曲盘名卉侵坐右斗室天壤寬清琴间尊卣岭南  
橘柚黄香光围一叟儿孙喜团圞旨酒为翁壽予饮虽不多清光毋相负

新春入山

野田黄雀啄柴篱节近青阳草色知人到小亭耽徙倚梅花昨夜放南枝

葺旧馆成

旧业荒芜长绿苔经营手自剪蒿莱城头纵览偏宜月屋角开窗恰见梅深院杏花围小阁隔  
溪柳色入平台西山翠靄看朝暮山雨山烟次第来

三月三日宿花家庄

淮河宿雾转尘沙上已春风苦忆家  
尽日荒村茅屋里西园辜负海棠花

恭和

御制赐高旻寺僧纪陰诗原韵应制

江郭只园一水中高僧石隐市东忽闻

藻翰垂霄汉弥望天花落半空  
清澈机锋尘界净光明色象紫云笼  
只今佛日昭回处鹿苑千秋景物融

金山寺

咫尺天关若可扪涛飞雾卷湿云根  
千寻石色中流见万里江声砥柱尊  
地濶天空气象蛟蟠龙跃共朝昏  
我来扈

躋登高阁遥望烟光接海门

山中积雨

连宵夜雨响溪声雾满山腰不放晴  
云接远村千树合波清镜一奁平  
黄梅果熟泥中落碧藕花欹水面生  
莫怪奚童迟送酒河深今日断人行

即事

禾黍吹香落照斜课奴锄地却还家  
不嫌十日山中住为看秋兰二番花

兰开二番移盆入庭中

桂林香动隔隣家菊蕊攢枝已放芽  
白露才过残暑退老翁生计理秋花

夜坐

闲栽花竹涤尘襟久矣鐙前废苦吟  
坐拥梅花三十树月明犹自理清琴

入山看梅花

山烟初破客重来地湿莎青长绿苔惊蛰才过三日雪梅花犹剩五分开醉吟高士醒初解羽化仙人梦乍回好景莫教容易得教儿且与发新醅

岁尽闲居

溪山雪拥废追寻捡点清欢发苦吟斗室梅花香作茧容予炉火坐来深

除夕

山寒梅未花且复居斗室盆梅三十树瓮盎杂书帙交错花枝繁栉比花房密香光塞户牖趺坐仅容膝几罗琴尊与翁称六一翦烛照花红煨炉避寒栗自烹绿雪茶於此享清逸

恭赋

南巡颂德诗

圣怀周八宇宵旰切维寅化洽寰区俗风行薄海民金汤罗郡国簪绂肃臣邻奎壁辉文囿弓旌賁隐沦高冈仪彩凤广漠集祥麟赤县讴吟徧华封祝颂閭山川三壤则玉帛万方宾骏烈光前後鸿规迈等伦

帝容时穆穆

王度复眈眈首出宏功运无为大化神甘霖沾绿野淑气起青苹鴈塞三驱埽龙沙万乘巡平成弥海澨浩瀚軫河漕耕凿田为壑堤防土作堙苍黎伤转徙

宸极悯艰辛念此桃花涨还同瓠子津帑金司库给云锺庶僚徇星鸟方司历苍龙正早春阳回沙水泮草痕湮

睿虑勤筹度

皇心重拊循和鸾听肃肃彩鷁覩翬翬羽扇开云表霓旌驻水濒观瞻纷里閭惊蹕撒郊畛举棹花光映扬舲柳色匀源流劳审视通塞互咨询上策聆

天语成模示近臣伫看新陇陌重理旧耕比户驱秧马临渊卷钓纶载歌疆翼翼何患水泯泯吏治谘谋切王言诰诫淳闾閻情可念象魏法宜遵广沛茅檐泽遥飞驿路尘雷塘舟再御茂苑輶重江渚经千里风帆未浹旬澄波摇豹尾清景照龙鳞庆洽扶筇叟恩施解网人方言资采择民隐许敷陈求骏金台筑衡材玉尺抡冲和

天表近涣汗德音新拜首瞻青雀欢声达

紫宸苏台逢庆节虎阜值良辰岳牧偕黄耆冈陵祝大椿嵩呼腾地起景佑自天申图牒陈千瑞盘匱献八珍冠裳趋帐殿氓庶塞城闉佩德心原摯观光气益振烟波何渺渺蚕室尽溱溱

法驾临吴越休声动浙闽绥方宁憚远问俗岂辞频车不惊桑陌舟常舫水滨城陰湖潏潏溪畔石砢磷花港初移柳孤山近剪榛游观心愈惕经画额常顰选俊擥芳杜澄怀对绿筠停桡看驯雉驻蹕听鸣螭紫笋方垂箴朱櫻始破唇渊怀期治洽深念冀民淳扶杖容相接迎

銮近不嗔彤駉环

帝子雕輦奉

慈亲孝养超千古尊荣备一身语櫜知鹄喜舞櫂见龙驯留

驾诚难却旋旌义不填衢歌咸济济巷舞总恂恂御藻垂天汉恩波浹地垠省方兼省吏含笑复含嚔建业澄江绕长干紫气氤千村花作圃万井稼盈畝黄纸新恩徧乌衣旧俗醇土风陈碧藕野?进芳蓴南国歌游凤东方喜贡珣荷钱初的的桃实已蓁蓁刈麦青如毯烹鲜色似银射侯穿柳径锡宴坐花茵泽厚江同永功高岳比岫赋蠲民有庆刑措狱无呻赐札荣邦彦遗簪悯旧绅井盐轻课额漕粟发陈因唤雨鳩为妇催耕鸟曰鷗良材蘅芷擷芳草蕙兰勿渥赐旌廉直流膏起瘠贫胶庠伸士气关樞减商缙胜地皆留蹟崖碑许刻珉民心如挟纊

帝盼在悬鹑率土归元化敷天托至仁永无嗟在泽惟有庆吹豳嘉祉蒸民粒和风万国甄虞巡羣牧觀禹会百祥臻献赋纷瑶轴攀辕拥画轮

一人操斗极品类入鸿钧农自歌遗穗官无叹积薪光同珠的砾治比玉斑璘未获随銮御无由侍佩巾晨昏睽子职依恋本天真颂德心逾慕摛词意每逡敬扬光被盛瞻仰抱诚纯

扬州左太守赠鹤二只以笼置舟中载归

?水东归兴邈然故人相赠缟衣仙扁舟夜泊空江水自起提灯照鹤眠

夏日居五?园

清池双鹤自徘徊避客应无剥啄来绿树陰陰帘影静幽兰花拥坐隅开

移兰

爱此岭南花罗我斐几侧我来坐朝暮沈酣废寢食翠叶碧如油辛苦自培植高枝挺百箭枝枝净如拭幽意淡天真无心鬪香色静好洛川神窈窕关雎德空阶竹陰静深苑帘影直风定池水平静对忘语默邈然潜心性此意谁能测我自领幽趣长鸣鹤应识

松下构一亭用东坡语白首归来种万松

涉世头已白归来学种松时值辛未岁买山清涧东傍水有修堤蜿蜒若长虹种松高二尺短鬣早青葱迄今十七年枝叶已数重高者二丈余谡谡来清风特为置一亭偃息深林中虽有虬枝古翠色迥不同微飏过枝梢细响若笙镛有时风乍起涛声走碧空俯仰闻天籁置我蓬莱宫我师陶弘景千载躋高踪

溪上看芙蓉

枫櫨柏紫间青松石角斜飞出几重老我惭为溪上客小舟烟雨看芙蓉

陆犀之松江作此送之【以下补遗】

霜浓菊老正深秋怜尔南归揽敝裘自昔买山曾有愿好凭弹铗问西畴

题曹天全小像

链气凝神入窈冥手携芝草诵黄庭桃九熟鹤千龄争似松涛万壑青

玉蝶梅盛开

枝头碧玉避寒栽早发春葩送客回京国迢遥二千里江南犹见晚梅开

二月十八日宿高桥故乡人来言庭梅冬?大放

小庭春事早相催经月红英点绿苔不是梅花不相待但闻归信即先开

夏日

莹莹波色入帘青曲曲回廊绕一亭我正闲吟池上句鹤如相伴亦来听

尝新

早禾初刈立秋前?榷香风满一川白粲河鱼新荐庙乞归欣得遇丰年

文端集卷三十六

# 卷三十七

钦定四库全书

文端集卷三十七

大学士张英撰

笏素堂文集一

赋

瀛台

赐宴赏花赋【有序】

时当清晏海宇谧宁

皇上以听政之暇临幸西苑俯念诸臣劳於职事特行旷典

召集瀛台赐之宴饮凡公卿侍从台省之臣咸得与於斯礼

温纶春蔼

圣泽如天诚太平盛事千载一遇也【小臣】随惇史之末班幸际昌期躬沾湛露不揣固陋谨拜手以志其盛赋曰维深严之紫禁当宫阙之西隅啓薇垣之右掖居金兑之云衢为宴闲之胜地比瑶岛之仙都宫槐百尺御柳千株山名万岁镇北极而环神武水遡玉泉入太液而泛蓬壶清流滢洄於玉砌苍林掩映夫金铺北则有琼华之岛窈苍翠而玲珑南则有迎薰之亭灿金碧而穹窿蚕室峙其西蕉园列其东其临流也则朱阑绣柱者水云之榭其冠山也则穿云竦汉者瀛台之宫九岛纡折於百步三亭宛转而相通浦号藏舟烟波深杳台名垂钓沧漪旋绕雕梁落影於波心瑶殿分光於霞表望双阙之觚棱隔潇湘而缥缈好鸟集於菰蒲嘉鱼唼夫苹藻其制作之丽密也铜龙喷水而泉落云标金凤衔珠而光腾树杪础璧书蟠螭之象藻井有垂莲之巧水檻则下瞰潜蛟山楼则平临飞鸟其为桥也石鲸飞动玉螭逶迤遥接乎西城之阴远通乎北渚之湄堆云积翠龙卧虹垂带晚霞而璀璨射朝旭而陆离其为木也槐阴葱郁松影参差琪花瑶草湘芷江蓠圆殿之古柏干层霄而蔽日兔园之薜萝垂倒影而临池其为舟也龙楼凤舸望若丹霞月台宏敞僊鷁繁华开绮窗而近柳坐琼筵而泛花疑监湖之鼓楫髣银汉之乘槎又有百果之园百鸟之室桃杏枣梨有蕃其实孔雀鹦鹉鸳鸯鸂鶒入瑶筐者珍果盈千闭雕笼者文禽非一外则缭垣周布罗列星庐万家隐见於云树西山翠滴於庭除内则珠帘玉檻雕栊绮疏耀晴云与碧涧若水晶之映璠璵上则飞甍宝顶纓络琼



琚似浮空而未落出高柳而凭虚下则流觞曲沼鸣湍石渠时潺湲於水碓泉声落而徐徐洶

皇宫之壮丽岂数乎瀛洲方丈之所书若乃时当避暑新荷满汀红蕖吐艳翠盖高擎千顷一色紫萼朱英朝帘初卷望之若繁星之辉碧落夕幔未收睇之如朱霞之在赤城独其发潜渊而振采泛清泉而濯茎实甘旨而芳烈藕雪净而水晶制芰荷以为衣岂同乎凡卉之徒荣所以风人采之媲美於幽人之洁楚骚咏焉比德於君子之清尔其带雨含烟飏风浥露北渚丛生南洲密布时开时落或妍或素晓气空蒙微香暗度此固景色之尤佳而园林之堪赋者也

皇帝躬亲庶政勤劳万几日旰而食未明求衣值励精之偶暇暂宴息於宫闈是时也晴云卷香露曦乘法驾载鸾旗过垂杨之辇道临沼沚之芳菲喜棠棣之交映快花萼之羣辉乃设玉體布华筵开水殿对芳莲金盘玉筋举网烹鲜

念诸臣之在职皆鞅掌於经年举泰交之盛事同庆赏於花前开尧室之衢尊列周京之豆笾是时鸳鹭成行簪裾咸集佩绶悬鱼联珠合璧露湛僊醪霞张绮席分左右而成行舒鸾凰之彩翮花夹岸而锦障生香柳覆堤而长廊尽碧羣虎拜而扬休承

天语之渥泽如登春台羣心悦悵

天子乃御画舸泛南河篙师击楫榜人和歌龙气遥成五采结飞盖而凌波舟频移於密藻櫂自转於新荷起沙鸥与白鹭迎锦缆而偏多乃

命羣臣咸登画舫大官设席酒正司酿水平若镜微波细浪击汰乎临漪之亭回舳乎平桥之上坐昆明之碧水眺香山之叠嶂极游观而未已许溯洄而荡漾舟随浦曲人与花深桂桡频转兰桨遥寻既徧乎芙蓉之沼远泊乎槐柳之阴饫

君恩之无极感遭遇於臣心猗欤盛哉继在镐之休风修曲江之遗事赏花垂钓嗣徽宋宗柏梁赋诗轶美汉禋信可垂於国书亦足风兹有位天池御苑以泳以游惠风遐畅嘉气旁流

皇心载悦羣工咸休以示慈惠匪乐优游期上下之交励当勉之乎为楫而为舟虽翱翔於西掖而心实周乎四海与九州

喜雨赋【有序】

康熙十有七年季夏之月经旬不雨暑气烦蒸火云丽空炎景烁物骄阳可畏恒燠有徵

帝心惕然念雨泽愆则难冀丰穰之庆阴气郁则恐为灾沴之由爰是发

德音下明诏悬輶铎求昌言严恭寅畏斋戒於宫肃穆精诚祷祠於

帝致斋之次日乙酉阴云四合电掣雷轰雨沛於中夜禱祀之次日戊子凉飈候至烟霏雾结雨澍於亭午於以涤枯润槁育物宁人皆

圣心为之感而

天心为之应也【臣】近侍内庭备详

宸虑职居惇史宜志

天休猥以芜词忝兹盛美敢拜手稽首而作赋曰苍苍无垠者有象之天天心之所属兮则在乎璇宫之侧黼席之前盖君身所以配帝而主极所以承乾故明作而幽赞兮若璧合而珠联月维季夏律叶林钟司晨者赤帝乘权者祝融覩阳景之南至仰大火之昏中维斯时也炎歊蒸郁炽日蘊隆上无纖云下无微风阳坂飞烟於火井羲轮衔耀於烛龙气欲流金威能烁石濯寒泉而犹温对冰壶而如炙力已倦於蒲葵衣不胜夫絺綌万户千门六街九陌咸流汗之成浆或狂呼而动魄谓今兹之溽暑实罕邁於畴昔虽迎凉之殿含露之台珠帘高卷绮窗洞开其如畏景暄赫烈日昭回触炎威之四至鲜薰风之南来列子何以御之而冷然楚王何以临之而快哉是盖夏无时雨阳愆陰伏积此亢旱蒸为烦燠胡以慰我三农长我百谷四野望之而惊心万夫因之而蒿目

天子曰咨在予一人雨阳有忒矜此兆民沛

王言之涣汗垂清问於丝纶爰咨卿贰民瘼悉陈辍朝撤膳兴於朕身将有事於

南郊先致洁於明禋於是端居穆清蠲虑静志上达穹苍捷如符契云油油而被天雷隐隐而出地雨霏霏而入帘风依依而生袂听静夜之沾濡爱宫槐之含翠此盖

睿念之方兴已获上灵之报赐致斋三日时维厥明天子乃御轻辇听鸾声享

圜丘礼太清荐紫坛之圭璧奏玉琯之韶龔穆穆乎皇皇乎覩千官之肃而咸师

一人之诚法驾载旋爰居爰处惟德动

天翼日而雨石鷲双飞商羊对舞云兴於西日之方午始而度凤城过龙楼气霭霭而如暮声飒飒而兼秋浩乎如风樯阵马之疾沛乎如江涛波影之流已而滴沥飘扬滂沱汪濊细珠溅於罽毼飞点侵乎绮缀其泛碧落而下也若九天之瀑布高转於银河其缘驾瓦而注也如百道之飞泉下垂於玉砌

天子坐广厦啓彤扉歌有渰之萋萋咏兴雨之祁祁任轻沾於绮席从飘洒乎御衣

## 天泽无疆

宸顏有喜爰命侍臣凭高眺视优渥遍乎九垓沾足同於万里岂止畿甸沐膏泽之施三辅获田畴之美猗欤盛哉古称雨金雨粟雨玉雨珠曷若兹雨澄暎涵濡凉逾琼液甘若醍醐良苗乍起酷暑潜驱登斯民於富壽之域又奚有贫札之虞盖由我

皇之德馨香上闻故其动於中也肤寸而雨徧天下綢繆若泰山之云更何藉乎土龙之逐逐与巫史之纷纷古人之言谅哉人主应天以实不以文

## 璿玑玉衡赋【有序】

粤稽古圣凜欽若於昊天伊昔哲王重仰观於悬象自迎日推算肇起轩皇迨定历授时首详尧帝盖法其广运所以符乾德之贞纪其递迁所以重民事之序然九垓八埏之数既寥廓而难稽四时五纪之行亦纷繁而莫辨故观天有器窥象有仪曰周髀曰宣夜曰浑天法已传於邃古曰三辰曰四游曰六合制渐备於畴人爰考虞书设玑衡以齐七政历稽汉制铸铜浑而象九围黄道分二极之中日月周於天纪银汉贯列辰之次经纬灿於云衢布位以象星躔数珠玑之错落设管而窥辰度琢琼玉之玲珑惟此制器之神奇允为言天之规矱法以久而益密继之者汉有张衡思以巧而愈精穷之者元推守敬我

皇上稽古正学敬天勤民睿哲性成宝鼎呈祥於炎历雍熙时协蓂阶纪瑞於尧年绥六宇而泰阶平抚五位而文昌耀灵台测景特专仪象之司玉历调元远绍重华之日盖由

皇上心与天一智在器先恭默足以穷神聪明尤能察物故不独微危精一远继美於虞廷敦典慎徽上嗣休於洊水即璇衡之制今古同符敢拜手稽首而献斯赋赋曰维乾象之灏灏浑周径而无端故拟之者如倚盖而象之者如弹丸或景长而多暑或暑短而多寒其数之无可纪极也虽隶首而莫殫古人以神灵之絶智创仪器之精微爰法天而奉若实先天而不违定两极之南北持二仪之枢机星辰随而耀彩日月转而周辉齐消息於阴阳穷天地而范围其为器也或谓肇自宓戏或谓原於帝嚳马融叹其精而王蕃踵其躅经汉唐而代新历宋元而遥续仰以协乎天经而俯以维乎地轴其为制也动随日驭健应乾行运宵旦而不息配三百六十五度之常贞乾坤肖其闔辟万物视为枯荣阳乌同其出没兔魄逐其亏盈若太虚之无为常不言而化成其经星之丽乎其上也三垣奠中央列宿罗四维紫极昌乎帝运前星耀乎储闈招摇东指而熙春大火西流而凉颶南箕北斗并钺参旗壁奎羽林之府东壁文章之司莫不托体圆象逐候推移其纬星之周乎其外也聚井会奎编珠联璧或隐或见为前为却金火遇而或逢其灾岁星在而人蒙其泽莫不视躔次为禴祥因天行而顺逆其游环之旋绕乎其侧也以二道之交周验二陆之寒暑天地以斯为襟带日月以斯为户牖包九有而亘八紘固即近而可覩其取乎璿玑也川泽之珍辉联象纬配景庆之光华萃蟠珠而非侈其取乎玉衡也山岳之宝气烛穹苍藉管窥之遥测何积气之难量所以制列三重经累朝而不改法沿数代当景祚而弥昌抑臣闻之人君德及方外化被羣生则五气顺序七曜咸平阳愆阴伏之不作而薄蚀晕珥之不惊然後乾施而坤载天清而地宁必星纪之不紊斯天与器而偕行然

则玑衡之为物也可以察天心可以观主德可以验政刑之臧否可以规运会之通塞天市应乎明堂北辰配乎皇极涵盖法其咸周时敏傲其无息司历者藉之以规天而人君因之以取则今

天子至德冒於海隅来享通於絕域

圣治所及则如玑衡之无所不覆也勤政则辨色视朝典学则夜分侧席

圣心所涵则如玑衡之无时不运也文治扬其光天章焕其彩则如玑衡之经纬咸备也张弛之尽善调燮之适宜则如玑衡之与时进退也猗欤盛哉瞻浑象之辉煌诞玉质而金相昔命官於虞帝今作赋於明光配天宇之鸿蒙同

帝德之无疆【臣】叨恩於珥笔敢因物而敷扬

南苑赋【有序】

康熙十有二年癸丑孟夏之吉

天子临幸南苑六军云会万乘雷动【小臣】初忝文翰之班特奉

命珥笔以从目覩旷远之神臯心慑豫游之禁地平畴綠野时值丰穰大辂青旗备观钜丽复拜

纶音命献诗赋一介鄙儒遭逢

盛事顿忘譾陋窃効讴吟谨拜手稽首而献赋曰维神京之南甸有振古之名区广衍号称陆海荡平继美康衢薰风拂於南极旭日照於东隅以旷则瞻眺云物以稼则地脉膏腴洵邦畿之沃壤亦天开之画图其北则凤城万雉龙楼千仞纷掩映於丹霞耸云表而高峻其南则冀野平陆金台崔嵬以燕齐为襟带接韩魏而宏恢其西则太行居庸层峦叠翠远苞秀而毓灵蟠郁葱之佳气其东则碣石天津川源奔滙萃淑景於中央巩北平之地势其水则清渠环绕味比甘泉石桥横而长鲸飞动画舸系而彩鷁蹁跹高柳垂而飞絮密荷簇而如钱嘉鱼咸沐於大泽锦鳞戏而便娟其木则宫槐禁柳浥露合烟松柏郁秀桃李争妍绕别殿而千章色苍翠而参天其兽则獐鹿麋麇黄羊白兔野雉朝飞幽禽在树每应弦而辄中时儻俟而羣友既草浅而兽肥复风高而鹰隼其外则周遭百六十里跨川原而为墙长亩绣错於平壤花邨散布於崇冈瓜田则千畦共秀麦陇则比户同穰其内则宫阙参差於綠树亭台亏蔽於疎杨列东西而为宫分新旧而殊方茅茨土阶之俭约规制髣髴乎陶唐东有穹窿之高阁金碧照耀乎初阳祀帝则华而非侈

行殿则简而何伤红门峙若丹岩

輦路平於翠陌高台号曰晾鷹亦因故而不饰农田耕凿之杂处雉兔刍蕘之接迹同文王之灵囿偕斯民而待泽汉之五柞唐之温泉制不师古崇侈极妍金铺玉砌冠山架渊华林园之宏钜昆明池之蜿蜒彼皆穷夫民力此独任夫天然考历代之园囿乌得与斯苑为比肩於是月当孟夏炎帝司晨陇弥望而如绣麦垂穗而灼灼条桑荫於广野微雨浥乎轻尘

天子重时巡而观穡庆麦秋而省民乃驾苍龙建翠旗百灵扈跸七萃羣飞周庐似列星之布万骑夺云锦之辉旆悠悠而风动凉飏飒而生衣登高原而纵遐瞩翠輦时驻於翠微旷远絶夫尘嚣帷天地而幕六合地最宜於经武比岐周之镐洛寓训练於驰驱骋骅骝於寥廓

天子御焉行将循蒐苗之古礼格飞走於林壑乃武事之既缵更励精於典学和风快其南来微凉生於殿角虽游豫之晏闲罗縹緲於

紫阁微【臣】时陪周宴日听虞琴忝邹枚之後乘随卫霍之华簪幸遭逢於

盛世倣虞人之献箴愿作颂以比勲华敢拟长杨之与上林

驾幸阙里赋【并序】

皇帝御极二十有三载重熙累洽区宇乂安文德覃敷声教暨讫乃稽古时迈肇事岱宗谒祠阙里典礼崇重恩泽优深臣庶懽欣远迩嘉叹夫元和盛年咸平昌世仅奏六代之乐修再拜之文犹垂式简编流辉今古詎有远御

六龙亲诣

万乘展隆仪于稽拜施殊敬于儒先

圣德显隆如今日者焉洵足以超轶往牒焜耀前纪也【臣】幸际昌时得瞻钜典虽固陋翦劣不足以发挥鸿藻然珥笔承明职兹纪载颂扬

休媿敢旷司存谨拜手稽首而献赋曰於烁惟

皇继序纂光本仁祖义昭宪考章奠玉衡于神轴握金镜于天闾调四气以通正龢八风而协祥于是西踰细柳东跨扶桑交河北徼比景南乡靡不丹梯走传碧海浮航输琛太府隶名职方耀幽遐以日月袞鳞介而衣裳越万里以入赆重九译而来王是以化洽太和道隆邃古纳九垓之管钥总堪輿之扃户参天地之清宁俪贞明之作覩文轨合而謡俗同跂喙恬而草木庀軼埃壙而苞混茫驾羲轩而凌三五焉

天子乃高拱垂裳中央运斗容与义林优游书藪河宝丕宣洛符诞受典学弘文铭楹箴牖探珠渊之秘筌陟玉山之高阜德荡荡以无名治熙熙而何有既则冲然永念穆然深思曰仪象

肇啓道法昭垂寢明寢炽惟君惟师羣圣一揆六经同归王泽下竭颂声式微孕星铃于上瑞  
锡麟绂于昌期毓龙蹲之至德挺凤跼之殊姿集大成于千古开絶学于来兹溯平乡之懿躅  
景阙里之崇规庶几哉闻见可接羹墙在斯举时巡之坠典秩释奠之隆仪尔乃乘大路控金  
鰲攀翠羽捎文虹属车按节繁吹鸣箫七翠鳞附千官景从驰道则五里十里旌门则一重再  
重集于泗水之上幸于尼山之宫斯时也清羽司音初阳应律葭管烟霏芸房露茁气不栗以  
时寒序将周而朔易抚景物之澄鲜揽风云之明瑟旌旗卷而广野回春帐殿开而暮山凝色  
遂乃肇举吉祀肃奉精禋春卿赞采祠官眡牲朱火西蘊元酒东陈嘉筵广豆丰粢洁盛振羽  
龠之六舞合咸英之九成荐祝号之明信导神紘之降迎穆穆

宸容痛痛天綽殊礼展谒隆文锡賚觐灵爽之长存俨哲人之如在感神契以潜孚体道真而  
昭对洋洋乎僊僊乎与珠庭月角授受于千载之间玉节金铉疇答於一堂之内也礼度有严  
威仪告竣登堂入奥规周矩还瞻圣里之岷岵憩广庭之静便布两楹以翼耸峙双阙以星悬  
藉杏坛之修荫挹璧池之素涟偃息于道德之府遡泳于图书之渊於是芝盖重葩龙旂曲柄  
贵拟一人尊侔万乘述素王之嘉赞发五言之

睿咏海岳迺其高深星云并其辉暎斯则

圣天子蘊道之淳风崇儒之殊敬也簪纓陪位衿佩圓桥长裾雾会仙组云影始横经以讐问  
旋拊石而吹匏诵遗言于姬孔沐雅化于唐姚礼让之容咸近光于黎献岂弟之泽庶作人于  
誉髦斯则

圣天子风声之四讞文治之丕昭也曲阜名区鲁原旧聚陪敦土田复除繇赋增讲肄之常员  
沛匪颁之异数推恩则徧及师儒锡爵则旁流支庶五经博士不遗凡蒋之封九命上公奚啻  
褒成之胙斯则

圣天子崇德之盛心兴贤之宏务也於是采甸侯卫公卿大夫期门式道执戟荷戈文学掌故  
之士垂髻戴白之徒纵观典礼踰济天衢涵濡化泽属厌道腴既雀跃而拚舞亦鳧藻而欢愉  
万人一口声满公车惟我后之东巡修百王之令式答珍贐于三灵听衢謠于百室却琼检以  
勿祈屏银绳而詎饰驹从清严仪文简质吏不讥呵民无供亿协时正律埒虞氏之省方纳价  
陈诗俪姬王之述职既陟山以裒对还翕河而问俗采哲阳之旧歌曦荣光之新烛朝宗滙江  
汉之波玉帛奉涂山之籙非汉日之攀茭乃尧年之刻玉若乃庆惠殷流湛恩四周给租赐帛  
省刑释囚虚衷清问博延广谏如天光之下济如露浓之上浮始汪濊于五土旋瀛沦于九州  
今又茂明至道导扬正学虎炳龙章金追玉琢浴我以诗书弘我以礼乐盛德登闕大猷辉卓  
帟六合而被英蕤鼓八紘而排氛浊诚振古之隆规开天之伟略也

天子方且回輿京室倚佩轩墀道岸先陟德契自持庀政考业基命勅几辨色以临黼展视夜  
而啓彤帷定仁义中正之极稽因革损益之宜不解冰渊之念弥勤輶铎之思所以泰阶顺轨  
乾策迎禧上理隆洽茂化雍熙治方侔于砥属俗已进于循蜚四海壽康恬于鶉居之代万年  
鼎祚巩于鳌极之仪

## 懋勤殿秋兰赋【有序】

轻风流火白露迎凉云净天高秋空气爽

君王宵旰燕闲爱兹澄景御图书之秘阁发清商之雅音乃有丛兰独荣秋殿芳香自发枝叶相扶植以青瓷围以朱檻斯亦托根之至荣者也【臣】朝夕

经帙味彼芳洁敬成芜赋以奉

宸懼其辞曰臣闻兰之生也隱於空山被於幽谷其守贞也虽无人而亦芳其德馨也不因风而自续是以尼父发猗兰之歌郢客和幽兰之曲当其植根九畹毓秀三湘昔作骚人之佩古称王者之香名楚台而留赏啓汉殿而发祥【汉武帝生於猗兰殿】养亲续兰陔之咏燕宾泛兰渚之觴莫不惜兹嘉卉钦彼幽光慨自人夸春艳莫采秋英荫深林而寂处偕衆草而丛生戏阴崖之翡翠侶芳洲之杜蘅惟敷华於山泽敢结想於蓬瀛一旦跻琼堦登玉宇拂珠帘迎绣户泛上苑之光风含长秋之暮雨诚何美乎兰皋岂更思乎蕙圃於时秋也萤光熠熠蝉声嘒嘒梧叶初惊飘飊文砌碧筒渐老将残玉井之莲金粟犹迟未发小山之桂尔独披纷翠叶葳蕤紫茎花繁露重体弱香轻娟娟自赏既媲美乎幽人之洁亭亭独立复比德於君子之清以兹高致怡我

皇情内殿深严左图右史久祛凡卉独留琼蕊枝垂宫砚色侵文几何馥馥之袭人每帘动而香起

天子丙夜陈书漏沈宵永风入户而虫鸣月临轩而人静绕鐙开历乱之花隔幔送参差之影更怜落卉藉以雕盘置绮筵而留盼惜余芳於未残喜

君心之见珍荷遭遇之良难幸处乎朱门与紫闥永违乎长坂与层峦臣将寄言於薜轴窃敢托咏於崇兰遂作歌曰有香草兮华且滋邻玉树兮与紫芝自楚泽兮来轩墀枝挺生兮花离离感

君恩兮欣自持观秋兰之独茂兮岂微草之无知赐金园赋【并序】

余作

赐金园记述

君恩之所由纪命名之攸始犹以云窗礪户隱约於长林嘉卉芳草杂遘於幽谷者铺叙摹画未罄其状尝考昔人云赋者古诗之流也又曰古人称不歌而颂谓之赋夫马融长笛王褒洞箫古人爱一物犹比拟赞诵被於简牘文必极美词必尽丽况余目营心画朝游夕处风雨晦明於此绸繆欣戚悲嘯於此寄托习之也久述之也详爱之也深言之也长窃以平子归田未

极隐沦之趣安仁闲居未穷林壑之观爰因胜地勒以雅辞赋曰伊龙眠之西隩历岫岫之盘互乱溪流而浅涉指层岭而遥度经樵径之欽崎偃松出而当路罗奇峰以四周簇青林而万树中有幽人邃馆居士衡门碧梧清沼萦带修垣桥贴波而曲折柳覆堤而偏反高槐郁其菁葱榜双扉以赐金之园其西轩也斋名学圃古屋素题草缘堦而径仄梅入户而枝低架茅宇以文杏葺圭窠以香泥所以鞠渊明之衆子偕老莱之逸妻仓困攸居井臼是宅女获男臧鸡栖豚栅库藏名酒积嘉核荫桂丛而宵窆期以宴而以息其南轩也长廊委蛇暎日迎曦燠馆温室风静帘垂俯海棠之香国纷娇姹之奇姿弄脂妍而粉膩酣春日而迟迟乃其朱栏翠幕姚魏所家鞞红茜紫一捻名葩长安跨等身之树洛阳矜径尺之花亦莫不露湿烟霏散绮流霞瞻曲房之南隅压檀栾之修竹簣簣万个琅玕千簇筠粉吹香纸窗分緑月落而影偏空庭雪压而声锵寒玉斗室生白来往天光乃敷几列胡牀拥乱帙凝清香蒲团挂壁筇杖倚墙攸宁攸芋以咏以觴盼远松而延伫藉柔萸而徜徉其东轩也则历幽篁之宫入古梅之里苍干莫名糺枝难拟或昂藏而披云或支离而拂水或凌烟而乍垂或拂地而腾起挺新条以敷华积古苔而绣紫倘邓尉之可方伊罗浮之足齿虽珊瑚碧树之交柯亦难并乎斯美中则有堂名香雪楼称鹤背檻浮花气之端户掩香光之内雪皑皑而千堆鸟鹤鹤而羣队庶可以蹑王乔之高踪接洪崖之芳欵时则春回幽谷香动寒岑登楼遥瞩地僻花深玉田琼圃雪苑珠林神恍忽而震荡芳寒烈而来侵御文貂之紫绮抚阳春之素琴何方壶之不可复即惧斯乐之难任沿池而北桃溪横带深红浅白俯临湍濑夏至而緑阴繁春深而红雨霏纤石径於中央衬疎杨於水外迤北而北轩在焉前场後圃左冈右池峰桐垂荫下植将离或倚云而孤特或当堦而纷披水榭西构芳塘涟漪红蕖碧藕花叶参差鹭起而珠露倾蝉吟而香风吹又有芙蓉的烁柳丝历乱疎枝密叶被於堤岸入春和而早荣当秋清而晚灿其地则羣峰回合襟带田畴岭峤亘而虚敞溪环折而深幽松屏冠於岩岫葑屋隐於平丘烟云生而出没忽恍惚其不可求其室则南窗北牖延爽招凉碧纱外卷桃笙内张如艇斯泊枕藉沧浪如台斯屹云山苍茫裁芰荷以为衣摘莲实以为粮当炎曦之方驭喘黄犊於翳桑爰斯地之萧散微风起於曲廊却絺衣而不御挥纨扇而不扬实清景之可娱觉空山之夜良其周乎四轩者则有紫藤碧筱芳槿红兰或高引而垂幄或密比而成阑循石磴而遥跻飞阁耸於北岫临杏圃而结撰盛春晖之绮观其亭则也红倚山曲江临水芙蓉溪亭在河之浹朱櫻冠乎崇冈乔柯暎乎清沚循花溪而南征赖以憩乎游趾其圃则早韭百本晚菘一畦丹茄紫姜霜薤露葵子母余犀水陆蹲寒匏并蒂甘菊连枝莫不葳蕤於北圃蔓衍乎东篱朝荷勑而可乐夜翦而如飴其果则紫栗千房青梅百斛柿美乌棗梨甘大谷安石珍榴火齐赤玉西域蒲萄磊落盘屈何必移卢橘於江南走荔支於巴蜀其泉则霽沸如珠甘芳若醴漱灵石而常清沈丹砂而愈旨既潏洄於堦下复潺湲於花底贮之为淙砚之池引之为灌蔬之水虽地狭而境偏信泉甘而土美先生之处此也谢轩冕远尘嚣叹人生之形役悯机事之日劳惟白云之可怡誓栖息於临臯旷天地而睥睨何有乎螺贏之与二豪爰因四序周乎四轩抱书携笈移琴挈尊逐花时之早晚量风日之凉温拥万轴於坐隅手一编而朝昏怀古人之可见接羲轩而道存尔乃葆光味腴崇简敦素息虑屏思纳新吐故惟万物之齐观常蔬水而自裕时则佳辰淑景日丽风和或蹋径草或倚庭柯或攀危磴或临素波珍禽啼而未歇锦鳞聚而遂多濯尘纓於磐石藉文茵於浅莎翹首天地临风浩歌落花落叶伤如之何当其春雨一犁其耕泽泽麦覆西陇草回南陌鱼戏春水生鸂鶒鸣杏花白先生乃服春衣振轻策循陇亩而劝农眺春云而自适迨夫秋潦澄清木落羣岫柏弄色於寒初枫染丹於霜後千岩烂若披锦万壑殷如攢绣殊形异采



不可殫究先生乃命巾车挈茶铛坐丹岩临赤城朱霞暎乎朝旭绦云弥於太清较四时之景物惟秋晚之莫京其游迹所至也则有寒潭激碧石马当路飞泉媚笔皎若纨素带麓南村沿溪别圃修篁隐衲子之宫茂树表贞臣之墓纵步履之所如随攀涉而成趣噫嘘嘻四时之序有代谢九逵之轨无终全躬耕钓以自给甘笋蕨而长年慕彭泽之避世希香山之乐天侣春花与秋月休吾生之自然歌曰壑有涧兮山有岑白云度兮笼轻阴竹隴花田春似海板桥流水闭门深鸟隔树而关嚶鱼唼藻而浮沈鱼鸟各无意听我归来吟遥遥千载後何人知我心

## 双谿芙蓉赋

惟双谿之澄澈二水会於庭除出层峦而迢递经石堰而舒徐生芙蓉於夹岸涵秋露而分散後岩桂而发采侣丹枫而锦铺其为色也艳而不妖丽而非侈叶铺翠幄柯临清沚质抗金风神含秋水每迎凉而先荣近严寒而未靡联远浦而搴芳毓千丛而霞起或朝淡而夕绯或初碧而乍紫或以并蒂呈华或以独秀为美或露滴而初开或风翻而乱绮或倚松如静女或临渊似君子西蜀号为锦城石卿称为仙史更有湘江异种厥名三醉初则蕊含浅黄淡质凝翠暮则一抹微红朱丝如织越三日而茜紫朱殷不可思议或先或後种非一类于是纵轻棹凌若耶放艇则晴霞一色回楫则弥望万花舟移而丛密影动而波斜晚蜂踟躇于寒蕊游鳞噉啜于晴沙其在晨露初曦花光如拭夕波方起景非一色或披衣而晨兴或流连于日晷任拟似之徒工非笔墨之所能测

## 文端集卷三十七

# 卷三十八

钦定四库全书

文端集卷三十八

大学士张英撰

笃素堂文集二

颂

圣学时敏颂【有序】

【臣】闻自古哲王既优於圣性必加以圣学盖精义微言备於往牒常经大法具有成规是以涵养德性则典学宜先经纬世务则明理为要本仁祖义则古称先所以兴大业而跻盛治也恭惟

皇上躬上圣之姿赋天亶之哲虚怀向学本於性生自临御以来修释奠之上仪首崇学校举经筵之钜典靡间春秋所谓观乎人文以化成天下也臣英尝稽讲帙之制两汉以来已肇其端唐宋诸君详举其事汉宣帝诏诸儒讲五经同异於石渠阁光武每旦视朝罢数引公卿郎将讲论经理唐太宗聚四库书於弘文殿置弘文馆於殿侧选文学之士令更日宿直与之讲论前言往行宋太祖虽在军旅手不释卷尝谓李至曰人主当淡然无欲朕无他好但喜读书多见古今成败宋真宗始置侍读侍讲之官以双日御经筵以只日诏儒臣讲读宋仁宗置崇政殿说书又作迺英延义二阁以礼儒臣明代讲读之员甚备公卿执政多由之此皆汉唐宋明以来英君谊辟崇儒重学以兴起太平焜耀前纪者也然以方我

皇上昧爽听政即御讲幄当宵衣旰食之不遑而延见必有常度复盛暑祁寒之不辍而精勤屡逾恒规研究於二典之学而道接唐虞殫精於四子之书而心传孔孟以古史为昭鉴而观考亭涑水之鸿编以性理为渊源而穷太极西铭之微义不更为超前古而迈百王哉且

温纶屡颁欲尽咨询之益

天顔下霁不辞覆讲之劳辨义则理析毫芒敷词则声振金石既横经虚受当

弘德之深严更披卷澄怀御

懋勤之清晏百家罗列穷奥义於天人八法兼精间游心於翰墨斯其逊志勤敏真可谓博而有要精而能该者矣臣英自惭謏劣无似猥蒙

圣恩拔置讲帟俾侍从於细旃广厦之间数年於兹矣仰

圣学之崇高觐

睿怀之冲挹言之难罄知之最亲愿殚愚忱敷扬实德非敢为虚词溢美以自蹈贡谀之嫌也  
谨拜手稽首敬献

圣学时敏颂一章颂曰惟

皇天纵睿哲文明抚绥区夏覆冒函生万物斯覩百度惟贞仁符地载健比乾行尧羹舜墙左  
规右桀铭日师汤惜阴追禹道德之林仁义之府翱翔优佚错综参伍金华列席冠佩济跽发  
谟陈典源遡陶唐探河观洛道契轩皇春秋二仲修举有常日御万几心周九服扶桑衔照铜  
龙始旭六卿毕对旋临讲幄韦编在前

宸衷肃穆孔顔妙绪邹鲁微言治平之矩入德之门六经啓龠诸子滙源探微月窟抉奥天根  
尚书肇起危微精一益赞天工箕陈皇极爽猷旅獒旦书无逸宏纲大法

圣人惟则大易精义既法而奇義文画象周孔属辞裁成万类囊括二仪开物成务

圣人惟师穷理於经徵事於史兼陈法戒深参道揆义镜紫阳博综涑水网罗百代寻源索委

圣学弥广

圣志弥冲

温纶屡谕覆讲宜崇诸臣敬答恐劳

圣躬

帝曰俞哉斯道何穷辨析精微昭宣义蘊吐词为经发言成训炳炳琅琅金声玉振葑菲不遗  
刍蕘不摈寒暑靡辍宵旰维勤内庭清昼绡帙如云蒐罗图史研究典坟关闽微义濂洛遗文  
讲贯之余游心藻翰虎卧龙翔奔会神腕掩映鑪烟缤纷玉案堂哉皇哉天章紉纆洪惟

圣学冠古烁今沧溟东岱莫并高深天地为轨位育为心助流鸿化昭垂雅音自愧小臣谬随  
深殿日侍宸严数承清宴蠡测管窥亲闻灼见仰瞻

睿勤历久靡勑惇史之职有媿则扬巍乎难名焕乎有章历稽前牒谁与颉颃赓扬作颂垂示  
无疆

## 昇平颂【并序】

臣窃惟自昔国家席累叶之鸿休抚守成之大业承平既久类必有非常之功以荡涤瑕秽而镇抚生民然後皇威遐邇社稷尊安有泰山四维磐石苞桑之固焉在诗有之曰薄言震之莫不震叠在书有之曰其克诘尔戎兵以陟禹之迹方行天下至于海表夫以成康之邳隆犹以张皇六师为大训载于诗书信有徵矣汉以兵力定七国文景之业弥光尤已事之着明者哉盖国家之有师旅征伐犹天地之有霜雪雷霆也非霜雪则万物烦嚣之气不肃非雷霆则四时堙郁之气不宣非师旅征伐则乱臣赋子无所讐服惩创而不敢肆故霜雪所以开阳春也雷霆所以啓晴霁也师旅征伐所以靖祲氛致太和也天地仁爱万物之心与圣人仁爱万民之心皆不得已而托之乎此者也我

国家自

世祖皇帝戡定大乱

皇上抚馭区夏以来待藩臣之恩良渥矣处之以重镇视之以心膂睦之以懿亲极之以高爵显秩参之以膏腴禄乃物太甘则自蠹兽久畜则思触富贵极而骄悍生骄悍生而反噬起平居则怙势席宠以荼毒朝廷远方之赤子乃下尺一之

诏则环视而起一方作俑诸方应之以盗弄

天子之戈於潢池举平日

朝廷所封之疆土所属之将士所简閱之器械所赉予之金钱悉藉以抗

天子之命据固阻险伏莽跳梁自非大奋我武以芟刈而薙猕之何以昭臣子万世之经而彰我

国家四征不庭之罚乃自始乱以来授钺

天宗分驰

禁旅虎臣四出鹰扬奋兴以渐次削平迄于今八载海内荡定昭明无纖芥根株之遗可谓盛矣臣窃念身依阙廷趋承

讲幄者五年

简侍近密者又四年其远方兵威克捷之奇战胜攻取之略戈甲组练之华折冲陵轹之势【臣】虽不得而闻且见也若我

皇上八年来宵衣旰食之心则臣知之最深念赤子罹於汤火急欲一旦出而登之衽席之上每复一城一邑必

严谕以无扰百姓至仁也武臣进止皆恭请

庙算以行万里之外视如眉睫之间凡一经

圣虑则险者平难者易成功奏绩刻日而应至神也简任将帅以武勇智略为经以持重宽爱为纬畴咨而举推毂而行至慎也减膳撤悬力崇简约以佐天下兵食之需故军兴岁久常赋不益至俭也阃外将帅时赐手勅申诫其有能靖寇抚民者则

洒宸翰制诗篇解御服以褒异之至厚也数年来屡避正殿朝贺一方底定宫中必焚香亲告

天

祖至敬也未明求衣昧爽听政日昃不遑暇食夜分省览章奏不辍以筹画天下至劳也捷书至必敬告两宫亲承色笑懽声溢于殿陛之间至孝也殲渠魁而舍胁从逆命者诛之归命者抚之赦过宥罪布大诰于天下至信也天下之人但见八年之内殄灭羣寇绥靖多方震古踈今武功若此之盛而能尽知我

皇上深宫之中神武胜算焦心劳思如此之不易易哉今者十月克复云南贼渠授首十一月十三日夜露布至

皇上时御乾清宫览奏臣等叩首称贺

御榻前

天颜悦甚顾谓臣等曰朕今日为天下万姓喜追思逆乱以来官民咸被荼苦更复惻然于怀臣等谨合词对曰

皇上仁爱之心通于天地斯所以为万世开太平也圣衷之一念不忘百姓者举类此臣又伏念古者雅颂之作以昭德纪功周宣王平淮北而江汉兴歌唐宪宗平蔡州而淮西有颂若以方今日之功烈不足以当百之一当时之臣犹能撰述诗颂铺扬国美垂布金石焜耀史册况我

国家数年中东戡闽粤西定陇蜀北平察罕南靖滇黔奇功茂烈炳炳烺烺不可胜纪【臣】职居惇史载笔左右其敢以固陋自覆而不勉缀赓扬之末班乎谨撰颂八章曰平闽平粤平陇平察罕平蜀平滇各指一事言之也曰泰阶平归功

庙谟也曰武功偃乐成功重休养也统名之曰昇平为万世无疆庆也诗曰吉甫作颂穆如清风则【臣】滋愧也

平闽

闽峤峨峨闽海泱泱滩石剑立篁丛弩张狂童逆命爰阻我疆势连长鲸浊乱海邦

王师奋武载旆皇皇东由姑蔑西经豫章如霆击枯如发撓銳系颈以组俘于明光厦门逋寇归我帆樯一民不殲

神武孔将

平粤

古称百粤象郡羊城昔建南藩以奠东溟乃生?獯怙势凭陵不孝不弟为乱之萌

天戈所指游魂载惊既归而命既抒而诚狼子反覆黄钺斯行梟巢尽覆瘴海弥清毒潭鳄埽合浦珠明五岭烟峦南拱

神京

平察哈

北岳为镇东海为垠部落环卫绣错鱼鳞中有察哈旧我有民居我肘腋为我藩臣蠹兹负德忽煽烽尘元老秉钺我马駉駉师惟一战

命不重申殲彼强寇不返只轮魁渠函首献于

紫宸

太宗戡伐前烈维新

平陇

陇西泾阳俗剽民劲乱臣反戈河北咸震我师既出逐北乘胜顿于坚城岁靡有定

帝曰元老往敷朕训示之以威怀之以信矢不遗鏃兵不折刃崇墉夜开頰首归命投戈而諱悔罪思顺秦陇千?惟以歌咏

## 平蜀

古惟西蜀国号鱼鳧剑阁嶙峋云栈崎岖一夫扼险万夫叹吁况峙糗粮千里沃腴贼实藉之稽我

天诛将军凭陵蚕丛坦途既克保宁遂入成都孤雏咸殪腐鼠莫逋夔门巫峡重厘版图

皇威赫赫时听巴歛

## 平滇

诞惟滇寇倡乱之先攘臂昆池窃踞湘川

王师萃止如云蔽天威武撻伐声震八埏巨凶既殄余烬犹然寄命孤城析骸经年元戎奋武伐鼓渊渊铁桥失险滇城摧坚剪彼鲸鲵膏我戈鋌乱源祸始藁街特悬

## 泰阶平

六军振旅九服来同桃林归马扶桑挂弓星辉云缦岳朗川融休哉鸿烈谁其始终辅弼之英貔虎之雄只受成命谟由

圣衷智勇天锡濬哲亶聪握机镜要神运枢中仁慈恭俭昭格

苍穹巩万世业定此肤功

## 武功偃

我有弓矢愿言囊之我有戈矛载衅藏之膏泽万物云行雨施譬彼稂莠翦伐无遗今此良苗滋溉攸宜仰承帝祐俯恤民疲崇文惇教返于恬熙仁风恺政浹髓沦肌

天子万年如天无为垂衣端拱诞受崇禧

## 至德弘仁颂【并序】

稽古称幅 之广曰东渐於海西被於流沙朔南暨声教讫於四海可谓盛矣然东南以海为域西曰流沙则犹在今甘肃之境朔方亦未尝明言所至之地历三代以至汉唐宋元明王化之所及车书之所通皆未有如我

国家今日之无远弗届者也

皇上视荒远之人无异於宇下之赤子凡跂行喙息者皆欲令其安全生养而纳之於轨物之中尽两间之所覆载不忍一方一人不获其所书所谓光天之下至於海隅苍生共惟帝臣岂非圣人之心前後古今一辙哉曩者喀尔喀虽数通职贡未尽臣服今者向慕

德威倾心内附欲列藩臣

皇上厚加存恤给地安置赉以牲畜刍粟恩至渥矣爰以康熙三十年孟夏之吉

车驾亲自拊循羽林之士云附景从至于边徼之地七旗喀尔喀君长等帅其衆十有余万人倾诚効命於龙旗鸾旂之前莫不扶老挈幼稽顙流涕感恩呼吁皇上育以至仁抚以至德锡宴颁赏咸从优渥发德音下明诏量其向化之诚予以世守之爵其族衆皆赐秩有差复为之申法禁布规条俾与北藩四十九族同沾恩泽永遂生养猗欤盛哉我

皇上之德丕冒比天地照临并日月会合如风云濡泽若雨露昭明法律如三光之丽天底定方隅如四维之奠地恩赉礼成羣心欣悦普天率土莫不歌颂前史纪载罕覩斯盛【臣】忝居惇史之班敢对扬盛美只献颂曰维彼远人虽处漠北自天覆之岂有方域干止罔克圣心悯惻好生之仁维帝时则【一章】

靡憚暑雨跋履山川安人是亟怀远宜先涤其危苦赉以生全稽顙至止欢动八埏【二章】

何以宴之旨酒维盈何以锡之庭实百朋庞眉皓首扶杖来听天膏所沛万类咸荣【三章】

自古仁人继絶举废存其名号勿殄厥世永为北藩版图是隶带砺之封爰及苗裔【四章】

圣慈荡荡令甲煌煌维仁是育维义是纲教以亲逊尔无胥戕食我茅土率我典章【五章】

我德既敷我武孔扬如云如电戈甲腾骧如虎如貔骑官蹶张天威赫耀震肃遐荒【六章】

自兹远人保聚生息如溺斯拯如槁斯植耕田凿井惟帝之力锡爵分珪惟

帝之德【七章】

驾转六龙云生九陌甘雨载涂泽我疆场人和致祥敷天悦怿盛举永光昭于简册【八章】

圣德仁明武颂【并序】

盖闻宏胞与之量者不以中外殊观建久远之模者不以烦劳易虑是故事以除暴为大凭陵边境则必诛虐害丑类则必诛背恩弃誓则必诛必不使遐方赤子犹有扰其覆载之天者仁之至义之尽也功以克断乃成焦心劳思而不辞栉风沐雨而不辞涉远踰险而不辞必不使



凶顽梗化尚得留其牙蘖之害者谋之远虑之周也骏烈冠乎百王英武迈於前古如我

皇上今日之灭噶尔丹者是已臣谬以譴劣微材获侍从于细旃广厦之间者最久窃窥

宸衷所注惟以爱养生民救宁远迹为至计凡在覆育之下者皆欲以安全遂其生业有厄鲁特噶尔丹者在当日原为请

安纳贡之国乃孽由自作狡诈狂迷与喀尔喀为仇喀尔喀既归附于我为

国藩臣而噶尔丹陵虐侵杀之不已以至阑入乌澜布通之地为我师大败几殲其族彼当困迫则设誓更不敢犯皇仁宥之於前矣自以僻处塞外怙恶不悛凭恃其衆蚕食邻壤肆行悖逆潜入巴顔乌澜之地奸谋叵测思以煽惑蒙古诸部落害将滋蔓夫稂莠不翦则无以安嘉禾蛇豕不除则无以靖疆宇大哉

王言噶尔丹若不即行剿灭边鄙何由得宁此我皇上爰整六师不得已而远征之至意也分大兵为三路以成犄角之势筹粮饷练火器砺兵仗精铠甲鼓励将士秣马赏兵出帑金以百万计自钜至细无一事不在天心筹画之内宵衣旰食谋虑周详此我

皇上经营于法宫之中决策于樽俎之上者然也亲统中路大兵以三月出塞戈戟耀日旌旗蔽空军威之盛谷撼山摇向来水泉乏絶之地经

指示而泉涌向来平芜未青之时迎

銮舆而草茂百灵协应万骑饱腾我

皇上减膳省餐以与六师同甘苦饬行阵明纪律谨刁斗严斥堠日日淬砺而申警之拊循而赏赉之熊黑之士无不奋勇百倍此我

皇上勤劳于帐殿之中振肃于涂次之际者然也噶尔丹夙称诡譎亦恃险远度瀚海沙磧素无水草难以飞越忽闻

至尊亲临天威所慑震骇惶惧弃其髦倪輜重鼠窜狼奔冀延残喘我

皇上万全胜算料彼必溃遁而西预遣将军领兵堵截圣躬率兵师奋勇追逐穷寇狼狈已极而劲军适当其前一鼓而剿灭之殲其衆俘其子女收获其牛马牲畜数十万逆命者诛之来奔者受之一日之间而国烬矣噶尔丹之支吾跳梁总在

睿算指顾预定之中纖毫不能越吾之范围如摧枯拉朽探囊而取耳此我

皇上靖寇于七旬之内成功于大漠之西者然也顽梗去则边方靖边方靖则远人安从此敷天絕疥癬之疾率土享宁谧之福

皇上又安中外之心慰矣时雍熙皞之化成矣盖由我皇上以彼苍仁爱之心为心以乾元刚健之德为德不憚一身之烦劳而惟求万方之康又不怀一时之安逸而必谨百世之防维猗欤休哉【臣】于斯举也管窥蠡测见我皇上丕冒之至仁审机之至明经世之神武超越从古英君哲后

圣德神功巍然炳然为史册所未有也岂【臣】寡闻渺见所能摹写其万一者哉谨作颂九章以附于赓扬之末

### 一章

维

帝至仁覆帔惟均恩周九服化洽九宾谁其扰之痼瘵在身曾经宥释誓言载申

### 二章

维

帝至仁化被无垠狡寇鸱张如蜚抗轮自膏斧钺以警不臣彼投戈者咸与维新

### 三章

维

帝至仁德配高旻荡荡王路彼自罔遵立殲封豕尽滌边尘凡有血气莫不尊亲

### 四章

维

帝至明建威消萌雷霆之击必待

亲征中权黄幄西北连营神谋胜略巨憝以平

### 五章

维

帝至明纪律师贞壁垒宜肃铠仗维精宣劳慰谕以励羣英

天戈所指计日功成

六章

维

帝至明洞察彼情

六龙天降兽骇鸟惊自焚其巢宵遁西行一鼓而烬值我劲兵

七章

维

帝神武深入其阻遐荒愚寇惊瞻葆羽如兽触樊如鱼困釜奔?不遑孰敢予侮

八章

维

帝神武赫然斯怒瀚海飞沙罔憚劳苦自秉宝刀躬持玉斧率师迅逐计日而五

九章

维

帝神武万方作覩计安黎元冒寒触暑七旬灭贼归歌杖杜伟烈英风超迈千古

圣武三临絶塞荡寇功成颂【有序】

皇帝承天景命临御宇内劳

九重之宵旰谋万姓之乂安所以抚绥而教养之者至矣备矣蠲租之诏岁必数下史不絶书嘉惠元元动以数百万计积贮之令行於丰稔徧於州邑所在有数十年之储凡此无非为百姓计也曩时三逆盘结为天下之蠹将来必致荼毒生民於是

大奋威武翦除而廓清之盖

圣人之心欲使薄海内外戴发含齿之氓咸遂安养共乐生成同登仁壽之风永底时雍之化

深宫睿虑之所孜孜图维自朝至於日中昃不遑暇食者惟在乎此也然又安中土之心甚切则不得不安边徼欲安边徼则不得不除寇贼此理势之必然者斯时荒远之区脱有梗我

王化伏莽跳梁之人则将来必益为边患则必调发转输以远烦禁旅劳顿九州之民此

圣心所以惓惓焉为国家计久远为生民谋休息为万世立太平必欲荡涤此狡寇厄鲁特噶尔丹者盖所以安边塞也威远人也实所以又安中土也维丙子季春圣躬亲御六飞远度瀚海戈甲耀日旌旗蔽空风驰云集俯瞰贼垒如自天而下为狡寇之所不及料披靡奔溃兽骇鸟散劲旅堵截一鼓而草薶禽猕之贼虽遁迹荒远而部曲尽矣牧畜空矣奄奄之息何能久存据庸衆之识似更不烦

车驾之再临王师之久驻乃

宸算制敌迴出寻常留将军於塞上以困蹙震悚之圣躬以丙子冬复临边塞渡河至鄂尔多斯之地经画布置丁丑春又

亲至宁夏驻蹕於狼居胥山遣师搜剿盖

圣心以车驾逼临其地则我之将士百倍奋勇而彼之部曲惶骇离畔振如雷如霆之威凶渠自褫其魄沛如雨如露之泽党与咸贰其心所以俘其子而来献者彼之邻国也遣使而输诚纳款者彼之腹心也贼虽狡悍斯时四顾无亲入地无路以膏斧之躯为饮鸩之计惟有自即殄戮耳安能出

圣谟成算之外哉总由我

皇上躬亲指示奇正兼施恩威并用视絶域於掌上罗犷兽於阱中故成功若斯之盛也盖非至明无以审机而不惑非至诚无以历久而不倦非至断无以成功而不疑而总归於

圣心之至仁视边方为一体而不忍数罹其灾也登寰宇於衽席而不忍以一事烦苦吾民也是以

三次远临絶域跋涉山川冒触寒暑

亲举玉趾恒饮浊泉风雪则屏去帐殿减餐则俯同士卒挥黄钺以先驱擐甲胄而达旦指麾形势则极在巘在原之劳筹画机宜则穷九地九天之秘焦劳烦苦不可殫述

圣躬皆亲历之仁天下子万民之心至矣蔑以加矣今者逋寇悉平荒远无不臣之国边烽尽息诸蕃皆乐利之年大功告成盛典斯举以副我

皇上义安中外之心成我

国家太和熙皞之化永永万年至於无极【臣】窃惟圣武三临絶塞殄寇宁民焜耀史册上下千古无与比隆谨撰颂九章以述盛烈颂曰

维丙子春

圣武丕扬组练十万气吞朔荒

帝亲率之沙碛腾骧殲此獯膏我斧戕

右一章

维胸臑河远带荒服自

天临之泉甘草緑立覆其巢挥戈西逐万古不磨圣人之躅

右二章

寇方奔突西遇我军风埽霆击狐兔披纷饱我卒伍殄厥丑羣

神谋指授耆定大勲

右三章

维丙子冬雨雪载涂黄河曲岸

銮辂驰驱除恶务本宜絶根株时哉勿失洋洋

圣谟

右四章

河流浩浩虎旅云屯震之以武绥之以恩风驰青塚化洽乌孙呼韩接踵稽颡

至尊

## 右五章

天与不取昔人所嗤张我精銳焮彼饥疲乘机维哲扼要乃奇

圣人之智匪衆所窥

## 右六章

维丁丑春经武西偏狼居胥山古史所传

天子韎韐威畅八埏远鄙西汉勒铭燕然

## 右七章

都邑聚观孽子成俘鸱张鉅寇一夕殄诛彼胁从者咸输尔孚

巍功骏烈振古所无

## 右八章

玉关万里靡尘不清覆载之内咸震

天声外安中义亿载功成金函玉检永颂昇平

## 右九章

圣德勤民颂【有序】

维丙子丁丑岁以春以冬

圣躬三驾絶漠以忧劳万民之故为久安长治计踰越沙磧蒙犯霜雾浊泉菲食日以供御擐甲胄以终夕摩干楯而达旦北遡黄河西践狼居胥翦除狡寇以安边圉以靖区夏使永杜馈饷裹甲之萌

圣心之勤民深矣至矣不遑启处三载于兹迩年以来中外无疥癬之疾服教畏神者远自日出扶桑极於流沙莫不梯山航海奉琛载贄八字昇平四民乐利皆圣天子之所经营缔造栉风沐雨垂四十年而致斯盛也承平奏矣

圣衷念此时四海之内为民患而未至底定者则莫大于河以言民生则淮扬千里未有奠居

以言国计则漕挽天庾为南北咽喉之地以言修筑则岁费水衡钱以钜万计以言泛滥则城郭耕桑时时可虑是今日勤民之事洵无有急于此者矣在河道诸臣或识囿一隅而不能周知全势或苟且一时而不能经画久远或拘守已见而不能广集羣谋或徒糜金钱而不能收集成效我

皇上焦心劳思讲求两河者数十年考究形势酌量高下揣度旱溢每廷议时恭聆

天语则羣心豁然盖诸臣见其偏而

圣心见其全诸臣谋其暂而

圣心图其久故爝火曦照若斯之悬絶也已卯岁春车驾临河上

躬亲指示淮黄之势始洞若观火诸臣奉

睿谟以集事而安澜可永庆矣

圣心念治安天下之大计兵革既息则莫要于察吏宁民布德施惠以通輿情而联衆志

巡幸东南颁布德音以次第举行之留漕粟以平糶蠲逋赋以阜民减税课以裕商广取额以作士涤除刑狱宥释过愆奖励官方存问耆老凡所以勤劳百姓者莫不周详委曲殊恩渥泽洋溢汪濊可谓至矣

銮輿所莅供给之费一丝一粟不以烦百姓严飭从官无有侵扰

万乘所历市不易肆农不辍耕近光

天顔懽声雷动焚香而祝

万壽者所至填塞马首如广野云屯沧海潮集

皇上皆温顔慰谕之瞻云就日真旷古之所希覩盖我皇上以天下为家故巡省风俗皆绸缪户牖之计也皇上以万民为子故婴孺遶膝皆抚摩顾复之恩也且只奉

慈宫朝夕承懽孝德超于千古率

诸皇子左右提命景福迈于百王【臣】幸际昌时恭闻盛美懽呼忭舞罔知所极不揣謏陋敢撰芜词谨献颂十章章八句

## 一章

赓扬

圣孝振古所稀金根玉辂日侍

慈闱万姓稽首彩云六飞以天下养六宇春晖

## 二章

河源星海淮号鸿流稽天浴日为万姓忧

亲举玉趾相度咨谋安澜胥庆禹功式侔

## 三章

东南岳牧辑瑞来同袞对

天颜肃肃雍雍仁风翔洽恺泽醇浓四方民隐达于圣聪

## 四章

爰溥国储軫此艰食蠲逋已徵数盈万亿阜民之生恤商之力尧衢荡荡载歌

帝德

## 五章

百郡羣吏整饬联常简兹良牧宠以服章

训辞温蔼锡赉辉煌时迈之典事在激扬

## 六章

龙旗所指嘉气冲融释辜宥过恩逮臣工桁杨尽偃犴狴咸空无微不照上厪

宸衷

## 七章



山海保障熊罴是资训练嫺习武不可弛爰遵江浒营列水犀申明令甲以肃鼓鼙  
八章

菁菁者莪育彼中陵采芹采藻集于泮林念兹微末圣泽溥承诵读之士霞蔚云蒸  
九章

天章宝翰溥及臣邻人怀拱璧家蕴奇琛龙翔紫渤凤翥高旻名山福地光气常新  
十章

爱戴羣情如依父母如潮如海如林如藪扶杖而迎亦有黄耇酌彼兕觥

天子万壽

圣德仁民天锡万壽颂【并序】

【臣】尝窃考董仲舒有言曰人君每事未尝不求端於天天以爱养生民为心凡所以子惠而煦育之者一付於建极之一人恭惟我

皇上天亶至圣慈爱为心仁育义正为德【臣】自备员史官以来侍

讲筵直

内廷者三十有余年於

皇上早作夜思之际宵衣旰食之顷无一时不以爱养生民为心无一事不以讲求利济为主其养民也则田畴树艺不厌其详水旱灾祲务求其备其教民也则敦本明伦必先其重人心风俗务底於淳蠲赋之多史册罕闻每岁数百万周流公溥海内无不被之德省刑则矜恤惻怛法古刑期无刑之义寇攘蠹贼所以害吾民则變伐埽除之必尽虽

命驾三驱栉风沐雨而不以为劳水潦堤防所以卫吾民则殫心竭虑方励精于南而又营念于北务俾底定以利耕桑察吏则博求循良有一善之可以裨吾民必显扬之不遗以至省方求瘼疾苦必闻怀绥遐方无远弗届盖

圣心无一念之不注意于斯民而天下之民涵濡沐浴于

圣人之心亦无不鼓舞振作乐利感戴

圣人之化熙熙皞皞如万物之鼓动于太和而不觉以此而言德则曰盛德曰天德以此而言仁则曰至仁曰纯仁夫德既合天则天心眷佑万寿无疆之庆【臣】再赓天保九如之章矣此臣悉之于数十年之久

起居必覩警欵必闻知之既真且熟而天下之感颂圣人者在朝闻之在野亦闻之故不禁其言之详也独【臣】年齿既老且謏陋无文不足以抒扬万一敢竭其愚陋而质言之谨献颂曰食为民天古昔所陈祈谷上帝必谨元辰茫茫禹甸耕获畇畇一夫不耕上厪紫宸猗欵盛哉此

### 圣心养民之仁【其一】

圣有谟训诰谕谆谆务去尔诈务返尔淳民之质矣日用明伦肃肃章缝咸捧

温纶猗欵盛哉此

### 圣心教民之仁【其二】

赋有常经宇内式遵孰是尽蠲振古莫伦动以百万大地皆春鸿慈浩荡藏富于民猗欵盛哉此

### 圣心蠲赋之仁【其三】

大化翔洽间有未纯欲并生哉入我陶甄赦过宥愆咸与维新好生之德洽於蒸民猗欵盛哉此

### 圣心钦恤之仁【其四】

蠢尔弗率扰我边尘侵軼疆圉荼毒生民

亲举玉趾三驾重申殲厥渠魁化彼未驯猗欵盛哉此圣心除暴之仁【其五】

桑乾泛溢淮黄久堙谋民奠居莅止河滨经营胼胝不啻

躬亲南耕北获成功如神猗欵盛哉此

### 圣心底定之仁【其六】

州邑远吏抚民最亲一善必録简畀

彤宸或臧或否民依是甄民所与者锡以

宠纶猗欤盛哉此

圣心察吏之仁【其七】

诗陈时迈礼重躬巡闾阎疾苦

揽辔咨询蒸蒸黎庶济济臣邻光天之下甘雨阳春猗欤盛哉此

圣心省方之仁【其八】

凡在宇内覆载维均穷荒絶徼痼瘵在身日月所照声教咸遵

深恩渥泽蟠际无垠猗欤盛哉此

圣心怀远之仁【其九】

维天盖高穆穆化淳

一人体之徧育羣伦德积于世庆备于身于万斯年何福不臻猗欤盛哉此

圣心合天之仁【其十】

文端集卷三十八

<集部,别集类,清代,文端集>

# 卷三十九

钦定四库全书

文端集卷三十九

大学士张英撰

笃素堂文集三

表

恭进易经参解表

伏以

至道开於河洛发羲文周孔之微言

奥旨贯乎陰阳备彖象卦爻之精意参稽古训托藜火而重编侧近

光華食野芹而思献俯慙謏劣弥切冰兢兹盖伏遇皇帝陛下

道法天行不息

学同日进无疆尚书已讲於

经帙大易继陈於

黼座神凝简册

圣心探一画之先博极图畴

睿照启千龄之秘臣叨恩於禁籞祇奉

钦明窃有志於韦编欲窥象数自田何京房而後汉初各有师传逮濂洛康节以来宋儒始爲定论考亭本义之学洵可奉爲宗风伊川易传之文尤有资於治理窃惟广且大者易之体岂容骤测其精微奇而法者易之辞未许遽窥其典要必在发明章句譬如探源者先索其流务期剖晰文词难言得意者遂忘其象爰考先贤诸说辑爲参解一书时逾两期卷分六帙如涉沧海而寻畔岸祇堪自砭其愚顽窃仰泰岱而竭尘埃詎谓有裨於

高厚但念阅寒历暑分细旃广厦之余闲浥露研朱居秘阁芸香之胜地虽极知其芜陋敢不  
冒爲敷陈聊佐乙夜之览观庶备

九重之清燕伏愿

德符岐圣

治轶羲皇

履帝位而丰豫时登

养万民而讼师不作观损益之义化自洽於中孚察消长之几世自升於大有对时育物端居  
见天地之心知崇礼卑抚卷尽乾坤之蘊矣爲此具本谨称

进以

闻

谢

御赐书籍表

康熙十六年十二月二十日【臣英】蒙

御赐内府所藏书经大全四书集注文献通考共十有二函每卷首

锡以宣文之宝【臣】谨奉表称

谢者伏以

芝检芸函琬琰光腾几席

龙章凤篆珊瑚色映图书

颁石室之藏编荣分四壁作蓬门之世宝宠胜百朋仰浥

恩波俯窥学海恭惟

皇帝陛下

性符敦敏

德配文思

迈高宗典学之勤

法武王拜书之敬未央日晓牙籤早侍

经帙长乐钟疎玉烛犹辉

秘阁龙香绕砚罗金匱之鸿文蟾影临窗映缥緗之锦字?微言於曩圣

帝度冲容寻渺绪於陈编

皇仪渊穆学古有获用师说命之言日进无疆独悟羲经之义【臣】自侍观於

禁近尤难赞颂乎

高深悔謏陋之微躯荷

宠荣之殊眷華林西畔移家近傍

彤庭温室南隅入直常依

紫闥日分仙馥饫天上之奇珍时惹御香曳云中之清佩复蒙

恩赉

特锡鉅编一经肇启唐虞载传政传心之要四子嗣兴邹鲁备希贤希圣之资洵文字之本根  
尤道德之渊藪更念学不厌博当讲明乎钱谷兵农事贵有徵务综观乎古今上下爰

锡端临之纪俾观文献之全东观藏书人间罕覩西清華本菽苑争传印以蝌蚪之

天章紫泥星灿护以龙鸾之

内锦翠帙云封赐庠之邺架相辉总拜

君恩之重

宝翰之荣光互映益昭【臣】遇之奇比皇甫之载以一车士林同美似无忌之诏与千卷奕  
禩犹荣【臣】识陋面墙学慙窥管幼诵典谟之训难言四代之精微少习洙泗之言莫识六  
经之阃奥文慙平子授简敢赋两京博谢茂先入室惊看四库手披

凤纸目眩

螭文对册府之辉煌如获琼瑶之赐励樗材之愚钝敢辞铅槧之功伏愿

铭日常新

法天恒健

心存乎微危精一足包孔壁之全经

道溥於位育中和奚止鲁论之半部考礼作乐师古而治法冠乎百王戢矢橐弓偃武而文德  
昭乎四海矣为此具本谨称

谢以

闻

?谢

特擢翰林院学士兼礼部侍郎【康熙十九年五月初七日】

伏以西清要职谬分葦盖之光东观崇班复晋容台之秩湛露洊加於弱草仁风独拂乎樗材  
闻

命自天措躬无地【臣英】诚惶诚恐稽首顿首窃念【臣】葦门下士山陬竖儒幼读父书  
长承师训猥以鲁质幸际昌时忝南国之贤书值

登践鸿基之始【臣乡试在康熙二年】听当轩之胪唱适

躬亲大政之年【臣殿试在康熙六年】滥厕清葦六载回翔丹地仰承作育一编课试

彤庭给笔札於尚方杂琬琰於东壁

君恩实重【臣】遇尤奇骤兼柱史之荣早践讲僚之席螭头晓日持凤纸而侍鸾坡豹尾春  
云捧龙编而趋鹤禁追陪

法驾奉属车之清尘扈从离宫对直庐之皎月

天心垂照下鉴愚忱

帝谕特颁简居近密邱索探石渠之字丹铅校天禄之书

赐对无时奚啻玉堦三接近光有喜还借华林一枝陆贄之朝夕禁庭方兹?矣李泌之左右君侧殆为过之惧方切於春冰

恩逾深於夏屋允怀若惕报称良难兹盖伏遇

皇帝陛下

道重右文

功深典学

图畴考索精心独迈百王纪载蒐罗逊志允符千圣金华棐几由邹鲁而上遡唐虞

黼座牙籤自勲华而更稽河洛法戒观考亭之笔削精详兼涑水之编摹

圣虑弥冲时勤宣室咨询之益微劳必録俯念经帙讲诵之臣

沛涣汗之温纶悬日星之优诏褒嘉逾量铨叙增荣如【臣】尤愧謏愚叨膺显秩文非燕国詎堪侍草之名度谢曲江岂副秩宗之望仰前贤於策府恐玷儒风参华选於仪曹怀慙卿月顾一时僚采玉堂腾圭璧之辉知千禩韦编藜阁纪簪裾之盛敢不益思芹献勉竭葵诚许身窃慕夔龙致

主惟思尧舜伏愿

德崇乾健

敬法日跻

仁声溥而义问昭六服无忧梗化

文教修而武功偃万民偕乐时雍弥搜草泽之英益广弓旌之典斯臣等沐

海天之大泽常受祉於无穷托



日月之末光亦垂名於不朽矣为此具本谨称

谢以

闻

恩赐宫纱谢表

康熙二十一年五月十四日蒙

恩赐纱二端命编修臣杜讷賁付【臣】廷瓚送回江南【臣】?设香案领讫望

阙九叩首谨奉表称谢者伏以故里初归惊沐

殊恩於天上

圣慈垂顾远分渥泽於田间展雾縠之清华凉生革户披香罗之璀璨风满衡门叨异数而增  
慙抚愚衷而倍惕恭惟

皇帝陛下

德配神尧

勤媲大禹

文教彰而六经启蘊

武功偃而九服来同简儒臣於禁中置讲僚於座右臣猥以百生之奇遇际千载之昌期握筠  
管而侍彤闱抱芸编而趋紫闼备沾优渥曲赐矜容廼以衔土私情冒干

宸听复荷如天

圣度俯鉴微惊颁文绮於尚方錫精鏐於内府

龙顏宣室捧忠孝之

纶音马首东郊拜平安之

天语感深欲涕宠至弥惊自谢直庐遂遵河渚云深日近瞻冀北而怀思水涸沙淤望江南而

莫達朝沿柳岸心依黼席之前夜泊鱼矶梦绕金铺之侧逾四阅月始抵乡园适蓬蒿初返之时正綺縠遥颁之日荣生里巷争识

圣朝礼下之隆喜溢亲知共指微臣稽古之赐冰蚕丽质当暑弥清雪茧轻绡临风欲举爰选金鍼玉尺花鸟新裁还同紫綺珍裘龙香什袭伏念自膳服叨于禁近如臣之被宠者独深造颁赉及于家居似【臣】之蒙恩者益少钦承匪懈悚惕靡宁【臣】又伏思

恩命由於内廷未敢繕疏称谢遂使瞻依片念徒然自结於衡茅感激微衷无由上彻於

君父辗转宵旦难以即安敬藉同官肃陈谢悃望层霄而虎拜犹如身侍红云处下里而蛩吟敢冀词闻丹陛伏愿

圣躬纯嘏

帝治龐鸿俗厚年丰民安物阜【臣】虽暂栖藪泽光华近戴尧天远在江湖熙皞常依舜日【臣】愚不胜悚惶战栗之至谨奉表称

谢以

闻

恩赐羊酒食物谢表

康熙二十二年十二月二十三日蒙

恩赐【臣】英羊二牵酒二罇鹿一雉八鲜鱼鹿尾各六给付【臣】男翰林院编修【臣】廷瓚【臣】望

阙九叩首谨奉表称谢者伏以

恩从天上蓬茅沾玉露而增荣春到江南枯蠹沐琼膏而起色忆昔囊书

深殿每分辉於伏腊之时詎意卧疾空山复拜

赐於嘉平之节泽愈徵其优渥感自倍于恒常恭惟皇帝陛下

文治光华

武功赫濯

运睿虑於穆清之上措邦家於磐石之安仁浹生民薄征徭而诵声在野义孚藩服韬戈甲而译使来庭近者纪

圣略於球图昭回千禩焕

天章於云汉炳耀六经宏猷允驾乎昔王芳轨迴超夫前代【臣】英葑菲薄植荷

简拔於昌时樗栎微材随步趋於

经幄恩深十载宠溢多生仰瞻

圣学高深获覩

宸衷勤毖玉阶待曙早看三殿鐙辉金钥传声夜听九门漏彻层霄清切异数骈蕃翠釜银?常饱调兰之饌珍裘紫绮还裁叠雪之衣锦雉分自

御围良骥颁从

内廐春风帘幙宫樱堆赤玉之盘秋水蒹葭河鲤出珊瑚之网每当除岁宫使早扣衡门罗列尚方珍味懽腾穉子庖登仙兽瓮发天香历数殊荣皆成盛事臣英未有涓埃愚悃报

圣泽之帡幪猥以草土私情违

天顔於咫尺粉榆暂返寒暑再更听紫陌之鸡声近移茅舍盼觚棱之日影远到田间虽负土之情少醺颐复而采薪之疾益觉纏綿盖桐以心虚未霜而落柳因质弱望秋而衰身虽杂於渔樵念旧

恩而倍悚梦常依於

君父欲奋飞而未能乃上厪

睿怀垂注无殊曩昔近当令序流膏特畀幽遐爰开白兽之樽用励羔羊之素嘉鱼贡於辽海瑞鹿致自关山昔忝词曹故有文禽之錫近栖山泽并分野雉之珍计颁賚於

内廷正当雪候迨邮传於寒谷恰值春温

宸眷弥殷【臣】衷益愧乍闻而心惕永念而涕零思【臣】旧侍

彤闱惟切旷瘵之惧自离

紫闼久无夙夜之劳【臣】父得奉

龙章典礼祝嘉於泉壤【臣】英屡承

天语德音遥下於江湖【臣】虽糜顶踵之微茫而无能禱生成之万一者也伏愿

景佑日升

圣功时懋俗登三古治冠百王【臣】虽结伴山农同爲击壤

尧衢之侶倘得捐除宿疾再侍赓歌

舜日之班【臣】不胜惶悚之至谨奉表称

谢以

闻

疏

请假归葬疏

日讲官起居注翰林院学士兼礼部侍郎【臣】张英奏爲圣恩高厚难禱子情迫切已久冒  
摠微忱恳祈

赐假事窃【臣】一介竖儒学植謏陋叨逢

皇上右文之代拔置词曹旋擢

讲幄复蒙

简命供奉

内廷伏覩我

皇上励精听政之暇研经?史讲贯讨论寒暑无间夜分不辍【臣】每从细旃广厦之侧仰

圣学之高深窥

懋修之纯笃恭听

睿谟敬瞻

宸翰自古帝王逊志时敏之学未有如我

皇上今日之盛者也臣又伏思十载侍从深受

特简之遇猥膺超擢之荣日近

光华仰承

顾问给庐内地授餐大官

殊恩异数叠至洊加从来臣子遭遇未有如【臣】今日之宠渥者也频年以来日覩我

皇上宵衣旰食之劳虽有乌鸟私衷何敢仰干

天听今幸海内荡平

庙堂清晏亦人子可以言情之时恻念【臣】父歿已十有五年尚未归一抔之土子职有亏莫大於此每一念及中夜旁徨查京官历俸五年例准迁葬【臣】历俸十有一年迟久而不敢言者

君恩至深辗转而不容不言者子情至迫伏乞

皇上俯鉴愚悃

赐假南归经营窀穸俾【臣】父得安泉壤【臣】从此竭犬马之力捐顶踵之微以报我

皇上如天之恩日正长也【臣】不胜惶悚待

命之至谨具奏

闻奉

旨张英自简侍讲幄以来朝夕勤劳敬慎素着览奏伊父未葬情词恳切准假前往安葬事竣速回供职该部知道

恭谢

天恩事

日讲官起居注翰林院学士兼礼部侍郎今告假【臣】张英奏为恭谢

天恩事康熙二十一年九月初九日

御制昇平嘉宴诗序并诗勒石告成搨本

颁赐与宴诸臣【臣】请假在籍蒙

恩给付【臣】男翰林院编修【臣】廷瓚代领賚回江南【臣】恭设香案望

阙叩首称谢伏念【臣】一介愚鲁自擢侍

讲幄以来受

恩隆渥十载於兹欣逢本年正月十四日

皇上俯念诸臣屡岁勤劳錫之燕饮仿柏梁之賡歌昭泰运之昇平喜起一堂流辉千?【臣】叨随末班屡传天语捧觴载笔荣幸非常今复蒙

圣恩冠以

纶音将嘉宴诗章勒诸贞石垂示不朽念曾与斯宴者咸得沾赐【臣】以西清旧秩特分圭璧之华南亩微踪远锡琬琰之重荣光烛于蓬户宝翰奉为珍藏【臣】不胜感激忻幸之至为此具本谨以

奏

闻

岁终彙进讲章疏【康熙十五年】

日讲官起居注翰林院掌院学士兼礼部侍郎【臣】张英谨

题为讲义业已彙进岁终循例题明兼陈愚悃仰希睿鉴事窃惟君心仰法乎天心故圣帝重日新之学道统实关乎治统故哲王敦时敏之修盖探索则义蕴无穷而讨论斯精微愈出我

皇上聰明本於性成睿慮勤於典學

聖心無逸已深明義理之指歸

天語特頒欲備考史編之法戒超軼千古度越百王【臣】等幸侍

講筵涓埃莫効伏稽旧例年終宜將年內所講書義彙裝

進呈【臣】等已於康熙十四年閏五月遵

旨先期彙進茲當歲暮理合

題明簡編具在古訓犁然伏冀

聖聰恒加省覽虛懷遜志則德益進於高深尊聞行知則業逾臻於光大將

聖學有無疆之益而至治媲美隆古之休矣【臣】等無任諄切之至

題請

萬壽朝賀事

禮部尚書【臣】張英謹

題爲

萬壽朝賀關係鉅典理宜舉行謹特疏陳情仰祈俯允以慰羣情事竊惟典禮本乎人情凡人  
情之不容已者即爲典禮之所宜行爲臣子者道莫大於尊君誼莫切於親上

聖人篤生爲四海臣民之主遇

誕辰而稱慶合寮采以拜揚此頌祝之禮所關至鉅也考之經傳有躋堂介壽之文稽之史冊  
有朝賀饗飧之制皆因情立儀垂爲成憲歷代之而不能廢者所以使天下知尊其君親其  
上遂其感戴之情伸其拚舞之愿非僅稱觴拜祝而已也我

皇上

德迈唐虞

化隆三五事

天事

亲尽自古未有之爱敬治民治物溥从来未见之恩膏

圣作物覩遐迩欢呼恭逢

万寿之辰正当普庆之际因康熙二十七年二月内奉旨停止行庆贺礼钦遵在案【臣】等职司典礼伏念圣诞令节朝贺大典中外观瞻远近拜舞关系至重不宜永停比时因奉

明纶不敢瀆奏郁结之诚历今五载大典之旷已久臣民之望日殷【臣】等恭覩

皇上每於

皇太后万寿之期必行礼庆贺乃数年以来

万寿令节在廷诸臣以及藩王贡使不得一拜

丹墀是

皇上得以伸孝思於

皇太后之前而诸臣不能伸愚悃於

皇上之前家国一理臣子同情此在廷诸臣之所以夙夜难安於心而断不能已於竭诚敦请者也兹者三月十八日恭逢

圣诞之期四海雍熙百姓乐利正普天同庆之会【臣】等不揣愚昧敢献刍蕘伏冀我

皇上俯鉴輿情

允行旧典洽万国之欢心伸臣子之至愿天下万世永着尊君亲上之义中外欣忭无极矣为此具本伏祈睿鉴施行

恳

恩休致疏【康熙三十七年】



礼部尚书【臣】张英谨

奏为

圣恩高厚难醺微【臣】衰病旷职不容不仰瀆

天听事【臣】草茅微贱至愚极陋蒙

皇上拔擢之恩优容之德自揆知遇古今罕俦即捐糜顶踵更何能报称万一臣所以屡瀆

宸听者【臣】自幼体弱身有血疾中年此疾举发尚可撑持近因年老气血日衰每发一次则必甚於前再发则虑其难支且因此而怔忡眼昏遗忘日甚肢体酸痛【臣】所领皆要职旷误实多自知难逭【臣】今年六十一岁何敢谓之甚老但【臣】自念生平受

皇上非常之恩召入

内廷侍从逾二十载倘得以残年乞休归田调治夙疾则保全

圣恩终始在【臣】实为至荣实为至幸今以【臣】精神恍惚必有担迟错误自取旷职之罪在【臣】生平实为可惜人有至情必告父母

皇上臣之父母也此实臣之至情故敢冒瀆

天听仰求

圣慈俞允休致

隆恩渥泽更属非常【臣】战栗惶惧之至

题为

圣谟广运事

礼部尚书【臣】张英等谨

题为

圣谟广运

神武诞敷逆孽就俘狡寇殄灭党与尽皆归服荒远莫不来王永淶边尘普天庆洽应举行典礼以昭示中外垂宪无疆事礼科抄出议政大臣都统公宗室苏努等题为

睿略永清絕塞等事奉

旨览卿等奏贺知道了应行事宜着详察典例具奏该部知道钦此钦遵於四月二十九日到部【臣】等恭惟我皇上仁并尧天化同舜日

至圣作觀万国咸宁四海时雍羣生乐育惟此厄鲁特噶尔丹狡诈性成凶顽乐祸跳梁荒徼自外生成累年以来扰乱边境与臣服我之喀尔喀为讐遂将喀尔喀陵虐侵杀阑入我境内乌阑布通之地与大兵拒战为我师所击大败斯时因

圣驾未亲蒞军以致彼脱逃比噶尔丹跪於道傍於喇嘛所与佛像之前立誓再不敢干犯

天朝皇帝之喀尔喀及边界人民等语捧进印信文书方免其追剿释之而归彼乃背负

仁恩复行狂乱悖天虐衆违蔑誓言潜入巴顏乌喇地方奸诡叵测煽诱蒙古诸部落

皇上屡颁谕旨晓以祸福许其投顺彼仍怙恶不悛皇上念此贼若不即行扑灭边境人民必不获遂其安养於是

睿谋乾断特申天讨????大兵从三路出

皇上只告於

天

地

宗庙

社稷禡旗祭輶

亲统中路大兵声罪徂征远踰瀚海素无水草之地直抵黑鲁伦土喇地方

躬先士卒指示调度

天威所至噶尔丹闻风丧胆弃其子女庐舍中夜潰遁皇上洞察噶尔丹狡诈预定谋略料其必由西路逃遁果遇西路堵截之兵尽被剿杀潰散窃思噶尔丹在边塞之西肆行凶恶而无

忌憚者数十年

皇上筹画万全统率六师一鼓而覆其巢一战而夺其魄阵戮其妻孥弥其部曲尽收其辎重贼跳身溃遁残喘游魂狼狈困蹙苟延旦夕虽生犹死厄鲁特之珍灭实在此举矣

皇上仍颁谕旨许其来降而此贼狡黠昏迷犹思窜匿皇上神谟密运留将军於塞上驻劲旅於肃州聯指臂之形穷狡兔之窟皆非衆人所能测度者也丹济喇奔败之余觊觎余粮复为我师奋击败遁

圣驾於去年冬复亲莅边方渡河至鄂尔多斯之地经画调遣恩威并用贼之党与归命输诚者不絶於道皆加豢养抚恤贼之乞怜於他部落者皆以计擒获其使令彼奸狡一无所施困迫仓皇至於已极今年春圣驾复临边方西踰宁夏

驻蹕於狼居胥山震扬

天威分布禁旅授诸将方略尽堵截其遁匿之路必期戮此小丑其子檻车就缚珊瑚脑儿辈又率衆来降帝巴奏请谢罪丹济喇及阿喇布滩丹津汪布等皆遣人输诚向顺贼气索途穷自料擒获诛戮决不能逃遂於闰三月十三日服药自杀其党丹济喇等收其拏挟其骸引衆来归厄鲁特尽皆荡平噶尔丹父子皆献屍成俘塞外蒙古尽稽顙归顺

神功骏烈显烁如此洵亘古之所罕覩者也从此边徼永享清宁昇平极於万世皆由我

皇上义安中外之心至诚至仁行健之德如天而坚定不移於终始决胜之智如神而首尾总归於成算圣驾三次临边躬擐甲胄调兵筹饷备极焦劳冒暑冲寒久历烦苦惟以宁民为心安边为念而

圣躬之劳勩皆所不计是以昭格

天心感通

列祖成功若此之隆也仰惟我

皇上自御极以来爱养臣民则膏泽极其深厚励精政务则夙夜殚厥心思文德迈於百王武功轶於万?前者征灭反叛察哈儿平定三逆收克台湾海外咸入版图从来未通中国之倭罗斯皆已纳

贡喀尔喀之三君长率其衆数十万归附为臣今者亲征絶塞累年之贼寇一旦埽除异域之蕃部罔不臣服威武奋扬万世永赖

功德巍巍自古帝王无能比伦报至之日大小臣工远迩军民无不懽忭踊跃巷舞途歌咸谓太平之业从此益增太平矣【臣】等详稽载籍庆典允宜举行应

遣官祭告

天坛

地坛

太庙

社稷

永陵

福陵

昭陵暂安奉

殿

孝陵其旗纛

天安门太岁炮神及五岳五鎮四瀆四海历代帝王陵寝阙里等处俱应

遣官致祭以仰荅

天

地

祖

宗神灵之贶

皇太后前应请加

徽号

皇上前应请上

尊号以俯慰四海臣民及外藩君长吁望惓切之情颁诏天下

皇上升御座受诸王大臣官员进

表行

庆贺礼各省督抚文武官员亦应进

庆贺表文

圣躬三次临边始终经画

大功告成应

命史馆编辑平定北寇方略昭示无极此皆典礼所关悉宜举行以永光史册垂宪万世者也  
恭候

命下?办祭品选择吉日分

遣大臣由太常寺衙门启奏祭文由翰林院撰拟加上

皇太后

徽号

皇上

尊号颁

诏天下歛项

庆贺

表文由内阁拟定呈

览颁发臣部详察定例遵行编辑平定北寇方略其开馆事宜由内阁翰林院具奏岳鎮海渚  
等处

遣官致祭臣部另议具奏为此谨

题请

旨

请

恩乞休事

经筵讲官文华殿大学士兼礼部尚书加二级【臣】张英谨

奏为

圣恩高厚已极微【臣】衰病日增沥陈愚悃恳求

俞允回籍调治庶免旷官事【臣】一介?儒謏劣无比叨受

皇上知遇深恩拔置翰林俾侍从

禁廷三十余载洊历卿班复蒙

简与密勿非常之恩殊异之数加以训诲寛容矜恤周至宠渥于【臣】者至矣【臣】自愧  
弩骀迥逾涯分即捐糜顶踵何能报荅万一况敢以疾病微情仰干

天听但以【臣】幼时曾撓弱疾中年又有失血之症是以年老精神愈觉衰竭虽医药强扶  
旧疾旋已旋发目昏头晕怔忡时作复於今年七月二十二日正在衙门办事忽然痰疾昏晕  
言语错乱应对不真扶掖回寓医药调治四五日少觉昏瞶渐清从此气体益弱言语多有失  
次步履艰难勉强支持便觉恍惚【臣】窃念

纶扉重地断非【臣】衰惫所宜舛错遗忘恐不能免是以夙夜惶恐晷刻靡宁倘非【臣】  
自审衰颓难以供职又焉敢屡瀆

宸聽伏乞

圣慈俯鉴数年吁恳之诚

俞允致仕回籍调治旧疴田里之间得以少延视息感颂

圣恩终始矜全高天厚地之泽沦髓刻肤子孙世世无极为此具本谨奏请

旨于本月二十一日奉

旨卿才品优长効力已久及任机务恪慎益励文辞充练倚眷方殷览奏以衰病乞休情词恳切着以原官致仕该部知道

为恭谢

天恩事

大学士兼礼部尚书加二级【臣】张英谨

奏为恭谢

天恩事【臣】以謏劣微才蒙

皇上高天厚地之恩养育生成至於已极因衰疾乞休复叨

圣慈俞允回籍

优渥之仁有加无已

内廷錫宴特给与驿递夫马沾被汪濊感激涕零臣途次观二麦正茂物阜民安自入江南诸郡比岁丰稔更蒙

皇上殊恩蠲免正赋家有盖藏春来雨水沾足民生乐业【臣】仰赖洪慈勉自调摄以三月初三日抵里谨捧御笔笃素堂匾额悬揭中庭又以历年所

赐

御书及法帖陈列恭设香案率子孙叩首谢

恩【臣】日瞻

圣翰如覲

天顏云汉昭回顿令山川改色城郭增辉草野章缝争窥

鸿宝间阎父老共庆遭逢【臣】抚念生平蒙

皇上豢养大泽三十余年未能仰报万一自非老病交迫何忍就逸偷安叩辞

阙廷远离

君父依恋无已梦寐靡宁抚躬自慙莫知所措惟依尧天舜日之下息贱体之衰羸偕耕田凿井之民颂圣恩之深厚谨缮本奏

谢【臣】不胜惶悚感激之至谨具奏

闻奉

旨览卿奏谢知道了该部知道

为恭请

圣躬万安事

予告大学士兼礼部尚书加二级【臣】张英谨

奏为恭请

圣躬万安并陈谢悃事【臣】荷

皇上高天厚地之恩异数殊荣优渥无已江南恭迎圣驾得覲

天顏蒙

特赐

御笔匾额对联

御制诗章及大幅长卷皆超神入化之笔旷古罕俦天章灿如琬琰光彩炳如日星士林惊观未有之奇子孙传为万世之宝【臣】敬捧弘璧不胜感激惶悚顷以衰朽残年拜辞

阙廷亲聆

天语



温谕静养复

特赐

御用帽一顶袍一领套一领天香异锦内制辉煌【臣】谨奉以留示子孙又蒙

赐人参三斤灵药珍品於【臣】贱体甚宜从此仰荷圣慈得以少延残喘皆

天恩之所赐也【臣】以四月二十九日抵里犬马依恋之忱不能自己旁徨感愧惟有涕零沿途见直隶山东麦皆收获江南庐凤安庆之地雨泽沾足家家耕种田禾遍野可冀有秋谨藉以仰慰

圣怀兹特具本遣家人賫付【臣】男翰林院庶吉士【臣】张廷玉送通政司衙门呈

奏【臣】不胜惓惓感激之至谨具奏

闻奉

旨览卿奏谢知道了该部知道

文端集卷三十九

# 卷四十

钦定四库全书

文端集卷四十

大学士张英撰

笃素堂文集四

序

丁丑会试録序

恭惟

皇上御极以来会试天下士於京师已十有二科今岁在丁丑值礼闈校士之年【臣】英猥以謏陋叨蒙

简命俾偕【臣】赐履【臣】璵【臣】雯典厥事【臣】悚惕靡宁兢兢以不称任使是惧窃惟我

皇上振兴文治崇獎儒术为振古所未有又际海内承平嘉生乐育士之生其时者得以自力於学问而长养其才识以故蒸蒸丕变人文蔚兴若斯之盛也然其气机之相感召风声之所渐磨又有本焉不可不知也【臣】荷

恩遇侍从

内廷将踰二十年朝夕在细旃广厦之侧得於见闻者最亲且切恭覩我

皇上万几有暇即研究六经殚究诸史博罗百家游心翰墨自晨兴至於夜分祁寒盛暑罔有间辍又叨侍青宫趋承鹤禁仰窥

圣人训诲之勤

睿学敦修之密复见

诸皇子勤敏嗜学日有课程皆以

天潢之贵而躬韦布之修诵读相闻声彻殿阁诗书之气洋溢充塞可谓极盛矣是以

上之所向下之所趋潜化默孚捷於桴鼓宜乎海内文学之士日新月盛咸蔚然奋兴而彬彬乎进於大雅之林也【臣】承乏礼曹屡勘校十五国省试之文窃见滇黔蜀粤号称荒远乃其文皆日进於醇邃与中土无异因叹

圣化之隆文教之敷无远弗届所以沦洽而感通之者非一日之故矣顷者扁钥棘闱焚膏继晷闾多士三试之文絜长比短谨拔其尤者百五十九人例同诸臣署取中字每署字时辄抚其卷而祝之曰尔策名於朝矣将来必务为端人良士以无负科名抑【臣】又思古人以言取人岂尽渺然无可依据夫言者心之声也古者敷奏以言又曰不知言无以知人大约心术端纯者则其言必正大而无偏驳之病识解明通者则其言必条畅而无结塞之弊律已恭慎者则其言必谨饬而无叫呶之习且先之经书以观其义理继之表策以观其才识闾者沈心静气以与作者之精神相遇谁谓制科之文不可以观其人之梗槩哉今多士自献之文具在其尚勉思立身行已期无负乎其言以仰副

圣天子敦厉人才之至意俾典司试事者稍得以慊其为

国树人之悃诚宁不有光也夫

恭进易经参解序

【臣】窃闻易之为书贯彻二仪囊括万类微以穷阴阳之变化显以系人事之吉凶幽以明鬼神之情状探赜索隐彰往察来读者得其中微言大义之一二可以服之终身而无尽况取四圣人之所发挥而朝夕涵泳其间者乎又尝窃观先儒论易其大者极於扶阳而抑阴夫天地之有阴阳犹四时之有寒暑日月之有昼夜也以气化言之万物不能有长而无消人事不能有得而无失运会不能有治而无乱举世不能尽君子而无小人是以卦之爻三百八十有四阳爻居其半陰爻即居其半虽圣人安能损益於其间哉然圣人兢兢业业於阳刚也则扶之进之於阴柔也则抑之退之此固六十四卦中无在不存斯义而於否泰剥复夬姤诸卦之辞尤其深切着明者也圣人不能使四时有春夏而无秋冬而制为室庐衣裘以御之不能使日月有昼而无夜而制为鐙烛以继之不能使万物有长而无消而制为度数以节宣之不能使人事有得而无失而示以修省戒惧以补救之不能使运会有治而无乱而立为纪纲法度以维持之不能使举世尽君子而无小人而立为教化刑罚以劝惩之易之中数者备矣此则圣人扶阳抑阴之至意隐见於六十四卦之中所谓参赞化育裁成天地者岂有他哉故曰天地之性人为贵必读易而後知圣人之尊且大也【臣】草泽微材至愚极陋遭逢圣天子崇儒典学之时叨随

讲幄入侍

禁中恭覩我

皇上孜孜图治未明求衣躬理庶政退朝即御便殿讲诵经史至漏下数刻不辍祁寒盛暑率以为常【臣】自顾学植浅薄惟切惶悚侍从之暇伏读周易望洋测海茫无津涯欲纂辑训诂一书期先通晓章句然後徐求其精义爰奉朱子本义为标准而诠解训释则杂取於大全直解诸书芟其繁冗务存简切至於释卦名义则程传最精故节取以载於本卦之首大全诸儒之说发明经义有裨讲席者并采録之閱两期而成名之曰易经参解条分缕析一以先正之言为矩矱絶不敢参臆说於其间因【臣】质性愚鲁着此一编藉以自备遗忘荒陋粗浅深知不免又念在

禁中修辑之书不敢不上尘我

皇上睿览亦以见文明化成在上小【臣】亦有不敬自弃之私非云於经旨有所阐明羽翼足以献之

当宁也谨序

恭进书经衷论序

【臣】窃惟人君之以道治天下至尧舜禹汤文武之盛而极矣人臣之以道事其君至皋夔伊傅旦奭之盛而极矣迄今相去数千载当日之言论谋画纲纪设施与夫忠恳诚爱之心谐弼绸缪之计虽散见於六经旁流於诸史而弘纲鉅节之所统会则莫备於尚书使後之人犹得於方策之中想像唐虞三代之君臣如见其形容若聆其罄欬不觉有时代旷远之隔者则由其文至古其意至厚其旨趣至弘远流连往复而可以不穷也【臣】自供奉

内廷之初正值我

皇上讨论二典讲贯三谟穷究精研无微不彻由是而下逮商周誓诰之篇靡不再四寻绎凡昔人之所谓苦其奥博而难通者

皇上必深求义理之归而亦不辞夫章句诵读之劳二帝三王之言与夫古圣贤之所以告其君者朝夕沦浹於

圣心至深且渥也故以言乎典学则高宗逊志之勤以言乎服远则虞廷干羽之格以言乎六府三事则九功之时叙以言乎官人亮采则九德之日严

皇上以圣学之渊涵发为治功之醇茂岂仅稽古不倦而已哉【臣】质愚学陋寡识渺闻窃从

讲筵余暇退入直庐伏读尚书偶有一知半见録以纪之积久遂至成帙非敢自持臆说皆取衷于昔人之言谨依篇章次第分为衷论四卷又因在

内廷编辑之书不敢自藏其短冒陈

九重乙夜之览伏念我

皇上於尚书全编心源脗合精义默符每发一议远超汉宋诸儒之说【臣】忝侍

左右闻之熟矣如【臣】謏陋肤言类培塿伏於泰岱之前爝火耀于日月之下弥自增其悚  
惕云尔【臣】谨序

古今释疑序

甚矣读书嗜古之难其人也士子幼而从事於咕哔帖括之学皇皇焉求合於有司之尺度其  
不售也则数变其体以从时其售也则又将潦倒於簿书竭蹶於期会求其讲明古学淹贯经  
史岂不戛戛乎其难哉方子合山自束发受书以来即不为制举业所羁囿沈酣於六经诸史  
百家之书寝食沐浴其中者三十余年於天文历数律吕之精奥经史之源流异同疆域之沿革  
郊丘庙祀之分合文物制度之损益旁及於字学算数医卜方技之说靡不殚究博采昔人之  
衆论而条分缕析权衡其可否审定其从违着为一书名之曰古今释疑猗欤盛哉方子之  
为此书也负敏异之材具研究之力承累世之家学用英妙之盛年家有藏书门多长者兄弟  
切磨交游讲贯且赋性恬淡於世俗所欣羨嗜好之事方子一无所慕而独抱简编於长林丰  
草之中岁时伏腊风雨鸡鸣孜孜矻矻无间终始其取材也博其辨物也精其经时也久其庸  
心也专故能祛繁归约去疑得信以成一书为菽林之统会正学之津梁良非偶然也姑孰郡  
守杨公好古乐善梓是书以行於世予请假归里门适见是书之成快古乐之修明托鸿编以  
不朽敬识数语於简端焉

补岩居近科程墨选序

本朝以制举业取士三十有八年间更用策论三载旋复旧制岂非以四子五经之学精微  
宏濶足以覘士子之器业才识苟取之不失其道遂可以为

国家得人才之用非仅词章比偶声律之学而已也从来世运当太平之日朝野清宴民物恬  
安则其文应之亦必有鸿龐醇厚邕和寬博之气上以此求下以此应不谋而合譬如春林之  
鸟?漾之鱼不自知其声音之和而泳游之适暄融之草木不自知其枝叶之扶苏华实之昌茂  
必无有激楚嚆杀之音萧槭寒枯之色足以奸乎其间汉之极盛则有董子贾子之文唐之极  
盛则有许公燕公之诗类皆典硕敦重足以养国家长裕之气以蘊藏涵蓄其所不尽断非末  
季文人之所能及者噫文章关乎世运可不慎哉可不慎哉昭余戴子枫仲萃本朝制科之文  
而论定之其言曰论文以气为主气胜而後及於理与法数者备而入吾选焉善乎戴子之言  
夫天地之气嘘吸之於两间贯注之於万类而後宣泄之於文章诗赋当今海内荡定?氛廓清  
天地太和之气網緼融结则一时文章之士必争趋於昌明俊伟颢博端凝以应

国家之盛如董贾燕许诸人者戴子复以是编倡之其裨於制义岂小哉戴子少负奇气文博而学富为海内所推重者数十年今老矣而气不衰故其论文者如此

## 潘木厓诗集序

英获与蜀藻交在二十年前是时蜀藻以诗文负盛名为诸生祭酒英甫束发补博士弟子员蜀藻挈之坛坫教之为诗文朝夕奉余诲故读蜀藻之诗最久而殊未能测其涯涘也自少壮以来为诗不下数千首大约体凡数变变而益上每与同人把卷太息决蜀藻之诗之必传今年春书来京师谓且裒辑全篇镂之於板为喜而不寐者累日蜀藻诗少宗少陵中年沈酣於香山少陵雄浑苍深体兼衆妙香山排宕潇洒自为一家要皆不束缚於声律比偶之中独抒写其性情务为极言竭论穷变尽妍凡所为忧乐欢戚之言千古而下犹如即乎其人见其事而闻其声此则杜与白旨趣之所以同亦即蜀藻所以宗二家之意也尝窃谓香山之诗务於尽人固知之而少陵亦未尝不务於尽也少陵务於尽而不伤其涵蓄者气有余也香山务於尽而不伤其高淡者韵有余也子瞻山谷皆力摹少陵而其後不得不入於香山者才人握管思以畅发其性情类不乐为初唐诸子句镂字琢比拟属对之工而浩衍流畅以务尽其才故宋元以後之诗人大约不出此二家之法少陵香山之所以貌殊而致一者亦在此哉蜀藻天才高卓沐浴於诗学者三十余年天复嗇其遇而老之於诗游齐兗陟泰岱登戏马吊梁园两入京华又南浮江楚泛赤壁过浔阳望匡庐山所至登临览观与海内诗人相酬答以发抒其卓犖抑郁之气其遇稍类少陵而性复恬裕闲远善於缘情写物又於香山为近故其为诗能兼二家之胜长篇短章皆直写其胸臆几於极言竭论穷变尽妍而不伤其涵蓄高淡者由其气足以包举融贯韵足以掩映舒徐此所以得古人之深而非与貌似形肖者比也蜀藻母夫人予姑之子也高节博学有松声阁前後集行於世蜀藻少孤奉母夫人教为多今七十余矣白华兰陔蜀藻其以诗养乎吾邑僻处江上蜀藻与母夫人独以诗文名海内四方文学之士莫不宗之然则予於蜀藻又何庸以不遇为感哉

## 归孝仪制义序

文章之於遇合甚无取乎躁而获也夫躁而获者或凭其才思之颺发锋锷之犀利以取悦於一时经有识者按之其气必不能沈其力必不能厚其识必不能精其格律必不能完浑其理解必不能纯粹是以博学深思之士以文章显天下者其於遇合之际造物者若稍迟之以待其聚精会神含英咀华閤中而肆外卓然自成一家之文一出而传诵海内非文章之以遇合重而遇合之以文章重也归子孝仪弱冠荐於乡与予受知於即墨黄夫子同门生中孝仪年最少才情丰度擅一时无双之誉无不以联飞高第相许者甲辰之役以兄雪采先生分职礼闈格於例不得入试丁未复不第春明门外潦倒车尘马足之间同人又无不为孝仪叹惜扼腕而孝仪泊如也吾於此知孝仪之自待者方大而天之所以待孝仪者有在也已酉春遇孝仪於吴门时方谢尘嚣屏交游絶不问家人生业而担囊负书走百余里坐兰若中青镫荧荧与佛龕相对朝暮一编肆力揣摩举人所谓岑寂不堪之况而孝仪甘之予观其气沈其力鋭其色藹然其光黝然及再拜啓其笥篋而快读其制举之文则如长江大河之奔注而涵育也如珠光剑气之苍茫而温润也如千门万户之閤敞而清庙明堂之钜丽也才识明通而

不伤於浅褻先正而不失之拘力大而思深理纯而法备如此弁冕南宫黼藻文治真能自成一家之文絕非小儒曲学摭拾餽釘之可望其项背者噫孝仪之自待与天之所以待孝仪者固如是乎向固知之而今益信之矣大约功名之器类以郑重迟回而得之者其经济识力始能任重致远独文章然乎况孝仪由此而显天下犹然英妙哉举数年来之为孝仪郁郁者而一旦为孝仪快也遂濡笔而序之

## 日照李氏族谱序

余自康熙癸卯举於乡先大夫时年七十余即以一编示余曰此族谱稿本久未詮次予年且老前人行事予犹能缕缕叙述子盍为编葺成书以母坠祖宗之绪予敬受而卒業首世谱次世纪次丘陇次纶言次家传为若干卷每念欧阳文忠公集中载家谱一帙其言皆简质不事摭拾藻采斯可以传示久远故义例多仿之又念先大夫以耆耄之年独惓惓於此盖木本水源之思行苇葛藟之爱古人敬宗收族之道谊莫大焉事莫重焉今读日照李氏族谱不禁重有感於衷也愚庵李先生为当世名公卿其太翁封大夫孝阳先生敦龐閎硕道德文章世其家年已大耋以谱牒属愚庵令其编次而先生序之因知前辈敬宗收族之心本於仁孝之至隐其不谋而相合者固如是也且牘次详明而叙述简要得欧阳公家乘之义其可以垂示久远无疑书丘墓使子孙识所瞻依载训词俾後嗣无忘忠孝与余曩昔纂辑之事适符可以见心理之同而愚庵之用意深至也夙闻李氏有隐德蟠根深固而枝叶蕃昌玉蘊珠胎而光气腾上理固然矣我观孝阳先生与愚庵先生光明俊伟英姿磊落实能树鸿名而縣景祐李氏之族方大而又以亲逊敦睦庇其本根教诲其宗族其所发越流衍又安可穷哉敢拜手而为之序

## 左国颖序

宫詹学士澹人先生侍直

内庖细旃广厦之间多历年所曩者承

命编纂春秋解义日奉

宸览依鲁史纪年为次序列经文三传於前後则诠释其义意搜罗往说折衷羣言而论断之务求得乎圣人笔削精微褒贬谨严之至意宏纲大义已磨磨炳炳披卷而可得其指归矣复於编纂之暇采辑左传国语中之一字一语瓊丽警异者别为一书号曰左国颖夫古人之为学治其大必及其细研其义不遗其物故曰不学博依不能安诗不学杂服不能安礼又曰含英而咀华必如斯而後为学之备也如泛沧海者既览其风澜之壮阔而火齐木难珊瑚瑟瑟之珍宜并登之以为宝也游三湘七泽者既赏其山川之美而杜蘅兰茝跬步可采者亦宜郢车而载也登宗庙明堂者既观於百礼之盛百官之富而龙勺鸡尊苍璧黄琮之所陈宜并识之以广其见闻也夫子教人学诗以兴观羣怨事父事君之大而多识於鸟兽草木之名尤所不废况左传国语中单词只语皆古奥琢链其可宝不下於火齐木难其芳泽不殊於兰茝其

班剥陆离不异於夏瑚商琤其为沧海湘泽之蓄聚宗庙明堂之罗列何可胜数宫詹特表而出之岂非千古之快事哉且颖之为言也正义释之曰刀环谓之颖禾之秀穗谓之颖枕之警动亦谓之颖皆取其翘然杰出异於衆之义此又宫詹命名之意也夫昔苏文忠公言平昔读书始而记其事蹟既而熟其文词又进而考其制度名象凡数过而本末兼该精粗毕举予於宫詹之读书也亦云然

## 黄柏山房和诗序

龙眠黄柏山房去吾山园五里青嶂叠回清谿萦绕一径盘纡左临大壑右跨山腰奇石谿谿古藤垂荫盖境之最幽絶胜者也羹湖先生结屋其中引流种树每与予偕往自翦刈荆棘以迄於楼榭落成无时不同觞咏於斯地盖三年矣予入都後先生又搜奇剔异得大石壁如屏障苍翠班剥为飞阁以临之此则予想像而未得目睹者也瑶园癸亥岁即之官闽漳凡先生所目营心画草树烟峦之状瑶园亦仅得於邮报诗篇中而未尝见其十年拮据之劳也噫先生龐眉丹顏丰神玉立高卧龙眠一峰有时茹斋写经有时飞觴朗吟辄经月不出诗皆古调画亦入神林壑烟云供其驱使山川灵气奔走腕下豪情逸韵健笔奇怀足以陵轹景光发挥幽奥?内而有神仙则羹湖其人也宇内而有蓬壶则胜山其地也先生纵骑鹤而游道山亦必往来斯地耳岂远乎哉瑶园归而抚一石一树摩手泽蹶遗踪结而为涕泗发而为诗篇得七言长句三十首触景增慨遇物怆怀调苦而思深语悲而气咽然其空灵敏妙宛折纏綿足以写其真挚之情仁孝之思则又不求工而自工者也予读之不禁低徊永叹欲酌酒龙眠一峰呼先生之灵而以是为楚些之句焉每见先生家书寄漳海辄以清白勸其子瑶园居官最廉慎有惠政名誉翕然则瑶园之所以不忘其亲者又不止栝橈琴瑟之思也夫

## 文端集卷四十

<集部,别集类,清代,文端集>



# 卷四十一

钦定四库全书

文端集卷四十一

大学士张英撰

笏素堂文集五

序

讲筵应

制集序

臣英谬以疎贱譭薄际昌时邁景会以康熙六年丁未成繆彤榜进士授翰林院庶吉士是年冬以先大夫忧去九年庚戌服阙补原官十一年壬子秋授编修次年春充礼闈同考官三月

上幸南苑命臣英偕同官【臣】史鹤龄扈从於行宫进讲诏献南苑赋嗣後每巡行必侍从或独往或与侍读【臣】孙在丰偕是时扈跸多在南苑新宫綠槐高柳掩映丹甍千幕周罗六师环列卫霍金张以及期门羽林之士翼豹尾而处者云蒸雷殷深严弘丽不可殫述【臣】以书生抱简牋其间晨则委蛇丹陛夕则退处直庐承顏邀睐恩遇无比时从幸晾鹰台观试马紫骝赤骆蹶云追电

天子第其駉骏以赏劝诸王公大臣则献试马歌一日漏下十余刻

上御行殿秉绛蜡作大书使人问二臣知在直庐观书命作良马诗以献或风日和美

上率左右虎贲讲武平郊历上兰践甫草出则朱旗舒徐入则铙吹震发凌晨侵夜必召二臣讲论经史殫究义理日有程课罔以寒暑间【臣】自顾虽陋劣无似然每得以圣贤载籍陈说於

君父之前视古人奉属车清尘诏献甘泉上林赋者窃以为荣此则

圣天子典学之勤俾臣子有稽古之益也是年秋授日讲起居注官其後学士【臣】熊赐履入典阁事内殿进讲专命【臣】及在丰从事鸡未鸣时从长安门步至左翼门祇候少顷东方渐白楼鸽羣起星稀殿角露浥阶城偕奏事诸臣方曳组而入至乾清门候诸臣奏事毕内侍传入弘德殿殿中左右列图书南向设

御座北向设讲官席皆用黄絁幕中设鑪焚香讲官既入则侍从咸退讲官再拜北向立敷陈经义时有所谘询既退命赐茶於乾清宫门如是者三年由左春坊谕德优擢侍讲学士先後同在讲筵者则泽州学士【臣】陈廷敬崑山学士【臣】徐元文【臣】叶方蔼接

天顏於内殿蒙顾问於黼席图书翰墨貂绮之赐岁数至焉是时也海内寇贼未平

天子方宵旰殷忧四方将帅咸稟承

庙略指兵筹饷无虚晷且日御讲筵与【臣】等讨论古昔於此窥

圣度之高深睿学之懋敏太平之所以立致也因辑历年所进诗若干首为讲筵应制集而并叙其所遇如此

内廷应

制集序

康熙十二年癸丑春

天子御讲筵从容与学士言朕欲得文学之臣朝夕置左右惟经史讲诵是职给内庖以居之不令与外事其慎择醇谨通达者以闻时举【臣】名入对

上心识之自是再四谘询对者无异词迄十六年丁巳冬有

内廷供奉之命赐邸舍於瀛台之西辰而入终戌而退乾清宫之西南隅曰南书房

上旧所御读书处也命处其中饮饕给于大官执事使中涓笔墨侧理器具之属皆取於御府珍果饕餮之撤自

御饌者日数至焉

御乾清门听政後则召至懋勤殿辰巳前讲经书午後读史咨询对扬辩论之语详於南书房记注自丁巳冬迄壬戌春未尝一日少间伏念自古人臣间从殿陛一见天子数语达於宸听终身以为荣幸如【臣】者侍从燕闲趋承经席陪奉密勿前後近十载细旃广厦之间陈典故谈易象博综前史上自洪荒下暨挽近握丹铅於香案听钟漏於华清霁顏温语恒如家人父子谓非遭逢之极则恩遇之殊轨哉时或着为诗篇以纪述盛事甫脱稿即陈於

御座之侧吮毫授简成於俄顷者多有之唐郑亚序李文饶制集有曰牙管既轻芝泥将熟尝于席前亲授笔札公亦分陰可就落简如飞【臣】固不敢追踪赞皇而殿陛之间一时情事

则亦古今之所同也二十一年壬戌春请假归葬先大夫屡降

温纶渥被

恩赐俾得暂休沐於乡里因辑四年以来诗为

内廷应制集二卷其中词句粗疎浅劣当时多不暇点窜今皆悉仍旧稿存其实也昔欧阳公既老归淮颖之间辑内外制而序之因念平生仕宦出处且谓瞻玉堂如在天上【臣】今得奉

恩筑室于龙眠山中与田夫野老称说

圣天子盛德儒臣宠遇抚今思昔感激咏叹更复何能自己哉

小学详说序

圣天子敦崇正学讲艺明伦远宗虞廷精一之传大启邹鲁诗书之泽以至濂洛关闽诸书莫不盛行於时俾海内翕然从风所由士务实行而尚闇修尤以小学者为大学之门径未有舍卑近而即至於高远者内则少仪曲礼诸篇士君子立身之始而即造道之基也人当成童之时机识未开习染未深束身於礼节日闻正言日见正事有先入者为之主而後世俗不能移所谓少成若天性习惯如自然以斯日进於德而不难此小学之为功大而为成就人才之要务也予侍从

内廷数十年仰见

圣人师古教胄子之义

庭训之始则必以内则少仪曲礼讲贯熟习故被服其教者待人礼下谦冲而有礼恭敬而温文粹质早成盖有由也

圣虑更欲以此嘉惠海内命童而习之於科岁试童子时制艺一首小学论一首胶庠之地必资此为始进羔鴈家传而户颂岂不蒸蒸然盛哉其宗旨所在必缕析而条分之然後传诵者知所向往江陰张子辈乃标明旨趣着为详说操觚家开卷了然如指诸掌俾朱子纂辑羣书之意如日月之行天可不谓考亭以下千载功臣乎近山陶子为同学友相与参订成书谓私诸家塾不若公诸天下梓而行之是亦导流德化之一助也近山尊人曩时司铎吾乡教思广被而性极恬淡有柴桑之风余时官京师虽未接其丰范而心仪者久之今读是书知其家学渊源相承为有素也因不辞固陋而乐为之序

张氏宗谱後序

英生也晚於前人之行事皆不及見趨庭之際大人輒詔而進之爲述先世功業出處文章行誼以及宦游?媿子息之詳生卒某年月日葬某地綸綸不倦如是者有年雖謹志於中不敢忘然又竊自媿謏陋龔鄙每思執筆以記其萬一而喻之於心者不能達之於言則又慚惡退縮而自止如是者亦有年乙巳秋大人出舊譜一帙且爲述先世事綸綸不倦者如前命爲記述英再四遜謝退而自思吾先人之烈其不獲傳者多矣幸而有可傳又以不能文欲自掩其固陋而听其漸就湮沒也忍乎哉且爲子孫者着爲行實以持於當時仁人君子之前乞其一言以志不朽雖謏陋龔鄙容何傷况兵燹屢經族人之土着者多罹於厄今幸生聚二十余年漸次蕃衍昭穆世系不可一日不明又安能竟自遜謝以重違大人命也吾鄉諸世族皆有譜多爲其先達所編次如延陵如桂林如吳興天水及諸家譜皆遍求縱覽知先輩之於家乘綦重矣而桂林譜爲明善先生所修尤詳簡適宜竊向往焉故義例多仿之譜莫先于明世系爲述世圖第一行字官爵以及生娶卒葬子女?姻之事皆所當詳无可考者曰无可考婦改適則生卒葬不書絕之也爲述世紀第二人莫大於祖宗莫重於坟墓而祭田祭儀附之爲述丘隴第三人臣受國恩以至榮及父母錫之綸綸所當與宗祏并重者也爲述錫命第四名公鉅卿表章先人之文如行狀如墓表如墓志如記如傳如序不獨祖宗之行事賴之以傳鴻文鉅篇亦當百世寶之爲述贈言第五凡先大夫之庸勳在朝逸德在野文譽在藝林英所熟聞於耳者即一言一事不敢斂爲述列傳第六壺政之修實爲內助鍾儀郝法昔人所稱爲述內傳第七共爲若干卷至貴五公之後久已無傳小張之後亦莫可考惟山前一派迄今尚存觀舊譜迂桐圖支????本親今皆另爲一卷附載于後不敢忘先人收族之誼也至若扳援依附昔人之所深耻英亦用是凜凜信則傳信疑則傳疑不敢一毫行胸臆於其間恐貽在天之恫而爲賢人君子之所誚让也至叙述之挂漏蒐考之缺略自知不免謀授剗剗則大人之志也小子敢乎哉惟期繼此三十年則一修明潤色光大以茲編爲初藁可耳豈康熙五年歲次丙午孟秋之吉九世孫英百拜書

## 徽言秘旨序

古昔聖賢所以爲修身理性禁止邪僻變易氣質至今猶可以得其遺意者則莫若琴矣傳曰君子無故不撤琴瑟又曰不學操縵不能安弦其見於曲禮學記之篇者如是其詳且重也夫撫弦動操代不乏人予竊以爲宮羽之調適節奏之清真聲音之和暢充美不佻不靡不躁不迫不凌節而亂不嘽緩而散此皆非可以作而致強而能也恒視乎其人之性情焉故德性欲其寬平廣大清和恬裕不糾紛於嗜慾不汨沒於聲利不駁雜于喜怒不煩擾於视听湛然清虛翛然廣遠俯視六合游神古初然後寄之於心手托之於徽弦有純古淡泊之音無促節繁弦之病寫古人忠孝之思則周公孔子可舉然而高望也操古人高山流水之韻則伯牙鍾期之徒奔會於腕下也發古人悲憤淒惋之音則伯奇屈大夫慨嘆旁徨於其側也揮五弦而送飛鴻得乎心而應乎手朝烟夕霞不足以喻其變幻崩崖裂石不足以擬其奇峻海濤松籟不足以俪其雄邁流泉曲磻不足以比其幽窅瀟湘之云峨嵋之雪不足以絜其旷渺空潭之龍吟九臯之鶴唳不足以方其清音逸响古人所謂泠泠七弦遍一弦清一心者是豈非德性純厚之所爲器也而通于道乎予自弱齡即有志於据梧之學蓋歐陽子所云夙有幽忧之疾欲藉此以少自砭治願以塵事委頓隨學隨廢今且老矣慮嗣後指爪拘挛雖欲從事于此而不能曲折與徽軫相赴間理旧學一二引用以調習其心手冀異時倘可吟嘯於清泉白石之間

聊取以自娱又念古人类不能多学白乐天止习秋思范希文惟弹履霜或亦其寄托高远有在于朱弦素琴之外者吾友孙君静紫得琴之精义於芝仙尹君订其所着书曰徽言秘旨予求而览之其论指法最严且悉洞精达微穷极旨趣芟俗响而存古音矍凡调而尊正始可谓集琴学之大成盖尹君数十年心力寝食于兹而静紫紬绎而阐发之渊渊乎美矣备矣且静紫为徵君文孙道德之所涵濡中和之所衣被其为人也冲夷恬旷离尘远俗官于金门而读书味道怀古怡情宜其得於琴者深而有以发其性情自得之乐也噫古人所以为修己教人之具而後世罕能发明其义专求於声则未矣故为举其重者而序之

## 左长玉制义序

吾土山川之秀异杰出者无逾于城之东乡白云浮渡诸峯极巘泉洞壑之奇尽烟云林木之态顾以僻远城郭辙迹其间者或鲜少焉左子长玉读书于白云之隈凭临大江俯瞰湖泽近揽诸巘壑置于几案之侧发为文章思深而致远旨隽而气醇吐纳风流卓然?秀盖有得於山川磅礴之气而抒写其胸臆故与时流龌龊牖下者絶殊也忠毅公树大节於海内尤精於人伦之鉴其赏识多奇中至今朝廊艺林所称述必曰浮丘先生长玉为忠毅公从孙承藉家学素苦食贫独抱一编研链揣摩于烟云旷邈之际初则落落难合果一出而登贤书悬其所作于国门洵可以鼓单寒读书之气而为後来者劝也长玉既力学意弥冲然自下夙昔以文章寄京师请业于予早决其必售而窃幸予言之不谬今天益厚长玉俾其为六月之息从此肆力於古学博其识裕其气拓其才尽发山川之灵振起先贤之绪当不仅为制义之名世云尔也于其文稿之刻而书数语于简端焉

## 百石图序

天地清奇之气露泄于两间瑰异磊落而难于名状者盖莫如石二华之雄峙崢嶸莲萼仙掌秀出天半灏灏之巘巘磅礴奔流激湍富春之壁立幽峭匡庐之飞泉万仞武夷之蜿蜒九曲以至飞来峯之玲珑虎丘山之平旷凡着盛名於天壤者罔非石也故山戴石而漓岏水激石而滌洄林木?石而秀润高之则数寻盈丈号称石林米顛之所拜也小之则一拳半握峰峦毕具出入怀袖东坡之所宝而爱也无论郁林洞庭泗滨崑阜而其含蓄天地清奇之气则一也可斋贾公以其胸中清奇之气画而为百石标新领异变幻莫穷或正或侧或平或鋭或立或卧或以髮濡墨而为之或染花草而为之或舒毫而直写或经营而後出无不尽态极妍百幅无一相类其笔力腕力直与造化相侔然後天地以之泄其奇于两间者贾公收其奇于尺幅之中宁不足以焜耀古今上掩前哲哉公与予交最久性笃嗜笔墨乐与高人名士游政事之暇偶寓意写生笔法不肯剿袭前人而独探其奥盖一事不苟者如此想见公退食之时焚香清昼纵笔所如不过自写其贞介直方之?虚明峻洁之操奇怀逸趣奔会腕指掀髯一笑楮墨淋漓而石成矣则是图也公之性情器识见于此矣敏妙本於性灵而寓之于石又随笔綴以诗歌箴铭真行间作吐纳风流扬扞骚雅则是图也公之文章见于此矣古人云为政心间物自间公长才硕抱治民有经四境肃如品物成遂以卓异报绩故能以其暇裕游戏翰墨则是图也公之政事亦见于此矣即小可以观大即微可以知钜故乐为公称道而赞述之古人以石为云根故云泰山之云触石而雨徧天下以此为霖为雨沾洒秦楚之民皆于是乎在又不

独几席之玩而已也昔东坡亦官于黄枯木竹石至今片纸珍如拱璧况公以百幅後先辉映传之异时予言亦托以不朽矣

封大夫人李年伯母壽序

今上御极之二十一年岁在壬戌春王正月海内新奏底定炎荒絕徼罔不臣服

朝廷方布涣汗之德音沛休养之大泽士大夫数年来夙夜劳勩之心得以少自慰释相乐昇平且当温律融和万类熙皞凡为人子者咸思以康体之爵举福嘏以祝其亲以仰副

圣天子养耆老礼高年之心甚盛事也学士厚庵先生之母太夫人新被

纶封紫泥焜燿设帨佳辰适当岁首同官于

朝者咸以为荣举觴相贺英与厚庵曾同读中秘书共朝夕起居者三年闻太夫人之贤至稔且详故敢不辞固陋而质言之夫文学侍从之臣旅进阙廷珥笔鸣玉以文章受知者常也至遭遇之奇鲜有如厚庵者厚庵请告定省絕处闽峤当祲氛鼎沸之时独能抱孤忠抒密画间道上书报

天子出奇制胜殄灭寇贼以一书生缓带戎马间犒将士峙刍茭练义勇指形势俾克成厥功为

当宁所嘉叹为海内所传颂为举朝所具瞻为文章制科之士所藉以为美谈可谓奇矣然是时厚庵奉两大人居入禀庭训出而指麾不必如温峤之絕裾而能成折冲之功于乡里之间者则尤奇也且又闻之闽故多寇

国朝定鼎以来海氛未息伏莽时闻沿及藩变鲜有宁宇

封大夫前後扞御其疆厚庵克全大节皆太夫人内佐之脱簪指廩衣食其贫嫠惠施其族党何有何无弔勉不怠以聯絡腹心指臂之势数十年来劬劳艰瘁不可殫述也人第知太夫人此日迎养京华叠膺

命服子孙罗侍宾客歌颂为人伦之荣而抑知烽燹海峤之中室家飘摇之日所以佐其夫若子者荼苦有如是哉抑又闻之太夫人事舅姑极诚孝处姻娅妯娌以和敬为常训诲诸子既勤且笃母仪女德无弗醇备夫坤厚载物而百昌茂遂积之者厚则享之者弘厚庵昆季光大未艾固其宜也昔张齐贤在中书门下母以八龄封晋国太夫人太宗手勅褒美懽动都下厚庵之受知

天子不异古人太夫人之德福後先辉映洊登期颐载诸史册不独家之祜抑亦国之瑞矣

## 侍读缪念斋同夫人七十双壽序

盖闻国家当全盛之日德化旁流风教洋溢重熙累洽贤豪蔚兴类必有文学侍从之臣乐恬退而尚闇修托迹丘樊放情林壑以着作为事功以风义为坊表以砥行砺节为报称之具以讲德论学为人伦之监俾世人之仰慕其风者邈乎其不可即复乎其不可攀跻故能使躁者平竞者愧顽者廉懦者立其足以助流朝廷敦龐淳美之化未尝不与在廷之亮工熙载者同有功于斯世斯民也在渐之上九曰鸿渐於逵其羽可用为仪夫鸿飞在冥冥之中而羽可为仪则其裨益乎文明之治夫岂无其效哉居今日而求斯人于海内则吾同年缪念斋先生其人也先生於

今上御极之六年

廷对擢为第一授官翰林即请归养前後在馆职不踰数年中间皆退居于吴门始则承两尊人欢继则闭户治经学澡躬束行味道自腴所着诗古文词沐浴涵泳于昌黎南丰而自成一家的言屏迹双泉草堂时往来灵岩震泽间絕不以顔色示当事端静直方简易诚慤吴人咸重之曩时有大吏入

覲首以先生读书立品为对予闻之而喜慰己巳春圣天子省方至吴会予忝扈从尔时先生朝服率两公子迎於里门

天语赐问知为旧时侍从臣为之霁容予见先生气体充盛齿发不衰更为之喜慰今先生年且七十矣身愈退而德愈进迹益远而名益高深山大泽惟恃有拱璧夜光潜藏其间而後光芒腾达以上翼云汉日星之彩先生之在今日殆如是哉丁未岁

今上首亲政先生亦冠弁南宫三十余年以来

圣天子励精于上而成一代熙平之化先生亦潜修於家行成名立而享福佑壽考之盛云龙风虎之奇又岂独在堂陛间哉元配顾夫人孝淑恭懿闾德咸备治家谨肃皆有法度逮下慈惠中外无间言先生之高夫人实有以成之长先生一年闺门之内白首相庄福祉可谓盛矣婿宋子义存官比部郎谋进先生与夫人介壽之觴以予相知最深属为文以侑之予不敏因举数十年来胸臆中语欲以告先生者而述其大略以当祝厘并系之以诗曰植身如乔松苍翠色不渝龐鸿比山岳福庆良有孚再登双泉堂庭树正荣敷携手看雏凤的烁双明珠言过分云亭烟霞瞰南湖老梅塞巷陌古桂横路衢快哉鹿门翁举案多欢娱待我林屋山相将问蓬壶

大中丞安溪李厚庵先生壽序

粵稽自昔畿甸之难治也左冯翼而右扶风地在三辅之间其中吏道淳良为风纪之本四方之所则效况且世家大族壤土相错阡陌骈连屯庄杂仍强梗凭临奸究戢处盖地大者物之

所托势重者力之所聚于以抚绥有方而安戢善良也岂不戛戛乎其难之开府者百职司羣僚之长襟带数千里外幅 而内民社求其澄叙官方肃清行伍俾武克固圉而文能奉职各安其所以无覆餗陨越之患则最难此吏道之所以罕适於治而为古今之所希觐者也自吾李公为政敦尚大体力崇简要本经学以为政术法古则以治今兹盖廉以洁已清以泄物而于下吏丝粟毫髮之物一无所取于官敝衣蔬食处之晏如而其馭下也一切苟且之事皆不欲就其廉察官聯之道则必以吏治民生为事以恺悌慈仁为本以精明廉干为务而无取乎粉饰文誉炫焕才名以涂飭一时之耳目是以从风者皆应之如响其于民也务于止善安养以兴农田治水利为急务以敦孝弟崇俭让为盛事良善者存苦窳者去一时之人情咸鼓舞乐生以观其德化之成公之识尤能通獎善类推与好贤其于人材也皆务举所知

圣天子朗彻万类洞开重门而每以公之言为正择善令登赤县者多公所举人而公自视则欲然也是以谦冲善物屡被

恩纶如黼衣章服之华

御书夙志澄清之褒荣施重叠皆公之裕于中者素而被之者有殊荣也京都地接九河水所至多泽国平原千里忽为淤沮

圣天子悯民因为筑堤以扞御之岁糜费数十万以施惠于民公督理察视相其高下而胥度之奔走河堤殆如下吏勤劬况瘁卒使治芜莱为垦辟安閭阎富田作者岁获有秋以仰副我

圣天子惠元元爱百姓之至意岂不诚为鉉且鉅哉今者嘉禾溢亩芝草生於庭闕以彰我公享大年毓景佑之瑞兹秋为公介壽之辰贤大夫谋所以祝公壽而乞言于予余窃谓诗之言壽者屡矣而其言曰跻公堂而称兕觥继之以介壽则繫之于豳风七月篇毋乃诗言农桑之业兴则根本之计固公之所经营者皆农桑之事亦可即公之事以壽公不亦可质言之而无所附属寄托益以有耀也夫

文端集卷四十一



# 卷四十二

钦定四库全书

文端集卷四十二

大学士张英撰

笃素堂文集六

论

韩愈深得春秋之旨论

夫春秋何为而作也圣人以顺天道明王事而立万世不易之则者也圣人悯夫王道之不明礼乐政刑之失所统而天下後世将不得与闻于先王之教故明天道以治之以王者赏罚予夺进退之权一寄之於春秋而圣人忧天下後世之心益迫矣忧天下後世之心迫遂不得不力为之防深为之虑一言之褒一字之贬兢兢焉无敢失者非得已也韩子有曰春秋谨严程子以为深得春秋之旨盖以其能识圣人不得已之心矣夫春秋继诗而作也诗之旨主於温厚和平美刺之间优柔不迫类多托物以流连之咏歌而长言之即其间不无悯时病俗之非亦且怨而不怒初未尝指陈是非激切而褒刺之也而春秋之主于谨严也其于温柔敦厚之意何居不知诗之作也王者之政教明于上仁义涵濡里巷之间皆有以咏歌乎圣人之泽即鄙而下称变风矣而先王之教未衰善恶犹未泯于人心故其思深其言长若春秋之作也王者之政教不作于上纪纲废坠虽桓文复作号称尊王而先王之泽已湮善恶之几将泯故其情迫其言迫故其义不得不着此春秋之谨严所由继于温厚和平之後春秋之教一诗教也今观其宏纲大义之所在或抑或扬或隐或显或屈或伸或予或夺无不準之于天道本之于王事御之以帝王之大经大法呜呼何其慎也盖春秋一书以防天下之肆则立说不得不谨以止天下之僭则持义不得不严以一言立百世之经以一事立万事之则将以挽天命民彝于既泯使复与闻乎古先哲王之教也则是於圣人之词益切而圣人之心益苦矣夫先王之治天下莫严於礼太史公曰春秋礼义之大宗也苏子曰春秋之所褒者礼之所与也春秋之所贬者礼之所否也圣人之作春秋一以礼为断先儒之论春秋一以礼为归盖将为持世之大防而不得不出於此也非即韩子谨严之说哉韩子识春秋之义故其于佛老竭力而排之其词直其义正使异端不得进而与吾道争也亦可谓能谨且严矣盖未有圣贤生而不为世道忧者也未有为世道忧而不凛然于人心之防者也凛然於人心世道之防而出於谨且严也岂得已哉知此则可与读春秋而亦可与读韩子原道之文矣

王者以教化为大务论

董子之言曰王者南面而治天下莫不以教化为大务善乎董子之言上自商周秦汉下迄三

国五代唐宋以来国家所以延促之故卒未有能易其言者也人心之日流于伪如水之就下而不可止圣人以教化为堤防尧舜禹之相禅以治继治人心淳朴未漓董子所谓继治世者其道同也汤承夏之敝伊尹称之曰肇修人纪夫五典之敷久矣至汤而言肇修者救夏之衰也周承殷之敝文武成康数圣人相继渐摩涵濡以革殷故俗书曰商俗靡靡余风未殄又曰既历三纪世变风移化之若斯其难也秦人承战国之敝无一日之教泽而加剥削焉是以再世而不振西汉之泽絛于文景东汉之治洽于明章唐之绪永于贞观宋之祚延于真仁此数君者类皆能兴起教化以丕变一世之人心风俗使子孙有所凭藉以为固尝譬之天下大器也昔之人用之数百年日剥月削久而窳敝矣後之人取其器小而补苴之大而陶铸之称其力之厚薄以为所用历年之多寡未有仍其窳敝谓可以无虑者或曰人心之日趋於挽近势则然也虽圣人不能返之使淳是盖未知天道矣夫秋气之萧瑟隆冬之沍寒斗杓一移万物煦煦譬如人立乎文景贞观之间回思嬴秦五代之世不犹乐阳春之和而几不知栗烈之苦耶是知天道无剥而不复之理人心无往而不返之机圣人执大权于上以天地为鸿钧以万物为铜冶以喜怒赏罚为屈伸呼吸使天下之人訛訛焉而动蒸蒸焉而化斲华而还朴去伪而即诚风俗淳美人心敦固耻于犯法悚于为非礼义之化浹肌沦髓如治器者坚好完固而後可以贻之子孙而为百世不拔之业也且治天下之需人材人主尽知之矣天下卓立特行之士不为世俗所移百而不得一者也古人有言曰天下之人中材为多故治世之本教化为尚教化行引中人而升之于君子之域教化废推中材而纳之于小人之途故教化者推之挽之之具也廉耻之道重而後有恬淡之士义利之辨明而後有气节之行躁竞之习除而後有难进易退之节侈靡之风革而後有守约洁已之操风行六字蒸变万类鼓之舞之咸去故习所由风俗美而人材出以惟上所用故曰有教化而後有人才有人才而後国有与立善乎董子之言为不可易也

## 中和位育论

读中庸者勿徒谓是圣贤言理之书也夫天地至广万物至繁日星河岳之奠丽飞潜动植之蕃变神奇而莫可测纷纭而莫可纪极天下之聪明才智而莫能知其所以然中庸谓以一心之中和而位之育之朱子释之以吾之心正天地之心亦正吾之气顺天地之气亦顺要皆浑言其理而未尝实指其事于是高明者将游其心于空虚杳渺之域颡固者习闻其说又视为迂远而不可信以为圣贤特如是言之耳间尝观洪范之所谓五事以貌言视聽思而约之以肃乂哲谋圣配之以雨阳寒燠风推之于休徵咎徵极之于庶草蕃芜而後知圣贤之言有其理则必有其数理精而数亦非粗有其理则必有其事理实而事亦非虚其所以训天下後世者该乎至大而非夸通乎至微而非不可据也夫貌言视聽思于一身备之肃乂哲谋圣于一心备之至于雨阳寒燠风皆不失其序则天地位可知矣庶草蕃芜则万物育可知矣圣人在上以一心运乎穆清之上辨上下以定乾坤大施生以配覆载陰阳之愆伏寒暑之失次水旱之不时皆得以裁成补救泄其太过而助其不及故日月不蚀星辰不孛山陵不崩川泽不竭清者常清宁者常宁此天地位之实事也建立法度纪纲教养生民使老者以壽终幼孤得长遂樽节爱养草木鸟兽取之有时用之有道使各遂其性各蕃其生此万物育之实事也故称尧舜之功者曰地平天成称成汤之德者曰鸟兽鱼鼈咸若上古圣人德盛化神者皆然中庸特举而言之耳尝谓中庸之所谓至诚至圣必至帝王而後能极其量中庸之所谓参天地赞

化育必至有天下而能显其功盖君心即天心也万物之托於天者有形之天万物之托于君心者无形之天天人主一念之动而万类以为惨舒一言之发而四海以为休戚知此则知中和位育之理至近而非远至切而非虚也如夫子居春秋之时躬备圣德而位育之功不得加於上下疑参赞非儒者之事虽然圣人继往训开来学使天下後世晓然于天经地义之大仁民爱物之理虽不能位育一时之天地而其施益远而其教无穷盖六经者圣人参赞之事也故曰尧舜之圣功在当时仲尼之圣功在万世

## 格物致知论

大学一书统明新以垂训贯本末而立言而其说始於格物则格物之说亦诚重矣盖盈天下皆物也内而身心意外而家国天下显而彝伦物则之际大而天地万物之原隐而君子小人之情状以及于一事一物莫不有其当然之理与其所以然之故如此而不能真知灼见则善恶之数未明是非之几未决邪正之理未判危微之机未审以之明德则几微疑似不能洞达而无遗以之新民则设施措置不能每举而悉当又何以本末兼贯明新一致而号为大人之学哉大学之所以托始于格物者其学甚大而非无所统会也其学甚博而不入于驰骛也其学甚精而非流于虚渺也内而身心意若何而诚而正而修外而家国天下若何而齐而治而平人伦物则若何而为恩义分合之端天地万物若何而为位育生成之故君子小人若何而为诚伪邪正之别以及一事一物若何而为至当不易之则于此格之使之表里内外洞达不疑格一物而一物之知以致格衆物而全体之知以致盖知者理之具于吾心者也而散见于物在吾心则为知在物则为理于物物而格之而後吾之知不入于昧不蔽于偏不流于虚而有觉之体全矣虽然格之者何格之以吾心之知也非吾心有知而何所恃以为格致之者何致之以在物之理也非在物能格而何所藉以为知故知与物非有二体格与致非有二事司马温公以为格去外物是以物视物而不知即吾心之知所寓也王文成主于知行合一是一以一格而遂无余事亦与大学之旨有岐格物致知正吾学与曲学之所以分途而辨之不容不早且慎也彼离物索知而自矜顿悟者虚无异端之学也既不求於物则外视物矣又安能不举身心意与家国天下而俱外之也哉大学之道所以统明新贯本末於一原者格物致知之说也

## 太极图论

太极之说始於易易曰太极生两仪两仪生四象四象生八卦太极居两仪之先则其为生天地万物之本无疑也至周子濂溪始建图立说於太极之上复益之以无极而太极由此而动静互为其根以至生五行布四时成男女化生万物而太极之义备矣先儒往往谓无极之说易所未发而周子发之或疑其说近于空虚朱子以无形而有理之言释之盖谓其有也而初不滞於形迹谓其无也而更非涉于虚渺後世纷纷之议折衷於朱子之图解而亦可无疑矣尝论天地之所以生陰阳之所以立五行之所以变化人物之所以蕃育何以往复而不穷何以流行而不滞何以亘终古而不敝此必有为之极者是即於穆不已之原继善成性之本乎故极中未尝无健顺之理而言仁义礼智信则分配乎五行独此一理浑然精纯而万变生焉万化出焉故谓之太极合而言之天地万物共一太极一气周流之内天地且不能外而况于

人物乎此所谓合万殊为一本者也分而言之 一事一物各有一太极即纖细之物俄顷之间而此理何弗周徧而不遗此所谓散一本为万殊者也易之所谓两仪即图之所谓动静陰阳也易之所谓四象八卦即图之所谓五行人物也易言其理图发其蘊无极一言又所以善言乎太极而使人不敢以气化之相嬗者遂谓之太极然则周子与易有岐旨乎而周子所以建图之意何居人与万物同涵此太极而惟人得其秀而最灵观于天地位则天地陰阳之极自人立之万物育则万物之极自人立之故一言以断之曰圣人定之以中正仁义而主静以立人极焉吾人性中之一动一静即配乎图之陰阳也吾人性中五常之德即配乎图之五行也吾身之酬万事应万变即配乎图之万物也然则动静之朱分五常之所不能名万事万变之未接而凝然中处者非即配乎图之太极乎君子欲使吾身之太极足以配乎天地之太极而动静生生不穷者盖有道焉不外乎周子通书之所谓诚与图说之所谓静而已矣太极虽兼动静而非静无以立其体太极虽浑万善而非诚无以会其原静则常正而太极之体立矣诚则不息而太极之用周矣体立用周则天地之极与万物之极自人立之是则周子建图之意也岂徒言天理而不切于人事者哉洪范五为中数而言皇建其有极五行五事莫不从之矣惟中能建极殆亦先图而啓其义者与

## 不知命无以为君子论

夫子罕言命孟子亦曰君子不谓命圣贤之意盖不欲以气数之有定阻人进修之意啓人趋避之心孔子又尝曰不知命无以为君子其义何居夫人之处世荣辱得丧毁誉进退之数类皆有天焉不知其为天而汲汲以求之营心於患得患失之途此小人之侥幸无足论者也知其为天而委心于因任置身于闲旷举凡进德修业奉职循分之事皆置焉不讲一切听之于杳渺不可知之数以自谓知命而可谓之君子哉非也夫子之意盖谓知此而後君子可为也天下之欲为君子而不能为者荣辱乱其中得失易其虑毁誉眩其视听安危吉凶摇惑其素履由是沉静者转而为竞躁矣方直者化而为突梯矣亢激卓立者变为緘默谨愿矣以福利为必可趋以灾异为必可避苟且安营而君子于是乎不可为矣圣人告之以知命所以静其心澹其虑一其聪明夺其智巧而後其为之也纯诚敦一可以历万变而不渝其正入万物而不易其识其进德也坚其修业也勤其奉职也专其循分也恪独居而坦坦处羣而穆穆遇事而侃侃利害乘之而磊磊落落艰大投之而孜孜勉勉中无所疑外无所惧先後左右无所瞻顧却虑凡君子所当为之事皆得而为之则由其知命者素也进以礼退以义孔子之所以为孔子非徒曰得之不得曰有命云尔也士大夫之持身涉世其亦味乎斯言而已足哉

## 记

### 思过轩记

读易楼之南构屋三楹分南北户别而为六其东北一隅去门径稍远尤为静僻室修广不盈丈置木几竹榻于北牖下当窗则梅桂参差草花菁翠丈室中邃远有幽人之致予每于游览卉木酬错亲故读书作字之暇辄坐卧其中捐思却虑收视反聽冀得片晷之憩息而游心于冲夷恬澹之境也每思人生丛过积咎扰扰纷纷相循而不已如号长风鼓巨浪惊心骇目试

静而体之揆之诗书所纪载昔人之所言行而是非得失自见矣玉莹洁则瑕类出潭激澈则沙砾见天清湛则云翳显夫人亦犹是当此静境与为守寂无宁思过气静心澄平生所为万端在目此孔氏有内省之训曾子重其严之诚也作思过轩记

## 香雪草堂记

予生平酷嗜种树常欲得闲壤一区梅李桃杏之属各布柯干不使杂处俾其掩映交错尽态极妍为足纵观览之乐顾以地隘力薄不能适所愿学圃斋之南为南轩去轩十余步为竹圃竹之外有古梅数十树盘互偃侧为一方广十丈许不杂他树梅之致有临清池者有倚短墙者有石者有与竹相间者有高翥拂云者有低偃拂地者有碍路者有临窗者有孤干亭立而上如盖者有丛生而条干自相环抱者有苔藓绣澁而劲如铁者有曲干糾枝而奇如虬龙者有撑拄而如攫者有偃蹇而如卧者可谓极梅之态矣花时自深冬以及春半先後相续大约山寒气晚至啓蛰时而尽发弥望如雪香气袭里许为屋三楹以临之题曰香雪草堂堂前为广轩资其爽也花下置小亭便憩息也自冬至後辄携书卷移器具寝处其中烟霭晴旭景皆佳胜雪时月夜为尤奇絶予种树之愿虽不能尽酬幸而有此不可谓非造物者之厚遗我也使予常得寝处其中春玩其华夏休其赏其芳妍而景其高洁优游徜徉咏苏陆之诗亦已足矣尚敢多求乎哉

## 五亩园记

予所居之室在城西南隅曰笃素堂予为宗伯时皇上御笔所赐之名也曰忠孝予为侍讲学士时上所书也堂之後有梅十余株曰咏花轩取庾信今朝梅树下定有咏花人之意居室之南为五亩园有二方池相接可二亩许临小池构屋三楹曰六经堂予有六男子各习一经令子孙世守其临大池则有亭翼然清波涟漪环以高柳秋水轩三字则

## 驾幸金陵时特

御书以赐之其池之南与此亭相对则有楼三楹曰日涉轩有小亭曰兰丛予园最称僻野惟在高柳数十株竹数千个其桃杏兰桂梧桐紫薇石榴之属则周乎两池而分植之予山野鄙人三十余年叨近

## 圣天子光华故

## 宝书之赐臣家独多

皇上天纵至圣经史之学无所不该即法书一端亦超絶前古而冠弁百王予家斗室之中琳琅奎璧荣光四照予幸以暮年归老于故乡依日月之光饱尧舜之德饮食寝处戴高履厚岂不为大幸哉故记其事而谨书之

## 芙蓉谿记

出郭四里许由谷口而西是为西龙眠两山夹谿路缘谿而入蜿蜒深曲至媚笔泉水石益佳山始开拓四围如屏障中有田数顷膏沃平衍南北二谿至此合流谿之南有石壁横数十丈插谿中是为垂云泝谿边构垂云亭是入吾园之始也吾园得平壤之半不设藩篱任樵者取径焉径绕垂云泝西行苍山古木与清流相萦带既而过石埠上小亭曰芙蓉谿亭亭临涧水乃南涧入园之始跨礧为桥过桥循山麓而行碧树掩映下视平畴则南阜种秫田也藏山阿中者为南庄农人所居畜牛一头置畚鍤钱鏹于其中槿篱茅屋鷄犬桑柘盖村落景也过此为枫坪为土穀祠为南玉雪冈为观获亭向南有屋一区对菊圃傍有枫柏橙榴柿栗之属磊磊砢砢至秋而红紫頽黄相间名曰秋妍馆馆之北修竹数亩穿竹径而往则为村之南门村为三区右则桂丛中则来鹤亭左则居室来鹤亭手自植梅与松主人日从宾客赋诗饮酒于其中有丁令威之思焉居室之堂曰传恭欲以貽子孙世世耕且读无忘先公创业之艰故曰传恭南向者为千巘万壑之楼盖烟霞岭岫大溪平畴归樵耕犊皆可览瞩且山居宜楼园花堤树在俯视间固吟眺一胜景也庖馐臧获之室则隐于楼侧不可得而见出村之北门行古梅中百步大溪之傍有磐石临溪昔人沅苕浣衣之所构亭冒石上曰溪光山翠亭亭之西为杉坪为茗冈稍东为木香棚为北玉雪冈为牺舟亭亭临深礧乃北礧入园之始从亭下登舟而南沿清流荡轻桨春则垂柳桃花夹两岸一里许秋则紫薇芙蓉照耀水际南指松堤堤之内则稻田十余亩堤之外则高峰千百叠也舟行水中至濶水则双溪草堂在焉堂五楹东向高朗轩豁洞南北窗以延凉燠绕砌种红白莲夹?环碧柳高梧为主人避暑之所堂之南则曲廊数十步杂花交?沙岸萦回由曲廊啓南户则入佳梦轩为主人晏息之地廊之南为药栏为鹤棚为秋水轩结构溪畔正对涟漪紫菱湾菱涡波光澄澈游鳞可数系其傍者为桃花流水扁舟舟中置竹几茶铛当风日清佳则携琴书挟茗果登舟沿绿溪中上下溯洄竟日不知疲一花一石皆为凝睇久之夕阳晚风则垂钓扣舷而歌溪中接东西?有绿杨桥桥畔有云耕亭溪之东有闸口水涸则闭之水涨则啓之跨闸为放舟亭啓闸则舟入大溪烟波浩渺可直达赐金园古称山居之胜有六曰奇峰怪石清流眺览古木新花吾园幸皆具是六者又有耕获之乐舟楫之适凉台燠馆之娱梅杏樱桃梨枣之味杂花香草之繁縟紫鳞白羽之飞跃岂不可以优游颐老于其中哉康熙己卯嘉平月既属鸿胪禹子为此图遂并记而书之

## 御笔书双溪恭记

西龙眠山有二溪夹一山而东其北溪则自黄柏山房而来其南溪则自蕉园而来皆穿石礧从云中落奔流激湍曲折逶迤至于山之麓则二水会合略加疏凿则二水滙而聚于吾堂之下渟泓澄澈旱不涸而涝不泛白沙灿然游鳞可数因种红白莲紫菱畜朱鱼数百头辟其地而构堂以临之于水际种芙蓉数百本枫柳桃杏紫薇之属于堤上种松千株环溪有田即以溪水为灌溉癸未春

圣驾閱视河工巡历江南予时迎

驾之金陵恭求

## 御笔书双溪又书秋水轩二匾额蒙

圣慈问汝在家好种树又书种花处一匾赐之夫穷荒僻壤之中一丘一壑老臣衰病藉以养痾避嚣如秋虫之抱寸壤鹤鹑之栖一枝荒陋僻野乃致劳

## 圣人之赐额

宝翰焜煌炳如星日将使山灵有复旦之光野人被尧舜之泽载之史册传为神臯奥区貽之子孙奉为金庭福地烟霞云物千古常新岂止老臣身被荣幸而已哉

## 桃花流水扁舟记

龙眠向来溪流湍急奇石如林溪行石隙中跳珠溅瀑不可以舟余筑双溪平水约里许可以舟矣因制小舟可容数人坐荡漾于芙蓉间紫菱触手可摘水至清游鳞可数山畔高松翠竹绿槐垂柳之阴皆在目前?上植桃花数百本每有味乎张志和之诗云桃花流水鳜鱼肥遂取以名吾舟余曩前涉历江淮熟习于波涛之险惊骇震恐于江路者数矣烟波浩渺风浪贴天四顾无岸江豚诸怪隐现出没相顾无人色屡濒于危遂立誓不登江船今此舟无帆橈之设惟柔艣一枝两童子荡之微风徐行往来不出一里之内琴一张书数卷酒档茗碗钓竿略具脱有风雨则移置菱芡湾中高咏青箬笠绿蓑衣斜风细雨不须归之句枕书而睡又素喜唐人诗曰钓罢归来不系船江村月落正堪眠纵然一夜风吹去只在芦花浅水边此皆有道之言夫乘长风破巨浪瞬息千里亦云快矣然此岂在芦花浅水边哉余生平颇思舟之逸而又甚惮舟之险故于山中制一舟就其逸而避其险视陶岷三舟之乐当不是过也

## 垂云亭记

芙蓉谿之南有石壁六十余丈上?翹木下俯清溪有一径甚仄石之下野人为小沟堰水入田是以径之左右皆水而径宛转于流水之中樵童牧豎之所往来而余特加石甃以平治之石之上皆山花野草而余特去其荆榛培其佳木于石上镌垂云泝三字于溪上作垂云亭以对之石色青苍如削玉如画家所谓斧劈皴欹磊落与老树垂藤相间亭可小憩而入吾园者必取径焉李习之谓园有难兼者六事高峰奇石幽潭曲水古树新花余但因故物不事疏凿雕饰而六者咸备过此亭便入芙蓉溪舍陆而登舟客至则舟子舻舟以待岂不可优游怡老哉

## 浮山华严寺斋僧田记

浮山以巉岫洞壑之奇?跨江北僧寮皆依石结构悬崖置屋若巢居然其中建置宏敞楼观轩翥金碧辉映巍然为诸巖之总持者则华严寺也前代勅赐藏经以及紫绮袈裟花幡绣幢之属甚夥寺依平麓前带崇冈奇峰青壁连蜷蟠郁苍翠插天云气出入不可名状者皆屹立于寺之西北长松修竹古桂丹枫仰视青苍俯瞩空濶诸巖石之胜?而不藏如海舶珍奇轮囷陆

离错列于碧帷青幕之下至斯地者神体恬旷心目骇愕窈霭深秀疲于应接洵寰宇之奥区佛刹之钜观也予以癸亥秋至浮山始至则白雾蒙山林壑隐见及寺门则山足和尚方率其徒刈豆中田草屨腰镰跣而揖客予信宿方丈中时听戒僧聚处者数十人朝夕不闻人声五更钟鸣梵诵後聚食一堂人粥一盂羹一盘不闻匕箸声食竟各治职事薪者薪芸者芸获者获圃者圃汲者汲及晡而入定当午而始饭遇岁歉则止设粥糜盖山足和尚之教其徒者严肃精进如是予每见释氏之徒鲜衣美食惰其四肢羣聚而嬉游窃意其教不应如是今观和尚之所持而加敬信焉则山足之有功于其教岂不伟哉寺昔为延陵宫谕司马清江公辈所护持有田若干亩力耕以饭四方之僧至山足益广拓之为田若干亩春耕秋获不爱其力以供养十方则无可师所谓随分自尽各安生理之铎也山足和尚道气渊沉邃于诗学戒律精苦夫澹泊勤苦之中万善出焉吾安能测山足所至哉重其请故乐为之记也

## 文端集卷四十二



# 卷四十三

钦定四库全书

文端集卷四十三

大学士张英撰

笏素堂文集七

杂着

御制文集恭跋

【臣】英窃闻文者载道之器也尧舜禹汤文武之心法道法其最着者莫如钦明濬哲勤俭智勇肃雍敬胜後之人得因其所传以溯其所存而知其德之盛者则惟赖乎典谟誓诰风雅之文炳日星而烂云汉也钦惟皇帝陛下宗二帝之心传跻三王之治理海?光天之下罔不率俾景运隆祚覃固龐鸿

万几听覽之暇辄着为古今诸体文章诗什积时既久编为若干卷【臣】伏而读之有言性道之文焉危微精一经纶参赞皆探其源而抉其秘直以

圣心之所蕴蓄者发而为文远而洙泗近而濂洛关闽无不同体而共贯也有言政事之文焉明作惇大百度维熙休戚痼瘵万物一体直以

圣政之所敷锡者发而为文其中正宏备则周官立政之遗轨也有

两宫祝颂家庭賸奏之文焉立敬立爱纯诚笃厚合万国之欢以天下为养无非

圣孝之所流而不能自己者也有诚勉臣下之文焉劳来匡直扶獎诱掖使咸入于君子之域则放勲之所以教也有流览景物抒写性情之文焉则对时育物涵濡万类昭苏羣品如造化之亭毒凡飞潜动植之微无不畅遂於其际也惟如是故不事雕镂纂组而自然磨炳燿皇若斯之盛譬诸天地之景星庆云沧溟岱华光华屹峙亘古及今极天下之至文岂有能逾之者哉【臣】侍从左右伏觀

圣人之学博而无所不该而必以六经为根柢故圣制诸篇穷理极高深得易之奥典重鸿硕得书之大淳泓蕴藉得诗之厚褒贬谨严得春秋之法条理畅达得礼之序又从而博综诸史穿贯百家而指归不外乎是以经学为文章固宜乎文之磨炳燿皇而不可尚也猗欤盛哉【臣】英不揣固陋敢拜手稽首而敬识於简末御制夏日登景山诗跋後

康熙十七年五月十一日

皇上以几务之暇偶幸景山命【臣】英【臣】士奇侍从上揽辔登景山之巔周览四郊俯  
视宫阙东望蓟门西眺桑乾烟树苍深河流浩漭近在指顾之间

天顏怡暢二臣咸得寓目焉时则禾稼被野方待优渥之泽俄而云起西麓雨过龙楼

圣心顾而悦之

御制诗一章有时雨将来之句诗中之所谓

君臣同乐者盖有乐乎此也【臣】自蒙

恩入侍

禁庭

天章云汉时得而捧读之大约篇什之中必以四海八荒为念苍生赤子为心上述

祖德躬展孝思悯农事之艰难劳征人之况瘁揆诸古昔虞帝喜起之歌武王户牖之铭其曷  
加焉故虽一豫一游一篇一咏而心不忘乎百姓如此则凡触乎圣衷而发为

睿藻者皆于此可类观矣岂独光丽日星声诸金石足以超往牒而轶前轨哉七月十八日

上御迎凉之殿挥洒

宸翰书此诗以赐二臣楷法精严龙翔凤峙此希世之鸿宝二臣何敢私焉敬勒之贞石以明

圣心之所在独重民时亦以幸二巨之荣遇千古不多见而愧汗惶悚之不能自己也

写生十则题词

古之传写照者岂不重难其人哉于眉颊顾盼间并斯人性情器识而皆传之视绘月有光绘  
水有声之为尤难也顾恺之吴道元阎立本诸人其才皆卓犖不羣识鉴清远其所图者又皆  
当时之名公钜卿逸人高士以两人之性情相遇于缣素丹青之外而得之于心目之间则脱  
之手腕者犹其寓焉尔况笔墨乎古人以诗貌人者如杜少陵之眉宇真天人李昌谷之骨重  
神寒天庙器极力摹画千载如生画家亦必具此种笔力然後能令人想像于眉颊顾盼之余  
也予时在直庐日亭午户外传铃索声周子履坦承

命来为予写照予初识周子于此时凝神聚精经营睇视閱三日而成

天顏顾之赏其极肖噫亦可谓盛事矣周子今日之长康也传神阿堵岂待颊上三毫独是予以山泽衰陋之姿遭遇于时获此荣宠自顾形影有慙于裴楷多矣暇时书其所着十则相示探微索妙备具古法因知履坦之所学有本艺也而近乎道性灵不泯代有作者宁独古之传人哉

### 红术轩篆册题辞

古人于佳山水凡游历之所经耳目之所寓者辄着为诗歌记序以纪述其事盖将使岭云烟树之奇飞瀑鸣泉之胜一展卷而可得虽晤言一室之内可以卧游於千里之外也余尝谓人家古鼎传罇法书名画以及奇葩异卉凡接于目者皆当写为短句长吟以曲尽其情状载于卷帙之中则不必其物皆为吾有而吾与主人已各得其半矣黄山老布衣汪子快士抱五岳名山之愿而兴会遭遇能副之登泰岱历华衡渡潇湘涉洞庭跻天台穷鴈宕游迹所至必搜辑古人题咏境取其最胜句取其最奇者彙为一书又以其家于黄山也于黄山独详汪子工篆籀每句为图章系以小纪其篆法苍秀?古如以秦碑汉碣置于佳山水之间发挥其神采标举其眉目凡海内奇蹟壮观洞天福地汪子尽收之一卷之中而挟为已有又不止于分主人之半矣予夙昔有向子之志顷见是编而悦之欲公诸同志嗜好山水者家挟一编或以为登临之指南或以为卧游之图画无之而不可也

### 勉学箴

自河洛之肇纪创文字於羲轩三坟启其秘奥六籍滙其渊源金声出於孔壁韦编漏於秦燔恢恢乎道德之藪岳岳乎礼义之门百家腾跃而自喜诸史博综而不烦皆圣哲之菁华幸简牘之犹存罗古今于一室间图史於琴罇宝寸陰如尺璧实昔人之所敦请秘书而登阁乞邻光而凿垣轻千里之负笈絕三禩之窥园或负薪而吟咏或荷鋤而讨论或燃藜而不寐或移月而忘餐士无殊于贵贱惟经明而自尊矧予质之謏陋慕古谊之弗援历祁寒与炎暑乘月夕与朝暾求经义之微密思振衣於崑仑旁蒐罗乎载籍萃衆美以逢原愿含英而咀华期执简而芟繁探沧海之骊珠拾玉峯之瑶琨积雾隐南山之豹洪波翻北溟之鯢敢当前而自弃掷驹影於晨昏处文明而荒陋抱慙憾于乾坤矢读书以报国佩永叔之微言

### 题仲兄湖上翁所书地輿图後

余仲兄湖上先生隐居松湖之傍以渔为业其居为桃村种桃树芙蓉皆以千计其他四时之花卉亦略具亭舍塘径皆简朴历落聚妻孥长子孙於其中自不应科举後二十余年不入城市饮酒读书间撮其大要书为小册以自观览地輿图其一也年七十有二能就窗作极细字尺幅可数千余视之如蚊蚋蠅螻然多不能辨久视之则朗整有法度犹忆予家居时会书

谢表册子眼昏多有岐笔吾兄欲为补之余不从曰我不分四十余岁人作字待七十岁人补

笔也

## 姚珠树公传

明之季年吾桐冠盖煊奕王谢子弟以才闻於一时其中文章经济丰采言论气谊识量皆光明骏伟卓然为诸君之冠者则姚珠树公也英为珠树公幼婿公捐馆舍时英年十有五犹及侍公左右见其仪范巍然岳峙渊然海涵吐纳宗风神采四映英虽幼犹能识之工举子业为华赡博大而一一根据理要伸纸疾书千言立就古文词无不兼擅其美诗宗少陵而命意选词机杼仍由已出书法朗润高秀入晋人之室此皆邑人之所矜式海内之所流傳而英得於耳目之濡染者最多也公为廉吏後幼而食贫当时公卿雅重公才望折节缔交所以资奉之者甚厚公性豪迈不羈初不治家人生产悉推所有以供宾客觴咏之需然亦未尝有所匱乏也事项太夫人孝养纯笃至老不衰当明末造知天下将乱士大夫习于太平久皆讳言兵公留心当时事与老弁知兵者游讲求防御贼寇之策火器火药省与邑令谋而预备之崇祯甲戌流寇攻桐城以有备而获免乙亥贼张献忠聚数万衆围桐者三次蕞尔孤城与贼相拒数旬卒以无恙则公与守令同心守御之有道也公不遇於时无由为封疆谋画而克全梓里其效彰彰如是使设施展布其所就寧不伟哉

国朝定鼎後以明经署浙江龙游县学博训士有方多所成就至今称之教子至严肃既壮犹督课如少时以故皆为名士掇巍科少与方宫詹公八人为友称八俊以文章道义相切劘胶膝如古人邑人至今为美谈卒年五十有一以公之才而年与位皆不称其所积而未享者今之子若孙承之俾昌俾炽有以也夫

## 湖上先生傳

先生清河仲子名载字子容少倜傥负气节读书好奇不屑屑章句幼补博士弟子年四十辄弃去隐居於松湖之隈先大夫授滨湖田数十亩宅一区门临大泊可以畜鱼岁发荷花数万挺泊之外为长堤左右接山麓榆柳枫柏之属掩映堤上堤之外为大湖烟波浩渺帆檣出没绕湖则羣峰矗立黛色横亘宅之前极平衍轩豁古树罗列田壤绣错目前之景皆可指而瞩也宅之後修竹乔松为先大夫手植皆近百年物郁然深靓先生率妻子隐于其间家才足稻粱布衣蔬食宴如也与五兄同居湖上三十余年足蹟不履城市往还惟田夫野老经年不见宾客或嫁将会姻亲前数日辄作恶曰予岂耐衣冠而与人拱揖故但疎节濶目略见大意而已晚年以田产付诸子而自以渔为业鲜鳞日给于笊簞未尝乏絶鸡豚蔬果菱藕之类无筭悉素所艺畜客至亦罗列粲然而未尝取给于市于宅之左别构一墅去湖岸数十步以便网罟柳径柴门绕土楼植桃千树木槿芙蓉杂卉称是号曰桃村尝曰吾为园只数斛桃核足矣凿池架桥结草亭于其中从湖网得佳鱼则畜於池以供不时之需每岁十月後湖水稍退则纠集隣里庄农各具舟楫结罾网以备取鱼即以鱼为雇值先期大设酒饌以劳之吾嫂治具於内僮仆持壶觞先生劝釀於茅檐之下谈笑移时各尽欢而去予曾睥睨其间亦甚乐矣嫂笑谓予曰田家生计多在春夏汝兄生计则在秋冬似此风景盖三十余年矣噫熙恬乐易之风廉澹高雅之致宁不于今日见古人哉先生性纯孝友爱慈大人早世遗手绣观音像构一

亭事之惟谨有僧诣门募施先生笑曰彼以我为佞佛耶此吾亲也吾故事之性不能多饮而嗜酒晨起饮一瓭每饭则先啜数盃故常微曛体貌颀然而长髭微白丰神散朗无求於人无美於世无时不旷然天真盖居然海鸥云鹤之趣矣作字早岁学鍾繇至老目力不衰尝着輿图博采沿革故事彙书於图中方寸作数百字小於蝇头予时年五十不能辨也居乡以德感人人咸化之松湖数十年无盗有县令泊舟湖上请与先生见辞以疾不往年七十有八与嫂同时卒予每于公卿间述先生行事莫不低徊欣羨者久之大司农泽州陈公诗平生最爱江南客晚岁心怜湖上翁叔兄曾官吴门请老归高致相颉颃故当时咸知吾家有湖上先生吴门先生云

## 题阁部史公手札後

吴子尔玉母孝烈姚夫人为予妻祖湘潭公女年十六归吴生员讳道震事亲至孝夫以读书攻苦成疾吁天愿以身代夫歿遗孤两岁躬纺绩以养亲课子明季流寇扰桐城避乱於潜之龙湾为贼所执夫人大骂贼贼手刃之詈骂不絕而殒阁部皖抚史公讳可法廉访至潜闻其事列疏旌表後史公丁艰尔玉通以尺素其复札云云史公书不概见此则事关节孝言词虽短而蘊畜无穷尺璧寸珠良可为子孙世宝也史公为左忠毅公録学所得士与余乡主考大兴王公讳勗同举童子史公居首晋见时忠毅公呼史公令前复令登月台端视之谓诸生曰此子今日一介书生将来事业掀天揭地既退同人咸称异之笑谓史公曰看汝後日何以掀天揭地此大兴王公亲为予言者忠毅公人伦之鉴至精亦可传也夫人在予妻家为姑在延陵则予舅氏行云

## 先考

诰赠光禄大夫文华殿大学士加二级前

勅封文林郎内弘文院庶吉士拙庵府君行述

呜呼痛哉先君竟舍不孝载等而长逝耶不孝英前此三十年来未尝一日违膝丁卯之秋幸举於乡以应南宫试始为数千里游时值先君微疴依依不忍就道先君怡顏勉之曰吾健可无虑也次年不第疾驱返里再拜问先君寝膳则康健逾曩时去年冬再赴公车将束装微察先君起居虽春秋渐高然犹善饭且步履甚健私心欣慰拜别之日先君抚之曰勉旃此行吾还来气体益强齿摇落者复生矣尔母以老亲萦念後数于家邮得先君手谕皆细书盈幅慰励有加及与南来人问状咸谓先君兴致如常行不扶杖与人言终日不倦故不孝英稍得自慰詎意疾作不数日忽然奄逝竟以羈宦京邸病不及知药不及进没不及诀含殮不及亲不孝之罪百死莫赎矣呜呼痛哉不孝英尚何以生为己又念诸兄辈皆远在里门不孝英羈宦京邸倘于先君之嘉言懿行不复述其涯略是先君之风蹟不及闻於朝之縉绅先生以重不孝之罪也苦块间语无伦次冀大人先生哀而赐之一言以垂不朽先君讳秉彝字孩之号拙庵先世自豫章徙於桐至七世曾王父怀琴公成进士历官大中大夫陕西左参政初令永康为循良第一所至有廉能声至今咸尸祝焉王父恂所公以文学封中宪大夫抚州府知府赠

正议大夫广东按察使先君兄弟有四长鍾阳公庚戌进士历任山东布政赠太常寺卿次钦之公次淑之公皆明经先君行三生而穎慧絕人稍长就外傳六经子史之书靡不淹贯为文一本经术初不烦思索伸纸立就十五补博士弟子精攻制举业以廩例入南雍名噪士林者三十余年历成均岁久考授别驾未仕优游林泉者又二十余年生平孝友纯笃自鍾阳公筮仕以来王父母皆里居先君孝养诚顺甘毳之奉定省之勤数十年无闲已卯鍾阳公殉难山左时兵燹充路道殍相望先君走数千里外扶三櫟及藐孤归经纪其丧未逾月而王母又见背矣先是大江以北苦寇氛先君奉王母侨居白门流离转徙之中又值数大丧拮据经画以营殡殓皆备物备礼曰吾不敢以时绌俭吾亲也年六十余犹策杖从堪輿家徧历山水为先王母营窆窆地後卒得佳城松楸葱郁人咸以为积诚所致叔父坤庵公为大司马捐馆京师櫟归里门凡

谕赐祭葬诸大典皆先君左右贊襄一遵于礼逾年而叔父孝廉蔚庵公倏逝先君亲为含饭哀号达旦友爱之诚老而弥笃曾王父暨王父置义田数十亩以贍族人兵寇以来田在草间先君经理之渐就垦辟以充伏腊祠祭之用族之人贫不能婚丧及有志不能就学者咸赈给之祖塋傍为邻家地先君购之植松柏以?丘壠自曾王父以下徧建丰碑以垂不替每念谱牒散逸甲辰冬发篋搜先世行状志铭及世系图考自始祖迄今十二世旁及坟墓祭礼列传外传分为十卷牖列详明大旨主於敦宗睦族閱一岁而成鳩族人而告之曰吾家累叶以来兢兢惟耕读是务泊大参公登仕牒後实能以忠贞孝友世其家子孙奉先人训言以无自隕越此吾作谱之志也性素俭约于声色华丽之物絕无所嗜好一羔裘衣三十年虽敝不忍易时以惜物力留有余为训然性乐施济遇人之急不啻身受方吾桐苦寇岁且大祲先君设粥糜以济饥者全活甚衆生平多隐德不以告人其教子弟也惟以孝谨纯慤读书立行为先即不孝英旅食京邸先君犹屡谕之曰祖宗积德累世尔惟益自勉励以无貽前人羞老亲千里拳拳惟此而已後封一函示之曰此太上感应篇也近读此不忍释手特以寄汝见此如见汝父迄今手泽犹宛然也与人藹然以和肃然以敬未尝有疾言遽色遇人有过则微词以动之乡人孺子相对皆无侮容晚年益精性命之学宅後构一亭蒔花竹列图书课子孙诵读晨夕居其中时或往来别业杖履蹢躅被服都雅居人比之洛社香山之老云丁未春邑使君方隆重乡饮宾礼公论翕然推先君固辞不获礼行之日环桥观者称为盛举先是曾王父王父皆以乡贤列祀泽宫暨先君又以碩德晋宾筵先後济美邑人荣之长兄克俨虽早逝侄思耀复能成立丙午春思耀之子若嶷生子鸿奏一堂五代绕膝含饴先君顾之辄色喜即邑之人亦健美为里门盛事百年来未有也幸遇

### 覃恩邀

封典先君益冲然自下不改寒素秋爽後犹往来山水间时与宾朋讌会竟夕觴咏亶亶忘倦乃偶以疥疾十月十九日稍觉畏寒越一日腹中利数十次遂觉元气耗失子孙环膝下问所嘱曰吾心了无罣碍二十四日巳时气渐微而逝呜呼痛哉先君平生学道每自谓于性命之旨深有所会嗟呼易箦之时神观爽然岂非存顺殁宁之验耶呜呼痛哉先君生於明万历癸巳年正月十二日辰时歿於

皇清康熙丁未年十月二十四日巳时享壽七十有五恭遇

覃恩封文林郎内弘文院庶吉士先慈吴太君文学石莲公女

勅贈孺人庶母姜氏吕氏子七人长克俨庠生早世娶姚氏孝廉讳之藺公女次載庠生娶倪氏明经讳善公女继娶叶氏文学讳士公女次杰郡廩生娶潘氏明经讳应室公女继娶黄氏吴太君出次嘉娶李氏明经讳在公公女庶母姜出次即不孝英中康熙丁未科进士钦授内弘文院庶吉士娶姚氏明经讳孙森公女吴太君出次夔聘广昌令刘公讳鸿都女次芳聘汝南道彭公讳 女俱庶母吕出女三人长适庠生方穀次适邑廩生吴德音吴太君出次适水部吴公讳道新子吴澈庶母吕出孙五人长思耀庠生娶夏氏黄陂令夏公讳统春女继娶翁氏克俨出次廷璫娶方氏庠生讳仪女次廷瑞娶倪氏廩生讳士棠女次廷珠载出次廷璣娶廩生吴讳德音女英出孙女七人长适庠生吴讳道丰子吴德博载出次字庠生吴讳德怀子吴骊牲次字庠生吴讳商霖子吴熹杰出次字明经姚讳文焱子姚士?英出余俱幼未字曾孙二人长若嶷娶叶氏庠生讳尔诚女次若仑聘庠生夏讳鼎女曾孙女五人长适邑庠生左讳国材子左相次字庠生马讳敬思子马昙次字庠生盛讳约礼子盛某俱思耀出余幼未字廷璣出元孙鸿奏若岩出不孝英哀痛之余追维论述不文不备惟求大人先生俯赐矜怜锡以华衮以为先君泉壤之光不孝载等死且不朽

先妣

诰贈一品夫人吴太君行略

先妣

诰贈一品夫人吴太君外祖石莲公次女贈中宪大夫德陞公曾孙女石莲公文谊冠一时声振胶庠外祖母汪太君以乙未生太君幼而温恭端淑绰有令仪十五归大人曾王父大参公犹及见之每曰此宜家妇也大人年十七王父即授以家政太君躬节俭以佐之衣縞茹粝每自方恒少君督诸妇事织紵布缕丝枲之工致无有出其右者事王父母婉顏愉色内外无间祖母贈一品夫人齐太君於诸妇中尤笃爱太君伯父宦临清迎养王父母逾年而归嗣是惟太君是依一饮一膳非亲调不敢进祖母喜篝火夜坐太君聚诸孙妇诸孙女遶祖母膝下罗列果饴诸妇次第进食祖母欢然解颐既寢方敢入子舍昧爽则已盥栉立帟外矣以故祖母晚年食微太君则不甘寢微太君则不安未尝一日离也祖母痛己卯之难遂得疾太君躬亲药餌目未合睫者数閱月吁天以请疾既笃每顾太君曰爱我无如贤妇祖母卒哀毀欲絕时侨寓白门伯父母三棣甫至继以祖母之丧百费丛脞太君黽勉有无殫斂务从覃厚井然肃然一遵典礼时以为孝且以为才处姑姊妯娌间尤巽顺和睦伯母方夫人叶夫人姑母吴夫人何夫人皆敬爱之闺門之内咸取则焉事外祖母笃孝时外家居麻溪流寇卒至围城数匝音耗莫能达太君寢食俱废募力士间走贼营中昼伏夜行往来荆棘二百余里问汪太君平安忧稍释後寓旧京舅氏避地从之授馆餐焉既而舅氏罹患难太君营解得释不以流离转徙中渝友爱也大人嗜施济太君佐之甚力姻党中贫不能振者婚丧不能自举者子女不能

自育者太君咸助之生平隱德莫可殫述識解每能料于事前己卯自白門归壬午寇围桐数日而去太君曰是又将率衆至矣遂絜家再之金陵次年寇复来攻围异曩时孤城累滨于危吾家独无风鹤之惊居金陵时米珠薪桂食指甚繁故乡田园委在草莽太君经营拮据焦心劳思延师友礼宾客无异平时不止八口待哺而已也时大人以成均擢上第授别驾且就选矣或谓曰稍措置焉可得名郡归以谋于太君曰此时鱼轩翟茀何如羊裘鹿车耶遗荣偕隱愿效古人大人遂决意归挈子女居北山课婢子拾薪鋤菜以供朝夕审时度势而後入城郭故桐邑始苦寇既苦兵既苦除兵之兵而吾家独得安枕赖太君之明哲也督诸兄甚严择贤师良友脱簪珥以佐束修寓金陵时所僦屋甚隘迁徙无定居太君必先营书室隔窗聽咿唔声入深夜不倦则色喜时大人往来於桐太君以教子为己任间请於大人简题数百为籤作大斗贮之遇文期则掣籤命题文未毕不令就寝後迁桐居山中犹择隣庵命叔兄读书其中采山蔬以给馈食勉厉益力以故播迁琐尾中而诸兄侄未尝废学太君之教肃也早年即为大人聘侧室姜数年姜即世季兄幼太君顧复之教诲之忘其非己出复为大人置侧室吴亦不祿时方居北山吴病值太君亦病强起躬调药以治之既卒而其子又病太君保恤勤恳未几而殤太君泪盈盈殡葬皆从厚嗣是病渐笃自虞不起虑大人无侍巾栉者复聘侧室吕甫浹月而太君卒年五十有二太君幼嫺姆教備有女德通毛诗孝经列女传持家有礼法事大人诚敬婉顺婢子数十人皆有执业月朔望庀其良楮而赏惩之僮仆受命皆屏息立堦下唯而退晚年嗜禅寂尤多解悟蔬食十余年五十初度之辰饭僧数百人于鷄鸣寺手自绣大士像书诸佛经皆极工致固自有夙慧也不肖英生也晚太君即世英甫九龄耳尤愚頑无知于太君之丧曾不知恻故太君之嘉言懿行不能记忆其万一今从大人暨兄嫂间所熟闻于耳者谨志其大略如此以庶几于仁人君子之一言焉

诰授中议大夫

日讲官起居注詹事府少詹事兼翰林院侍讲学士冢

子廷璘行略

呜呼恻哉吾长男廷璘遂舍我而逝耶吾衰髦昏愤之中接讣音若信若疑呜咽哽塞不能出声久而一恸不自持家人勉以余衰病相慰解且告之曰此子官於朝二十有四年叨列华选获从贤士大夫游今闻其且死皆抚棺哀恻以吊之是乌可不叙述梗概以冀一言之赠余既愤乱不文又不忍没其寔谨举其在人耳目者质言之廷璘字贞臣号随斋幼而朗慧先封大夫见其童时作字每谓之曰此子学书可以成就辛亥随余在京邸遂入北雍乙卯雍试第一戊午举於乡己未成进士

殿试二甲第二名蒙

恩选授翰林院庶吉士辛酉授翰林院编修分纂会典同官咸谓克勤厥职己巳迁左右中允蒙



恩选授

日讲官起居注辛未壬申迁侍讲侍读左右春坊庶子翰林院侍讲学士侍读学士两岁之中蒙

恩超擢者六次

圣慈汪?咸以为荣每奉

勅作字作文时蒙

嘉獎遂奉

命与诸公同入

内廷校对

御书及各种法帖乙亥六月英奉

召至

畅春园赐宴赐

御笔书扇竝红白莲各一罇同

召者八人英与廷瓚皆与焉父子竝沐

殊恩亦千古之罕遇也逮

圣驾北征沙漠廷瓚叨从属车之後赏賚时及後於内廷面试诸词臣旋

御丰泽园试丰泽园赋理学有真伪论廷瓚叨蒙獎许十余年来直清华饫官饌

赐观内府名蹟无间朝夕己卯扈从

圣驾南巡

亲挥玉堂二大字賜之後又

御书传恭堂匾额以赐

天章墨宝拜赐独多

圣慈优重皆永荷恩施於百世子孙者也分纂

三朝国史渊监类函皆有条理丁丑年祭告南岳遣廷瓚往恪恭将事归而涂次里门祭扫祖墓刻日遄还盖廷瓚自十有七岁入京师从余居三十余年此番始得展祖茔一拜家中伯叔多不相识也已卯秋典山东乡试余诫之曰词臣无多任事所恃以报

国家育人材者惟在典试耳汝其慎之勉之廷瓚竭心殚虑务得真才初与各帘官约公发誓词复与李君伯猷又独出对神立誓语尤痛切各帘官遂各立一誓是役也衡监真才果能风清气绝尽拔单寒山左士人无论售与不售皆极口赞服至勒石以纪之抡文亦典重醇雅多积学英俊之士此则海内士大夫共为许可者也先是乙丑分校礼闱所取皆知名士此其生平自信不少宽假亦余之家训也庚辰迁詹事府少詹事素微有风疾余自乞休归诫以安心调摄勉报

圣恩家邮时至具道愈可如故今秋

车驾出视河工叨

命扈从已束车秣马以从至霸州旧疾微发蒙

上特赐温语谓离家未远可以遄还从村庄乘小舆而归

天颜温蔼彼方愧谢不遑回京两旬余药饵调摄渐次平复及念六日

圣驾还宫犹诣

内廷请

安步履神气如常至念七日无病而逝生平颂念世戴深恩感不容口闻易箦时执廷玉手无一语及私惟以未报

君恩为恨呜呼恻哉余生平不延幕客所藉以翻阅载籍稽考旧章寒暑不辍则廷瓚左右之功居多与朋友素慤慎谦和未尝雌黄人物尤不敢急于进取每有迁除则逊谢不安事父母先意承志四十余年未尝有一语逆父母之意待兄弟至性友爱廷玉同居

赐第教之诲之备极周至事伯叔昆季遇姻娅皆敦厚有礼处家极俭约绝无纨绔之习而推

解以賑貧乏則不惜德性如此宜乎其長年而奄忽不祿殊不可解也娶吳氏明經式昭公女

贈宜人繼娶顧氏內閣學士兼禮部侍郎培園公女封宜人子四長若霖歲貢生次若霈郡廩生吳出次若霏次若霖俱幼歿顧出孫曾紹孫女二人英哀恻之余所述荒陋失序伏惟采擇錫以寵光存歿不朽

#### 第四子明經廷 行略

余第四子廷 字黼臣以康熙丙辰十二月生於京師宣武門之東街自幼失乳體羸弱七歲就塾以後腹有痞疾肌膚不生顏色無潤澤疾時作時止余令其勿讀書每從塾喚之歸疾已輒往兒每言如此倏忽作輟豈不爲人所笑故遂聽之十五歲偶令其屬文亦不加督責頗能成篇閱二年歸就童子試許時庵先生試題誠之者擇善而固執之者也連下二節兒于開講下直分四比條暢有氣局次題乞其餘不足文亦滑稽排宕可觀時庵大奇之拔之前茅出其卷示同郡七學諸生咸以爲佳性儉素簡質平居恒服故衣即以之見客不肯易新衣與人言不苟爲雷同必言其所見姻戚閑或以爲偏而笑之不恤也丙子應鄉試場屋勞頓返舍遂得疾余如其體弱艱於應試令以明經入太學丁丑歲疾小愈冬復作復愈戊寅春兒覺體中無大恙知父母悬念決意來京師謂依父母前養疴可以慰晨夕入夏而大愈余每止其勿讀書然自幼好涉獵雖不入館塾架上書時取繙閱余偶徵引典故往往能言其所以然所撰制義獨簡嚴無枝葉時有精深語余疑其非已作徐察之亦無他余初不以此督之今夏學楷書余見之作詩余不知也入秋而咳且喘每侍其母坐輒終日夜分而後退欲呻吟必伺母出戶母至則強制言笑如常時或欲咳則起而他適家人竊窺之父母雖知其病而不知其若此之甚也此三年來藥餌未嘗離口至十二月十三日而喘甚與醫者商略用補氣重劑不覺亦不減十六日表兄姚華曾來相見銜啼言吾病重深以憂父母爲恨余無他語十七日復易輕劑申刻兒猶取方自看云如此輕劑恐不能治病睡片刻忽醒云夢見神聖固當佳言甫畢遂喘作而歿神觀清明至歿惟戀父母惜哉娶姚氏內弟玉青次女子若潭年甫四齡余極知死生者晝夜之道既歿而悲酸無益于歿者徒損于生者然每念其言語氣識皆屹然如老成人曲體親心不好華飾不雌黃人短長可稱克家之子故悲不能自持痛惋之中記此梗槩蓋不忍沒其微善亦以見余之悲所自來也

# 卷四十四

钦定四库全书

文端集卷四十四

大学士张英撰

笃素堂文集八

杂着

恒产琐言

三代而上田以井授民二十受田六十归田尺寸之地皆国家所有民间不得而私之至秦以後废井田开阡陌百姓始得私相买卖然则三代以上虽至贵钜富求数百亩之田贻子及孙不可得也後世既得而买之矣以乾坤之大块国家之版图听人画界分疆立书契评价直而鬻之县官虽有易姓改氏而田主自若董江都诸人亦愤贫者无立锥之地而富者田连阡陌欲行限民名田之法立为节制而不果行其乃祖乃父以一朝之力而竟奄有之使後人食土之毛善守而不轻弃则子孙百世苟不至经变乱亦断不能为他人之所有呜呼深念及此其可不思所以保之哉

人家子弟从小便读孟子每习焉而不察夫孟子以王佐之才说齐宣梁惠议论濶大志趣高远然言病虽多端用药止一味曰有恒产者有恒心而已曰五亩之宅百亩之田而已曰富岁子弟多赖而已重见叠出一部孟子实落处不过此数条而终之曰诸侯之宝三土地又尝读苏长公集其天才横轶古今无俦匹宜若不屑屑生计者游金山之诗曰有田不去如江水游焦山之诗曰无田不去宁非贪其题王晋卿烟江叠嶂图诗亦曰不知人间何处有此境径欲往买二顷田可知此老胸中时时有此一段经画生平欲买阳羨之田至老而其愿不偿今人动言才子名士伟丈夫不事家人生产究至谋生无策犯孟子之戒而不悔岂不深可痛惜哉天下之物有新则必有故屋久而颓衣久而敝臧获牛马服役久而老且死当其始重价以购越十年而其物非故矣再越十年而化为乌有矣独有田之为物虽百年千年而常新即或农力不勤土敝产薄一经粪溉则新矣即或荒芜草宅一经垦辟则新矣多兴陂池则枯者可以使之润勤薅茶蓼则瘠者可以使之肥亘古及今无有朽蠹颓坏之虑逃亡耗缺之忧呜呼是洵可宝也哉

吾友陆子名遇霖字洵若浙江人今为归德别驾其人通晓事务以经济自许在京师日常与之过从一日从容谈及谋生毕竟以何者为胜陆子思之良久曰予閱世故多矣典质贸易权子母断无久而不弊之理始虽乍获厚利终必化为子虚惟田产房屋二者可持以久远以二者较之房舍又不如田产何以言之房产乃向人索租钱每至岁暮必有干仆盛衣帽着靴誼

譁叫号以取之不偿则愬于官长每至争讼雀角甚有以奋鬪窘逼而生祸殃者稍懦焉则又不可得矣至田租则不然子孙虽为齐民极单寒懦弱其仆不过青鞵布袜手持雨伞诣佃人之门而人不敢藐视之秋穀登場必先完田主之租而後分给私债取其所本有而非索其所无与者受者皆可不劳且力田皆愿民与市?商贾之狡健者不同以此思之房产殆不如也予至今有味乎陆子之言

尝读雅颂之诗而叹古人之于先畴如此其重也楚茨大田之诗皆公卿有田禄者周有世卿其祖若父之采地传诸後人故曰曾孙今观其言曰我疆我理曰我田既臧曰我黍稷我仓我庾农夫爱其曾孙则曰曾孙不怒曾孙爱其农夫则曰农夫之庆以至攘籩者之食而尝其旨否剥疆场之瓜而献之皇祖何其民风淳朴上下相亲如此不止家给人足无分外之谋而且流风余韵有为善之乐後人有祖父遗产正可循陇观稼策蹇课耕雅颂之景如在目前而乃视为鄙事不一留意抑独何哉

今人家子弟鲜衣怒马恒舞酣歌一裘之费动至数十金一席之费动至数金不思吾乡十余年来穀贱竭十余石穀不足供一筵竭百余石穀不足供一衣安知农家作苦终年沾体涂足岂易得此百石况且水旱不时一年收获不能保诸来年闻陕西岁饥一石价至六七两今以如玉如珠之物而贱价棗之以供一裘一席之费岂不深可惧哉古人有言惟土物爱厥心臧故子弟不可不令其目击田家之苦开仓棗穀时当令其持筹以壮夫之力不过担一石四五壮夫之所担仅得价一两随手花费了不见其形迹而已仓庾空竭矣使稍有知觉当不忍于浪掷奈何深居简出但知饱食?衣絶不念物力之可惜而泥沙委之哉

天下货财所积则时时有水火盗贼之忧至珍异之物尤易招尤速祸草野之人有十金之积则不能高枕而卧独有田产不忧水火不忧盗贼虽有强暴之人不能竟夺尺寸虽有万钧之力亦不能负之而趋千顷万顷可以值万金之产不劳一人守护即有兵燹离乱背井去乡事定归来室庐畜聚一无可问独此一块土张姓者仍属张李姓者仍属李芟夷悬辟仍为殷实之家呜呼举天下之物不足较其坚固其可不思所以保之哉予与四方之人从容闲谈则必询其地土物产之所出以及田里之事大约田产出息最微较之商贾不及三四天下惟山右新安人善于贸易彼性至慳嗇能坚守他处人断断不能然亦多覆蹶之事若田产之息月计不足岁计有余岁计不足世计有余尝见人家子弟厌田产之生息微而缓羨贸易之生息速而饶至鬻产以从事断未有不全军尽没者余身试如此见人家如此千百不爽一无论愚弱者不能行即聪明强干者亦行之而必败人家子弟万万不可错此着也

人思取财于人不若取财于天地余见放债收息以及典质人之田产者三年五年得其息如其所出之数其人则哓哓有词矣不然则怨于心德于色浸假而并没其本间有酷贫之士得数十金可暂行于一时稍裕则不能矣惟地德则不然薄植之而薄收厚培之而厚报或四季而三收或一岁而再种中田以种稻麦旁畦余陇以植麻菽衣棉之类有尺寸之壤则必有锱铢之入故曰地不爱宝此言最有味始而养其祖父既而养其子孙无德色无倦容无竭欢尽忠之怨有日新月盛之美受之者无愧忤享之者无他虞虽多方以取而无罔利之咎上可以告天地幽可以对鬼神不劳心计不受人忌疾呜呼天下更有物焉能与之比长絜短者哉余

既言田产之不可鬻而世之鬻产者比比而然聪明者亦多为之其根源则必在乎债负债负之来由于用度不经不知量入为出至举息既多计无所出不得不鬻累世之产故不经者债负之由也债负者鬻产之由也鬻产者饥寒之由也欲除鬻产之根则断自经费始居家简要可久之道则有陆梭山量入为出之法在其法合计一岁之所入除完给公家而外分为三分留一分为歉年不收之用其二分为十二分一月用一分若岁常丰收则是古人耕三余一之法值一岁歉则以一岁所留补给连岁歉则以积年所留补给如此殆无举债之事若一岁所入止给一岁之用一遇水旱则产不可保矣此最目前可见之理而人不之察陆梭山之法最详即百金之产亦行此法使必富饶而後可行则大误矣且其法于十二分又分三十小分余恐其太烦故止作十二分要知古人之意全在小处节俭大处之不足由于小处之不慎月计之不足由于每日之用过多也若能从梭山每月三十分之更为稳实一月之中饮食应酬宴会稍可节者节之以此一月之所余另置一封以周贫乏亲戚些小之急更觉心安意适此专言费用不经举债而鬻产之由此外则有赌博狹斜侈靡其为败坏者无论矣更有因婚嫁而鬻业者絶为可哂夫有男女则必有婚嫁只当以丰年之所积量力治装奈何鬻累世仰事俯育之具以图一时之华美岂既婚嫁後遂可不食而饱不衣而温乎呜呼亦愚之甚矣吾既极言产之不可鬻矣虽然守之有道不可不讲不善经理付之僮仆之手任其耗蠹积日累月沃者变而为瘠润者化而为枯稍瘠者化而为石田田瘠而亩不减入少而赋不轻平时仅可支持一遇水旱催科则立稿矣是田本为养生之物变而为累身之物且将追怨祖父留此累物以贻子孙予见此亦不少矣然则如之何而可哉欲无鬻产当思保产欲保产当使尽地利尽地利之道有二一在择庄佃一在兴水利谚云良田不如良佃此最确论主人虽有气力心计佃惰且劣则田日坏譬如父母虽爱婴儿却付之悍婢之手岂能知其疾苦乎良佃之益有三一在耕种及时一在培壅有力一在畜泄有方古人言农最重时早犁一月有一月之益故冬最良春次之早种一日有一日之益故晚禾必在秋前一日至培壅则古人所云百亩之粪又云凶年粪其田而不足诗云荼蓼朽止黍稷茂止用力如此一亩可得两亩之入地不加广亩不加增佃有余而主人亦利矣畜水用水最有缓急先後当掬则掬当待则待当弃则弃惟有良农老农知之劣农之病有三一在耕稼失时一在培壅无力一在畜泄无方若遇丰稔之年雨泽应时而降惰农劣农亦卤莽收获隐藏其害而不觉一遇早乾则彼之优劣立见矣凶年主人得一石可值两石而受此劣佃之害悔何及哉人家僮仆管庄务每喜劣佃而不喜良佃良佃则家必殷实有体面不肯谄媚人且性必梗直朴野饮食必节俭又不听僮仆之指使劣佃则必惰而且穷谄媚僮仆听其指使以任其饕餮种种情状不同此所以性喜劣佃而不喜良佃至主人之田畴美恶彼皆不顾且又甚乐于水旱则租不能足额而可以任其高下此积弊陋习安可不知且良佃所居则屋宇整齐塲圃茂盛树木葱郁此皆主人僮仆力之所不能及而良佃自为之劣佃则件件反是此择庄佃为第一要务也禾在田中以水为命谚云肥田不敌瘦水虽有膏腴若水泽不足则亦等石田矣江南有塘有堰古人开一亩之田则必有一亩之水以济之後人狃於多雨之年塘堰都不修治堰则破坏不畜水塘则浅且漏不容水每岁方春时必有洪雨数次任其横流而不收入夏亢旱束手无策仰天长叹而已人家僮仆管理庄事以兴塘几石修屋几石为开赈时浮图合尖之具而已何尝有寸土一锸及于塘堰乎夫塘宜深且坚固余曾过江宁南乡其田最号沃壤其塘甚小不及半亩询之土人知其深且陡有及二丈者故可以溉数十亩之田而不匮吾乡塘最多且大有数亩者有十数亩者然浅且漏大雨後亦不满稍旱则露底田待此为命其何益之有哉向後修塘筑堰必躬自閱视

若有雨之年塘犹不满其为渗漏可知急加培筑大抵劣农之性惰而见识浅陋每徼幸于岁之多雨而不为预备僮仆既以此开入花赈又不便向主人再说一遇亢旱田禾立槁日积月累田瘠庄敝租入日少势必鬻变此兴水利为第一要务也若不知务此而止云保守前业势岂能由已哉

予置田千余亩皆苦瘠非予好瘠田也不能多办价值故宁就瘠田其膏腴沃壤则大有力者为之余不能也然细思膏腴之价数倍于瘠田遇水旱之时膏腴亦未尝不减若丰稔之年瘠土亦收而租倍于膏腴矣膏腴之所以胜者鬻时可以得善价平时度日同此稻穀一石耳无大差别且腴田不善经理不数年变而为中田又数年变而为下田矣瘠田若善经理则下田可使之为中田中田可使之为上田虽不能大变能高一等故但视後人之能保与不能保不在田之瘠与不瘠况名庄胜业易为势力家所垂涎子弟鬻田必先鬻善者予家祖居田甚瘠在当时兴作尽善故称沃壤四世祖东川公卒时嘱後人葬于宅之左曰恐为势家所夺由此观之当时何尝非善地今始成瘠壤耳惟视人之经理不经理也尝见荒瘠之地见一二土著老农之家则田畴开辟陂池修治禾稼茂郁庐舍完好竹木周布居然一佳产其仕宦家之田则荒败不可观而已汝侪试留心察之

人家子弟每年春秋当自往庄细看平时无事亦可策蹇一往然徒往无益也第一当知田界田界不易识也令老农指视一次不能记而再三大约五六次便熟有疑处便问之勿以曾经问过嫌於再问恐被人讥笑则终身不知矣第二当察农夫用力之勤惰耕种之早晚畜积之厚薄人畜之多寡用度之奢侈善治田以为优劣第三当细看塘堰之坚窳浅深以为兴作第四当察山林树木之耗长第五访稻穀时值之高下期於真知确见若听僮仆之言深入茅檐一坐一饭一宿目不见田畴足不履阡陌僮仆纠诸佃人环绕喧哗或借种稻或借食租或称塘漏或称屋倾以此恫喝主人主人为其所窘去之惟恐不速问其疆界则不知问其孰勤孰惰则不知问其林木则不知问其价值则不知及入城遇朋友则彼揖之曰履亩归矣此笑之曰循行阡陌回矣主人方自谓吾从村庄来劳苦劳苦呜呼何益之有哉此予少年所身历者至今悔之大约人家子弟最不当以经理田产为俗事鄙事而避此名亦不当以为故事而袭此名细思此等事较之持鉢求人奔走啜嚅孰得孰失孰贵孰贱哉

人家富贵两字暂时之荣宠耳所恃以长子孙者毕竟是耕读两字子弟有二三千金之产方能城居何则二三千金之产丰年有百余金之入自薪炭蔬菜鸡豚鱼虾醢醢之属亲戚人情应酬宴会之事种种皆取办於钱丰年则穀贱歉年穀亦不昂仅可支吾或能不致狼狈若千金以下之业则断不宜城居矣何则居乡则可以课耕数亩其租倍入可以供八口鸡豚畜之于栅蔬菜畜之於圃鱼虾畜之於泽薪炭取之於山可以经旬屡月不用数钱且乡居则亲戚应酬寡即偶有客至亦不过具鸡黍女子力作可以治纺绩衣布衣策蹇驴不必鲜华凡此皆城居之所不能且耕且读延师训子亦甚简静囊无余畜何致为盗贼所窥吾家湖上翁子弟甚得此趣其所贻不厚其所度日皆较之城中数千金之产者更为丰腴且山水间优游俯仰复有自得之乐而无窘迫之忧人苦不深察耳果其读书有成策名仕宦可以城居则再入城居一二世而後宜于乡居则再往乡居乡城耕读相为循环可久可大岂非吉祥善事哉况且世家之产在城不过取其额租其山林湖泊之利所遗甚多此亦势不能兼若贫而乡居尚有

遗利可收不止田租而已此又不可不知也

予仕宦人也止宜知仕宦之事安能知农田之事但余与四方英俊交且久閱历世故多五十年来见人家子弟成败者不少鬻田而穷保田而裕千人一轍此予所以谆谆苦口为汝辈陈说先大人戊子年析产予得三百五十余亩後甲辰年再析予一百五十余亩予戊戌年初析始管庄事是时吾里田产正当极贱之时人问曰汝父析产有银乎予对曰但有田耳问者索然予时亦曰田非不佳但苦急切难售耳及丁未後予以公车有称贷遂卖甲辰年所析百五十亩予四十以前全不知田之可贵故轻弃如此後以予在仕宦又不便向人赎取至今始悟析产正妙在无银若初年寬裕性既习惯一二年後所分既尽怅怅然失其所恃矣田之妙正妙在急切难售若容易售则脱手甚轻矣此予晚年之见与少年时絕不相同者也是皆予三折肱之言其思之母忽

饭有十二合说

一之稻

古称饭之美者则有玄山之禾精凿白粲昔人所重吾乡稻有三种有早熟者有中熟者有晚熟者早晚所熟皆不及中熟之佳蔡邕月令章句云时在季秋谓之半夏稻滋味清淑颐养为宜颂曰

诗称香稻如雪流匙辨种尝味迟熟攸宜益脾健胃百福所基

二之炊

朝鲜人善炊饭颗粒朗然而柔膩香泽倘所谓中边皆腴者耶又闻之静海励先生炊米汁勿倾去留以蘊釀则气味全火宜缓水宜减盖有道焉卤莽?裂是与暴殄天物者等也颂曰

释之溲溲蒸之浮浮炊我长腰质粹香留谨视火候丹鼎功侔

三之肴

礼曰居山不以鱼鼈为礼居泽不以麋鹿为礼食地之所产则滋味鲜而物力省近见人家宴会每以珍错为奇不知鸡豚鱼虾本有至味内则所载养老人八珍皆寻常羊豕特烹炮异耳何尝广搜异味哉且每食一荤则肠胃不杂而得以尽其滋味之美山海罗列腥羶杂进既为伤生侈费亦乖颐养之道所当深戒者也颂曰甘毳芳鲜是为侯鯖脾寬则化腹虚则灵戒尔饕餮视此鼎铭

四之蔬



古人称早韭晚菘山厨珍味城中鬻蔬者采摘非时复为风日所损真味漓矣自种一亩蔬时其老穉而取之含露负霜甘芳脆美诗人所谓有道在葵藿耶颂曰蔓青芦菔其甘如饴美胜梁肉晚食益奇菜根不厌百事可为

## 五之修

古称脯修亦所以佐匕箸山雉泽鳧鹿脯鱼槁昔人往往见之篇什但取一种可以侑食毋为侈褻奇巧颂曰饱尝世味如彼鸡肋聊资醢脯以妥家食炮炙肥甘腑胃之贼

## 六之菹

盐豉寒菹古人所谓旨畜以御冬也以清脆甘芬为贵食既而嚼口吻爽隼为益多矣颂曰

甫里幽居爰赋杞菊红姜紫茄青笋黄独告我妇子储备宜夙

## 七之羹

古人每饭羹左食右又曰若作和羹尔为盐梅羹之为用宜备五味以宣泄补益由来尚矣古人饭而以汤沃之曰飧言取饱也老者易於哽咽於羹尤宜颂曰新妇执馈爰作羹汤和以勺药椒芬飴香以代祝哽祇奉高堂

## 八之茗

食毕而茗所以解荤腥涤齿颊以通利肠胃也茗以温醇为贵芥片武夷六安三种最良松萝近刻削非可常饮石泉佳茗最是清福颂曰

松风既鸣蟹眼将沸月團手烹以涤滯郁丹田紫关香气腾拂

## 九之时

人所最重者食也食所最重者时也山梁雌雉子曰时哉时哉固有珍膳当前而困於酒食者失其时也有葵藿而欣然一饱者得其时也樊笼之鸟饲以稻粱而羽毛铍敝山谿之鸟五步一饮十步一啄而飞鸣自得者时与不时之异也当饱而食曰非时当饥而不食曰非时适当其可谓之时噫难为名利中人言哉颂曰晨起腹虚载游樊圃容与花间香生肺腑思食而食奚羨华膻

## 十之器

器以磁为宜但取精洁毋尚细巧瓷太佳则脆薄易於伤损心反为其所役而无自适之趣矣

予但取其中等者颂曰

绳牀斐几淨埽无尘花磁莹润参伍以陈陋彼金玉萦扰心神

十一之地

吁食岂易言哉冬则温密之室焚名香然兽炭春则柳堂花榭夏则或临水或依竹或?乔木之陰或坐片石之上秋则晴窗高阁皆所以顺四时之序又必远尘埃避风日帘幙当施则围坐斗室轩窗当启则远见林壑斯餐香饮翠可以助吾藜藿鸡黍之趣故曰食岂易言哉颂曰

食以养生以畅为福相彼陰阳时其凉燠以适我情以果我腹

十二之侣

独酌太寂羣餐太嚣虽然非其人则移牀远客不如其寂也或良友同餐或妻子共食但取三四人毋多而嚣颂曰

肃然以敬雍然以和不淫不侈不烦不苟式饮式食受福孔多

文端集卷四十四

# 卷四十五

钦定四库全书

文端集卷四十五

大学士张英撰

笃素堂文集九

杂着

聪训斋语

圃翁曰圣贤领要之语曰人心惟危道心惟微危者嗜欲之心如堤之束水其溃甚易一溃则不可复收也微者理义之心如帷之暎鐙若隐若现见之难而晦之易也人心至灵至动不可过劳亦不可过逸惟读书可以养之每见堪舆家平日用磁石养鍼书卷乃养心第一妙物闲无事之人镇日不观书则起居出入身心无所栖泊耳目无所安顿势必心意颠倒妄想生嗔处逆境不乐处顺境亦不乐每见人栖栖皇皇觉举动无不碍者此必不读书之人也古人有言扫地焚香清福已具其有福者佐以读书其无福者便生他想旨哉斯言予所深赏且从来拂意之事自不读书者见之似为我所独遭极其难堪不知古人拂意之事有百倍于此者特不细心体验耳即如东坡先生歿後遭逢高孝文字始出名震千古而当时之忧谗畏讥困顿转徙潮惠之间苏过跣足涉水居近牛栏是何如境界又如白香山之无嗣陆放翁之忍饥皆载在书卷彼独非千载闻人而所遇皆如此诚一平心静观则人间拂意之事可以涣然冰释若不读书则但见我所遭甚苦而无穷怨尤嗔忿之心烧灼不宁其苦为何如耶且富盛之事古人亦有之炙手可热转眼皆空故读书可以增长道心为颐养第一事也记诵纂集期以争长应世则多苦若涉览则何至劳心疲神但当冷眼於闲中窥破古人筋节处耳予于白陆诗皆细注其年月知彼於何年引退其衰健之蹟皆可指斯不梦梦耳

圃翁曰圣贤仙佛皆无不乐之理彼世之终身忧戚忽忽不乐者决然无道气无意趣之人孔子曰乐在其中顏子不改其乐孟子以不愧不作为乐论语开首说说乐中庸言无入而不自得程朱教寻孔顏乐处皆是此意若庸人多求多欲不循理不安命多求而不得则苦多欲而不遂则苦不循理则行多窒碍而苦不安命则意多怨望而苦是以局天蹐地行险徼幸如衣敝絮行荆棘中安知有康衢坦涂之乐惟圣贤仙佛无世俗数者之病是以常全乐体香山字乐天予窃慕之因号曰乐圃圣贤仙佛之乐予何敢望窃欲营履道一丘一壑仿白傅之有叟在中白须飘然妻孥熙熙鸡犬闲闲之乐云耳

圃翁曰予拟一联将来悬草堂中富贵贫贱总难称意知足即为称意山水花竹无恒主人得闲便是主人其语虽俚却有至理天下佳山胜水名花美箭无限大约富贵人役於名利贫贱

人役於饥寒总无闲情及此惟付之浩叹耳

圃翁曰唐诗如缎如锦质厚而体重文丽而丝密温醇尔雅朝堂之所服也宋诗如纱如葛轻疎纖朗便娟适体田野之所服也中年作诗断当宗唐律若老年吟咏适意阑入於宋势所必至立意学宋将来益流而不可返矣五律断无胜於唐人者如王孟五言两句便成一幅画今试作五字其写难言之景尽难状之情高妙自然起结超远能如唐人否苏诗五律不多见陆诗五律大率非其所长参唐宋人气味当於五律见之

圃翁曰昌黎听穎师琴诗有云呢呢儿女语恩怨相尔汝忽然势轩昂猛士赴战場又云失势一落千丈强欧阳公以为琵琶诗信然予细味琴音如微风入深松寒泉滴幽涧静永古澹其上下十三徽出入一弦至七弦皆有次第大约由缓而急由大而细极於和平冲夷为主安有呢呢儿女忽变为金戈铁马之声常建琴诗江上调玉琴一弦清一心泠泠七弦遍万木沉秋陰能令江月白又令江水深始知枯桐枝可以徽黄金真可谓字字入妙得琴之三昧者味此则与昌黎之言迥别矣古来士大夫学琴类不能学多操白香山止秋思一曲范文正公止履霜一曲高人抚弦动操自有夷旷冲澹之趣不在多也古人制琴一曲调适宫商但传指法後人强被以语言文字失之远矣甚至俗谱用大字及归去来辞赤壁赋强配七弦一字予以一音且有以山歌小曲溷之者其为唐突古乐甚矣宜为雅人之所深戒也大抵琴音以古淡为宗非在悦耳心境微有不清指下便尔荆棘清风明月之时心无机事旷然天真时鼓一曲不躁不懒则缓急轻重合宜自然正音出於腕下清兴超於物表放翁诗曰琴到无人听处工未深领斯妙者自然闻古乐而欲卧未足深论也

圃翁曰古人以眠食二者为养生之要务脏腑肠胃常令寬舒有余地则真气得以流行而疾病少吾乡吴友季善医每赤日寒风行长安道上不倦人问之曰予从不饱食病安得入此食忌过饱之明徵也燔炙熬煎香甜肥膩之物最悦口而不宜於肠胃彼肥膩易於粘滯积久则腹痛气塞寒暑偶侵则疾作矣放翁诗云倩盼作妖狐未惨肥甘藏毒鸩犹轻此老知摄生哉炊饭极輒熟鸡肉之类只淡煮菜羹清芬鲜洁渥之食只八分饱後饮六安苦茗一杯若劳顿饥饿归先饮醇醪一二杯以开胸胃陶诗云浊醪解劬饥盖藉之以开胃气也如此焉有不益人者乎且食忌多品一席之间遍食水陆浓淡杂进自然损脾予谓或鸡鱼鳧?之类只一二种饱食良为有益此未尝闻之古昔而以予意揣当如此安寝乃人生最乐古人有言不觅仙方觅睡方冬夜以二鼓为度暑月以一更为度每笑人长夜酣饮不休谓之消夜夫人终日劳劳夜则宴息是极有味何以消遣为冬夏皆当以日出而起於夏尤宜天地清旭之气最为爽神失之甚为可惜予山居颇闲暑月日出则起收水草清香之味莲方敛而未开竹含露而犹滴可谓至快日长漏永不妨午睡数刻焚香垂幙净展桃笙睡足而起神清气爽真不啻天际真人况居家最宜早起倘日高客至僅则垢面婢且蓬头庭除未扫竈突犹寒大非雅事昔何文端公居京师同年诣之日晏未起久之方出客问曰尊夫人亦未起耶荅曰然客曰日高如此内外家长皆未起一家奴仆其为奸盗诈伪何所不至耶公瞿然自此至老不宴起此太守公亲为予言者圃翁曰山色朝暮之变无如春深秋晚四月则有新綠其浅深浓淡早晚便不同九月则有黄叶其頽黄茜紫或映朝阳或回夕照或当风而吟或带霜而殷皆可谓佳胜之极其他则烟岚雨岫云峯霞岭变幻顷刻孰谓看山有厌倦时耶放翁诗云游山如读书浅深在

所得故同一登临视其人之识解学问以为高下苦乐不可得而强也予每日治装入龙眠家人相谓山色总是如此何用日日相对此真浅之乎言看山者

圃翁曰人家僮仆最不宜多畜但有得力二三人训谕有方使令得宜未尝不得兼人之用太多则彼此相谗恩养必不能周教训亦不能及反不得其力且此辈当家道盛则倚势作非招尤结怨家道替则飞扬跋扈反唇卖主皆势所必至予欲令家仆皆各治生业可省游手游食之弊不至于冗食为非也且僮仆甚无取乎黠慧者吾辈居家居宦皆简静守理不为闇昧之事至衙门政务皆自料理不烦干仆巧权门之应对为远道之输将打点机密奔走势利所用者不过趋蹕洒扫负重徒步之事耳焉用聪明才智为哉至于山中耕田锄圃之仆乃可为宝其人无奢望无机智不为主人敛怨彼纵不遵束约不过懒惰愚蠢之小过不必加意防闲岂不为清闲之一助哉

圃翁曰昔人论致寿之道有四曰慈曰俭曰和曰静人能慈心于物不为一切害人之事即一言有损于人亦不轻发推之戒杀生以惜物命慎剪伐以养天和无论冥报不爽即胸中一段吉祥恺悌之气自然灾沴不干而可以长龄矣人生福享皆有分数惜福之人福尝有余暴殄之人易至罄竭故老氏以俭为宝不止财用当俭而已一切事常思俭啬之义方有余地俭於饮食可以养脾胃俭於嗜慾可以聚精神俭於言语可以养气息非俭於交游可以择友寡过俭於酬错可以养身?劳俭於夜坐可以安神舒体俭於饮酒可以清心养德俭於思虑可以蠲烦去扰凡事省得一分即受一分之益大约天下事万不得已者不过十之一二初见以为不可已细算之亦非万不可已如此逐渐省去但日见事之少白香山诗云我有一言君记取世间负取苦人多今试问劳扰烦苦之人此事亦尽可已果属万不可已者乎当必恍然自失矣人常和悦则心气冲而五脏安昔人所谓养欢喜神真定梁公每语人日间办理公事每晚家居必寻可喜笑之事与客纵谈掀髯大笑以发抒一日劳顿鬱结之气此真得养生要诀何文端公时曾有多人过百岁公扣其术荅曰予乡村人无所知但一生只是喜欢从不知忧恼噫此岂名利中人所能哉传曰仁者静又曰知者动每见气躁之人举动轻佻多不得寿古人谓砚以世计墨以時計笔以日计动静之分也静之义有二一则身不过劳一则心不轻动凡遇一切劳顿忧惶喜乐恐惧之事外则顺以应之此心凝然不动如澄潭如古井则志一动气外间之纷扰皆退听矣此四者於养生之理极为切实较之服药引导奚啻万倍哉若服药则物性易偏或多燥滯引导吐纳则易至作辍必以四者为根本不可舍本而务末也道德经五千言其要旨不外於此铭之座右时时体察当有裨益耳

圃翁曰人生不能无所适以寄其意予无嗜好惟酷好看山种树昔王右军亦云吾笃嗜种果此中有至乐存焉手种之树开一花结一实玩之偏爱食之益甘此亦人情也阳和里五亩园虽不广倘所谓有水一池有竹千竿者耶花有十二种每种得十余本循环玩赏可以终老城中地隘不能多植然在居室之西数武花晨月夕不须肩輿策蹇自朝至夜分可以酣赏饱看一花一草自始开至零落无不穷极其趣则一株可抵十株一亩可敌十亩山中向营赐金园今购芙蓉岛皆以田为本於隙地疏池种树不废耕耘閱耕是人生最乐古人所云躬耕亦止是课仆督农亦不在沾体涂足也圃翁曰山居宜小楼可以收揽羣峰衆壑之势竹杪松梢更有奇趣予拟于芙蓉岛南向构一小楼题曰千崖万壑之楼大溪环抱羣峰耸峙可谓快矣筑

小斋三楹曰佳梦轩夫人生如梦信矣使夕梦至此岂不以为佳甚耶陆放翁梦至仙馆得诗云长廊下瞰碧莲沼小阁正对青萝峰便以为极胜之景予此中颇有之可不谓之佳梦耶香山诗云多道人生都是梦梦中欢乐亦胜愁人既在梦中则宜税驾咀嚼其梦而不当为梦幻泡影之嗟予固将以此为睡乡而不复从邯郸道上向道人借黄梁枕也

圃翁曰人生於珍异之物决不可好昔端恪公言士人於一研一琴当得佳者研可适用琴能发音其他皆属无益良然磁器最不当好瓷佳者必脆薄一醺值数十金僮仆捧持易致不谨过於矜束反致失手朋客欢讌亦鲜乐趣此物在席宾主皆有戒心何适意之有磁取厚而中等者不至大粗纵有倾跌亦不甚惜斯为得中之道也名画法书及海内有名玩器皆不可畜从来贾祸招尤可为龟监购之不啻千金货之不值一文且从来真贋难辨变幻奇於鬼神装潢易於窃换一轴得善价继至者遂不旋踵以伪为真以真为伪互相讪笑止可供喷饭昔真定梁公有画字之好竭生平之力收之捐馆後为势家所求索殆尽然虽与以佳者辄谓非是疑其藏匿其子孙深受斯累此可为明监者也

圃翁曰天体至圆故生其中者无一不肖其体悬象之大者莫如日月以至人之耳目手足物之毛羽树之花实土得雨而成丸水得雨而成泡凡天地自然而生皆圆其方者皆人力所为盖稟天之性者无一不具天之体万事做到极精妙处无有不圆者圣人之德古今之至文法帖以至一艺一术必极圆而後登峰造极裕亲王曾畅言其旨适与予论相合偶论及科场文想必到圆处始佳即饮食做到精美处到口也是圆底余尝观四时之旋运寒暑之循环生息之相因无非圆转人之一身与天时相应大约三四十以前是夏至前凡事渐长三四十以後是夏至後凡事渐衰中间无一刻停留中间盛衰关头无一定时候大槩在三四十之间观於须髮可见其衰缓者其壽多其衰急者其壽寡人身不能不衰先从上而下者多壽故古人以早脱顶为壽徵先从下而上者多不壽故须髮如故而脚輒者难治凡人家道亦然盛衰增减决无中立之理如一树之花开到极盛便是摇落之期多方保护顺其自然犹恐其速开况敢以火气催逼之乎京师温室之花能移牡丹各色桃於正月然花不尽其分量一开之後根干辄萎此造化之机不可不察也尝观草木之性亦随天地为圆转梅以深冬为春桃李以春为春榴荷以夏为春菊桂芙蓉以秋为春观其节枝含苞之处浑然天地造化之理故曰复其见天地之心乎

圃翁曰人往往於古人片纸只字珍如拱璧其好之者索价千金观其落笔神彩洵可宝矣然自予观之此特一时笔墨之趣所寄耳若古人终身精神识见尽在其文集中乃其呕心剝肺而出之者如白香山苏长公之诗数千首陆放翁之诗八十五?其人自少至老仕宦之所历游迹之所至悲喜之情怫愉之色以至言貌警欬饮食起居交游酬错无一不寓其中较之偶尔落笔其可宝不且万倍哉予怪世人於古人诗文集不知爱而宝其片纸只字为大惑也予昔在龙眠苦於无客为伴日则步履於空潭碧涧长松茂竹之侧夕则掩关读苏陆诗以二鼓为度烧烛焚香煮茶延两君子於坐与之相对如见其容貌须眉然诗云架头苏陆有遗书特地?来共索居日与两君同卧起人间何客得胜渠良非解嘲语也

圃翁曰予尝言享山林之乐者必具四者而後能长享其乐实有其乐是以古今来不易觀也

四者维何曰道德曰文章曰经济曰福命所谓道德者性情不乖戾不谄刻不褊狭不暴躁不移情於纷华不生嗔於冷暖居家则肃雝简静足以见信於妻孥居乡则厚重谦和足以取重於隣里居身则恬淡寡营足以不愧於衾影无忤於人无羨於世无争於人无憾於已然後天地容其隐逸鬼神许其安享无心意顛倒之病无取舍转徙之烦此非道德而何哉佳山胜水茂林修竹全恃我之性情识见取之不然一见而悦数见而厌心生矣或吟咏古人之篇章或抒写性灵之所见一字一句便可千秋相契无言亦成妙谛古人所谓行到水穷处坐看云起时又云登东臯以舒啸临清流而赋诗断非不解笔墨人所能领略此非文章而何哉夫茅亭草舍皆有经纶菜陇瓜畦具见规画一草一木其布置亦有法度淡泊而可免饥寒徒步而不致委顿良辰美景而匏樽不空岁时伏腊而鸡豚可办分花乞竹不须多费而自有雅人深致疏池结篱不烦华侈而皆能天然入画此非经济而何哉从来爱闲之人类不得闲得闲之人类不爱闲公卿将相时至则为之独是山林清福为造物之所深吝试观宇宙间几人解脱书卷之中亦不多得置身在穷达毁誉之外名利之所不能奔走世味之所不能缚束室有莱妻而无交谪之言田有伏腊而无乞米之苦白香山所谓事了心了此非福命而何哉四者有一不具不足以享山林清福故举世聪明才智之士非无一知半见略知山林趣味而究竟不能身入其中职此之故也

圃翁曰予於归田之後誓不着缎不食人参夫古人至贵犹服三澣之衣缎之为物不可洗不可染而其价六七倍於湖州绉紬与丝紬佳者三四钱一尺比於一疋布之价初时华丽可观一沾灰油便色改而不可澣洗况予性疎忽於衣服不能整齐最不爱华丽之服归田後惟着絨褐山茧文布湖紬期於适体养性冬则羔裘夏则蕉葛一切珍裘细縠悉屏弃之不使外物妨吾坐起也老年奔走应事务日服人参一二钱细思吾乡米价一石不过四钱今日服参价如之或倍之是一人而兼百余人糊口之具忍孰甚焉侈孰甚焉夫药性原以治病不得已而取效於旦夕用是补续血气乃竟以为日用寻常之物可乎哉无论物力不及即及亦不当为予故深以为戒倘得邀恩遂初此二事断然不渝吾言也

圃翁曰古人美王司徒之德曰门无杂宾此最有味大约门下奔走之客有损无益主人以清正高简安静为美於彼何利焉可以啖之以利可以动之以名可以怵之以利害则欣动其主人主人不可动则诱其子弟诱其僮仆外探无稽之言以荧惑其视听内泄机密之语以夸示其交游甚且以伪为真将无作有以徼幸其语之或验则从中而取利焉或居要津之位或处权势之地尤当远之益远也又有挟术技以游者彼皆藉一艺以售其身渐与仕宦相亲密而遂以乘机遭会其本念决不在专售其技也挟术以游者往往如此故此辈之朴讷迂钝者犹当慎其晋接若狡黠便佞好生事端踪迹诡秘者以不识其人不知其姓名为善勿曰我持正彼安能惑我我明察彼不能蔽我恐久之自堕其术中而不能出也

圃翁曰予性不爱观剧在京师一席之费动踰数十金徒有应酬之劳而无酣适之趣不若以其费济困赈急为人我利普也予六旬之期老妻礼佛时忽念诞日例当设梨园宴亲友吾家既不为此胡不将此费制绵衣袴百领以施道路饥寒之人乎次日为余言笑而许之予意欲归里时仿陆梭山居家之法以一岁之费分为十二股一月用一分每日於食用节省月晦之日则总一月之所余别作一封以应贫寒之急能多作好事一两件其乐逾於日享大烹之奉

多矣但在勉力而行之圃翁曰移树之法江南以惊蛰前後半月为宜大约从土掘出之根最畏春风故须用土裹密用草包之不宜见风甚不宜於隔宿所以吴门建业来卖花者行千里经一月而犹活乃用金汁土密护其根不使露风之故近地移植反不活者不知此理之故也其新生细白根系生气所托尤不当损人但知深根固蒂不知亦不宜太深种植书谓加旧迹一指若太深则泥水伤树皮断然不茂矣凡树大约花时移则彼精脉在枝叶易活於桂尤甚花已有蓓蕾移之多开然此最泄气故移树而花盛开者多不活惟叶茂则其树必活矣牡丹移在秋当春宜尽去其花若少爱惜则其气泄树即活亦不茂数年後多自萎树之作花甚不易气泄则本伤古人云再实之木其根必伤人之於文章功名也亦然不可不审也

圃翁曰予少年嗜六安茶中年饮武夷而甘後乃知芥茶之妙此三种可以终老其他不必问矣芥茶如名士武夷如高士六安如野士皆可为岁寒之交六安尤养脾食饱最宜但鄙性好多饮茶终日不离瓯碗为宜节约耳

圃翁曰论语云不知命无以为君子考亭注不知命则见利必趋见害必避而无以为君子予少奉教於姚端恪公服膺斯语每遇疑难踌躇之事辄依据此言稍有把握古人言居易以俟命又言行法以俟命人生祸福荣辱得丧自有一定命数确不可移审此则利可趋而有不必趋之利害宜避而有不能避之害利害之见既除而为君子之道始出此为字甚有力既知利害有一定则落得做好人也权势之人岂必与之相抗以取害到难於相从处亦要内不失己果谦和以谢之宛转以避之彼亦未必决能祸我此亦命数宜然又安知委曲从彼之祸不更烈於此也使我为州县官决不用官银媚上官安知用官银之祸不甚於上官之失權也昔者米脂令萧君掘李贼之祖坟贼破京师後获萧君置军中欲甘心焉挟至山西以二十人守之萧君夜遁後复为州守自着虎吻余生记其事李贼杀人数十万究不能杀一萧君生死有命宁不信然耶予官京师日久每见人之数应为此官而其时本无此一缺有人焉竭力经营干办停当而此人无端值之或反为此人之所不欲且滋诟詈如此者不一而足此亦举世之人共知之而当局则往往迷而不悟其中之求速反迟求得反失彼人为此人而谋此事因彼事而坏顛倒错乱不可究诘人能将耳目闻见之事平心体察亦可消许多妄念也

圃翁曰人生适意之事有三曰贵曰富曰多子孙然是三者善处之则为福不善处之则足为累至为累而求所谓福者不可见矣何则高位者责备之地忌嫉之门怨尤之府利害之关忧患之窟劳苦之藪谤讟之的攻击之場古之智人往往望而却步况有荣则必有辱有得则必有失有进则必有退有亲则必有疎若但计丘山之得而不容铢两之失天下安有此理但己身无大谴过而外来者平淡视之此处贵之道也佛家以货财为五家公共之物一曰国家二曰官吏三曰水火四曰盗贼五曰不肖子孙夫人厚积则必经营布置生息防守其劳不可胜言则必有亲戚之请求贫穷之怨望僮仆之奸骗大而盗贼之刼取小而穿窬之鼠窃经商之亏折行路之失脱田禾之灾伤攘夺之争讼子弟之浪费种种之苦贫者不知惟富厚者兼而有之人能知富之为累则取之当廉而不必厚积以招怨视之当淡而不必深恨以累心思我既有此财货彼贫穷者不取我而取谁不怨我而怨谁平心息忿庶不为外物所累俭於居身而裕於待物薄於取利而谨於盖藏此处富之道也至子孙之累尤多矣少小则有疾病之虑稍长则有功名之虑浮奢不善治家之虑纳交匪类之虑一离膝下则有道路寒暑饥渴之虑



以至由子而孙展转无穷更无底止夫年壽既高子息蕃衍焉能保其无疾病痛楚之事贤愚不齐升沉各异聚散无恒忧乐自别但当教之孝友教之谦让教之立品教之读书教之择友教之养身教之俭用教之作家其成败利钝父母不必过为萦心聚散苦乐父母不必忧念成疾但视已无甚刻薄後人当无倍出之患已无大偏私後人自无攘夺之患已无甚贪婪後人自当无荡尽之患至於天行之数稟赋之愚有才而不遇无因而致疾延良医慎调治延良师谨教训父母之责尽矣父母之心尽矣此处多子孙之道也予每见世人处好境而鬱郁不快动多悔吝忧戚必皆此三者之故由不明斯理是以心徧见隘未食其报先受其苦能静体吾言於扰扰之中存荧荧之亮岂非热火坑中一服清凉散苦海波中一架八宝筏哉

圃翁曰予自四十六七以来讲求安心之法凡喜怒哀乐劳苦恐惧之事只以五官四肢应之中间有方寸之地常时空空洞洞朗朗惺惺决不令之入所以此地常觉寬绰洁淨予制为一城将城门紧闭时加防守惟恐此数者阑入亦有时贼势甚銳城门稍疎彼间或阑入即时觉察便驱之出城外而牢闭城门令此地仍寬绰洁淨十年来渐觉阑入之时少不甚用力驱逐然城外不免纷扰主人居其中尚无浑忘天真之乐倘得归田遂初见山时多见人时少空潭碧落或庶几矣

圃翁曰予之立训更无多言止有四语读书者不贱守田者不饥积德者不倾择交者不败尝将四语律身训子亦不用烦言夥说矣虽至寒苦之人但能读书为文必使人钦敬不敢忽视其人德性亦必温和行事决不顛倒不在功名之得失遇合之迟速也守田之说详於恒产琐言积德之说六经语孟诸史百家无非阐发此义不须赘说择交之说予目击身历最为深切此辈毒人如鸩之入口蛇之螫肤断断不易决无解球之说尤四者之纲领也余言无奇止布帛菽粟可衣可食但在体验亲切耳

文端集卷四十五

# 卷四十六

钦定四库全书

文端集卷四十六

大学士张英撰

笥素堂文集十

杂着

聪训斋语

圃翁曰人生必厚重沉静而後为载福之器王谢子弟席丰履厚田庐仆役无一不具且为人所敬礼无有轻忽之者视寒畯之士终年授读远离家室唇燥吻枯仅博束修数金仰事俯育咸取诸此应试则徒步而往风雨泥淖一步三叹凡此情形皆汝辈所习见仕宦子弟则乘舆驱肥即僮仆亦无徒行者岂非福耶乃与寒士一体怨天尤人争较锱铢得失宁非过耶古人云予之齿者去其角与之翼者两其足天地造物必无两全汝辈既享席丰履厚之福又思事事周全揆之天道岂不诚难惟有敦厚谦谨慎言守礼不可与寒士同一感慨歔歔放言高论怨天尤人庶不为造物鬼神所呵责也况父祖经营多年有田庐别业身则劳於王事不获安享为子孙者生而受其福乃又不思安享而妄想妄行宁不大可惜耶思尽人子之责报父祖之恩致乡里之誉貽後人之泽惟有四事一曰立品二曰读书三曰养身四曰俭用世家子弟原是贵重更得精金美玉之品言思可道行思可法不骄盈不诈伪不刻薄不轻佻则人之钦重较三公而更贵予不及见

祖父赠光禄公恂所府君每闻乡人言其厚德邑人仰之如祥麟威凤方伯公已酉登科邑人荣之赠以联曰张不张威愿秉文文名天下盛有盛德期可藩藩屏王家至今桑梓以为美谈

父亲赠光禄公拙庵府君予逮事三十年生平无疾言遽色居身节俭待人宽厚为介弟未尝以一事一言干谒州县生平未尝呈送一人见乡里煦煦以和所行隐德甚多从不向人索逋欠以故三世皆祀於乡贤请主入庙之日里人莫不欣喜道盛德之报是亦何负於人哉予行年六十有一生平未尝送一人於捕厅令其呵谴之更勿言笞责愿吾子孙终守此戒勿犯也不足则断不可借债有余则断不可放债权子母起家惟至寒之士稍可若富贵人家为之敛怨养奸得罪招尤莫此为甚乡里间荷担负贩及佣工小人切不可取其便宜此种人所争不过数文我辈视之甚轻而彼之含怨甚重每有愚人见省得一文以为得计而不知此种人心忿口碑所损寔大也待下我一等之人言语辞气最为要紧此事甚不费钱然彼人受之同於实惠只在精神照料得来不可惮烦易所谓劳谦是也予深知此理然苦於性情疎懒惮於趋承故我惟思退处山泽不要见人庶少斯过终日櫟櫟耳读书固所以取科名继家声然亦使

人敬重今见贫贱之士果胸中淹博笔下氤氲则自然进退安雅言谈有味即使迂腐不通方亦可以教学授徒为人师表至举业乃朝廷取士之具三年开塲大比专视此为优劣人若举业高华秀美则人不敢轻视每见仕宦显赫之家其老者或退或故而其家索然者其後无读书之人也其家郁然者其後有读书之人也山有猛兽则藜藿为之不采家有子弟则强暴为之改容岂止掇青紫荣宗祔而已哉予尝有言曰读书者不贱不专为塲屋进退而言也父母之爱子第一望其康宁第二冀其成名第三愿其保家语曰父母惟其疾之忧夫子以此荅武伯之问孝至哉斯言安其身以安父母之心孝莫大焉养身之道一在谨嗜慾一在慎饮食一在慎忿怒一在慎寒暑一在慎思索一在慎烦劳有一於此足以致病以貽父母之忧安得不时时谨凜也吾貽子孙不过瘠田数处耳且甚荒芜不治水旱多虞岁入之数仅足以免饥寒畜妻子而已一件儿戏事做不得一件高兴事做不得生平最喜陆梭山过日治家之法以为先得我心诚仿而行之庶几无鬻产荡家之患予有言曰守田者不饥此二语足以长世不在多言凡人少年德性不定每见人厌之曰怪笑之曰嗇诮之曰俭辄面发热不如此最是美名人肯以此诮之亦最是美事不必避讳人生豪侠周密之名至不易副事事应之一事不应遂生嫌怨人人周之一人不周便存形迹若平素俭嗇见谅於人省无穷物力少无穷嫌怨不亦至便乎四者立身行己之道已有嵯?而其关键切要则又在於择友人生二十内外渐远於师保之严未踣於成人之列此时知识大开性情未定父师之训不能入即妻子之言亦不听惟朋友之言甘如醴而芳若兰脱有一淫朋匪友阑入其侧朝夕浸灌鲜有不为其所移者从前四事遂荡然而莫可收拾矣此予幼年时知之最切今亲戚中倘有此等之人则踪迹常令疎远不必亲密若朋友则直以不识其顔面不知其姓名为善比之毒草哑泉更当远避芸圃有诗云於今道上揶揄鬼原是尊前妩媚人盖痛乎其言之矣择友何以知其贤否亦即前四件能行者为良友不能行者为非良友子暑中退休稍有暇晷遂举胸中所欲言者笔之於此语虽无文然三十余年涉履仕途多逢险阻人情物理知之颇熟言之较亲後人勿以予言为迂而远於事情也

楷书如坐如立行书如行草书如奔人之形貌虽不同然未有倾斜跛侧为佳者故作楷书以端庄严肃为尚然须去矜束拘迫之态而有雍容和愉之象斯晋书之所独擅也分行布白取乎匀淨然亦以自然为妙乐毅论如端人雅士黄庭经如碧落仙人东方朔像赞如古贤前哲曹娥碑有孝女婉顺之容洛神赋有淑姿纖丽之态盖各象其文以为体要有骨有肉一行之间自相顾盼如树木之枝叶扶疎而彼此相让如流水之沦漪杂见而先後相承未有偏斜倾侧各不相顾絶无神彩步伍连络映带而可称佳书者细玩兰亭委蛇生动千古如新董文敏书大小疎密於寻行数墨之际最有趣致学者当於此参之

法昭禅师偈云同气连枝各自荣些些言语莫伤情一回相见一回老能得几时为弟兄词意藹然足以启人友于之爱然予尝谓人伦有五而兄弟相处之日最长君臣之遇合朋友之会聚久速固难必也父之生子妻之配夫其早者皆以二十岁为率惟兄弟或一二年或三四年相继而生自竹马游戏以至鲐背鹤髮其相与周旋多者至七八十年之久若恩意浹洽猜间不生其乐岂有涯哉近时有周益公以太傅退休其兄乘成先生以将作监丞退休年皆八十诗酒相娱者终其身章泉赵昌甫兄弟亦俱隐於玉山之下苍顔华髮相从於泉石之间皆年近九十真人间至乐之事亦人间罕有之事也

论语文字如化工肖物简古浑沦而尽事情平易含蕴而不费辞于尚书毛诗之外别为一种大学中庸之文极闳濶精微而包罗万有孟子则雄奇跌宕变幻洋溢秦汉以来无有能此四种文字者特以儒生习读而不察遂不知其章法字法之妙也当细心玩味之

古人读文选而悟养生之理得力於两句曰石蕴玉而山辉水涵珠而川媚此真是至言尝见兰蕙芍药之蒂间必有露珠一点若此一点为蚁虫所食则花萎矣又见笋初出当晓则必有露珠数颗在其末日出则露复敛而归根夕则复上田间有诗云夕看露颗上梢行是也若侵晓入园笋上无露珠则不成竹遂取而食之稻上亦有露夕现而朝敛人之元气全在於此故文选二语不可不时时体察得诀固不在多也

世人只因不知命不安命生出许多劳扰圣贤明明说与曰君子居易以俟命又曰君子行法以俟命又曰修身以俟之不知命无以为君子因知之真而後俟之安也予历世故颇多认此一字颇确曾与韩慕庐宿斋天坛深夜剧谈慕庐谈当年乡会考时乡试则有得售之想場中颇着意至会试殿试则全无心而得会状会试場大风吹卷欲飞号中人皆取石坚押韩独无意祝曰若当中则自不吹去亦竟无恙故其会试殿试文皆游行自在无斧凿予谓慕庐足下两掇巍科当是何如勇猛以此言告人人决不信余独信之何以故予自谕德後即无意仕进不止无竞进之心且时时求退不已乃由讲读学士跻学士登亚卿正卿皆华膴清贵之官自傍人观之不知是何如勇猛精进以予自审则知慕庐之非妄矣慕庐亦可以已事推之而知予之非诳也愿与世人共知之

予生平嗜卉木遂成奇癖亦自觉可哂细思天下歌舞声伎古翫书画禽鸟博奕之属皆多费而耗物力惹气而多後患不可以训子孙惟山水花木差可自娱而非人之所争草木日有生意而妙于无知损许多爱憎烦恼京师难於树植艰於旷土书阁中置盆花数种滋培收护颇费心力然亦可少供耳目之翫琴荐书幌牀头十笏之地无非落花填塞亦一佳话也

古人佩玉朝夕不离义取温润坚栗君子无故不撤琴瑟义取和平温厚故质性爽直者恐近高亢益当深体此意以自箴砭不可任其一往之性也

人生以择友为第一事自就塾以後有室有家渐远父母之教初离师保之严此时乍得友朋投契缔交其言甘如兰芷甚至父母兄弟妻子之言皆不聽受惟朋友之言是信一有匪人侧於间德性未定识见未纯鲜未有不为其移者余见此屡矣至仕宦之子弟尤甚一入其彀中迷而不悟脱有尊长诫谕反生嫌隙益滋乖张故余家训有云保家莫如择友盖痛心疾首其言之也汝辈但於至戚中观其德性谨厚好读书者交友两三人足矣况内有兄弟互相师友亦不至岑寂且势利言之汝则温饱来交者岂能皆有文章道德之切劘平居则有酒食之费应酬之扰一遇婚丧有无则有资给称贷之事甚至有争讼外侮则又有关说救援之事平昔既与之契密临事却之必生怨毒反唇故余以为宜慎之於始也况且戏游征逐耗精神而荒正业广言谈而滋是非种种弊端不可纪极故特为痛切发挥之昔人有戒饭不嚼便咽路不看便走话不想便说事不思便做洵为格言予益之曰友不择便交气不忍便动财不审便取衣不慎便脱

学字当专一择古人佳帖或时人墨蹟与已笔路相近者专心学之若朝更夕改见异而迁鲜有得成者楷书如端坐须庄严寬裕而神彩自然掩映若体格不匀淨而遽讲流动失其本矣汝小字可学乐毅论前见所写乐志论大有进步今当一心临仿之每日明窗淨几笔精墨良以白奏本纸临四五百字亦不须太多但工夫不可间断纸画乌丝格古人最重分行布白故以整齐匀淨为要学字忌飞动草率大小不匀而妄言奇古磊落终无进步矣行书亦宜专心一家赵松雪佩玉垂绅丰神清贵而其原本则出於圣教序兰亭犹见晋人风度不可訾议之也汝作聯字亦颇有丰秀之致今专学松雪亦可望其有进但不可任意变迁耳

龙眠芙蓉谿吾朝夕梦寐所在也垂云泝天然石壁上倚青山下临流水当为吾相度可亭之地期於对石枕流双谿草堂前引南北二涧为两池中一闸相通一种莲一种鱼制扁舟容五六人朱栏翠?兰浆桂櫂从芙蓉谿亭登舟至?舟亭登岸襟带吾庐汝归当谋疏凿濶处十二丈窄处二三丈但可以行舟汝兄弟侄轮日督工於九月杪从事渠成以报吾堂轩基址预以绳定之以俟异日临河有大石土人名为獾洞此地相度亭子下临澄潭四围岭岫既旷然轩谿亦窈然幽深其旁当种梅柳以映带之亦此时事也向来梅杏桃梨之属种植者亦不少矣使皆茂达尽可自娱此时浇溉修治扶植去草为急仆人纸上之树日增园中之树日减汝当为吾稽察之树不活与不种同山中须三五日静坐经理晨入暮归不如其已也可与兄弟侄言之

辛巳春分日予携大郎二郎六郎出西直门过高梁桥沿溪水至法华寺饭于僧舍因至万壽寺时甫移华严钟於後阁尚未悬架遂过天禧宫看白松盖余最心赏古松枝干如凝雪清响如飞涛班剥离奇扶疎诘曲枝枝入画叶叶有声如对高人逸士不敢?玩京师寺观此种为多而时代久远则无过天禧宫者共二十余株皆异态殊形可谓巨观矣是行也春寒初解野色苍茫然已有融润之气得小诗曰緑谿来古寺石堰旧河梁冰泮波澄緑风轻柳麴黄苔痕春已半松影日初长篮笋携诸子僧寮野?香

时文以多作为主则工拙自知才思自出谿迳自熟气体自纯读文不必多择其精纯条畅有气局词华者多则百篇少则六十篇神明与之浑化始为有益若贪多务博过眼辄忘及至作时则彼此不相涉落笔仍是故吾所以思常窒而不灵词常窘而不裕意常枯而不润记诵劳神中无所得则不熟不化之病也学者犯此弊最多故能得力於简则极是要诀古人言简链以为揣摩最是立言之妙勿忽而不察也

治家之道谨肃为要易经家人卦义理极完备其曰家人嗃嗃悔厉吉妇子嘻嘻终吝嗃嗃近於烦琐然虽厉而终吉嘻嘻流於纵轶则始寬而终吝余欲於居室自书一额曰惟肃乃雍常以自警亦愿吾子孙共守也人之居家立身最不可好奇一部中庸本是极平淡却是极神奇人能於伦常无缺起居动作治家节用待人接物事事合於矩度无有乖张便是圣贤路上人岂不是至奇若举动怪异言语诡激明明坦易道理却自寻奇觅怪守偏文过以为不坠恒境是穷奇禱机之流乌足以表异哉布帛菽粟千古至味朝夕不能离何独至於立身制行而反之也

与人相交一言一事皆须有益於人便是善人余偶以忌辰着朝服出门巷口见一人遥呼曰今日是忌辰余急易之虽不识其人而心感之如此等事在彼无丝毫之损而于人为有益每谓同一禽鸟也闻鸾凤之名则喜闻鸛鷖之声则恶以鸾凤能为人福而鸛鷖能为人祸也同一草木也毒草则远避之参苓则共宝之以毒草能鸩人而参苓能益人也人能处心积虑一言一动皆思益人而痛戒损人则人望之若鸾凤宝之如参苓必为天地之所佑鬼神之所服而享有多福矣此理之最易见者也

凡读书二十岁以前所读之书与二十岁以後所读之书迥异少年知识未开天真纯固所读者虽久不温习偶尔提起尚可数行成诵若壮年所读经月则忘必不能持久故六经秦汉之文词语古奥必须幼年读长壮後虽倍蓰其功终属影响自八岁至二十岁中间岁月无多安可荒弃或读不急之书此时时文固不可不读亦须择典雅醇正理纯词裕可历二三十年无弊者读之若朝华夕落浅陋无识诡僻失体取悦一时者安可以珠玉难换之岁月而读此无益之文何如诵得左国一两篇及东西汉典贵华腴之文数篇为终身受用之宝乎且更可异者幼龄入学之时其父师必令其读诗书易左传礼记两汉八家文及十八九作制义应科举时便束之高阁全不温习此何异衣中之珠不知探取而向涂人乞浆乎且幼年之所以读经书本为壮年扩充才智驱驾古人使不寒俭如畜钱待用者然乃不知寻味其义蕴而弁髦弃之岂不大相刺谬乎我愿汝曹将平昔已读经书视之如拱璧一月之内必加温习古人之书安可尽读但我所已读者决不可轻弃得尺则尺得寸则寸毋贪多毋贪名但读得一篇必求可以背诵然後思通其义蕴而运用之於手腕之下如此则才气自然发越若曾读此书而全不能举其词谓之画饼充饥能举其词而不能运用谓之食物不化二者其去枵腹无异汝辈於此极宜猛省

凡物之殊异者必有光华发越於外况文章为荣世之业士子进身之具乎非有光彩安能动人闺中之文得以数言槩之曰理明词畅气足机圆要当知棘闱之文与窗稿房行书不同之处且南闱之文又与他省不同处此则可以意会难以言传惟平心下气细看南闱墨卷将自得之即最低下墨卷彼亦自有得手亦不可忽此事最渺茫古称射蠹者视蠹如车轮然後一发而贯今能分别气味截然不同当庶几矣汝曹兄弟叔侄自来岁正月为始每三六九日一会作文一篇一月可得九篇不疎不数但不可间断不可草草塞责一题入手先讲求书理极透澈然後布格遣词须语语有着落勿作影响语勿作艰澁语勿作累赘语勿作雷同语凡文中鲜亮出色之句谓之调调有高卑疎密相间繁简得宜处谓之格此等处最宜理会深悯人读时文累千累百而不知理会於身心毫无裨益夫能理会则数十篇百篇已足焉用如此之多不能理会则数千篇与不读一字等徒使精神瞶乱临文捉笔依旧茫然不过胸中旧套应副安有名理精论佳词妙句奔滙於笔端乎所谓理会者读一篇则先看其一篇之格再味其一股之格出落之次第讲题之发挥前後?义之浅深词调之华美诵之极其熟味之极其精有与此等相类之题有不相类之题如何推广扩充如此读一篇有一篇之益又何必多又怎能多乎每见汝曹读时文成帙问之不能举其词叩之不能言其义粗者不能况其精者乎自诳乎诳人乎此絶不可解者汝曹试静思之亦不可解也以後当力除此等之习读文必期有用不然宁可 unread 古人有言读生文不如翫熟文必以我之精神包乎此一篇之外以我之心思入乎此一篇之中噫嘻此岂易言哉汝曹能如此用功则笔下自然充裕无补苴寒澁支?冗

泛草率之态汝每月寄所作九首来京我看一会两会则汝曹之用心不用心务外不务外了然矣作文决不可使人代写此最是大家子弟陋习写文要工致不可错落涂抹所关於色泽不小也汝曹不能面奉教言每日展此一次当有心会幼年当专攻举业以为立身根本诗且不必作或可偶一为之至诗余则断不可作余生平未尝为此亦不多看苏辛尚有豪气余则靡靡焉可近也

余久历世涂日在纷扰荣辱劳苦忧患之中静念解脱之法成此八章自谓於人情物理消息盈虚略得其大意醉醒卧起作息往来不过如此而已顾以年增衰老无由自适二十年来小斋仅可容膝寒则温室拥杂花暑则垂帘对高槐所自适於天壤间者止此耳求所谓烟霞林壑之趣则仅托於梦想形诸篇咏皆非实境也辛巳春分前一日积雪初融霁色回?为三郎廷璐书此远寄江乡亦可知翁鍼砭气质之偏流覽造物之理有此一知半见当不至于汨没本来耳

古称仕宦之家如再实之木其根必伤旨哉斯言可为深鉴世家子弟其修行立名之难较寒士百倍何以故人之当面待之者万不能如寒士之古道小有失检谁肯面斥其非微有骄盈谁肯深规其过幼而骄惯为亲戚之所优容长而习成为朋友之所谅解至於利交而谄相诱以为非势交而谀相倚而作慝者又无论矣人之背後称之者万不能如寒士之直道或偶誉其才品而虑人笑其逢迎或心赏其文章而疑人鄙其势利甚至吹毛索瘢指摘其过失而以为名高批枝伤根讪笑其前人而以为痛快至於求利不得而嫌隙易生於有无依势不能而怨毒相形於荣悴者又无论矣故富贵子弟人之当面待之也恒恕而背後责之也恒深如此则何由知其过失而显其名誉乎故世家子弟其谨饬如寒士其俭素如寒士其谦冲小心如寒士其读书勤苦如寒士其乐闻规劝如寒士如此则自视亦已足矣而不知人之称之者尚不能如寒士必也谨饬倍於寒士俭素倍於寒士谦冲小心倍於寒士读书勤苦倍於寒士乐闻规劝倍於寒士然後人之视之也仅得与寒士等今人稍稍能谨饬俭素谦下勤苦人不见称则曰世道不古世家子弟难做此未深明於人情物理之故者也我愿汝曹常以席丰履盛为可危可虑难处难全之地勿以为可喜可幸易安易逸之地人有非之责之者遇之不以礼者则平心和气思所处之时势彼之施於我者应该如此原非过当即我所行十分全是无一毫非理彼尚在可恕况我岂能全是乎古人有言终身让路不失尺寸老氏以让为宝左氏曰让德之本也处里閭之间信世俗之言不过曰渐不可长不过曰後将更甚是大不然人孰无天理良心是非公道揆之天道有满损虚益之义揆之鬼神有亏盈福谦之理自古祇闻忍与让足以消无穷之灾悔未闻忍与让翻以釀後来之祸患也欲行忍让之道先须从小事做起余曾署刑部事五十日见天下大讼大狱多从极小事起君子敬小慎微凡事只从小处了余行年五十余生平未尝多受小人之侮只有一善策能转湾早耳每思天下事受得小气则不至於受大气吃得小亏则不至於吃大亏此生平得力之处凡事最不可想占便宜子曰放於利而行多怨便宜者天下人之所共争也我一人据之则怨萃於我矣我失便宜则衆怨消矣故终身失便宜乃终身得便宜也汝曹席前人之资不忧饥寒居有室庐使有臧获养有田畴读书有精舍良不易得其有游荡非僻结交淫朋匪友以致倾家败业路人指为笑谈亲戚为之浩叹者汝曹见之闻之不待余言也其有立身醇谨老成俭朴择人而友闭户读书名日美而业日成乡里指为令器父兄期其远大者汝曹见之闻之不待余言也二者何去何从何得



何失何芳如芝兰何臭如腐草何祥如麟凤何妖如鸩鸩又岂俟余言哉汝辈今皆年富力强饱食温衣血气未定岂能无所嗜好古人云凡人欲饮酒博奕一切嬉戏之事必皆觅伴侣为之独读快意书对佳山水可以独自怡悦凡声色货利一切嗜慾之事好之有乐则必有苦惟读书与对佳山水止有乐而无苦今架有藏书离城数里有佳山水汝曹与其狎无益之友听无益之谈赴无益之应酬曷若珍重难得之岁月纵读难得之诗书快对难得之山水乎我视汝曹所作诗文皆有才情有思致有性情非梦梦全无所得於中者故以此谆谆告之欲令汝曹安分省事则心神宁谧而无烦扰之害寡交择友则应酬简而精神有余不闻非僻之言不致陷於不义一味谦和谨饬则人情服而名誉日起制艺者秀才立身之本根本固则人不敢轻自宜专力攻之余力及诗字亦可怡情良时佳辰与兄弟姊夫辈一料理山庄抚问松竹以成余志是皆於汝曹有益无损有乐无苦之事其味聪听之义

座右箴

立品 读书 养身 择友

右四纲

戒嬉戏 慎威仪 谨言语 温经书 精举业 学楷字 谨起居 慎寒暑 节用度 谢酬应 省宴集 寡交游

右十二目

子弟自十七八以至廿三四实为学业成废之关盖自初入学至十五六父师以童子视之稍知训子者断不忍听其废业惟自十七八以後年渐长气渐骄渐有朋友渐有室家嗜慾渐开人事渐广父母见其长成师傅视为侪辈德性未坚转移最易学业未就蒙昧非难幼年所习经书此时皆束之高阁酬应交游侈然大雅博奕高会自诩名流转盼廿五六岁儿女累多生计迫蹙蹉跎潦倒学植荒落予见人家子弟半涂而废者多在此五六年中弃幼学之功贻终身之累盖覆辙相踵也汝正当此时离父母之侧前言诸弊事事可虑为龙为蛇为虎为鼠分於一念介在两岐可不慎哉可不畏哉读书须明窗淨几案头不可多置书读文作文皆须凝神静气目光炯然出文於题之上最忌坠入云雾中迷失出路多读文而不熟如将不练之兵临时全不得用徒疲精劳神与操空拳者无异作文以握管之人为大将以精熟墨卷百篇为练兵以杂读时艺为散卒以题为坚垒若神明不爽朗是大将先坠云雾中安能制胜人人各有一种英华光气但须磨链始出譬如一草一卉苟深培厚壅尽其分量其花亦有可观而况於人乎况於俊特之人乎天下有形之物用则易匮惟人之才思气力不用则日减用则日增但做出自己声光如树将发花时神壮气溢觉与平时不同则自然之机候也读书人独宿是第一义试自己省察館中独宿时漏下二鼓灭烛就枕待日出早起梦境清明神酣气畅以之读书则有益以之作文必不潦草枯澁真所谓一日胜两日也

易经一书言谦道最为详备天道亏盈而益谦地道变盈而流谦鬼神祸盈而福谦人道恶盈



而好谦又曰日中则昃月满则亏天地不能常盈而况於人乎况於鬼神乎於此理不啻反覆再三极譬罕喻书曰满招损谦受益古昔贤圣殆无异词尧舜大圣而史称之曰允恭克让孔子甚圣德及门称之曰恭俭让况乎中人之才能越斯义古云终身让路不失尺寸言让之有益无损也世俗瞽谈妄谓让人则人欺之甚至有尊长教其卑幼无多让此极为乱道以世俗论富贵家子弟理不当为人所侮稍有拂意便自谓我何如人而彼敢如是以加我从傍人亦不知义理用一二言挑逗之遂尔气填胸臆奋不顾身全不思富贵者衆射之的也羣妬之媒也谚曰一家温饱千家怨忿惟当抚躬自返我所得於天者已多彼同生天壤或系亲戚或同里閭而失意如此我不让彼而彼顾肯让我乎尝持此心深明此理自然心平气和即有拂意之事逆耳之言如浮云行空与吾无涉姚端恪公有言此乃成就我福德相愈加恭谨以逊谢之则横逆之来盖亦少矣愿以此为热火世界一帖清凉散也

谭子化书训俭字最详其言曰天子知俭则天下足一人知俭则一家足且俭非止节啬财用而已也俭於嗜慾则德日修体日固俭於饮食则脾胃寛俭於衣服则肢体适俭於言语则元气藏而怨尤寡俭於思虑则心神宁俭於交游则匪类远俭於酬酢则岁月寛而本业修俭於书札则後患寡俭於干请则品望尊俭於僮仆则防闲省俭於嬉游则学业进其中义蕴甚广大约不外於葆啬之道东坡千古才人以百五十钱为一块每日只用画杈挑取一块尽此钱为度决不用明日之钱汝辈中人可无限制陆梭山训居家之法最妙以一岁所入除完官粮外分为三分存一分以为水旱及意外之费其余二分析为十二分每月用一分但许存余不许过界能从每日饮食杂用加意节省使一月之用常有余别置一处不入经费留以为亲戚友朋小小周济缓急之用亦远怨积德之道可恃以长久者也居家治生之理恒产琐言备之矣虽不敢谓圣人复起不易吾言其於谋生不啻左券总之饥寒由於鬻产鬻产由於债负债负由於不经相因之理一定不易予视之洞若观火仕宦之日虽极清苦毕竟略有交际子弟习见习闻由之不察若以此作田舍度日之计则立见其仆蹶不可不深长思者也人生俭啬之名可受而不必避世俗每以为耻不知此名一噪则人絶覬觎之想偶有所用人即德之所谓以虚名而受实益何利如之

人生髫髻不离父母入塾则有严师傅督课颇觉拘束逮十六七岁时父母渐视为成人师傅亦渐不严憚此时知识初开嬉游渐习则必视朋友为性命虽父母师保之训与妻孥之言皆可不听而朋友之言则投若胶膝契若芳兰所与正则随之而正所与邪则随之而邪此必然之理身验之事也余鏤一图章以示子弟曰保家莫如择友盖有所叹息痛恨怨艾於其间也古人重朋友而列之五伦谓其志同道合有善相勉有过相规有患难相救今之朋友止可谓相识耳往来耳同官同事耳三党姻戚耳朋友云乎哉汝等莫若就亲戚兄弟中择其谨厚老成可以相砥砺者多则二人少则一人断无目前良友遂可得十数人之理平时既简於应酬有事可以请教若不如己之人既易於临深为高又日闻鄙猥之言污贱之行浅劣之学不知义理不习诗书久久与之相化不能却而远矣此论语所以首诫之也人生第一件事莫如安分分者我所得於天多寡之数也古人以得天少者谓之数奇谓之不偶可以识其义矣董子曰与之齿者去其角附之翼者两其足嗇於此则丰於彼理有乘除事无兼美予閱历颇深每从旁冷观未有能越此范围者功名非难非易只在争命中之有无尝譬之温室养牡丹必花头中原结蕊火焙则正月早开然虽开而元气索然花既不满足根亦旋萎矣若本来不结花

即火焙无益既有花矣何如培以沃壤灌以甘泉待其时至敷华根本既不亏而花亦肥大经久此余所深洞於天时物理而非矫为迂濶之谈也曩时姚端恪公每为余言当细玩不知命无以为君子章朱注最透言不知命则见利必趋见害必避而无以为君子矣为字甚有力知命是一事为君子是一事既知命不能违则尽有不必修之利尽有不必修之害而为忠为孝为廉为让绰有余地矣小人固不当取怨於他至於大节目亦不可诡随得失荣辱不必太认真是亦知命之大端也

文端集卷四十六